



**IO. AUG.
ERNESTI
OPUSCULORUM
ORATORIORUM
NOVUM...**

Johann August Ernesti





2



IO. AVG. ERNESTI
OPVSCVLORVM
ORATORIORVM

NOVVM VOLVMEN



ACCESSIT
ELOGIVM BEATI VIRI PVBLICE SCRIPTVM

LIPSIAE
SVMTIBVS CASPARI FRITSCH
MDCCXCI

HEALTH DATA
DIVISION IV C 4720

1951

1951

1951

1951

1951

IO. CHRISTIAN. THEOPH. ERNESTI
LECTORIBVS ERVDITIS

S. D.

Non adeo mihi tempora nostra displicent, neque adeo sum Vestrae gravitatis et virtutis immemor, ut existimare possim quenquam Vestrum, vel omnino quenquam alium fore, qui me operae pretium hoc libello edendo fecisse neget. Igitur nec edendi causas enumero, nec consilium excuso, nec auctorem commendo, quemadmodum facere solent, qui, dum praefantur, vel sibi paulisper metuunt, vel suspectas auctoris virtutes habent. Hoc vnum vereor, ne tarditatem edendi meam nonnulli vituperent. His primum respondeo, tarditatis causas eas fuisse, quas recensere et longum sit, et vero etiam quodammodo invidiosum. Deinde, quod utile est et bonum, quamvis sero venit, tamen, cum iam adest, praesentia sua et veluti maturitate, desiderii acerbiter consolatur.

De iis, quae hoc volumine continentur, singulatim dicere, non arbitror opus esse. Quicquid extabat elogiorum, quod quidem ab editione Opusculorum Oratoriorum Batava abesset, studiose collegi, et his typis exscribendum curavi. Adieci vnam orationem, rariorem inprimis, et paucis notam, quod nec publice, nec suo nomine beatus vir scripserat. Additum autem in fine Elogium Ernestianum laetabuntur omnes, qui, cum beati viri ingenium legendo perspexerint cum admiratione, eius totam imaginem ab artificis manu expressam intueri volent.

His igitur, quaeso, Lectores, ita utamini, ut optimi et sapientissimi viri memoriam recolatis. Mihi vero, praeter summam oblectationem, quam curandi libelli studium attulit, non poterit ullum iucundius operae praemium contingere, quam si Vobis edendi consilium probari intellexero. Valete. Scripsi Lipsiae a. d. XVIII. Aprilis.

INDEX

INDEX

E L O G I O R V M

<u>I</u>	
<u>Ernesti Aug. de Apfelstade</u>	pag. I
<u>II</u>	
<u>Hieronimi Georgii Gloekneri</u>	II
<u>III</u>	
<u>Gotthelf Augusti Grafii</u>	21
<u>IV</u>	
<u>Friderici Lebrecht Stolzii</u>	31
<u>V</u>	
<u>Aug. Friderici Mulleri</u>	39
<u>VI</u>	
<u>Christophori Wollii</u>	52
<u>VII</u>	
<u>Iacobi Christiani Seileri</u>	64
<u>VIII</u>	
<u>Ferdinandi Aug. Hammelii</u>	74
<u>IX</u>	
<u>Iob. Friderici Krumbharii</u>	86
<u>X</u>	
<u>Sophiae Reginae Ludwigiae</u>	96
<u>XI</u>	
<u>Io. Christophori Gotschedii</u>	105
<u>* 3</u>	XII

	XII	
<i>Friderici Augusti Iunii</i>		pag. 123
	XIII	
<i>Christian. Furchtegott Gelleri</i>		134
	XIV	
<i>Gottfridi Heinsii</i>		153
	XV	
<i>Rudolphi Aug. Schubarti</i>		171
	XVI	
<i>Aug. Florentis Rivini</i>		182
	XVII	
<i>Casparis Richteri</i>		191
	XVIII	
<i>Caroli Christiani Deylingii</i>		200
	XIX	
<i>Gottfridi Winckleri</i>		206
	XX	
<i>Io. Thomae Richteri</i>		213
	XXI	
<i>Iacobi Henrici Bornii</i>		219
	Accessit	
	I	
<i>Oratio panegyrica</i>		227
	II	
<i>Elogium ab Aug. Guil. Ernestio publice scriptum</i>		253

IO. AVG. ERNESTI
M E M O R I A E
ET
E L O G I A

PVBLICE PRIVATIMQVE SCRIPTA

MEMORIA *)

ERNESTI AVGVSTI DE APFELSTADT

PRINCIPIS SCHWARZBURGICI E SONDRERSHVSANA
DOMO A CONSILIIS SANCTIORIBVS CANCELLA-
RII SENATVS ECCLESIASTICI PRAESIDIS ET
AERARII PRINCIPALIS PRAEFECTI.

Si, quanta pietate adversus Socerum optimum movetur animus, tanta facultas data esset praedicandarum virtutum, quarum per multos annos spectator et admirator fui, et vel sic in adspectum proferendae pietatis: profecto nullius nec virtus integrius atque vberius laudata, nec pietas luculentius demonstrata reperiretur. Sed ut nemo facile aut plures gravioresque pietatis causas, aut maiorem laudandi vel a virtutibus alienis materiam, vel a pietate sua voluntatem habuit: ita vix quemquam fuisse existimem, cuius minus solum in ea re esset studium, magisque omnibus vinculis impeditum ac paene constrictum teneretur. Nam si vel maxime libera pietatis voluntas esset, nec ei se res vlla opponeret, propter quam se revocaret atque reprimeret ipsa: tamen hominem, qui res magis quam verba exercere consuevit, et factis magis quam oratione officium pietatemque proferre ac probare, ipsius Soceri imitandi disciplina didicit, de-

*) Haec Memoria scripta est nomine D. Henr. Christ. Boernerii, Princ. Sondersh. Consilarii.

deficeret, opinor, oratio, quae vel rerum laudandarum vel pietatis magnitudinem aequaret. Sed hoc se vinculo liberaret fortasse pietas ipsa. Etenim pietas vera et magna sua sponte diserta est, nec mutum quemquam esse atque infantem finit. Enim vero illa ipsa vis pietatis frangitur atque debilitatur memoria et cogitatione voluntatis eius, quam Socer vivus cum saepe in sermonibus ostendisset, ad extremum etiam in testamenti tabulis declaravit. Nam qui oculos soleret pascere alienis virtutibus, vel spectando vel legendo cognoscendis, aequifinisque auribus alienas laudes audiret, quas et ipse libenter praedicaret: idem adeo nec legendis nec audientis laudibus suis delectabatur, ut etiam offenderetur. Nemo eum de se in eam partem loqui audivit, ut de virtutibus suis admonere homines velle videretur: facta verbis ad laudem disertiora existimabat: quibus agendo virtus probari non posset, iis frustra verba adhiberi. Quicquid per fortunae secundae tempora de laudibus suis scriptum ab amicis clientibusve acceperat, id omne ille curiose occultabat, nec his praeconibus virtutum suarum dimittendis laudes suas propagari ad aliorum scientiam volebat. Testamento denique cavit, ne mortis suae cohonestandae causa quicquam fieret, in quo aut aliqua vanitatis species appareret, aut laudum suarum ostentatio quaesita videretur. Quomodo ergo, quod vivo Viro non facerem, qui nunquam aliquid adversus voluntatem eius fecisse me et scio, et gaudeo: neque enim probaret, aut permetteret: id facere sustinebo mortuo: cum dolor et iactura eorum, quibus cari fuimus, etiam curiosiores in conservanda mortuorum voluntate soleat reddere? Ita pietas sibi obstat ipsa. Sed vincat tamen in eam partem, quae est ad communem existimationem honestior, et ad animi honesti placationem tranquillior. Quomodo enim cuiquam satis gratus adversus tot Viri, non mihi magis, quam aliis nota beneficia videri possim, si hoc tempus gratiae pietatis tacitum praeterire sinam?

Nihil

Nihil autem est, meo quidem sensu, magis inquietum, quam animus, reprimens identidem et cohibens pietatis magnae, et in adspectum hominum prodire gestientis, sensum: qua emissâ etiam onere quodam sibi levatus videtur. Sed ita vincat pietas, ut memor sit modestiae Viri, quae nec ipsa ad laudem referebat bene facta, nec ab aliis referri volebat: praesertim cum etiam laus domestica minus fidei habitura videatur. Itaque nihil aliud faciam, quam ut imaginem vitae, ingenii, animique ut-cunque adumbrem, laudes iis praedicandas relinquam, qui earum testes ac spectatores fuere: fuere autem et tam illustres et tam multi, ut laus Viri nec teste nec praedicatore domestico indigere videatur.

Patriam habuit Erfurtum, in qua vrbe avus Io. Christophorus, Scholae ad D. Iohannis aedem cum laude praefuit: Pater autem, Zacharias Bernardus, primo caussae dextre agendis, deinde litteris Fisci Electoralis, Secretarii nomine, cum fide tractandis, claruit. Erat Pater tum rerum ceterarum, quas ageret, curiosus, tum pietatis in Deum integrae et efficacis amantissimus, eiusque sensum amoremque ante omnia inspirare tenero filii animo, dictis, factis, disciplina, exemplis cupiebat. Itaque primum Sacris Christi initiando testes sponsoresque dedit Io. Ernestum Tenzelium, Consiliarium Moguntinae in Vrbe Erfurtenfi Curiae, Icti non religiosi et sancti minus quam eruditi insigne exemplum, et Augustum Hermannum Frankium, qui tum ibi in aede D. Ioannis sacra faciebat, post doctrina, pietate, et prudentia illustravit non modo Halas Saxonicas, sed etiam rem Christianam univversam egregie adiuvit. Ita filium, siue Theologiae siue Iuris studium sequeretur, habiturum sciebat, cuius non magis doctrinam aemularetur, quam sanctitatem imitaretur. Deinde non modo aliis eum Christianae doctrinae et litterarum elementis erudiendum dedit, quod faciunt vulgo, sed ipse etiam ad veram pietatem integre colendam adduxit. Narrabat saepe ac libenter Vir beatus de

disciplina paterna, cuius nullam partem magis laudabat, grataque memoria prosequabatur, quam institutum precum faciendarum, librorumque sacrorum patre coram legendorum per horas a scholasticis exercitationibus vacuas, quas alii aequales ludendo perderent: quo se non modo integrum servatum credebat ab corruptelis, quae ab contagione improborum et levitate aequalium venire solerent, sed etiam ad Deum integro et vero animo colendum adductum gaudebat. Hac tam pia et salubri disciplina cum ad sextum decimum annum usus esset, repentina ex acuta febris morte patrem amisit. Quam iacturam, cum per se gravissima esset, aggravavit inopinatum et grave rei familiaris universae periculum. Et enim Fiscus Electoralis repetebat rationes nondum relatas pecuniarum, quibus cogendis pater praefuerat, cum pecunia ipsa, quae nusquam reperiebatur. Ea erat summa grandis, atque haud paullo maior, quam universa pecunia paterna. In his angustiis, cum dies prope adesset, qua die bona parentis in fiscum redigerentur, narrabat, sibi, sollicitudine et aegritudine fesso, per somnum oblatam esse speciem patris, deducentis se in Conclave Fisci, et post fellam Boineburgii (is tum Electorali vice Erfurtinam rem administrabat) demonstrantis arculam, in qua rationes cum pecunia reposuisset. Expergefactus repente ab tam perspicuo viso, etsi laetior res erat, quam ut capere eam animus ac credere posset, tamen, urgente periculo, in quo etiam incerta et inania remedia tentare nemo dubitat, inducit in animum adire Fiscum, periculum facturum, utrum inani specie elusus animus, an veritas sibi demonstrata per somnum esset. Ingressus conclave, quod nunquam ante viderat, percellitur statim specie conclavis ipsa, videns omnia simillima iis, quae dormiens viderat. Cum omnes admirarentur, quid sibi juvenis vellet: tum vero ille recta pergit ad locum in somnis sibi demonstratum, reperit cistam, et in ea ecce pecuniam cum rationibus omnem. Omnibus, qui aderant,

erant, admiratione rei defixis, ipse laetus alacerque festinat domum, ut matrem quam primum rei tam laetae nuncio impertiat, effunditurque cum ipsa in laudes divinae benignitatis, cuius tam insigne documentum sibi contigisset. Atque hoc illi veluti pignus fuit providentiae divinae, quam per omnem vitam mirifice benignam habuit, et vero etiam incitamentum pietatis in Deum augendae acerrimum, cum nec oblivio vlla rei illius memoriam ex animo delere posset, nec memoria eius sine sensu laeto et grato adversus Deum tangeret animum.

Septimum decimum annum agebat, cum iuri dicundo praeficeretur apud Cohortem, quae arci Petrinae prope Erfurtum praesidet. Ea erat opinio ingenii atque doctrinae, ut, qua aetate alii ad ius discendum admitti solent, ea ipse ad ius dicendum vocaretur. Neque enim gratiae rem dederant, sed iudicio fecerant, qui ei hoc munus mandarant. In eo cum aliquot annos ita versatus esset, ut dexteritatem fidemque omnibus probaret, vocatur ad Praefecturam iure dicundo in Denstetina illustr. Lynkerorum prope Vinariam Dynastia. Qua suscepta, non modo hoc egit, ut fide Patronis, aequitate omnibus satisfaceret, sed ut etiam ius omne, Saxonicum Inprimis, accuratius cognosceret legendo, cogitando, et agendo, cum tempus omne, quod negotiis necessariis superesset, huic rei condonaret. Cuius studii tantum fructum cepit, ut ex ea Praefectura longe longaque, quam venisset, doctior discederet. Itaque Denstetum, per iocum, Academiam suam appellabat, nulliusque prope rei memoriam libentius, quam Densteti, et temporis ibi in studiis doctrinae exacti, recolebat. Nempe tum demum vere discimus, et accurate discimus, cum res agenda sunt, cum rerum, quas nobis percepisse videmur, usus venit, qui solus ut leges ipsas, ita legum scientiam vel corrigit, vel probat.

Sed cum tres annos ita exegisset, redit in patriam, loco oblato inter eos, quibus causas agere ius esset in

dicasteriis principalibus, revocantibusque studiis et favore omnium, qui non modo doctrinam, et dexteritatem eius spectassent, sed etiam qui aequitatem et sanctitatem nossent: capitque Academicos Doctoris honores, scripta ac defensa erudita disputatione *de pacto circa haereditatem tertii, ignorantis, certi, bonis moribus non refragante, et tam iure naturae, quam moribus Germanorum valido*. Is annus erat eius, quod nunc agitur, seculi duodevicesimus, dies XI. Februarii.

Tum vero et documentis idoneis, et Ordinis gravissimi, multoque magis Principis iudicio constituta auctoritate scientiae, certatim vel opem eius consiliumque expotunt, qui gravem ac difficilem causam habent, vel honores ei deferunt, qui fructum aliquem capere e dexteritate eius, prudentia, et fide cupiunt. Nam mox Senatus Civitatis eum cooptat in Ordinem suum, in quo ad Consulatum usque pervenit: et post ill. Reinhardo, in Goettinganam Academiam evocato, successorem dat, in Consilio Ordinis Ecclesiastici. Per eandem occasionem Syndicum Civitati dedit Elector Moguntinus, et non ita multo post Comes illustrissimus Hatzfeldius eum Praesidem Consilio vtrique, Civili et Ecclesiastico, in Comitatu Blankenhanensi praeposuit. Sed omnium maxime sapientiam, prudentiam, dexteritatem, fidem eius, multis et magnis rebus cognitam atque spectatam, ornavit atque illustravit, Serenissimus atque Indulgentissimus Princeps Schwarzburgicus, Henricus, ut in dignitatibus hominum spectandis prudentissimus, ita in bene meritis ornandis liberalissimus et benignissimus. Nam primum A. XLII. ei nobilitatis iura et insignia, et Comitis Consistoriani ornamenta obtulit, simulque ad sanctiora consilia in hanc urbem vocato, tribus annis post, summa omnia contulit, Cancellarium, Consiliique Ecclesiastici Praesidem fecit, et Aerario praeposuit. Hos tantos honores, haec tanta rerum agendarum onera quomodo sustinuerit, nec est meum dicere, nec opus est praedicare.

care. Praeclare quidem sustinuisse, ita mihi, quamquam genero, praedicare licet, ut nullius ne tacitam quidem reprehensionem debeam reformidare: adeo perspicue atque saepe et Princeps Sapientissimus prae se tulit, quantopere sibi fides eius et opera probaretur, et quicquid est civium nostrorum, summi atque infimi, prudentiam, aequitatem, facilitatem, humanitatemque laudaverunt. In quo ei contigit, quod haud scio an multis. Etenim qui summae rerum praesunt, interdum res natura consociatissimas, utilitatem Principis et privatorum, opinionis errore dirimunt atque seiungunt. Itaque dum Principis gratiam tenere cupiunt, privatorum benivolentiam amittunt. In iure autem reddendo nullo modo fieri potest, ut omnibus etiam summa aequitas satisfacere possit: saepeque numero decernendum est contra alicuius opinionem ac voluntatem: unde oriuntur offensiones animorum atque voluntatum. Noster autem, eadem Principi et privatis utilia esse, nulloque discidio eorum rationes dissociatas statuerat, et Princeps ei contigerat, id quod in permagna felicitate ponebat, qui utilitatem suam a parentium utilitate seiunctam nullam agnosceret. Itaque, qui bonis artibus gratiam Optimi Principis collegisset, neque enim aliis eam ineundi facultas datur, iisdem eam retinebat, et utilitatibus eius ita serviebat, ut privatorum commodis nihil detraheret. Erat autem ea aequitatis et iustitiae opinio, ut etiam qui contra voluntatem suam aliquid ab eo decretum viderent, illa ipsa mitigarentur opinione, et ad animi aequitatem revocarentur: praesertim cum admirabilis in eo esset facilitas et humanitas et popularitas, qua ita iis satisfaciebat, ut eum etiam tum amarent laudarentque.

Harum omnium virtutum, aliarumque, beneficentiae, modestiae, patientiae, radix erat integerrima et veterrima in Deum pietas: quippe, ut supra memoravimus, ab ipsis vitae initiis in animo sata, et cum aetate confirmata, denique et ab ipso exercitationibus pietatis

assiduus, et ab Deo multis maximisque beneficiis, et admirabilibus singularis cuiusdam adversus ipsum providentiae documentis, alta atque nutrita. Cum esset, id quod inter omnes constat, iuris doctissimus atque prudentissimus, in bonis consiliis capiendis promptus, in dandis fidelis, in agendis rebus feliciter efficax: tamen quicquid ipsi ob eas virtutes tributum videretur, eius nihil sibi meritisque suis debere putabat, omnia ad Dei benignitatem referebat, omnia pro donis, ex eius manu profectis, accipiebat, eaque sibi, aliorum magis, quam sua causa, data credebat. Nec aliam ob causam magis gaudebat omnibus suis vel naturae vel fortunae bonis, quam quod iis sibi facultas ampla data esset, bene de re publica merendi, qua nihil maius contingere atque laetius in rebus humanis posset: eaque cupide et diligenter utebatur. Pietatem caste colebat: non dictis atque vultu ostentabat, sed animo fovebat, factis in utraque fortuna proferebat. Eam porro etiam privatis exercitationibus alebat, legebatque assidue non modo sacros libros, eosque imprimis, sed etiam Lutheri, Arndii, Moshemii, Sakii, Stemleri, Viri Magnifici, aliorumque multorum, nec aliam suaviorem a curis negotiisque publicis recreationem vel expetebat, vel sentiebat, quam quae talibus lectionibus contingeret. Neque modo in secundis rebus hanc maximam oblectationem animi habebat, sed etiam in rebus adversis maximum hoc lenimentum experiebatur.

Nam in tot rebus laetis, quae ei divina benignitate contingere, non caruit, praesertim extremo vitae tempore, incommodis atque acerbitatibus. Matrimonium inierat a. XVIII. cum Maria Christina Bernhardia, Viri Reverendi M. Ernesti Gottlieb Osanni, Sacerdotis Erfurtensis Vidua, matrona et corporis et animi dotibus ornatissima. Ex ea ipse prolem nullam habebat superstitem: nam quod ex ea natum erat, mox abstulerat mors: sed tres ipsi liberos e priori matrimonio attulerat: quibus
ille

ille educando, tuendo, ornando, animum plane paternum per omnem vitam praestitit. Hanc igitur uxorem, quacum triginta annos concordissime atque suavissime vixerat, amisit a. XLVIII. cum iam ea aetate esset, ut eius cura maxime indigeret, praesertim cum corporis, tot laboribus per tot annos exerciti, valetudo labefieri inciperet. Nam iam tum subinde tentabatur praecordiorum doloribus, qui vitae spem in longum proferre non sinerent, et maiora valetudinis incommoda ostenderent. Anno autem LV. mense Augusto, repente ita ei obscurata est oculorum acies, ut nihil praeter exiguum lucis sensum in altero oculo relinqueretur. Hoc tantum malum ille tanto animo tulit, ut nec quereretur acerbe, nec remedia anxie requireret, aut cupide optaret. Immo ille praeteritae fortunae memoria leniebat praesentis incommodum, laudans toto animo Deum, qui sibi tam per multos annos secundum vitae sine ulla offensione cursum dedisset. Sed cum nullum iucundiorem oculorum usum habuisset, quam qui in legendis iis, quos supra commemoravimus, libris cerneretur, vicarias oculorum faciebat aures, iubens sibi praelegi, quae legere ipse cuperet. Sed maxime animum intendebat in hanc curam, ut sibi laetum a vita discessum, quantum in ipso esset, pararet: non quod tum primum ea cura tangeretur: per totam vitam hoc egerat: sed quod sibi iam nihil aliud agendum ac curandum putaret, cui finis vitae haud procul abesset. Neque enim mortis imminentis cogitationem fugiebat, aut ab adventante avertebat oculos, sed spe et votis ei occurrebat, cupiens quam primum evolare corporis vinculis, et coram intueri Deum atque salutis auctorem Iesum Christum, quem mente atque animo dudum complexus esset. Cuius voti mox compos factus est, die XXIV. Aprilis nuperi, qua die placidissime, constantissimeque obdormivit: nactus vitae exitum, qualem quisque sibi mecum contingere optet. Vixit annos LXV. et mensem vnum, cum diebus XX.

Natus enim est a. cDIdCXCH. d. IV. Martii. Exuviae repositae sunt in vrbis coemeterio, tota Civitate funus celebrante.

Salve Beata Anima, et fruire felicitate, cuius spe et cupiditate plena ex hac vita demigrasti. Ego vero grata et laeta memoria semper colam paternum Tuum in me meosque animum, et beneficia plurima et maxima, sed multo magis, ita Te velle scio, pietatem Tuam in Deum et virtutes omnes, tanquam vnam veram Tui imaginem, vsque intuebor, amabo, imitabor, et ita me in Te gratissimum existimabo, vt Tibi animo totaque vita simillimum praeftitero.

MEMORIA

HIERONYMI GEORGII GLOEKNERI

A. M. ET PHILOSOPHIAE PROFESSORIS
EXTRAORDINARIJ.

Qui bonas literas dextre fideliterque docent, tum alios fructus capiunt, et ad ingenii cultum, et ad animi voluptatem ita magistros, ut, si nulla alia extrinsecus praemia accesserint, tamen satis magnam mercedem laboris tulisse videantur, tum illum inprimis magnum et periu-
cundum, quod multas fideles amicitias inveniunt, vel ornamento in rebus secundis, vel praesidio et levamento in adversis futuras. Socrates quidem, cuius sapientia in nulla alia re magis, quam in rebus humanis recte aesti-
mandis, eluxit, hunc fructum tanti putabat, ut eum omnibus aliis praemiis, quae in docendo expeterentur, longe anteferebat, et prope solum sequeretur. Nondum
ea aetate contemptus hic, qui nunc est, et haec veluti vilis invaserat sapientiae, quae intelligendo dicendoque cernitur, disciplinam; sed lautissimis stipendiis redimebatur. Sophistae, et eloquentiae magistri, operam suam
singulis non minus talento Attico locabant, quae temporibus illis erat pecunia permagna. Isocrates quidem
tantas pecunias fecerat ex eloquentiae praeceptis exercitationibusque, ut ei etiam invidiam ceteri, ut sit, conflarent artis illius professores, incitarentque in eum, qui,
trierarchiae defugiendae causa, actionem permutationis (*αἰτίδοσις*) intenderet, et trierarchiae munus et sumtus subire cogeret. Socrates autem, quamquam in re per-
tenui erat, habebatque discipulos ditissimos, in his Alcibiadem,

biadem, qui quamvis mercedem vel exigenti libenter dedissent, vel non plane recusanti cupide obtulissent, hanc sibi legem docendi statuerat, ut nihil quicquam ab ullo caperet, satis magnam, immo maximam mercedem esse existimans in amore eorum, qui a se profecissent. Ἐθαύμαζεν, εἴ τις ἀρετὴν ἐπαγγελλόμενος, ἀργύριον πρᾶττοίτο, καὶ μὴ νομίζοι, τὸ μέγιστον κέρδος ἔχειν Φίλον ἀγαθὸν κησάμενος: mirabatur, si quis virtutis disciplinam profectus pecuniam caperet, nec putaret, maximum se lucrum esse habiturum, vero amico comparato. Xenoph. Mem. Socr. I, 2, 6. Nam quod ei tamen Aristophanes in Nub. 99. obiicit pecunias a discipulis exactas, id vulgare in Sophistas convicium est, cuius generis alia in Nubibus sub Socratis persona exprobrari Sophistis aliis, cum in ipso Socrate nihil tale esset, veteris Scholiastae observatio est. Quod institutum viri ut est magni animi, ita profecto quavis demonstratione efficacius ad intelligendum, quanti ille amicitiam veram aestimaverit: cum vulgus, etiam philosophorum, eam ore tenus laudet, pro quamvis mediocri lucro, immo spe lucri, amicos vetricimos vendere ac prodere paratum.

Sed ut cuiuslibet doctrinae, bene fideliterque traditae, hoc praemium tribuatur, debeatur certe, nulli tamen vel saepius vel magis contingit, quam quae in humanitatis studiis versatur: et hanc disciplinam esse omnium maxime et gratiosam, et ad benevolentiam alliciendam, amicitiasque conciliandas efficacem, videmus. *Quis est nostrum*, Cicero (Planc. 33.) verissime ait, *liberaliter educatus, cui non educatores, cui non magistri sui atque doctores, cui non locus ille mutus ipse, ubi altus aut doctus est, cum grata recordatione in mente versetur?* At magistros doctoresque intelligit, quod in promptu est, vel maxime, vel solos eos, qui puerilem aetatem literis ad humanitatem erudierunt. Hos propemodum solos praeceptores nostros appellamus: hos cum forte offeruntur, quomodo excipimus, quomodo gaudemus, quomodo be-

nevo-

nevolentiam adversus eos profundere gestimus? quam non modo ad ipsos, sed etiam liberis eorum propinquisque benefaciendum prompti et parati sumus? ipsam memoriam mortuorum iucunda memoria prosequimur. Quam multa exempla possemus commemorare ex doctoribus bonarum literarum, qui propter illam ipsam disciplinam vel ad honores producti a discipulis, vel omnibus modis vivi mortuique culti sunt. In hac nostra Academia, ut nihil de Georgio Helto dicam, quo mortuo ita affectus est Georgius, Anhaltinus Princeps, ut ad eum, consolandi causa, scribere consultum putarent Lutherus et Melanchthon: nihil de Camerario, qui ab humanitatis disciplina floruit amicitiiis summorum hominum: Petrus Mosellanus tam carus multis, in his Christophoro Carolovicio, et Iulio Pflugio, Episcopo post Numburgensi, summis viris, fuit, ut ab hoc etiam mortuus monumento in aede D. Nicolai, quod nunc etiam extat, posito, et versibus laudis et amoris plenissimis honestaretur.

Fallimur, an haec est merces, divina quadam providentia constituta labori, qui vel in comparanda harum literarum facultate idonea, vel in iis bene docendis exhaustitur, multo ille maior profecto et molestior, sed idem utilitate, quae quidem ad rem familiarem pertineat, longe inferior eo, qui in ullo alio doctrinae genere proponitur? Invidiosum fortasse fuerit, nostris id verbis docere, quae nobis in tali re deesse non possent. Magnum illum, quem ante nominavimus, Ioachimum Camerarium audiamus, cui experto credere omnes aequum est. Is igitur suum hoc studium fuisse scribit, *ut, linguae graecae et latinae mediocri scientia acquisita, auctores veteres legere, et quibus de rebus monumenta scriptorum suorum relinquere posteris voluissent, perspicere, et enarrare aliis liceret.* Scio esse, ait, hoc parvum et humile. Sed in adipiscendo quid temporis impendendum, et negotii suscipiendum, quid perferendum molestiae, et sustinendum oneris sit,

ut

ut ego periclitando comperi, ita nemini, cui recte consultum cupiam, suadere velim, ut ipse quoque experiundum sibi statuatur. Quanto enim, unum aliquod celebre quasi opificium doctrinae colere, et facere grandiore[m] artem, utilius est, vel ad dignitatis vel rei familiaris incrementa, vel etiam cursum aequabilem et planum vitae — — Sed quemadmodum nemini auctores esse volumus, in hoc studium se ita immittendi, ut reditus vel difficilis vel nullus reperiat[ur]: sic animadvertere nobis videtur, maximos et pulcherrimos fructus de eo produci aliis, et viam aperiri ad omnem doctrinae splendorem et famam. (praef. ad Notat. figur. orat. in Scriptis Apostol. A. 3.) Iam hic ipse fructus etsi merces laboris satis magna atque iucunda et est, et esse debet viro bono, qui aliena etiam utilitate, praesertim discipulorum, eaque ad ingenii cultum pertinente, delectatur ut sua, nec peccatus habet ad sensum laudis obtusum: tamen nec ita parca est benignitas divina in praemiis laborum tribuendis, nec ita imbecillitatis humanae immemor, ut intra hanc mercedem subsistat, eaque vna contentos esse cogat, nec aliis praeterea cumulet bonis humanitatis doctores, quibus vel secundae eorum res oriuntur, vel adversae leventur.

Atque etiam illi ipsi, qui fidem talis praeceptoris experti sunt, nullo modo possunt ei non maxime liberales se probare velle, a quo ad illam ingenii animique liberalitatem humanitatis disciplina sunt eruditi: praesertim cum sciant, sentiantque, quantum boni sit non modo in literarum earum scientia et usu, sed etiam in ipsa ingenii animique conformatione, quae ab earum accurata fidelique disciplina venit. Etenim si quis vel maxime ex illa disciplina ad id genus vitae venerit, in quo eae literae proprie non adhibeantur, nec habeant aliquam utilitatem eiusmodi, quae incurrat in cuiusque vel stultissimi oculos, faciatque, ut in eo plane necessariae videantur: tamen in omnibus eius sermonibus, scriptisque cuiuscunque generis, atque etiam in factis, apparet atque extat illa

illa ingenii elegans a literarum elegantia et humanitate conformatio et venustas. Vt qui commode saltare didicerunt, in statu, in sessione, in incessu, non vtuntur illi quidem artificio saltandi: sed ipse corporis habitus ac motus indicat, didicerint ne saltare nec ne, habetque aliquam ad adspectum gratiam: sic in omnibus hominis docti actionibus, siue disserat de parte aliqua doctrinae, siue scribat aliquid, etiamsi proprie non vsurpat literarum humaniorum scientiam, tamen facile animadvertitur, ytrum tantummodo in eius doctrinae velut opificio sit iactatus, an ad eam humanitatis studiis instructum perpolitumque ingenium attulerit. Quodsi vero etiam rudes earum literarum sentire hoc possunt, et cum suavitatem aliqua sentiunt fusam illam per omnia et incurrentem in sensus elegantiam: quanto magis eam sentiant necesse est illi ipsi, a quorum ea ingenio fluxit, et cum gratia quadam admoneantur eius, a quo eam acceptam tenent? Quid? si quis ex ea disciplina retulit pectus refertum pulcherrimis sapientiae interioris praeceptis, et animum supra vulgares animas elatum, qui nec capiat, nec terreatur vulgarium de bonis malisque rebus opinionum ludibriis? Quid? si fessus munerum laboribus et curis, se velut e tempestate in portum, ita ad illos suos pristinos amores retulerit, eorumque humanissima saluberrimaque suavitatem recreetur? Non putamus meminisse eius, per quem gustu huius suavitatis est imbutus, per quem ei aditus ad hunc portum factus est? Quam multos saepe audivimus, commemorare solitos, ex iis, qui a studiis Academicis ad negotiosum aliquod vitae genus essent delati, in quo doctrinae parum aut nihil loci esset, cum dicerent, hunc sibi fructum temporis illius vel vnum reliquum esse, vel maximum et iucundissimum, quod humanitatis studiis ad minuenda et obruenda vitae suae fastidia uti possent, eorumque se quam saepissime meminisse atque libentissime, a quibus ad humanitatem eruditi essent?

Hunc

Hunc igitur disciplinae humanioris fructum, in multis aliis, inprimis iucundum, et capiebat, et libenter praedicabat Gloeknerus noster, Vir eruditissimus. Cum enim in hanc Academiam attulisset egregiam humaniorum literarum scientiam, eamque apud nos, audiendis earum doctoribus, mirifice auxisset, primum in domos amplissimas receptus est, ut erudiret graecis latinisque literis adolescentes, deinde a multis, etiam nobilissimis iuvenibus expetita est eius disciplina. Hic ille doctrinam, fidem, dexteritatemque ita probavit, ut omnibus esset vehementer carus, dignusque videretur, quem non modo tum, cum eum praeceptorem humanitatis haberent, sed etiam postea omni benevolentiae genere ac significatione prosequerentur. In quo genere maxime solebat memorare et laudare Domus Wagneriae memorandam sane liberalitatem, ipsiusque Andr. Wagneri, Viri Excellentissimi, cui comes olim adiutorque studiorum elegantiorum fuerat; qua ille ita fruebatur, ut ibi tanquam domi suae, et apud Parentes suos esset, in qua etiam vitae finem habuit. Quam rem ille cum aliis de causis in magna parte felicitatis numerabat, tum quod perfugium habebat in adversis, et cum esset corpore imbecillior, infestareturque subinde ab hypochondriorum permolesto illo, et animum quoque tentante morbo, habebat, quorum alloquio, humanitate recrearetur et confirmaretur. In quo quantus sit fructus amicitiae, magis sentitur, quam intelligitur, estque omnium ille quidem minime optabilis, sed, cum usus venit, omnium maxime gratus. Ipse autem humanitate, virtute, et omni officio ita sustentabat amicitias, ut in dies fierent firmiores, mortuusque omnibus, quorum benevolentia et amicitia usus est, magnum reliquit desiderium sui.

Natus est Fribergae in Hermunduris a. MDCCXV. patre Christophoro, matre Anna Sophia Grunbekia. Patrem, qui in suburbio Fribergensi, Catechetae nomine, pueris elementa Christianae doctrinae et literarum tradebat,

tradebat, in prima pueritia amisit: matrem, quae viduitatis aerumnosae maximum solatium habuit ipsum, superstitem reliquit. A morte patris in Gymnasii Fribergensis disciplinam traditus, septem annis sub magistris eius Mullero, Hassio, Luthero, Harzbachio, Beiero ita meruit, ut omnes partes discipuli boni impleret, pietate in Deum, studio literarum, modestia cedens condiscipulorum nemini. Itaque valde benevolis usus est, cum praeceptoribus, tum aliis, in primis Waegero, quo sponse initiatu sacris Christianis fuerat, sacerdote in ea vrbe, et aliis virtutibus, et vero etiam beneficentia probatissimo, a quo multis se beneficiis affectum praedicabat. Ex eo Gymnasio cum luculentis testimoniis praeceptorum dimissus, cum venisset in hanc Academiam, annum agens vicesimum, contulit se ad doctores earum artium, quibus studium suum eo animo addixerat, ut non vulgari scientia contentus esset, sed ut accuratam et copiosam expeteret. Itaque philosophiam et mathesin, historiam, literas hebraicas et humaniores didicit, magistris Winclero, Ioechero, Weissio, Hebenstreitio, atque ita bene praeparatus, Theologiam, Pfeiffero, Weissio, Wollio, et Tellerio: quibus omnibus assiduitatem et studium audiendi abunde probavit. Sed audiendi diligentiae prudenter adiunxit exercitationum in omni genere industriam, declamans saepe, et disputans super philosophia et theologia, apud Winclerum et Hebenstreitium. His agendis cum quatuor annos exegisset, contulit se Delitium, in hospitium Strengii, sacrorum in eo oppido Antistitis: vnde non ita multo post ad nos reversus, egregiam operam navavit studiis Andreae Wagneri, nunc Icti, Regii Consiliarii et Praefecti iure dicundo in hac Vrbe, Viri Excellentissimi *), de quo supra memoravimus. Inde in domum

*) Iam per plures annos Dresdae Ser. Principi Elect. a consiliis intimis Fisci, Viri, meritis, virtute, doctrina maxime venerandi.

domum Romani Telleri, τὸ μακρίτε, receptus; et studiis filiorum praefuit magna cum fide et pari successu, et patrem adiuvit, cum aliis in laboribus, tum in Opere Biblico, in quo tum laborabat, cuius etiam alteri Volumini, morte illius praematura destituto, praefatus est: fuitque Viro praeclaro, et longiori vita dignissimo, in primis probatus et carus. Sed illi Viro nemo carus esse poterat, nisi qui multis virtutibus, inprimis illis lenioribus et placatioribus, hoc est, suis, esset ornatissimus. Inter haec saepe etiam in publicum protulit ingenium et doctrinam, vel defendens pro cathedra aliorum Exercitationes, vt Taubneri, Gymnasii Laubanensis nuper Rectoris, *de latine germaniceque cogitandi discrimine*, vt Ioachimi, A. M. Regii nunc Halis Praefecti iure dicundo, *de recta legis naturae concipiendae ratione*: vel suas ipse disceptans, vt a. XLV. eruditam illam *de Potamonis Alexandrini Philosophia Ecclesiastica, recentiorum Platonitorum disciplinae admodum dissimili*: denique scribens de argumentis vtilibus: sed maxime lectionibus Academicis habendis. Nam honores Magistri adeptus, statim ab legitima disputatione *de Potamone*, scholas aperuit literarum graecarum et latinarum, philosophiae, et philologiae sacrae: in quibus non modo perspicuitate, ἀκριβείᾳ, copia doctrinae satisfecit auditoribus, sed eos etiam modestia iudicandi, pietatis et virtutis sensu proferendo cepit. Per haec cum cognitus esset bene multis, subinde expetitus est, vt operam suam erudiendae scholasticae iuventuti locaret: sed imbecillitate corporis, quae laborem scholasticae provinciae vix ferret, deterritus, maluit tenuiori conditione in Academia vivere, quam oneri tali succumbere. Neque vel sic defuit Viro optimo, vnde honeste posset vivere, nato discipulos liberales et gratos, et desideria intra angustos limites continere docto. Atque etiam praeter illa ornamenta, quae ei ab amicitia et benevolentia multorum contigerant, tanto maiora illa et gratiora bono viro, quanto veriora, accesserat

ferat aliud a Professione Philosophiae, quam ei nulla alia nisi dignitatis suffragatio impetravit, ante annos quatuor. Eam adiit oratione disertâ, de *Philosophiae noxis ab geometricae methodi abusu*: cui erudita disputatiuncula de *Wetstenianae ἐμπνεύσεως in N. T. vitiis* prolusit. Sed ante ediderat alia quaedam probabilia doctrinae specimina: vt, de *Socratico disputandi genere*, et de *libertate Dei*, adversus retentiores quosdam Philosophos, Epistolas. Etiam Calmeti Lexicon Biblicum e Francico fecit Germanicum, adpersis subinde animadversionibus. Sed illum laborem et invitus susceperat, et haud libenter absolvit: saepeque aiebat, id oneris se, nisi domesticae rationes tum coegissent, subitum nunquam fuisse. Nec fuit in eo ita sui arbitrii ac iuris, vt satisfacere sibimetipse posset. Quodsi diuturnior vita contigisset viro docto et laborioso, pluribus haud dubie et luculentioribus documentis doctrinae inclaruisset. Sed divina providentia malebat eum, vitae huius molestiis liberatum, ad melioris vitae gaudia traducere. Qui transitus ei repente, et sine vlla doloris acerbitate contigit. Nam a. d. V. Febr. hora XI. antemeridiana, inter docendum, eum oppressit imbecillitas tanta, vt docendi finem facere cogeretur. Ibi, dum e diaeta ad liberiores aërem hauriendum prodit, ἀποπληξία subito corripitur. Arcessitus advolat D. Heynius, V. C. cuius et arte felici, et amicitia fideli atque iucunda usus erat, vt opem in repentino malo ferret. Sed impetus ille totum corpus pari vi oppresserat, nec locus auxilio humano dabatur. Itaque paucis horis post expiravit.

In eo multarum rerum optimarum exemplum egregium perdidimus, doctrinae modestae, philosophiae religiosae, religionis castae et efficacis. Amicis fide satisfaciebat, suavitate placebat. Nihil diligentius cavebat, quam ne quem offenderet, quem nollet: nolebat autem quemquam: nihil facilius consequebatur, quam vt gratus et carus esset, quibus vellet. In magna corporis imbecillitate nunquam patientia desiderata est, nunquam ani-

mo tranquillitas, ne hilaritas quidem defuit. Sapientia, in primis caelestis illa, non modo sensum malorum hebetaverat, sed etiam rerum divinarum et pulcherrimarum sensu suavissimo obruerat. Cuius rei multo maior in mortuo admiratio, quam in vivo laus fuit: cum, aperto cadavere, intellectum est, Virum optimum nunquam spiritum ducere aliter potuisse, nisi ut omnia thoracis abdominisque viscera pariter magna vi attollerentur. Nam vnum quodque vicino, omnia inter se, velut in vnum corpus concreverant, nec reperiebatur, quod naturalem situm obtineret, nullum intestinorum volumen secretum a reliquis erat. In quo ut vix intelligi potest, quomodo alimenta digeri, et in succum et sanguinem, aptum alendo corpori, verti potuerint, ita illud in promptu est, quam molestum Vir optimus traxerit spiritum, quam plenam aerumnarum dolorumque vitam omnem habuerit: cum ille interea tranquillitatem, saepe etiam hilaritatem vultu atque sermonibus eam praeferret, quae vix aliquam eius miseriae suspicionem relinquerent. Felices, quos sapientia, fides in Christum, et virtus ita non modo adversus omnia mala fragilis huius corpusculi atque vitae obduravit, sed etiam dulcedine sua implevit! Felicem vero Glœkneri animam, quae ex tam misero domicilio in sedes eas translata est, ubi libera ab omni malorum contagione, pura et liquida laetitia fruitur! Quam ei nobiscum ita gratulamini, Carissimi Cives, ut virtute viri imitanda ad eandem adspiretis.

M E M O R I A *)

GOTTHELF AVGVSTI GRAFII

CONSISTORII PRINCIPALIS IN VRBE SONDER-
HVSANA ADSESSORIS ECCLESIAE PASTORIS ET
ECCLESJARVM PER PRINCIPATVM SONDER-
HVSANVM SVPERINTENDENTIS.

Si quis Theologi imaginem oratione instituat exprime-
re, quae omnes vna virtutes, eo dignas nomine, con-
tineat, eamque e vivo exemplo cupiat ducere, non mi-
nus profecto, quam Zeuxis ille apud Ciceronem pictor,
in perfectae pulcritudinis muliebris specie effingenda,
necesse habeat plures intueri, e quibus partes perfectio-
nis illius collectas in vnum coniiciat. Nam cum omnia
humana, et quae ab natura, quamquam solertissima arti-
fice, proficiscuntur, et quae humana cura comparantur,
absint longe a perfectionis verae, atque expletae partibus
omnibus, fastigio: tum vero quaedam de posteriori ge-
nere adeo multis et magnis rebus mista et temperata
sunt, vt earum vix numerum inire cogitando, nedum
omnes complecti agendo et parando liceat. In hoc au-
tem genere esse eam, quae Theologia dicitur, ita intelli-
git quisque facillime, vt eius naturam maxime cognitam
habet atque perspectam. Nam primum, quibus rebus
ea scientia perfecte tenetur, eae tam magnae tamque
multae, ac prope infinitae sunt, vt eas vix cuiusquam
aut ingenium complecti omnes, aut industria persequi,

B 3

aut

*) Scripta est haec memoria nomine cognatorum defuncti, qui
tum erant Sonderhusae.



aut aetas assequi posse videatur. Ipſus autem ea eſt, et ab auctore ſuo, et ab argumento ſanctitas, vt, in quo ea inſit, ab eo ſanctitas exempli ac vitae poſtuletur ea, quae humanae imbecillitatis modum longe ſupergrediatur; quod ſanctitas diſciplinæ, vitae morumque non modo impuritate, ſed etiam negligentia et levitate quacunq̃ue, commaculari et obſcurari videtur. In quo multo maior difficultas proponitur, quam in ſuperiori. Nam quae in ſcientia comparanda obijciuntur difficultates, in iis ſuperandis adiuvatur ingenium humanum, vel a pulcritudine et ſuavitate rerum percipiendarum, vel a laudis et gloriae, vtilitatis denique ſpe et cupiditate, adiutricibus rerum omnium efficaciffimis: at ab ſanctitatis ſeveritate, non modo inſita eius gravitate, ſed etiam ipſa naturae noſtræ pigritia quadam retardamur. Atque haec rei magnitudo et difficultas facit, vt, quo quiſque aequior eſt, eo minus perfectionem ſummam illam in Theologo requirat, ſed, qui plurima habet, quibus ea perfectio continetur, vel in ſcientiae magnitudine, vel in vitae ſanctitate, eum non modo admiretur, ſed etiam amet, et perfectionis honore ac laude adſciat.

Ex eo genere nuper habuimus in hac Vrbe Virum, et hac de cauſa, et munerum publicorum gravitate, ſeſtute denique ipſa ſumme Venerabilem atque Excellentiſſimum, Gotthelf Auguſtum Graſium, Sacrorum Antiſtiſtem Primarium, et Dioceſeos noſtræ Superintendentem, Conſiſtorii denique Principaliſ Adſeſſorem. Nam, vt de doctrina primum dicamus, quae pars eſt ſcientiae eius, quam Theologi profitentur, quam ille non attigerit? quae ars, in qua vel praefidium Theologiae, vel ornamentum ineſt, quam non tenuerit ſupra mediocritatem? Callebat egregie literas graecae et hebraicas: philoſophiae ſcientiam iam adoleſcens luculentis ſpeciminibus probaverat: partium Theologiae omnium a clariffimis doct̃oribus olim acceptam ſcientiam lectionibus aſſiduīs meditationibusque augebat indies: nec vſplam aliquid a
prae-

praeclaris Theologis scriptum prodierat, nec modo a nostris, sed etiam externis, quod ille non cognoscere studeret, cuius cognoscendi copiam non facile consequeretur. Nam etiam amicitias habebat multas cum doctissimis viris, contractas in iuventute, et per occasionem sacerdotii Genevensis, quas aleret epistolis assidue scribendis, ut ab iis cognosceret, si quid exiisset alicubi, quod sua referret scire: et callebat linguas plures, per quas posset intelligere, quicquid quocunque genere sermonis scriptum esset. Et erat incredibilis aviditas cognoscendi, quid in Academiis clarioribus, quid quacunque in parte Ecclesiae Christianae ageretur. Reperiebat autem hoc facilius amicos tales, quod in eo erat plurimum humanitatis atque officii, et institutas amicitias colebat summa fide atque integritate. Sed illam tam accuratam, elegantem, et copiosam doctrinam non ad vanitatem et ostentationem referebat, sed ad honestam ingenii et animi oblectationem, inprimisque ad usum Ecclesiae. Concionabatur enim ita, ut non modo plebi perspicuitate docendi, et gravitate cohortandi serviret, sed etiam ceteris, delectu rerum exquisitiori, varietate et copia, orationis denique ipsius simplici elegancia, ita temperans omnia, ut omnibus satisfaceret. Itaque, quo tempore Genevae sacra faciebat, ad eum audiendum veniebant non modo hi, quorum causa proprie concionabatur, sed etiam externi, cupientes et ipsi aliquem fructum capere ex eius pia doctrina et eloquentia. Nec minus probatus est, cum Gotham evocatus, in has terras Geneva redisset: cuius rei testimonia cum multa commemorare liceat, vnum hoc satis erit ad fidem, quod a Gunthero, Sapientissimo Principe, delectus est, ad id munus, quod in hac urbe ad extremum usque sustinuit. Quod enim aliud maius testimonium esse potest illius Principis iudicio? de quo B. Reinhardus, cui Graevius suffectus est, Theologus excellentis doctrinae, dicere solebat, nunquam se acrius examen doctrinae subiisse,

quam in primo sermone, quem secum Guntherus habuisset. Mores autem Viri qui fuerint, quae vita, testes sunt omnes Civitates, in quibus operam Ecclesiae Christianae navavit. Genevae quanto in honore fuerit, quam carus non modo suis, sed etiam aliis, postea videbimus: in hac autem vrbe quis est, qui eum, non fateatur, non exempli minus sanctitate, quam doctrinae claritate venerabilem fuisse. Pietas erat integra et vera, sed quae agendo potius, quam dicendo se ostenderet: candor exempli antiqui: nihil ficti, nihil simulati: modestia et humanitas adversus summos et infimos: rerum humanarum omnium verissimus contentus: nec appetebat divitias, nec amissas lugebat. Animi mira inerat constantia, et tranquillitas. In omni vita gravitas, temperata eleganti humanitate: in consuetudine et sermone familiari hilaritas non abhorrens a personae, quam sustinebat, dignitate.

Haec tanta virtus quomodo nata, quomodo adoleverit, quem totius vitae cursum habuerit, non alienum erit breviter commemorare. Patriam igitur habuit Fribergam in Hermunduris, patrem Ioannem, Gymnasii in ea vrbe per multos annos Con-Rectorem, egregie meritum, matrem autem Dorotheam Sophiam, Andreae Kuhnii, Medici Fribergensis filiam natu maximam. Literas, quibus praelegantur ingenia puerilia ad capiendas doctrinas maiores, ita didicit in Schola patria a magistris, qui tum illam Scholam regebant, patre inprimis, a quo et prima literarum initia domi didicerat, ut praeceptoribus inprimis probaretur ingenium et discendi studium, nec minus obediendi parata voluntas et vita ad omnem modestiam et virtutem composita. Ex earum autem disciplina dimissus contulit se Lipsiam, inque disciplinam clarissimorum, qui tum erant, Philologorum, Philosophorum atque Theologorum, Io. Olearii, Rechenbergii, Ittigii, Seligmanni, Gottfridi Olearii, Io. Schmidii, Cypriani, Ludovici, Starkii, quibus ingenium, studium omnis praeclaræ doctrinae, profectumque ipsum per exercitationes

tiones disputandi, concionandique, tum privatas, tum publicas, vehementer probavit, inprimisque Gotfrido Oleario, qui eum enixe omnibus in rebus iuvabat, et ad familiares sermones de studiis doctrinae, adque Bibliothecam admittebat. Horum autem de consilio cum proferre in publicum tentaret profectus, primum aliquoties in cathedra bene stetit, defendens quae alii scripsissent, post etiam sua. Nam Baccalaureus Philosophiae creatus, aliquoties theses philosophicas pro cathedra defendit, mox Magister Philosophiae creatus a. c1610ccciii. eruditam de *Libertate* Diatriben, qua dubitationes, inprimis Lockii, eleganter dissolvit, et veram libertatem argumentis idoneis confirmat. Inde animum ad docendum appulit, coepitque explicare Philosophiam et exercere disputando, qui se magistro Philosophiam cognoscent.

Sed magna plaga rebus eius iniecta est a. c1610cccvr. Saxonia per Svecos occupata, cum diffugerent Studiosi timore armorum, et vix videret, quomodo se porro tueretur. Enimvero subvenit ei tali tempore benignitas Th. Ittigii: a quo missus Stutgardiam, adscitus est in Domum Viri Illustris Io. Phil. L. Baronis e Schelliis, Dynastae praediorum Bauschlott et Stetten, S. R. Imp. Equitis, multis honoribus splendidi, praepositusque filiis duobus ad pietatem humanitatemque erudiendis. Inde, duobus annis exactis, reversurus Lipsiam, rogatur a Patrone, ut cum filiis iret comes, Lausannam primum, deinde Genevam, ad extremum iter cum iis faceret per Franciam. Ita deductus a consilio, cum Schelliis proficiscitur Lausannam, consumitque ibi prope totum annum, usus hospitio et convictu Petri Crosae, Philosophi clarissimi, cum quo post literarum commercium et amicitiam perpetuam habuit. Inde Genevam transit: ubi cum vix tres menses egisset, rogatur a Curatoribus Sacrorum Lutheranorum, ut Germaniam peragraret, pecuniae colligendae causa ad constituenda Sacra publica Lutheranorum Genevensium. Id negotium cum suscepisset,

piſſet, impetrata a Schellio patre venia, relinquit iuvenes, Laufannam reductos, accingitque ſe itineri. Sed illud conſilium irritum fuit. Nam cum pacis conſilia, quae tum agebantur, ad nihilum rediſſent, graſſarenturque per Germaniam bella pariter atque peſtilentia, apparebat totum illud iter parum fructuoſum nec magis tutum fore. Itaque renunciat conditionem, neque adverſantibus, neque querentibus quibus addixerat operam ſuam: repetitoque priſtino conſilio redeundi in patriam, profeſtus Geneva, per Friburgum, Bernam, Baſileam, ubi Bibliothecam publicam, et Sam. Werenfelfium, Theologum clariffimum viſit, Schafhuſium denique, venit Stutgardiam, inde denique, cumulatus beneficiis a vetere hoſpite, per Noribergam redit Lipſiam: qua tamen tum ſtatim altero die poſt reliſta, Fribergam contendit, feſtinans videre parentes fratresque, quorum flagrantiffimis deſideriis expectabatur. Exſatiatus eorum adſpectu, ſermone, amore, excurrit Lipſiam, quo habebat mandata a Schellio, et ipſe cupiebat convenire patronos et amicos ſuos.

Redux Fribergam, paucis diebus poſt accipit nuncium de morte M. Antonii Schulzii, qui Genevae ſacra in Lutheranorum coetu fecerat, cui ſucceſſorem eum deſtinabant Curatores. Oblata ei eſt conditio primum per Lehmannum, Sacrorum Fribergenſium tum Antiſtitem, mox ab ipſo Ordine Theologorum Lipſienſium, quibus poteſtas data erat a Curatoribus, ei hoc ſacerdotium deferendi. Cum res conveniſſet, menſe poſt accipit literas a Curatoribus, quibus ei ſacerdotium rite mandatur. Itaque mox, editis legitimis in Conſiſtorio Lipſienſi ſpeciminibus, conſecratus rite et inauguratus, abit Fribergam, ut ſuis vale diceret: inde mox iter ingreſſus venit Genevam a. d. III. Kal. Febr. A. C. MDCCCXI. Adiiit ſacerdotium Dominica Septuageſimae, concionatus ſuper 2. Theſſ. III, 3. 4. 5. magna cum congratulatione omnium, qui Virum per ſuperiorem commemorationem cogno-

cognoverant, inprimis Curatorum, qui in eo non modo doctrinam parem tali loco, sed etiam virtutes omnes inesse iudicarent, quibus opus esset ei, qui et suis satisfacere, et ceteris non displicere vellet. In quo eorum spei eventus plenissime respondit. Praefuit enim illi sacerdotio per duodecim annos, non modo magna cum dignitate, sed etiam gratia apud omnes, propterea, quod doctrina pariter atque exemplo insignem se faciebat, et humanitate modestiaque influeret in animos omnium. Primores quidem reipublicae Genevensis eum, quoad ibi fuit, omni honoris genere ornarunt, quod haberi tali viro posset, et ipsi Theologi eum in oculis tulere, in his, qui tum longe princeps erat, Io. Alphonfus Turretinus, magnae et elegantis doctrinae vir, idemque moderatione clarus, qui eum etiam sibi convictorem esse cupiit: adeo eius consuetudine familiari delectabatur. Quo magis doluere omnes, cum ab eo sacerdotio decederet, vix alium sperantes sibi contingere posse, qui eius virtutes aequaret. In quo dolore certatim eum ornare significationibus honestissimis Ordines omnes studuerunt. Cum concionaretur ultimum in coetu suo, misit Senatus Ampl. Syndicum Primarium Tronchinum, qui sua vice adesset, ipsumque post ornatissimis verbis Duci Gothano commendavit: Theologorum autem et sacerdotum Collegium testimonium dedit sui de eo iudicii honorificentissime scriptum. Atque etiam post principes illius civitatis viri et saepe per literas humanissime scriptas declararunt, quam iucunda sibi esset, omnibus de causis, eius memoria. Abiit autem Geneva, ad Sacerdotium in aula Ducis Gothani obeundum. Etenim egerat hoc Graefus consilio prudenti, feliciterque perfecerat, ut Coetus Lutheranorum Genevensis acciperetur in clientelam Ducis Gothani. Is tum erat Fridericus II. Princeps Sacrorum puriorum et amantissimus, et tuendorum cupidissimus, idemque omnium bonarum literarum Stator tum vnicus. Huic ergo cum per eam causam prudenter tractatam
inno-

innotuisset (etenim eius rei causa ipse a. c1c1cccxx. Gotham ierat, et difficultates, quae a Genevenfibus movebantur, de medio tandem sustulerat,) haberetque apud eum laudatores virtutum suarum plurimos, in his gravissimum Ernestum Solomonem Cyprianum, qui apud Principem talem, propter excellentem doctrinam et virtutem, graciosus erat imprimis, placuit Principi optimo duobus annis post, eum ad se evocare, eiusque uti opera in sacris aulicis, primum Diaconi, anno post Concionatoris nomine, venturusque erat inde ad maiora sacerdotia, si in ea Vrbe mansisset. Nam Principi probabatur Viri opera, et nemo erat, quin cognosceret ac plurimi faceret eius doctrinam, virtutem et vero etiam in omni vita elegantiam. Sed aliter visum erat Deo, qui hanc Urbem ei destinaverat, in qua Ecclesiae suae operam navaret. Venit autem huc (a. c1c1cccxxxii.) vocatu Celsissimi Principis, Guntheri, ut supra diximus, cui ad extremum vsque probatus fuit, nec minus Fratri eius Celsissimo Henrico, qui post illum has terras rexit, Nepoti Serenissimo, Christiano Gunthero, qui nuper felicissimis auspiciis rerum Schwarzburgicarum regimen suscepit, univrsae denique Celsissimae Domui Principali. Univerſa quidem Civitas, atque Dioecesis, cui praefuit, eum, quoad vixit, amavit, magni fecit, et ad extremum, etiam propter senectutis reverentiam, ut Patrem coluit. Quod ei merito contigit. Nam, ut ceteras virtutes hic mittamus, de quibus ante dictum est, in omnibus muneris partibus summa cum dexteritate et fide versabatur, apparebatque omnibus in rebus animus officii conservandi cupidissimus, et eorum, qui fidei eius crediti essent, aut quibuscum aliquid muneris causa ageret, amantissimus, nec ulli rei, praeter impietatem, inimicus.

Inter curas publicas adiunxit etiam animum ad matrimonium, quod iniit Gothae a. c1c1cccxxvi. d. XII. Febr. cum matrona pia et pluribus virtutibus ornatissima, Anna Elisabetha Gravelia, quae ante in matrimonio habue-

habuerat M. Io. Christophorum Arnoldum, in Ecclesia Gothana Diaconum. Cum ea accepit privignum, Ludovicum Guil. Arnoldum, qui nunc, Doctor, Medicinam Gothae facit nobilem, et privignam, Christinam Iulianam, quam Io. Ernesto Gottl. Kochio, Viro Consultissimo, Civitatis Stolberg. Syndico, collocavit: quibus naturalis parentis adfectum, curamque per omnem vitam praestitit, consulens omni ratione eorum commodis et felicitati, gaudensque eorum bonis, ut suis. Sed et ipsi peperit prolem plurimam: filios quatuor, Salomonem Andream d. VI. Mart. a. c101000xxvii. Dan. Henricum, d. XII. Febr. a. c101000xxix. Danielelem, d. VI. Apr. a. c101000xxx. Victorem Fridericum Guntherum, d. XXII. Apr. a. c101000xxv. filiam denique Augustam Mariam Catharinam, d. XXIII. Iul. a. c101000xxxi. Ex his omnibus vna vitalis fuit filia, quam ante duos annos d. XX. Sept. feliciter collocavit Io. Guiljelmo Ernesti, Consiliario Principis in Curia et Consistorio, lugentem nunc Patris, aetate quidem maturam, sed amore ac pietate acerbam sibi mortem. Dolori e morte praematura tot filiorum accessit ad extremum summus luctus e iactura vxoris, quam repente fecit a. c101000clv. d. V. Febr. ex apoplexia. Ceterum eam iacturam tolerabiliorem fecit pietas filiae, quae summam curam, etiam inito matrimonio, adhibuit, ne quid desideraret Pater, quod tali senectuti opus esset, cum ipse vicissim eam omni indulgentia ad mortem vsque prosequeretur. De qua antequam dicamus, de vniverſa valetudine Viri dicendum videtur.

In prima aetate imbecilla valetudine vsus est, cum laboraret ex hypochondriis, sive intemperantia studiorum, sive alia qua causa contracto vitio. Idque malum ita invaluerat, vt, cum in Academiam ire pararet, medici iuberent abiiicere cum libris studia literarum, et precibus potius cogitationibusque iis vacare, quibus ad bene moriendum praeparetur. Cum nihilo minus abisset Lipsiam, brevi coactus est domum reverti, et, ommissa studiorum con-

contentione, curare valetudinem. Sed ea confirmata rediit Lipsiam et paullatim ita convaluit, vt prosperrima posthaec valetudine, etiam in ipsa senectute vteretur; quam temperantia, labore, hilaritate animi et tranquillitate ita sustentavit, vt ad summam senectutem pervenerit. Mortis causam habuit hanc. Tertio ante obitum die invasit eum repente colicus dolor, cum vomitu vehementi: cui malo etsi remedia idonea opponebantur a D. Ebarto, Consiliario et Medico Principis dexterrimo, tamen eorum vis vel magnitudine mali vel imbecillitate senili superata est: accessitque mox inflammatio intestinorum aut ventriculi, quae ei mortem attulit. Sensit vir beatus adesse vitae finem: quem ille adeo non expavit, vt etiam gauderet, venire tandem horam, qua ex hac vitae miseria ad beatam immortalitatem transitus daretur. Itaque depositis omnibus rerum humanarum curis, tota mente se convertit ad Deum, et servatorem suum Iesum Christum, cui fideliter per tot annos servierat, et eius manibus commendato spiritu placide expiravit.

Vixit annos octoginta et sex dies, superata vltima vitae humanae meta. Natus enim est d. II. Aug. a. MDCLXXIX. defunctus vita d. VIII. Augusti nuperi. Exuviae depositae sunt d. X. Aug. in vrbis coemeterio, comitante funus magna omnium ordinum multitudine. Memoriam Viri virtutumque plurimarum ac pulcerrimarum nulla ex animo cuiusquam delebit oblivio. Quae viro beato erit tanto honestior, quanto magis amorem pietatis, studiumque parvis virtutis commovebit. Neque enim maior aut dignior honos sanctis et virtute insignibus viris potest haberi, quam virtutibus eorum imitandis.

M E M O R I A
FRIDERICI LEBRECHT STOLZII

I. V. DOCTORIS

Cum ius et leges ab ipsa humanitate profectae sint, et barbaras gentes ab immanitate morum ad humanitatem vitae traduxerint: tanto quaeque gens maiori in honore non modo leges ipsas habuit, sed etiam eos, per quos eae causis iudicandis agendisque exercerentur, quanto ipsa esset ab humanitate cultior, et per hanc ipsam causam legum amantior. Equitibus Romanis, nulla in re antea diversis a cetera plebe, nisi militiae paullo maiori honestate, secundum in civitate et medium inter Senatum plebemque locum dedit legum per iudicia exercendarum munus: nec alia certior via ad summos in re publica honores patuit apud Romanos, quam industriae, ut Cicero appellat, hoc est, in causis forensibus agendis fidelis et peritae assiduitatis, quae etiam virtuti militari, apud bellicosissimum populum, dignitate coepit aequari.

Sed cum ius aliud privatum et civile, aliud publicum esset, non quod nos dicimus, sed quod ad causas publicas pertineret, h. e. eas, in quibus securitas, et salus cetera reipublicae verteretur: maximo in honore fuere, qui talibus causis agendis, reos, capitis fortunarumque omnium periculum adituros, defenderent. Nec gloriosum fuit, in talibus causis vicisse, in quibus conspicua rei innocentia adversus calumniatorum improbitatem, aut incertarum suspicionum levitatem, defenderetur, sed etiam, quibus nocentes legum severitati eriperentur, si nulla alia, nisi iuris et ingenii, vis adhiberetur. Humanus

nus enim et tolerabilius videbatur, ut erat, nocentem subinde elabi legibus, quam innocentem fama, fortunis omnibus, vitaeque privari. Itaque ut quisque vel genere nobilior, et honestior, vel ab ingenio et eloquentia paratior fuit, ita magis reorum capita, quam causas privatas defendit, quod in iis maior ingenii gloria, maior etiam, non modo apud ipsos, qui defenderentur, sed etiam apud populum, gratia proponeretur: et quoscunque causarum agendarum industria ad summa pervenisse traditum est, eos reperimus, non tam causis minutis, et ad privatam civium utilitatem pertinentibus agendis, quam reis defendendis, et a legum severitate vindicandis, eo contendisse. Illos ipsos, qui iam principes essent reipublicae, Africanos, Crassos, Antonios, Hortensios, nihil fere aliud, nisi defendisse reos, constat, cum causas ceteras prope infra suam dignitatem esse iudicaret, illis bene agendis dignitatem etiam augeri, et illustrari putarent. Itaque etiam, in orationibus edendis, earum maxime rationem habebant, quibus defensiones criminum inessent; quod eas et expectari magis, et ad gloriam esse illustriores videbant. Atque ita profecto se res habet. In causis privatis subtilitas magis quaedam et diligentia cernitur, in criminibus defendendis etiam ingenii vis, et copia. Ciceronis privatarum causarum tres modo orationes habemus, pro Quintio, Roscio Comoedo, et Caecina. Eae quamquam subtiles sunt, et plenae artis, tamen quotus quisque legit, aut intelligere vult? Itaque si his, et similibus, Ciceronis eloquentia et ingenium spectaretur, actum prope esset de eius tanta gloria. Ceterae omnes iudiciales, praeter Verrinas, sunt publicarum causarum defensiones, in his regina omnium, de Quintiliani verissimo iudicio, Miloniana: iisque maxime fundatur ingenii Ciceroniani et eloquentiae gloria. Quid? Demosthenis cum multae extent privatarum causarum orationes disertae, nec iniucundae lectu: tamen parum notae sunt vulgo, nec in celebritate famae versantur, quod

quod ad eas legendas nemo fere accedit etiam ex iis, qui Demosthenis eloquentiam cognoscere cupiunt. Principatus Demosthenicae eloquentiae est in publicis, quibus vel accusavit reos, vel defendit. Atque id res ipsa docet. Nam in causis tenuibus, cuius generis sunt privatae ple-raeque, nulla est materia, in qua ingenium vim suam magnopere expromere, aut copia et ornatus oratorius locum habere possit: at in causis publicis, et ipsa magnitudo rerum aditum dat eloquentiae ornamentis et copiis, et ingenium varie se ostentare, indaganda callide veritate, suspicionibusque probabiliter vel roborandis vel frangendis, potest. Etenim, in causis talibus saepenumero maxime vera reperitur sententia philosophi, qui veritatem in profundo demersam dixit. Non saepe profecto longius remota est veritas ab sensibus humanis in rebus naturalibus, quam in factis, in quibus saepe sub infinita propemodum περιάσεων minutarum ambiguarumque mole latet; unde eam protrahere, et in plena luce collocare, sane haud parvi aut parum in rebus humanis usu triti ingenii est. Sicut casus, ut ait Cicero, saepe ita imitatur veritatem, ut non casus sed veritas esse videatur: sic in rebus vitae humanae error saepe permultas ac prope omnes veri notas induit, fallitque non vehementer cautos et acutos. Sub hac igitur tanta specie veritatis latitantem, ex vix minima sui se parte ostendentem errorem, tamen videre, aut veritatem, leviam admodum sui vestigia praebentem, deprehendere, qualis viri, quam vero paucorum putemus esse? cum plerosque videamus, in ipsos oculos incurrentem vel veritatem, vel errorem, et digito demonstratum, non cernere.

Nec vero Graecorum modo Romanorumque moribus praeclara, et laude plenissima fuit reorum defensio, sed nunc quoque praeclarum habetur, ut est, in eo genere bene solerterque versari. Nam etsi nostris moribus eloquentiae laus abest a talium defensionum facultate, quoad ea copia et ornatu rerum verborumque cernitur,

C

cete-

ceterae tamen laudes omnes, ingenii, diligentiae, fidei, humanitatis denique, salvae sunt. Qui publice de iure respondent, nullas causas graviores putant iis, quae ad caput hominum pertinent, ut quae etiam, propter gravitatem, iis maxime committuntur, qui in causis tractandis ac iudicandis prope consenuerunt, tantamque in iis diiudicandis diligentiam adhibent, ut nisi multis manifestisque signis rem deprehenderint, nisi prope manibus teneant facinus, decernere contra caput hominis non audeant. Recte. Grave enim est de vita hominis, etiam levissimi et contemptissimi, iudicare, quae omnium rerum humanarum maxima est, et semel amissa revocari ac restitui non potest. Quodsi Fimbria, apud Cicero-
nem (*Off. III. 19.*) negavit, se sponsonem iudicaturum, quae in haec verba facta esset, *ni vir bonus esset*, ne aut probatum hominem fama spoliaret, aut bonum virum iudicaret, qui non esset, quorum utrumque esset gravissimum: quam grave putemus, iudicare de vita hominis, quae ita cum summa infamia amittatur? Enimvero si magna diligentiae atque prudentiae laus debetur his, qui tales causas bene iudicant, profecto etiam, qui eas bene defendunt, defendendoque iudices in viam veri quodammodo deducunt, summa laude affici debebunt.

Atque in eo genere nuper apud nos inprimis valuit, Fridericus Lebrecht Stoltzius, Vir iuris Consultissimus: qui cum in omni genere causarum, in foro agendarum, accurate feliciterque versaretur, tum inprimis se ad hoc genus causarum dederat, in eoque multis bonam operam navavit, quorum defensio ei, vel privatim, vel publice, esset mandata. Itaque etiam in animo habuit, quae ipse in eo genere, vel ingenio, vel usu reperisset utilia, libro peculiari complecti, qui de modo causarum capitalium in foro disceptandarum (*de Processu Criminali*) inscriberetur, adiunctis XXXII. Defensionum talium suarum exemplis. Sed id opus, in quo plurimum temporis consumserat, inchoatum imperfectumque reliquit, oppressus.

oppressus ante tempus valetudine, quae primum rerum agendarum facultatem, et non ita multo post ipsam vitam eripuit. Sed bene est, quod alia sui virtutumque suarum monumenta reliquit in animis multorum, per quae memoria eius conservaretur, cui etiam hoc Viri elogio consulendum putavimus.

Natus est in villa Dioeceseos Bornensis, Breunsdorf, anno huius seculi tertio, a. d. XII. Februarii, Patre Ioanne Sigismundo, tum in illa villa sacerdote, post Archidiacono Glauchaviensi et Pastore Meranensi, matre Anna Christiana Werneria. Avus paternus fuerat Ioannes Sigismundus, Pastor oppidi Francobergensis, idemque Dioeceseos Chemnicensis Senior et Adiunctus Superintendentis, natus patre Simone Iona, Consule Pirnensi, qui in matrimonio habuit Mariam Elisabetham, Ioann. Georgii Promnizii, ICTi clari filiam: maternus autem, Adamus Wernerus, Diaconus Werdensis, in Hermunduris, cui nupta fuit Sophia Werneria. Primae pueritiae praeceptores habuit, praeter parentem ipsum, M. Sigelium quendam, post Scholae Glauchaviensis Rectorem, M. Langium. Inde, linguarum initiis rite perceptis, missus est in scholam Zuiccaviensem, cui tum magna cum laude praeerant M. Vinholdus, Rector, et M. Martini, Conrector: quorum disciplina, alterius etiam convictu, cum quatuor annos usus esset, venit, de ipsorum iudicio et consilio, in hanc Academiam, ad maiores disciplinas percipiendas. Appulit animum primum ad Philosophiam, quam ab Rudigero et Birnbaumio didicit, post ad iuris legumque studium. Et iuris quidem civilis Doctores habuit Luderum Menkenium, I. Florentem Rivinum, Dunklerum; Canonici, Stiglium, Conr. fil. Feudalis autem ill. Bauerum. Modum causarum agendarum tradidere Sigelius et Kaestnerus. In horum doctorum scholis et disciplina cum tres annos summo cum studio consumsisset, ad causarum agendarum ius aditum sibi muniit, primum Exercitatione iuridica D.

Koefeliffi pro Cathedra rite defendenda, deinde examen legitimum apud Iure Consultos Vitebergenfes fubeundo: per quae cum cognita et fpectata eius dignitas efferet, anno duodececeffimo huius feculi in numerum Cauffidicorum adfcriptus efferet decreto regio. Ab illo ftatim tempore adiit forum, coepitque cauffas ita agere, vt mox opera eius a plurimis expeteretur. Quae res ei animum fecit altiora cogitandi. Itaque tertio anno poft Doct̃oris honores petiit, et impetravit ab Ordine Ict̃orum Erfordienfium, qui ei luculentum iudicii fui teftimonium imperavit, laudata eius et in interpretando, et in respondendo dexteritate, et fcientia: quo tempore etiam Exercitationem, *de Succelfione Fiffi*, pro Cathedra difceptavit. His honorum infignibus in hanc urbem relatis, cum bonis artibus auxiffet veterem famam, dignus habitus efferet, qui gener adfciceretur a Car. Gotfr. Winklero, D. et Senatorii ordinis Viro Praetorio, cuius de vita fuperiori anno diximus*), collocata ei a. XL. prid. Kal. Iun. filia maiori, Ioanna Sophia, ornatiffima virgine, qua cum omnem reliquam vitam, fine prole quidem, fed concordiffime exegit. Tribus annis poft, aditus ei regio beneficio datus efferet ad agendas cauffas maiores in Curia Provinciali, et Confiftorio: iurisdictionisque villaticae procuraciones a nobiliffimis equeftris ordinis viris ei mandatae funt. Per quae vt opportunitates vitae, ita labores aucti funt, quibus corpus non nimis robuftum frangeretur, et gravibus periculofisque morbis aditus patefferet. Sed citius, quam quis crediderat, incubuit mali vis, atque corpus laboribus exercitum oppreffit. Nam anno LV. mēfe Novembri, cum febris catarrhalis eum infefaret, fpefque efferet depellendi periculi, mēfe poft, repente ἀπό-πληξ̃ς accessit, a cuius vi non modo corporis, fed etiam fenfuum partes quaedam torpebant. Advocatus ego**) ad opem

*) v. I. A. Ernesti opuscula oratoria p. 312.

**) Loquitur Hundertmarkius Med. Doct̃. et illo tempore Acad. Rector, cuius nomine haec Memoria feribebatur.

Opem ferendam, adhibui, quaecunque tactas malo partes fulcirent, atque excitarent, omnique ope excutere torporem membris ac sensibus tentavi. Nec successu res caruit, restituto non modo ceterarum partium, sed etiam linguae usu, et luce reddita sensibus, haecenus, ut maxime necessariis vitae humanae partibus ipse sufficeret: eratque spes, omnia paullatim reditura ad pristinum vigorem, quae adhuc languoris aliquid a vi mali retinerent: cum ecce repente in deterius versa sunt omnia. Adorta enim est eum superioris anni mense Septembri febris quartana, coniuncta cum gravibus pectoris oppressionibus, et doloribus: accessere mense Decembri vehementes et diuturnae convulsiones, quae, cum totum corpus frangerent, et debilitarent, omnem spem vitae retinendae ademerunt. Et tamen resistere tanto malo naturalis roboris reliquiae, traxitque vitam adhuc ultra quinque hebdomadas dierum, h. e. ad XXIII. diem Ianuarii superioris anni, quo animus, diu vexatus malis corporis, evolvit ex illis molestiis ad coelestia et perpetua gaudia. Ad quae optanda, non magis malis corporis, quam ipsorum cogitatione pia et vivida, incitabatur, quae etiam assiduis sermonibus et alloquiis Stemleri nostri, sustentabatur et alebatur. Et fuerat ille per omnem vitam rerum sacrarum studiosus, amore earum imbutus mature a patre et praeceptoribus, adfueratque frequens sacris, et exercitationibus pietatis publicis, per quae sensus pietatis acuitur, et excitatur, ut tanto facilius et altius penetrare ad animum oblatis sensus possent. Religiosae pietatis, ut doctrinae, documentum etiam dederat libro, vernacula lingua scripto (Lips. 1741. 8.) in quo de iurisiurandi in causis forensibus usu ita disputat, ut vehementer de abusu huiusmodi finiendarum litium, et levitate hominum atque impietate in ea requeratur, de eiusque mali remediis consultet. Quo lenius etiam ferre obitum eius debent, Vidua Viri, Matrona Ornatissima, et quibuscunque arctior aliqua ne-

cessitudo cum eo intercessit: cum in his tantis miseriis Civitatis nostrae, quantas vix ante experta est, haud paulo beatiores sint, qui placide de vita decedant, quam qui earum praesenti sensu et adspectu cruciantur. Exuviae depositae sunt, ut voluerat, in aede Paullina, cui etiam, ut templis quinque villarum, in quibus iuri dicundo praefuerat, de pecunia sua legavit, non ille quidem magnas summas: quomodo enim? qui nihil haberet, nisi quod, in mediocri fortuna, et liberali vitae genere, comparisset ex iis, quae labore, quaesisset? sed tamen, ut bona voluntas appareret grati erga ea loca animi demonstrandi, quae sibi vitae honeste agenda praesidia aliqua suppeditassent, cum multi, lautissime a patria habiti, ut ingrati hospites decedant.

Nos interea gratulemur Viro tranquillam felicitatem, quam discessu ex aerumnosa vita adeptus est, et ad eandem non modo votis, sed etiam recte et bene agendo, adspiremus. P. P. Dom. II. post Epiphan. A. C. cldcccLx.

M E M O R I A
AVGVSTI FRIDERICI MVLLERI

ORGANI ARISTOTELICI PROFESSORIS ORD.

Cum Patriarchis et Prophetis tribuitur in scripturis divinis senectus cum vitae satietate, dubium videri potest, vtrum id ad senectutis gravitatem, et vitae ultimam longitudinem, an ad expletum vivendi desiderium, insitum natura, referendum sit: quorum alterum solam aetatis commemorationem, alterum vero etiam sapientiae laudem haberet. Neque enim satietas in istis viris intelligi potest ea, quae ab incommodis vitae humanae et senectutis venit, et cum fastidiosa impatientia coniuncta est; in qua est defatigatio potius, quam vera satietas: sed sancta illa et adversus Deum grata, quae insitae vivendi cupiditati modum statuere didicit spe vitae melioris, et concesso divinitus vitae spatio, praesertim longiori, contenta, ex hac vita discedit tanquam e convivio, in quo libenter et hilariter usa sit hospitis benignitate, ceterum, vbi tempus est, cum laetitia et gratiarum actione discedere non modo possit, sed etiam gestiat. Hanc rationem si quis probet ac defendere velit, magnum adiumentum habeat, non modo ab rei natura: neque enim abhorret ab istorum virorum ingenio et moribus, immo cum iis optime consentit: sed etiam ab ipso satietatis verbo, quo scripturae sanctae fere vtuntur, non in fastidii aegritudine notanda, sed in laudanda bonorum redundantia, vltra quam nihil desideretur, in qua animus cum magna suavitate acquiescat.

Haec certe est illa satietas vivendi, quam sapientia divina et humana probat et commendat, quam intelligi voluerunt illustres vel ingenio vel rebus gestis viri, cum se satis vixisse sive vere, sive animi magni ac fortis simulatione, dicerent. Nam sacrae quidem literae nullam aliam vivendi satietatem probant, nisi quam voluntatis divinae reverentia, et acceptorum, dum viximus, bonorum laeta et grata cogitatio, adde intellectam rerum humanarum omnium vanitatem, adfert. Nec aliter eam laudant viri sapientes, nisi remoto contemptu vitae et futurorum metu, et impatientiae taedio. Itaque eam non infortunatis propriam faciunt, sed cum fortunatissimis communicant, nec ad ultimam senectutem amandant, sed cum flore ipso aetatis coniungunt. Hinc illa a veterimis philosophis inventa, et creberrimo philosophorum, oratorum atque etiam poetarum usu trita ac paene detrita similitudo, ad hanc quidem rationem aptissima, quae vitam humanam cum convivio comparat, cui hilaris non modo bonorum perceptio, sed etiam in fine discessus conveniat. Iulius quidem Caesar, cum annos quatuor et quinquaginta natus, satis diu se vixisse praedicabat, nihil triste cogitabat, circumfluens tum maxime bonorum omnium copiis, et rerum gestarum gloria florentissimus; sed iis, quae et a fortuna accepisset, vel virtute parasset, se contentum, nihil desiderare amplius significabat vel ad vitam, vel ad gloriam.

In hac autem animi adfectione, si sit integra et constans, et e disciplina religionis verae adscita, quanta sit sapientia et praestantia animi, facile intelligi potest. Inest enim quaedam *αὐτάρεξια*, quae nullo alio in genere rerum humanarum praestantior et sapientior debet putari: inest fortitudo adversus illecebras vitae, et ipsa illa potentissima ad vivendum invitamenta; quod genus fortitudinis solet esse difficilius ac rarius, quam quod in tolerandis molestiis cernitur: inest altitudo efferentis se animi supra res humanas, sed ita, ut non fastidiose ac superbe contemnat,

sed,

sed, ut divina dona, in honore habeat, iisque grate fruatur: inest denique verum et incorruptum iudicium animi, nec maligne detrahentis bonis divinis aliquid, nec opinionis et pravae cupiditatis errore adiungentis. Quod si etiam hunc admiramur, qui ab miseriarum et vanitatis sensu aut cogitatione contemptum vitae suscipit, ac tristem satietatem, ut ille apud Platonem Axiochus, aut apud Dionem Charidemus: multo profecto magis efferre debemus eum, qui in ipso fructu bonorum suorum, et sensu suavitatis vivendi, tamen *ut plenus vitae conviva recedit*, atque, ut Socrates praecipit apud Platonem, sive potius, ut haud paullo certior praeceptor, Simon, facit apud Lucam, paeana canens e vita discedit. Haec tanta rei magnitudo facit, ut, qui talem vitae satietatem in aliquo agnoscant, satis eum admirari non possint; ceteri, qui, quid in tali genere verum sit ac fieri possit, suo animo ac sua facultate metiuntur, eam nullo modo cadere in naturam humanam existiment, et illum sapientem, qui cum tali satietate de vita decedat, personis poeticis annumerent, ad oblectationem ingenii, non ad imitationem vitae compositis.

Sed nobis talis ac tantae virtutis exemplum haud ambiguum nuper contueri licuit in A. F. Mullero, Philosopho aetatis nostrae clarissimo. Etenim cum ille nos, non multis ante mortem diebus, ad se advocasset, ut quaedam daret mandata, de modo funeris, et quae de pecunia sua testamento constituisset, pro amicitia, quae inter nos fuisset, aperiret, de instante morte sua ita praefabatur, ut diceret, sibi spem vitae retinendae vix ullam relinqui: nec se eo nomine queri: paratum esse ad abeundum ab hac vita: esse hanc, ita aiebat, ordinationem divinam, ut moriendum sit: quam recusare, impium esse: rogare se Deum, ut laetum et tranquillum animum, quem per totam vitam cum omnibus iis, per quae ali posset ac conservari, benigne concessisset, eum sibi ad fatalem usque horam perferre, et in illa ipsa hora liceat retinere.

Atque haec ille constantia oris atque orationis ea, quae nullam simulationis suspensionem relinqueret. Et in illo articulo etiam exui solet simulatio, cuius utilitas nulla relinquitur, incipiuntque verae de pectore voces audiri. Quo ille tempore cepit fructum haud dubie maximum sapientiae, quae non modo de Pythagorico praecepto, debet esse commentatio mortis (μελέτη τῆ θανάτου), sed etiam e disciplina Christi, vnius certi ac probandi bene et constanter moriendi praeceptoris. Qui enim alius maior fructus esse sapientiae potest, quam non inveni graviter in utramque partem rebus iis, quas homines verae sapientiae expertes vel expetunt vehementius, vel expavescunt gravius, quam rerum natura et voluntas divina fert? Nec vero quisquam digne sapientiae professione moritur, nisi qui tali animo videre appropinquantem mortem, atque praesentem excipere potest. Itaque, etsi nunquam timorem mortis, praesertim magnum, probamus, tamen multo magis miramur et reprehendimus in iis, qui vitae magnam partem in studiis doctrinae et sapientiae consumere, aut eius disciplinam exercuere, quam in ceteris, qui in rerum sensibilibus ac terrenarum curis vitam exegere. Sed illam nostri in morte obeunda constantiam, non humanae modo sapientiae, sed multo magis etiam divinae fructum fuisse, satis indicavit hoc, quod eam non e necessitatis naturalis, aut communis hominum fortis, similiumque rerum cogitatione et commemoratione duxit, per quae philosophi vulgo solent timorem mortis vel depellere, vel minuere, sed a voluntate et ordinatione divina, totamque posuit in obedientiae officio, quod Deo deberetur, et vero etiam propter vitae sibi concessae longitudinem et felicitatem libentius praeflaretur: quam obedientiam non esse humani ingenii, et sapientiae humanae, et res ipsa arguit, et multis locis praeclare monet Apologia Augustanae Confessionis.

Arbitramur, vnum hoc satis esse ad Virum vel digne laudandum a nobis, vel bene cognoscendum ab aliis.

Nam

Nam summam laudem esse in constantia moriendi, praefertim tali, ignorat nemo; cum etiam heroas, quos nostra consuetudo vocat, constet, nullam maiorem laudem videre, quam quae ab illa constantia veniat: et quot quantarumque virtutum comitatum habeat, ita in promptu est, ut omnes videant. Sed nostrum est, non ex hoc velut membro totam Viri sapientiam intelligendam relinquo, sed totum Virum vitamque omnem ita describere, ut vel in memoriam iucundam redire legenda possint amici veteres ac discipuli, vel cognoscere minores. Hoc ergo agemus.

Natales habuit in villa (Obergraefen) Dioeceseos Rochlitensis, XX. M. P. ab Vrbe nostra, patre Io. Adamo, sacerdote; a quo susceptus est m. Decembri medio anni a C. n. post millesimum sexcentesium, quarti et octogesi, e Iohanna Susanna, Io. Fromholdi, Pharmacopolae Rochlitensis, filia. Felicitas ingenii, quae in tenerissima aetate pueri elucebat, patrem impulit, ut eum destinaret literis: quarum rudimenta ita celeriter arripuit, ut vix duodecim annos natus in ludo Principali, qui est in oppido Grimmano, uti disciplina literarum posset. Ibi exactis sex legitimis annis, cum luculento Doctorum testimonio missus est in Academiam Lipsiensem ad maiores disciplinas percipiendas: e quibus philosophiam maxime et legitimam scientiam sibi delegit, in quibus discendis ingenium experiretur. Erat tum in utroque genere disciplinae, qui novaret quaedam, et in rebus ipsis, et in ratione differendi, non sine offensione, ut sit, eorum, qui vetera, in quibus scilicet ipsi conseruauerant, non movenda putarent: in philosophia quidem Andreas Rudigerus, in iure Gottlieb Gerhardus Titius. Primus eum novitate suae disciplinae, imprimis Dialecticae, pellexit Rudigerus, ut eum praeter ceteros sectaretur: planius autem et subtilius philosophandi rationi adsuetum Titius, qui et ipse philosophabatur ad novam rationem, atque etiam in Iure civili philosophia magis, quam

quam historia et literis utebatur, et tum in illa ipsa disciplina, tum in Iure Ecclesiastico in multis ab inveteratis opinionibus secesserat, secutus maxime novas Halensium Ictorum de iis rebus opiniones; ut qui Chr. Thomae disciplina usus erat. Nec eum novitas illa traxit modo eo, quo etiam stultissimum quemque, sed ut ingenia meliora solet, quorum sollertia natura non modo capitur probabili novitate, cum oblata est, praesertim si ingenii commendationem habet a specie quadam philosophandi, sed eam etiam ipsa requirit et persequitur.

Horum igitur disciplinis bene penitus imbutus, animum convertit ad docendum, petito primum a. 1707. et accepto Philosophiae Magisterio, deinde, anno post, iure privatim docendi, per disputationem publicam *de arte loquendi*. Ille ipse annus ei fuit initium scholarum de philosophia habendarum: quae quantopere, et quibus de causis, celebratae sint, dicemus non ita multo post. Sed cum in eo genere probabilem facultatem exercitationum frequentia et assiduitate consecutus esset, statuit adiungere scholas iuridicas: quod fecit acceptis primum a. 1714. in Academia Erfurtensi Doctoris honoribus ac iuribus, quorum causa scripserat ac defenderat pro cathedra diatribam *de rationibus legum investigandis* ad l. 20. 21. π . de LL. deinde facultate iuris privatim in hac Academia docendi, per rescriptum regium, cuius facultatis extra ordinem impetratae ab eo, qui non in hac nostra Academia Doctor creatus esset, vix alterum aut tertium hoc exemplum erat. Atque ab hoc tempore semper utramque disciplinam lectionibus privatis tradidit, sed ita, ut in Iure se Institutorum, Pandectarum et Iuris Ecclesiastici finibus contineret. Et satis erat, quod ageret, qui universam philosophiam, pluribus die quaque horis, explicaret, et illa quoque tria adiungeret, et omnia recte et ex utilitate discentium agere cuperet.

Ad eas scholas, praesertim philosophicas, quantus factus sit concursus aemulantium studia sapientiae, non attinet

attinet dicere, cum nemo sit, cuius per aures ierit nomen Mulleri, Philosophi Lipsiensis, qui non pariter acceperit de inusitata frequentia iuvenum, qui ad eum venire discendi causa solerent: nec quisquam facile, certe memoria nostra, fuit ex eo genere doctrinae, qui eum hac in re, non dicemus, superaret, sed aequaret. Et ut illam frequentiam ei non temere contigisse, aut ab fraude quadam allectam confluisse intelligas, sed scholae Mullerianae fortunam firmis fundamentis nixam stetisse; per dimidium prope seculum duravit, repertique sunt, quorum non modo patres, sed etiam avi eo praeceptore usi essent: quae fortuna non solet esse, ubi frequentiam inanis opinio, aut malae artes fecere.

Huius tam felicitis disciplinae sero praemia publice cepit, sed cepit tamen, post viginti amplius annos, per occasionem externae conditionis, quae ei in vicina Halensi Academia offerebatur. Nam primum Professio Philosophiae extraordinaria cum stipendio data est a. 1731. et anno post ordinaria Dialecticae Aristoteleae; quem locum mors Christiani Ludovici vacuefecerat. Huius Professionis initia cum aliis legitimis speciminibus commendavit, tum Disputatione pro Cathedra defensa, *de Emigratione religionis causa suscipienda*; cui materiam migrationes, quae tum e Salisburgenſi Dioecesi religionis causa fiebant, suppeditarant. Nec in ea laudanda argumenti modo gratia valebat, sed etiam explicationis ipsius modus; qui ab omnibus existimabatur talis, ut ab nullo alio luculentius ea res tractata videretur. Itaque etiam germanice versa accessit Schelhornii *Historiae migrationum Salisburgenſium*, quam e latina germanicam fecerat Frid. Wilh. Stubnerus, Philosophus et Mathematicus egregius. Sed praemium illud regium mox secuta sunt alia, quae erant in potestate Collegarum, ut locus inter Sodales Collegii Principalis minoris, ut Curatio Collegii Paullini, et Decemviratus Convictu publico curando: ut nihil dicamus de Magistratu Academico, et Decanatu

Decanatu Ordinis Philos. quibus aliquoties, magna cum fide et dexteritate, functus est.

Genus Philosophiae sequebatur elegans, quod nullius se magistri placitis adstringeret, sed, quae vero similima viderentur, ea probaret, quemcunque auctorem haberent. Itaque non dubitabat, in multis discedere a Doctore suo Rudigero, quem etiam perspicuitate et suavitate docendi ac scribendi multum superabat. Sed ab eo dissentiebat, ut discipulum a magistro, philosophum a philosopho decet, sine ingrati animi suspicione, sine insectandi acerbitate, conservataque modestia et amicitia vetere. Ac nescimus, an debuerit Rudigero hoc nomine vel maxime probari hic discipulus, quod a magistro suo discedere vel auderet vel posset. Neque enim illud optimum genus discipulorum est, nostro quidem sensu ac iudicio, quod nihil non credit magistro, omnia cum pulvisculo arripit. Quid enim aliud facere potest tardissimus quisque, aut quid facit? quamquam non tam credit, quam ediscit psittaci more et repetit. Nec aliter ab aliis, ut a Wolfio, dissensum, neque in lectionibus, neque in libris profitebatur, quam exponendis modeste rationibus suis, omni contemptu atque odio secluso. Nec erat eo ingenio, in quod acerba de opinionibus dissensio caderet. Alienus ab invidia, et ab superbia, quae sua sola probari laudarique vult, quae sola gignit illam scholasticam adversus aliorum opiniones acerbitatem, studiosusque hominum et consociationis humanae, quicquid alienum esset a vitae communis humanitate, inprimisque illam paedagogicam acerbitatem adversus dissentientes, ab se longe abesse volebat. Novam vocari philosophiam suam non tam volebat aut gaudebat, quam ferebat: quippe multa se debere non modo praeceptorum suo Rudigero fatebatur, sed etiam aliis recentioris aetatis philosophis, Cartesio, Grotio, Lockio, Leibnitio, Thomasio, Wolfio, et aliis. Sed volebat meminisse, qui ita loquerentur, non modo non adeo nova esse pleraque, sed

sed etiam, quae nova essent, in veterum inventorum fundamentis aedificata esse. Atque etiam eos, qui haud dubie et de confessione omnium, qui aliquid intelligere et iudicare possent, magni Philosophi recentioris aetatis essent, ut Grotium et Leibnitium, in veterum libris admodum versatos fuisse, nec quemquam magnum esse aut fieri in philosophia posse, qui non eadem via persequenda ad eam laudem contenderet. (*T. I. Phil. praef. p. 3. 4.*) Caeterum quae de philosophia sive latine sive germanice scripsit, etiam orationis genere commendantur, quo non ille quidem elegantissimo usus est in utroque genere, sed tamen meliori, quam vulgo utuntur, qui de philosophia latine scribunt, vel germanice: illis fere ad barbariem inclinantibus, his novo quodam genere utentibus, quod, si quis de superiori seculo in vitam rediret, intelligere non posset.

Docebat assidue, multis die quaque horis; etiam in ultima senectute ad minimum ternis. Nec unquam deerant, qui eius operam expeterent. Et habebat genus docendi multas illecebras: primam omnium et efficacissimam, perspicuitatem singularem, quae paene cogeret homines intelligere, quae traderentur. Itaque qui illum non intelligeret, eum nihil intelligere posse, vulgo ferebant. Quoad et quoties quaeque res tradenda esset, ut omnium ingeniis ad percipiendum apta fieret, plane tenebat. Accedebat hilaritas quaedam in differendo, non quae risus captaret parum decore, sed quae indicaret magistrum, libenter et cum propria quadam oblectatione agentem, quod ageret, et alacritatem quandam ostentaret, qua mirifice vel tenetur ingenii iuvenilis celebritas, vel tarditas incitatur. Ea porro alacritas erat etiam in sene tanta, ut post ferias legitimas se recreari diceret docendo, et cum ex levi corporis imbecillitate laboraret, ad lectiones, etiam contra medicorum voluntatem, tamquam ad remedium festinaret.

Nee

Nec vero Scholae umbra se continuit illa praeclara Viri, in rebus imprimis philosophicis, doctrina et facultas subtiliter, perspicue, atque etiam cum gratia quadam differendi, sed etiam luci se commisit, edendis scriptis pluribus, e quibus ea facile intelligi posset. Atque ut mittam breves chartas programmatum, quae a Professoribus per vices necessario scribuntur, primum Balth. Gratiani, Hispani, *Aulicum*, germanice versum, et illustratum locupletatumque notis egregiis et merito laudatis, sub *Oraculi* assidui et domestici novo titulo, tribus voluminibus edidit a. 1715. 17. 19. octonis *). Post adiunxit animum ad conficiendum modicum Corpus Philosophiae, quo in lectionibus habendis vteretur, sed quod posset etiam vñsibus servire eorum, qui philosophiae per se cognoscendae studiosi essent, legereturque ab extraneis, ut, quod philosophiae genus sectaretur, viderent, cognoscerentque, inanes esse criminationes, quae sibi exprobrarent novas et periculosas sententias. Id primum a. 1728. et sequentibus annis, per partes editum, paucos post annos, celeriter direptis exemplaribus, repetitum est (a. 1733.), sed ita, ut multis locis vel accuratius scriptum vel auctius esset. Constat opus tribus tomis, quorum vnus Dialectica et Physica, alter Metaphysica, Ethica et Politica, tertius autem ius naturae et gentium explicat. Materia lectionum proprie est in Aphorismis; sed iis subiectae sunt omnibus notae, interdum longiores, quibus vel pars aliqua aphorismi latius explicatur, quam in scholis fieri potest, aut illustratur consensu antiquorum philosophorum, in quibus frequentissima mentio est Aristotelis, aut, quae post primam editionem contra disputata erant, ab Rudigero imprimis, diluuntur, denique opiniones contrariae multorum refelluntur. Quas si quis legerit diligenter, facile animadvertat, quanta etiam copia doctrinae et lectionis fuerit,

*) vid. Act. Erud. germ. fasc. 49. Stollii Hist. Erud. III. 5. 29.

fuert, aptae ad exornandum philosophiae velut aedificium: nam cetera bona iam ante commemorata sunt. Offensionem habuit inprimis, quod Iuris naturalis, latius dicti, quod de officiis cuiusque erga se et alios praecipit, principium cognoscendi faceret vtilitatem privatam, e qua nata esset confociatio humana, quae officia erga alios fundaret. Sed ille vtilitatem non defendebat eam, quam intelligunt, qui bene latine loquuntur, sed quae esset in vera felicitate cuiusque, quam alii perfectionem sui, magis metaphysice, et minori cum offensione, sed eodem sensu dicunt. Ceterum officia, quae sibi quisque debet, in Ethicis tractat, ea autem, quae aliis debemus, sola in iure naturae explicat, quod angustius dicitur. In quo frustra accusabatur a Rudigero (*v. P. III. p. 64.*) quod eam sibi rationem iuris naturalis tranſtandi sublegisset, qui primus viderit, ad ius naturae tantum hoc genus officiorum pertinere; cum nemo veterum latinorum ius naturae latius dixerit.

Qui vitam tot per annos consumserat in literis discendis ac docendis, videbaturque natus et factus ad docendum, tamen non minus aptus erat ad res agendas. Itaque eius opera fideli et vtilissima multos per annos vsumus in rebus Academiae communibus tractandis, quae sub eius manu etiam meliores et auctiores factae sunt. In quo plurimum adiuuabatur vero Academiae amore, et studio adversus Collegas, quibuscum, quoad quisque vellet, amicitiam et concordiam coluit. Nemini se anteponebat: non sui arbitrii erat: non in sententiis pertinax, aut vincendi adversus collegas cupidus: omnibus obsequi, prodesse, placere cupiebat: amicus fidelis, sodalis iucundus. Quo maius desiderium, quamquam valde senex mortuus, publice privatimque reliquit. Amorem gratum erga Academiam, de qua per tot annos abunde meritus, et satis gratus videri debebat, etiam testamento declaravit, quo pecuniam suam propemodum omnem destinavit Facultati Artium, ut Professorum inde

D

stipen

stipendia perpetuum auctarium, ipsi autem monumentum sui in Ordinem amoris haberent.

Nec minus illa assiduitas, et non modo patientia, sed etiam alacritas in laboribus sustentabatur naturali robore corporis, quo etiam morborum causas e vitae genere, et impetus ipsos superabat. Cum tentaretur interdum doloribus e calculo renum: celeriter levabatur, vel excernendis calculis minoribus, vel eiecta per urinam materia plurima viscida, calcis similitudinem referente. Acciderat ei etiam hoc incommodi, ante decem amplius annos, ut acies oculorum cataracta opposita obscuraretur. Sed ea cum in altero depressa manu artificis adhaesisset (nam in altero nondum ad maturitatem concreverat) ita eo oculo valuit, ut, vitro convexo admoto, omnes ei usus necessarios praestaret. Tentatus est vergente aetate etiam aliis malis, quibus alius fortasse succubuisset: at insita vis corporis ea non ita longo tempore discussit. In quo se dicebat adiuvari plurimum aëris liberi ac puri usu. Itaque cum se imbecillitate aliqua sentiret infestari, medicinam fere petebat ab excursionem paucorum dierum in vicinam silvam Academiae nostrae; unde se praedicabat semper velut recreatum redire. Sed omnia vincit paullatim senectus: et nulla vis corporis est tam firma, quam non ad extremum frangat atque conficiat aetas. Anni igitur proxime superioris mensibus humidioris et inclementioris aëris coepit interdum laborare difficultate respirandi, quae senilia maxime corpora solet infestare. In quo levabatur medicamentis, quae vel humores viscidos discuterent atque evacuant, vel corpus roborarent, celeriter succurrente Celeb. Ludovici nostri amica cura. Sed maior incubuit vis mali, primum auctumno superioris anni; adversus quam tamen utcumque sustentata est Viri imbecillitas: deinde principio veris proximi. Quo tempore cum accessisset febricula, ita corpus, aetate, laboribus, aliisque malis senilibus confectum, paulatim exaruit, ut vitae finem adesse sentiret. Itaque ommissis

omissis omnium humanarum rerum curis, et editis mandatis vltimis, totum se comparavit ad constanter ingrediendum iter, quod ante oculos esset, firmanſe cogitatione rerum coelestium, et colloquiis super iis cum pluribus, imprimisque Eichlero, apud quem edere confessiones solennēs Eucharistiae sumendae consueverat. In his cum mensem amplius exegisset, ipsis Kal. Maiis, hora tertia matutina, leniter expiravit, nactus vitae finem, qualem pie exoptasse diximus. Vixit annos LXXVI. cum mensibus quatuor: sed vivet porro vigebitque doctrinae, et meritorum in doctrinae studia, et hanc Academiam, memoria, quoad doctrinae ipsae vigeant, et haec officina doctrinarum stabit. Sed nostrum maxime erit, qui praesentes virtutes Viri, vſuque cognovimus, sanctam habere eius memoriā, et cum ceteras virtutes eius, tum amorem vel in rempublicam nostram, vel in literarum et sapientiae studia, vel in adolescentes studia illa aemulantes imitari. P. P. Dom. IV. Adv. Dominici a. C. cldccclxi.

M E M O R I A CHRISTOPHORI WOLLII

THEOL. DOCTORIS ET PROFESSORIS EXTRAOR-
DINARII ET AD AEDEM S. THOMAE
DIACONI.

Quanta iactura publice facta sit in morte Christophori Wollii, Viri S. R. et Clarissimi, nemo potest ignorare, qui non ipsum et virtutes eius plane ignoret. Quis autem ignoret aut Virum eum, qui in luce Ecclesiae et literarum vixerit, aut virtutes eas, quae in tam amplo huius Civitatis theatro spectatae sint, et tot ingenii monumentis propositae late fulserint? Itaque virtutes ipsas commemorare, aut praedicare, supervacuum fuerit, ac prope in eas iniurium: relinquiturque vnum lugendae ac deplorandae calamitatis publice acceptae triste officium; quod hoc debemus magis, ac persolvimus libentius, quo magis adversus Viri tam bene de Academia et literis communibus meriti memoriam et debemus grati esse, et vero etiam cupimus. Sed pleraque amissorum in eo bonorum communiter lugemus cum multis, illud autem proprie, quod fuit in exemplo, saluberrimo cum aliis, tum iuventuti nostrae, his praesertim temporibus, quae maxime tali exemplo, vel ad confirmandum ac prope consolandum, vel ad incitandum atque inflammandum, opus habere videantur.

Etenim non facile reperietur in tota hac Civitate nostra, qui primum durioribus usus sit initiis pueritiae, cui tantopere ac tamdiu consistendum fuerit cum paupertate;

pertate; quae est natura sua molestior iis, qui propter ardorem discendi, lautiorum librorum et aliarum rerum apparatus desiderant ad illam sitim restringendam, et facile ingenium praeclarum, et altiora expetens, debilitat, atque aut ab studio suo reiecit, aut a recta via demovet. Enimvero ille constantia invicta et alacri fortitudine contra molitus est, et ab illis ipsis difficultatibus, quibus undique oppugnabatur, vires sumpsit aviditas discendi. Et illa erat neque simulata, aut verbis iactata cupiditas, ut saepe, nec quae satiari se pateretur iis, quae aliorum studium abunde explent, atque etiam fatigant, sed qualem Socrates vere excellentis ingenii haud ambiguum signum faciebat, hoc est, quae omnia complecteretur, quorum scientia in laude poneretur. Itaque multas linguas, latinam, graecam, hebraicam, omnes longe supra mediocritatem didicerat: etiam novitias adiunxerat, Francicam, Britannicam, Hetruscam, Belgicam: partes humanitatis omnes, philosophiam omnem: denique Theologiae partes universas ita perceperat, ut difficile esset decernere, in qua praecipue excelleret; cum non magis erudite interpretaretur, quam subtiliter differeret, nec modo acute in scholis disputaret, sed etiam accommodata ad captum popularem de fide et officiis concionaretur. Quid dicam de scientia historiae, non modo civilis antiquae, sed imprimis ecclesiasticae, et disciplinarum theologicarum omnium, item librorum in omni genere literarum ac doctrinarum, in quo studium suum posuerat? Nec illa librorum scientia erat similis notitiae ei, quam boni librorum propolae tenent, sed digna docto viro, quae ad res ipsas cognoscendas, et ad apparatus doctrinae recte usurpandum prodesset. Et ea omnia ita habebat in promptu, propter felicitatem ingenii, assiduitatemque exercendi, ut nunquam in vlla re, de qua quaestio aut sermo incidisset, destitueretur.

Sed nec illa pertinax cum paupertate conflictatio, nec haec tanta, tam copiosa et parata scientia, infelix

fuit. Etenim et illa ita victrix evasit, ut non modo ipsa paupertas cum toto incommodorum et molestiarum satellitio cederet, sed etiam loco pulsae succederet Bona Copia rerum omnium, et ad finem usque permaneret, et doctrinae varietas et copia praemia tulit in omni genere ea, quae non saepe contingunt eidem; cum et nomen Viri longe lateque celebraretur laudibus doctissimorum hominum, nec modo popularium, sed etiam externorum ac locis disiunctissimorum, in praesentem autem confluerent honores et emolumenta iucundissima: ut ipse fateretur, sibi longe supra spem ac vota contigisse res secundas.

In quibus omnibus quam multa sunt aptissima, primum ad confirmandam honestam et probam paupertatem, ne abiiciat animum, sed pertinacia laboris, constantiaque studii, confidat, se impedimenta fortunae, quamquam potentis adversariae, superaturam, speretque res meliores, quae semper contingunt tandem iis, qui sapientiam vero et constanti et pio adversus Deum animo coluerunt, tantoque plus secum adferunt suavitatis, quanto post plures et maiores aerumnas contigerunt. Sed qui similem fortunam optet, aut sperare velit, Wolliano exemplo fretus, idem Wollianae patientiae, constantiae, et industriae exemplum imitatione vera et fidei persequatur: nec aequum censeat, sibi legere ac sperare, quod suavius sit, quod autem molestius putet, detrectare. Quam bene autem hoc exemplo admonemur, quantum bonum sit in ipsa illa paupertate, si accadat iis, qui ab ingenio bene sunt constituti, hoc est, in quibus celeritati percipiendi par adiuncta est cupiditas discendi? Etenim videmus, illa ipsa difficultate, quam paupertas obicit, acui posse ingeniorum vim, et, velut maiorum atque celeriorum fluminum, ab obiectis molibus, incitari et augeri. In quo quantum sit ad consequendam eruditionem magnam et copiosam adiumentum, quis non intelligit? Quo minus etiam talis bonarum mentium pauper-

paupertas magis beatas atque ad eruditionis magnae et publice privatimque fructuosae gloriam feliciores putare debet divitias, quibus citius retardantur ingenia et franguntur, quam incenduntur ac confirmantur. Circumspicite quaeso, Carissimi Cives, et numerate clariores omnium disciplinarum doctores, quos vel haec Academia ad hoc usque tempus habuit, vel qui alias suae doctrinae lumine illustrarunt: reperietis, longe maiorem esse numerum eorum, qui ad eam facultatem et gloriam a paupertate profecti sint, quam qui a rebus lautis ac divitiis venerint. Ipsius autem doctrinae Wollianae quam luculentum exemplum est, sive magnitudinem eius videamus, sive genus et modum. Nam primo, qui tot linguas, tot artes ac disciplinas, tam bene et copiose tenuit, non satis docet, quantum capiat ingenium humanum, si modo aperire se doctrinae vndique affluenti, eamque serio complecti, exaggerare eius thesauros, et fideli custodia retinere velit? non pudorem incutit ignaviae, quae tam libenter angustis se vnius disciplinae finibus continet, atque etiam se ingenii humani imbecillitate, et disciplinae cuiusque amplitudine velat, et, ut etiam impudentior sit, modestae cuiusdam sapientiae nomine ornat? Quis porro non videt, in illa primo linguarum variarum inter se, deinde artium et doctrinarum consociatione, rursusque linguarum et doctrinarum copulatione, esse pulcherrimam bene discendi disciplinam? quae perspicue doceat iuvenes, qua via ad Theologiae accuratam et exquisitam scientiam pergendum sit, ipsaque Theologia, quae proprie dicitur, quam multarum artium comitatu stipata esse debeat.

Haec exempla autem praesto esse, et oculis obversari iuvenum, et commendari, quando magis, aut aequè necessarium fuisse dicamus, quam hoc misero et calamitoso tempore? quod non modo belli vi, sed etiam multis multorum malis artibus, avaris fraudibus, et impia immanitate, vel adfert paupertatem, vel aggravat, tollendis

paupertatis honestae perfugiis, vel ita minatur in posterum iuventuti ac denunciat, ut deterrere eam a studiis doctrinae velle videatur; quae etiam pro nihilo haberi prae pecunia, et pecuniarum spe, nullo alio tempore magis patuit. Quam alieno autem tempore de Civitate nostra et Schola sublatum est exemplum tanti laboris, tam efficacis industriae, tam insatiabilis in discendo et cognoscendo aviditatis; cum ita sunt inclinata omnia in studiis literarum ad compendiariae doctrinae ignaviam, laborum in discendo et exercendo fugam? Nec vero parum incommode ita cecidit, ut in illo Viro nobis eriperetur, qui vel tacita exempli sui exprobratione oppugnaret illud discidium linguae et cordis, quod a tam multis inducitur atque etiam commendatur, qui doctrinam barbaram, et literis atque humanitate destitutam, non modo sequuntur, sed etiam laudant. Quo magis etiam faciendum est, ut, exprimenda Vitae eius imagine, saltem memoria talis Viri commendetur studiosis doctrinae, si vel sic aliquo modo tam multiplicis exempli auctoritas et fructus conservari possit.

In quo praedicanda est Urbis nostrae ac Civitatis felicitas et benignitas, quae hunc Virum protulit, fovit, atque ad honores extulit. In ea natus est d. xxiiii. Ian. an. cldccc. tenuis fortis, at honestae parentibus, patre Martino Christophoro, Ioachimi Philippi, civis Stolbergensis, et Magdalenae Peterdorffae, filio, matre Susanna Catharina, Ioannis Troiani, civis Schlaesens, et Catharinae Hassiae, filia: quibus mature privatum ad se recepit, et paterno animo educavit patruus, Io. Valentinus, civis Bornensis. Literas didicit primum in ludo illius oppidi, ita studiose et feliciter, ut celeriter condiscipulos ceteros superaret. Nec satis habuit discere, quae a praefectore publico traderentur, sed etiam domi assidue legit libros graecos et latinos, quos ei suppeditasset D. Lucii, Sacrorum Antistitis, et Henr. Fulmichii, Consularis, liberalitas. Inde annos natus quindecim venit huc, in disci-

disciplinam et contubernium Scholae Thomanae, decreto Ordinis amplissimi, suffragante Gotfr. Graevio, Consulari, cui coram ingenium et profectum in literis probaverat. Ibi vero non modo literas eas, quarum tum in ea Schola disciplina erat, diligenter ac studiose coluit, sed etiam hebraicas adiunxit, vsus opera M. Matthiae Georgii Schroederi, qui orientales literas tum privatis scholis docebat. Tribus annis post, cum ex illius Scholae disciplina, cum luculento Praeceptorum testimonio, discessisset, Academicos doctores coepit audire, Philosophiae discendae causa, per tres solidos annos, Andream Rudigerum, Theologiae, Io. Gottlob Pfeifferum, Hermeneuticae denique sacrae, D. Christianum Frider. Bopnerum. Arabicas etiam literas coepit discere, magistro Carolo Datichi, Graeco Antiocheno, qui tum in hac Urbe commorabatur. At non contentus iis, quae in scholis traderentur, ipse assidue curioseque legendo, scribendo, cogitando auxit scientiam a praeceptoribus acceptam. In quo vsus est bibliothecis publicis privatisque, nulla insuper occasione bonorum librorum videndorum, et ad legendum sumendorum, praetermissa. Eos autem ita legere consueverat, ut inter legendum singula excuteret, consideraret, quid probandum reprobandumve esset, videret, denique horis nocturnis excerpta in certos locos reconderet. Haec tanta aviditas legendi et discendi cum vulgo nota esset, offerebantur ei undique libri boni et novi ad legendum, etiam a librariis, qui amare soleant, si qui sunt liberalioris ingenii, homines mercis suae intelligentiores et amantiore. Sed ne legendi studium libris modo vernaculis, graecis et latinis, contineretur, linguas etiam externas, Britannicam, Hetruscam, Belgicam didicit, omnes sine magistris, quibus solvere pro opera sibi navanda non poterat. In quo quantum laboris exhausserit, facile intelligi potest. Ceterum cum ita recte pronunciandi modum ignoraret, post, cum facultas data erat, magistris earum linguarum

haecenus usus est ad breve tempus, ut pronunciandi modum disceret. Atque hic tantus amor literarum atque doctrinae, eique adiuncta probitas vitae, conciliavit ei non modo Praeceptores, ut eum amarent inprimis, sed etiam alios, in his L. Romanum Tellerum, patrem eius, qui nuper Ecclesiam non magis quam Academiam nostram ornavit, Virum singularis sanctitatis: a quo commendatus Abrah. Christophoro Plazio, Consulari, Patrum reperit, qui primum victu praebendo, deinde verè etiam aliis beneficiis adiuveret.

His igitur initiis niti coepit et ad illam doctrinam, quae tantae ei laudi fuit, et ad honores et fortunas. Et honorum quidem cursus hic fuit. Primum Magister Philosophiae creatus, privatim docendi ius nactus est, specimine legitimo ad disceptationem publicam proposito, *de facultatibus intellectualibus in bonos habitus mutandis*. Deinde adscitus est a. 1725. in Catechetas Petrinos; octo autem annis post destinatus Concionibus in aede D. Nicolai diebus Saturni a meridie habendis: quo temporis tractu etiam Baccalaureus S. Theologiae creatus est. Sed haec initia tenuia, quibus satis diu contentum esse oportuit, inde ab anno XXXVII. maiora et luculentiora et frequentiora praemia secuta sunt. Nam eo anno Diacono emerito, primum in Nova aede, deinde in Nicolaitana, adiunctus est: duobus annis post ad aedem Thomam translatus, Diaconus concionibus meridianis habendis merere coepit: e quo gradu, quatuor annis, ad secundum in ea aede, qui est Archidiaconatus, pervenit: pervenissetque ad primum, nisi a valetudine, de qua post dicemus, impedimentum oblatum fuisset. Inter haec etiam Academicis ornamentis auctus est. Nam a. XLI. secundum gradum Theologorum honorum cepit, anno autem XLVI. summum. Accessit ad extremum, anno post, ornamentum a Principe, data Professione Theologiae extraordinaria.

Etenim

Etenim a studio docendi, quod cum primis honoribus Academicis susceperat, et ipsa consuetudine docendi auxerat, nihil remisit, postquam sacrorum faciundorum munus receperat: sed quamquam hoc, ut nunc sunt tempora, prope totum hominem occupat, et plus, quam satis est, laborum habet; tamen ipse nullo modo passus est se a docendo abstrahi, sed semper aliquot horas, ad extremum, cum valetudine oculorum impediretur, vnam saltem die quoque erudienda iuventute consumsit. Solebat autem maxime operam docendi ponere in interpretandis scripturis sacris, de qua parte sanctae disciplinae etiam scriptis bene meritus est, et in explicandis scholae modo dogmatibus theologicis. In docendo porro mira alacritas erat, et quaedam celeritas ab exercitationum frequentia et diuturnitate, atque etiam fiducia quadam iusta, per quam etiam tarda ingenia incitaret, et secum abriperet. Ea porro adiuuabatur a facultate bene loquendi, non modo hactenus, ut facile ac bene posset dicere, quae vellet, sed etiam, quod ea dabat brevitatem in disserendo, quae nec rebus obesset, nec perspicuitatem impediret: quam brevitatem, nisi, qui sit in artibus bene latine dicendi egregie versatus ac tritus, consequi in docendo ac scribendo nullo modo potest. Itaque etiam disciplina eius a quamplurimis expetebatur, et ad extremum usque diem vitae ei corona auditorum non defuit.

Sed cum studiose doceret iuventutem, propter amorem doctrinae; multo etiam studiosius ac diligentius partes muneris ecclesiastici exequabatur. Concionantis mira perspicuitas erat: delectus rerum ita aptus ingenio populari, ut etiam doctis serviret: denique aliqua gratia, digna rerum sanctitate. Itaque libenter audiebatur a multis. Qui eius curae proprie se crediderant, confessionibus edendis, qui erant permulti, eos ita curabat, ut etiam vehementer et parentis modo amaret.

Nec

Nec vero agendo tantum protulit doctrinam, sed etiam scribendo. Nulla est pars doctrinae sacrae, quam ille non vel vniuersam illustrarit literis, vt interpretandarum literarum sacrarum et Theologiae moralis disciplinam, vel parte aliqua, explicanda accuratius, aut defendenda. Sed maxime amplexus est sacrarum literarum interpretationem, in qua, propter scientiam linguarum, plurimum valebat. In eo genere cum alia multa bene scripsit, quae infra commemorata sunt, tum de *Parenthesi sacra* egregiam Diatriben, de *Calmetianis regulis interpretandi scripturas*, et *Hermeneuticam N. T.* Graecam N. T. orationem defendebat aduersus eos, qui paene totam hebraicam facerent; non haecenus, vt nihil ex hebraico sermone ductum haberet, sed vt longe minus, quam nonnulli iudicarent, inprimisque is, qui in Batavis aduersus Rollinum negauerat, Novi Testamenti Volumen inter Classicos auctores numerandum esse, e quibus sermo graecus disci a pueris debeat: cui proprium libellum opposuit. Nec minus bene mereri studuit de literis humanioribus, non modo ita, vt eas diligenter commendaret, et cum sacris coniungendas esse, praeceptis et factis doceret, sed vt etiam scriptis pluribus illustraret. Nec eaq; male de ipso merita sunt. Nam earum commendatione olim receptus est in domum Schacheri, Medici Clarissimi, ad erudiendos filios; in qua per decem annos benigne habitus, et omni genere beneficiorum cumulatus est. Nec alia magis scientia ipsi vel conciliavit, quorum patrocinio ad eam, qua post vti coepit, fortunam est productus, vel aditum ad famam, etiam apud externos, et gloriam dedit, quam sine his literis magnam, et late patentem, et diuturnam contingere non posse, et res et vsus omnis aetatis docet.

Sed in partibus praecipuis felicitatis, ad quam, Deo bene iuvante, se pervenisse gratus praedicabat, inprimis numerari debent matrimonia: quorum alterum, a. XXXIX. cum Christiana Elisabetha, D. Friderici Werneri, ad aedem

aedem Nicolaitanam Archidiaconi, filia, Virgine ornatissima, initum, tribus annis post, mortē Vxor̃is optimae dissolutum est, alterum ad mortem ipsius duravit. Nam altero anno a prioris Coniugis mortē, duxit Fridericam Elisabetham, D. Christiani Friderici Boernerī, filiam, in quo ipso felicitas permagna erat, Virginem animi corporisque dotibus ornatissimam: quam et amavit, vti debuit, maxime et constantissime, et amantissimam sui in secundis rebus et in adversis expertus est; cum ea, supra quam ab illo sexu, et a foemina, quae in illa fortuna nata et educata esset, postulari posset, in societatem incommodorum se daret, et eorum onera allevare Coniugi, consolando, et multo magis vigilando et laborando, studeret, exemplum fidei coniugalis ad posteritatem pulcherrimum futura. Vtrumque coniugium foecundum habuit: primum, duabus filiabus, quarum alteram Fridericam Elisabetham, infantem amisit, alteram Christianam Sophiam ipse, non longe ante mortem, despondit M. Mauritio Wilhelmo Schlesiero, Viro reverendo et docto, qui in villa Grostreiben, haud procul Torga, caste et religiose sacra facit: alterum vna filia Friderica Rahele, Ornatissima Virgine, et duobus filiis, Christophoro Friderico, et Christophoro Gottlieb; quos Patris et Avi materni simillimos speramus futuros. Liberorum amantissimum, et in magna indulgentia tamen severum Patrem fuisse, vel illud documento est, quod filium maiorem, non modo ab aliis doctis hominibus bene erudiendum curavit, sed etiam ipse in partem institutionis venit, quotidie non modo quaerendo, quid egisset, didicisset, sed etiam vnam et alteram horam magistri munere fungendo. Quae utinam felicitas ei diutius mansisset, et ad fratrem minorem venire potuisset! Sed aliter visum est Deo, rerum humanarum omnium arbitro, cuius in voluntate reverenter acquiescere fas est.

Commoda valetudine cum usus esset a pueritia, per quam illa alacritas in omnibus rebus, illa invicta laborum-patien-

patientia sustentata erat, paullo maior quadraginta annis, coepit imbecillitate tentari, quae graves morbos gigneret. Eius causam medici repetebant ab corporis habitu, qui mollior et succulentior a pueritia fuerat. In eo cum per se matura senectus cum suis incommodis veniat; apud nostrum hoc celerius venit, quo molle corpus in iuventute durius tractaverat per paupertatis necessitatem et discendi aviditatem. Haec igitur imbecillitas non modo imparem gravioribus laboribus diutius sustinendis fecit, sed etiam alia mala attulit, quae ex humorum tenuitate et abundantia nasci solent: sudores nocturnos, quos saepe febricula, aut δυσπεψία, aut catarrhus, aut arthritidis secuta est, et cum singulis imbecillitatis accessio. Hinc etiam gravis oculorum morbus venit, in quo curando frustra laboratum est. Sed per hunc ipsum valde auctum est malum, adempta laboris materia et motu intentiori, qui in principio imbecillitatis subinde profuerat, coepitque corpus ex hypochondriis laborare. In quo morbo cum aliquoties levamentum accepisset ab usu acidularum Egranarum, instituit iis uti singulis annis. Nec effectu optabili caruere. Sed proxime superiori hieme, ex terrore subito, et secuta terrorem refrigeratione, repente eum invasit febris similis catarrhali, cuius tanta vis fuit; ut vitae periculum adiret. Evasis tamen periculum, et per medicamenta idonea, quae solers cura Iankii, Viri Cel. proposuerat, ita paullatim corroboratus est, ut optime se valere diceret. Ceterum ineunte aestate rediit ad acidulas, quas sibi adeo salubres expertus erat. Eae per quatuordecim dies sumtae, cum plurimum profuisse viderentur, alios quatuordecim ei aquae sumendae destinatae, et lagenas singulas in dies quosque. Per aliquot dies nihil incommodi animadversum est: at die sexta Iulii repente omnia in perniciem versa sunt. Nam cum mane, aqua Egrana pota, etiam calidam bibisset, solita cum alacritate, absque ullo incommodi alicuius sensu, subito praecordia sibi queritur opprimi,

primi. Sed initia ista mali gravioris erant. Ecce vero paullo post eas malum vires sumsit, ut Virum, tanquam apoplexia attonitum, in lectulum adstantem deiiceret. Tardum erat, Iankium vocare, qui procul ab ea domo abesset: quamquam et ipse vocabatur. Arcessitur e proxima vicinia Bosius, V. C. et ab arte eius, multis praeclaris curationibus nobilitata, auxilium petitur. Is vero cum celeriter accurrisset, tamen moribundum reperit: Iankius autem, qui paullo post et ipse accessit, mortuum. Sensit statim Vir beatus, vitae finem adesse, et ita sensit, ut nec perterrefactus concideret animo, nec ullum signum animi non parati ad illud iter constanter ingrediendum ederet. Bono animo suos esse iubet, imprimis Vxorem, quae prope magis ipso torpebat ab illa plaga: dat mandata ultima: animum commendat in manus Domini nostri: ita exspirat.

Percussit non modo suos ille tam repentinus et gravis casus, qui multiplicem iacturam moerebant, sed omnes, ad quos fama tam inopinatae rei manarat, qui etiam in societatem luctus venerunt, aestimanda et privata calamitate eorum, quibus maritus, pater, socer, affinis ereptus esset, sed etiam publica. Quam iacturam Nos maxime aestimare ac dolere convenit, qui doctrinae publicae praesumus, et, propter merita Viri in Ecclesiam, Academiam, et literas, optare, ut Deus tutelam eorum suscipiat, quos mors eius gravius et propius adflixit. Vos autem, Cives Carissimi, hoc exemplo moniti, discite paupertatem aequo animo ferre, eiusque saevitiam patientia laborisque constantia superare: discite aspera illa et longinqua via, sed una vera, ad doctrinam et laudem contendere: discite vero etiam mori. P. P. Domin. II. p. Epiph. A. C. c1616cclxii.

M E M O R I A
IACOBI CHRISTIANI SEILERI
MEDICINAE DOCTORIS

Cum vniuersa hominum natura, facta ad similitudinem et imitationem beneficentissimae naturae Dei, et esse debeat, et vero etiam sit post Deum maxime benefica, nec quisquam ita tenuis sit ac humilis, vt nihil conferat, aut conferre possit ad communem vtilitatem, cum etiam ex iis, quae ad suam necessitatem quisque et vtilitatem comparavit, aliquid redundet ad communem, saepe etiam plus ad communem, quam ad privatam: tum vero antiquissima, nec utique falsa aestimatione, maxime benefici habiti sunt ii, quorum ingenium et opera in vita hominum et valetudine tuenda, et mortis morborumque periculis depellendis consumeretur. Etenim nomen *Evergetae*, quod ad maximorum et vbertimorum beneficiorum praedicationem memoriamque vsurpavit vetustas graeca, et libentissime adscivit vanitas regum ad beneficiorum suorum magnitudinem ostentandam, id, memoriae traditum est, primo tributum esse Aesculapio, qui artem hanc invenisse et homines docuisse putaretur. Et cum id verbum natura sua esset commune omnibus, qui commodi aliquid adiunxissent vitae cuiusquam, tamen maxime haesit in iis, qui vitae periculum medendo depulissent, aequatumque est pulcherrimo *Soteris* i. e. *Servatoris* nomini, omninoque proprie *Evergeta* dictus, qui Servator et esset et appellaretur. Itaque frequenter in monumentis graecis iunguntur *Soter* et *Evergeta*, vt et genus beneficii appareat, et id super omnia alia extollatur,

tur, velut vnum aut maxime dignum ea appellatione: vicissimque Soteris verbum a servatae vitae beneficio translatum est ad alia, quorum tanta magnitudo esset, vt vitae conservatae aequanda viderentur *), velut mensura legitima beneficiorum ad vitam humanam pertinentium esset in vitae conservatione, tantoque maius quodque beneficium esset, quanto propius ad eam accederet.

Ac profecto, si velimus perspicere sensus nostros, et excutere intelligentiam communem, facile reperiamus, hanc mensuram beneficiorum non levitate aliqua susceptam, aut per inscitiam constitutam, sed ab ipsa natura traditam esse defixamque in mentibus humanis. Quod enim est humanum in his terris quantumlibet bonum, quod non et debeat postponi, et sine dubitatione postponatur vitae, quae est veluti ceterorum omnium basis quaedam, qua eversa, tollantur cetera pariter omnia. Quod secuti Hebraei, vitam ita dixerunt, vt felicitatis vim omnem complecteretur; idque ad animum transferens sermo Apostolicus, Servatorem vocat, auctorem ac principem vitae, qui nos ab omnibus malis liberatos, ad veram et aeternam felicitatem traduxit. Recta autem valetudo quid est, nisi secunda quaedam vita, per quam non modo retinetur ac defenditur ea, quae proprie est vita, sed etiam facultas fruendorum bonorum humanorum datur, et ipse sensus bonorum non modo venit, sed et illuminatur ita atque acuitur, vt, ea recepta et firmata, ipsa bonorum nostrorum possessio restituta et confirmata videatur. Nam, vera et subtili aestimatione, ea modo sua quisque dicat, quibus vti fruique possit; estque imbecillitas valetudinis et aegrotatio simillima Horatianae inter opes inopiae. Itaque nulla suavitas est tanta, quae comparari possit cum ea, qua afficiuntur animo et corpore, qui e difficili ac longa valetudine recreati sunt ac refectioni; non modo quod praesenti vitae amittendae periculo

*) vid. dicta in Clave Cicer. in *Soter*.

culo liberati, in quandam spem securitatis adducuntur, cuius recentis suavissimus est sensus; sed etiam, quod ipsius valetudinis novae, hoc est, reviviscentium et gefientium virium animi et corporis, redditique bonarum rerum omnium sensus, mira est, nec vlla oratione exprimenda dulcedo.

Quo minus est mirandum, si, quorum consilio, prudentiae curaeque hoc tantum bonum debemus, eos vero, vt maximi beneficii auctores amplectimur, omnesque, qui se et vitam suam in ea arte collocarunt, eamque faciunt dextre et fideliter, vt communes Evergetas, non modo vivos colimus, sed etiam mortuos grata memoria prosequimur. Qui honos iis non ipsorum modo beneficiorum causa debetur, sed etiam, quod ea beneficia tribuunt primum promiscue et sine delectu, nemine ab auxilii sui veluti portu excluso, deinde, non vt ceteri, qui sine incommodo suo et molestia impertiunt aliis de eo, quod ipsis superest, quoque facile carent, sed cum magna aerumna et miseria sua. Nam si nulla miseria esset in assidue spectandis e propinquo malis humanis: quantum laboris sustinetur in istis perpetuis concursationibus? Quam plenum molestiae est, tot hominum perverstatem et stultitiam perpeti, impatientiam perferre, difficultatem exorbere, vivere ac, paene dicam, etiam dormire, ad aliorum arbitrium, non, quod beatissimum putatur, ad suum, saepe etiam, cum non possis, quod velis, malam gratiam inire.

Sed ex hoc genere nuper habuimus D. Iacobum Christianum Seilerum; quem qui communem Civitatis nostrae *Evergetam* dixerit, non profecto aberret a vero: adeo laboriose, fideliter, atque feliciter medicinam in hac Civitate fecit, adeo etiam diu! vt qui ante quinquaginta amplius annos se ad artem faciendam contulit, et ad extremum vsque diem vitae pari tenore operam suam longe plurimis navavit atque probavit. Sed ille non communi modo de causa, et vt ceteri eiusdem artis profes-

res,

res, *Evergetae* nomen honoremque meruit, sed etiam propriis quibusdam et praecipuis. Erat enim mirifice propensus ad benefaciendum, eiusque benignitas patebat omnibus, non modo qui expeterent, sed etiam aliis, quos aliqua de causa amaret, aut in honore haberet, omninoque dignos benignitate sua putaret. In quo se existimabat gratiam iis referre, quorum benignitate quondam sublevatus ad eam fortunam enixus esset. Itaque saepe, etiam iis, qui non postularent aut sperarent, gratuitam operam navabat: qui etiam solebant praeter ceteros praedicare assiduitatem in visendo, et diligentiam in curando. Nam non modo bene *docet amor*, ut est in proverbio, sed etiam bene *curat*: et in hanc quoque partem valet, quod Celsus ait, in praefatione operis, *utiliorem medicum esse amicum, quam extraneum*. Nec ille tam quaestui serviebat, cui sedulitas et diligentia non nimis aptae sunt, quam saluti hominum, operam suam expetentium, et indulgentiae suae ac fidei *).

Sed etiam alii, et per alias, quam quae cum arte eius coniunctae essent, occasiones, eum *Evergetam* experti sunt et coluerunt. Erat domus eius communis portus paternae gentis, et certissimum perfugium cognatorum omnium. Hinc consilium auxiliumque in rebus dubiis

E 2

et

*) Nihil, ut opinamur, impedit, quo minus, ipsa re admoniti, locum Celsi e L. III. c. 4. emendemus. *Ex his intelligi potest, ab uno medico non posse multos curari: eumque, si artifex est, idoneum esse, qui non multum ab aegro recedit. Sed qui quaestui serviunt, quoniam is maior ex populo est, libenter amplectantur ea praecepta, quae sedulitatem non exigunt.* Difficultas est in verbis *si artifex est*: quae cum ceteris non bene coeunt, ut sensit acutissimi et elegantissimi ingenii Vir, Io. Lud. Blanconus, qui in eo loco se haerere fatebatur. Si transponamus verba in hunc modum, *ab uno medico, si artifex est, plures curari non posse, eumque idoneum esse, qui etc.* plana erunt omnia. Medicus artifex opponitur ei, qui quaestui servit, artis securus negligensque. Probavit Vir illustris hanc rationem, a quo, quia et medicus artifex, et doctissimus est, paremque elegantis doctrinae copiam tenet, Celsi editionem numeris suis absolutam, quaeque et medicis et literatoribus satisfaciat, expectamus.

et angustis petebant, hic reperiebant. In quo numero se maxime memorant fuisse, primum D. Christianus Gottl. Eichlerus, ad D. Nicolai in hac Vrbe Pastor, quem ille non modo, quoad in Schola Misenensi fuit, sed etiam, cum in hanc Vrbe[m] studiorum causa venisset, beneficentia sua liberalissime fovit, post etiam omnibus in rebus enixe adiuvit: deinde Ioanna Regina, L. Schleusneri, ad aedem D. Thomae Archidiaconi, Coniux, Matrona ornatissima; quam, parentibus mature orbatam, ad se recepit, et non secus ac filiam suam, summa cura ac liberalitate educavit: a quibus vicissim, ut alter Parens, perpetuo amatus et cultus est; cum ipse eorum rebus secundis, ut suis bonis, gauderet, et eorum fortunam in magna inprimisque iucunda parte felicitatis suae poneret, denique, cum senectus eius morte Vxor[is] destituta esset, in eorum pietate suavissime acquiesceret. Nec minus carus fuit ac iucundus ceteris, qui eius benignitatem, curam, et studium consulendi rebus suis essent experti. Itaque, quamquam summa aetate mortuus, tamen magnum sui desiderium reliquit, nec inodo his, qui fructum aliquem ex eius benignitate ceperant, sed etiam ceteris, qui eum propter illam ipsam benignitatem amabant. Neque enim eos modo conciliat sibi vera et magna liberalitas, quos ea proprie complexa est, sed etiam, ad quos nihil ex ea pervenit: nec inodo propterea, quod in ea commune perfugium putatur, sed quod habet insitam a Deo commendationem ad animos humanos, eamque tantam, ut amare necesse sit, in quibus ea elucet.

Hunc tam beneficum, et cum hac, tum aliis causis amabilem ac venerabilem Virum edidit villa (*Hoekendorf*) inter Dresdam et Dippoldivillam a *MDCCCLXXXII*. die XVII. Martii, patre M. Balthasare Seilero, Sacrorum in ea villa antistite, matre Dorothea, Iacobi Lossii filia, qui Ecclesiae et Dioecesi Bornensi magna cum laude praefuit. Puerilis aetatis magistros habuit, primum domesticos, in his M. Io. Christoph. Eichlerum, qui susceptus mox Seilero, filiam

filiam eius in matrimonium duxit, ex qua Noster, quem ante commemorauimus, natus est; post publicos, Danielem Seiffium, ludi literarii in vicino oppidulo, quod a vitris fundendis, cuius rei officina est in vicinia, nomen habet, Rectorem, et mox Scholae principalis ad Grimmam magistros, Tobiam Petermannum, Georgium Ermelium, Io. Christianum Knauthium, et Sam. Iacobum: quibus ingenium, studium discendi, profectum in literis graecis et latinis ipsum, denique mores, ita probavit, vt ab iis cum luculento testimonio in Academiam dimitteretur.

Ceperat puerum lubido artis medicae discendae, allectum, vt fit, exemplo domestico, quod matris frater, Ieremias, in Academia Vitebergensi inter eius artis Professores claruerat. Accesserat postea imbecillitas valetudinis, cui se consulturum putabat, si ipse sibi medicus esse posset. Atque etiam alia artis bona conquiserat, quibus eam sibi ipse commendatiorem redderet: vnde ei argumentum orationis, de medicinae laudibus, natum erat, qua veniam scholasticae disciplinae impetraret. Et forte ita accidit, vt in huius Academiae cives referretur ab Ordinis medici professore, Io. Christiano Schamberggero, qui tum Academiam regebat. Is fuit dies XIV. Octobris anni 1610ccii. Aditum sibi ad illius artis disciplinam patefacere instituit per Philosophiam, et corporis humani per anatomicas notitiam: quarum alteram M. Carolus Frider. Pezoldus tradidit, ad alteram a M. Martino Nabotho adductus est. Posthaec ad maiores se doctores, Bohnios, Rivinos, Paulos, Schamberggeros, Etmulleros, Petermannos et Schacheros applicuit: quos cum omnes studio doctrinae cepisset, tum maxime benevolum et liberalem in se expertus est Schacherum. Nam ab eo receptus est in domum, et non modo docendo ad medicarum rerum scientiam institutus, sed etiam ad artis faciendae vsum exercendo et agendo adductus est, vt qui etiam ter secum in thermas Carolinas abduxit, vt opera

eius in curationibus istis vteretur. Quod beneficium ille non modo tum, eo, quo debebat, animo, accepit, sed etiam perpetua memoria ita prosecutus est, ut Schacherum vivum mortuumque alterius Parentis loco coleret.

Cum discendo exercendoque ita profecisset, ut ipse curandis morbis par esse videretur, consilium cepit, honores Doctoris petere in Academia extranea, delegeratque animo Dresdam, in qua, medicina facienda, rem quaereret. Sed intercessit ei consilio frater Patris vterinus, Christianus Satlerus, qui Mitueidae mercaturam faciebat. Is cum audisset, parari in hac Academia Gratulationem Secularem, auctor erat nostro, ut inter ea Solemnia Doctoris gradum capefferet, sumtumque in ea re faciendum benigne pollicebatur. Qua conditione accepta, cum specimina legitima per Examina et Lectiones edidisset, Disputationemque, *de morbis placentae uterinae*, pro Cathedra cum laude defendisset, inauguratus est Doctor Medicinae a. d. IX. Dec. a. c. MDCCIX. Tum, artis in hac Vrbe faciendae initio facto, statim sensit, adesse providentiam divinam rebus suis. Nam cum ita accidisset, ut, paullo post honores Doctoris acceptos, D. Fridericus Guil. Closius, Ordinis medici Adfessor, morbo gravi implicaretur, ab eo delectus est, cui curam eorum, qui suis consiliis vterentur, crederet, dum ipse valetudinem recuperasset. Quibus cum diligentiam fidemque abunde probaret, mortuo paullo post Cloasio, ab iis adscitus est in locum eius. Hac veluti hereditate, nec ea parva, adita, cum etiam indies augetetur numerus eorum, a quibus opera sua expeteretur, duobus annis post matrimonium iniit cum Regina Dorothea, Christiani Scholvinii, Typographi non obscuri, et Collegii typographorum Magistri filia, cuius virtutes cognoscendi facultatem propinquitas dederat. Cum hac vndequadraginta annos, summa concordia vixit, nec alium ex ea dolorem cepit, quam quem mors eius attulit. Id matrimonium omnibus aliis rebus beatum, prole caruit. Sed in

in naturalis prolis locum recepti sunt plures de propinquis, in his in primis ante commemorati, etiam heredes ab eo scripti, a quibus vicissim, vt et a Coniugibus vtriusque, parentis naturalis in loco amatus et cultus est.

Ceterum ea fortuna, quae ab initio fuit, ad extremum vsque permansit: semperque eius consilium et opera in valetudine tuenda morbisque curandis a per multis expetita est, mandata etiam ab Ordine Amplissimo cura aegrotantium in suburbano ad aedem Ioannis *ἡγεροντοκομείῳ*, quam per triginta annos summa fide sustinuit. Sed et ipse non defuit fortunae, et conservatis ad finem, et auctis omnibus, quibus ea vel diuinitus concessa, vel allecta esset ab initio. Quae pietas in Deum, quam integra, quam efficax in agendo, quam constans fuerit, sciunt omnes, quibus non plane ignotus fuit. In agendis rebus, quarum curam suscepisset, quanta diligentia, fides, industria fuerit, non his modo constat, qui eius opera sunt vñ, sed omnibus. Quotusquisque non miratus est saepe, cum extremis etiam annis, in summa senectute, videret senem festinare per vias vrbis ad visendos vel aegrotos, vel amicos alios, qui ei tutelam valetudinis credidissent, vt videret, si qua parte labaret, et fulcimento indigeret. Et in istis tot curis concursationibusque, etiam senis vultus semper serenitatem obtinebat, et prope hilaritatem, vt quae pectoris tranquillitate perpetua e pietatis et officii conscientia sustineretur. De beneficentia singulari supra diximus. Quis audivit quemquam de eo aliter dicere, quam in partem eam, vt integritatem eius, probitatem, officium, humanitatem laudaret? Quis non etiam senis consuetudine et sermonibus delectatus est, quos nihil nec tristitiae aut morositatis, nec loquacitatis inutilis ab senectute vltima traxisse videbamus et mirabamur. Quo minus mirandum est, si carus fuit omnibus, si eius incolumitatem et felicitatem ad suam curam propemodum omnes retulere. Quis enim non doluit, cum aliquid incommodi e lapsu, aut

alio tali casu, seni evenisse audisset? Quam multi etiam dedita opera hoc egerunt, ut eum aliqua inopinata benevolentiae suae significatione exhilararent. In quibus maxime insigne fuit Ordinis Medicorum amabile studium, quo quinquagesimum capiti Doctoratus annum ei, publice privatimque, Oratione, Versibus, Convivio, laetiolem effecit. Et erat tanti, exhilarare Senem, qui, quicquid huiusmodi esset ei tributum, accipiendi gratia augeret.

Sed in ceteris bonis Viri, etiam mortis genus, ipsius aestimatione, numeraverimus. Qui enim vix auditus est, optare aliquid humani boni, auditus est saepe, cum vitae finem facilem, et mortem sine morbi diuturni praegressione optaret. Quae ei, exacta sine morbis aetate, contigit. Nam cum ei puero corpus ita fuisset imbecillum, ut vitae longae spem concipere non auderet, ea post valetudinis firmitas fuit, ut semel tantum, non longe ab inito matrimonio, aegrotaverit. Et tum quidem periculose: ceterum, eo periculo superato, non nisi leviter aliquoties brevibus incommodis tentatus est, cum ostenderent se modo velut e longinquo morbi, non minarentur aut vim facerent. Quod ille non ad securitatem trahebat, aut valetudinis vitaeque longae fiduciam, quae est fallacissima, multosque cum maxima perniciē decipit: sed quanto magis abesse periculum videbatur, tanto magis se ab insidiis muniebat, non modo in illam partem, ne fretus firmitate corporis laberetur in infirmitatem, sed maxime in hanc, ne parum paratus ad vitam futuram opprimeretur a morte. Nam quotidie memor mortis, quae sibi serius ocus oppetenda foret, ita se comparabat, ita se suae Deo mandabat, ut nulla mors ei repentina et inopinata esse posset. Qua die mortuus est, antemeridianis horis, etsi ipse tentatus a levi catarrho, et sentiens solito maiorem imbecillitatem, qualis e defatigatione solet esse, tamen obierat plures e catarrho laborantes, a quo genere tum infestabantur longe plurimi, in his nepotem illum suum D. Eichlerum: a quo cum domum
relatus

relatus esset adoperta sella, subito pectus sibi vehementius opprimi sentit, intercluso paene spiritu. Re statim nunciata proximis, advocatur Ludovicus noster, Vir Celeb. opis ferendae causa. Sed mali vehementia remedio locum non relinquebat. Arctatur magis magisque spiritus et tardatur, ad extremum plane deficit; cum interea circumstantes et repentino malo paene stupentes amici adiuvant moribundum precibus, et D. Eichlerus piam animam commendat Deo, ad quem mox, exuta corporis vinculis, abiit. Dies is fuit X. Aprilis. Obiit octogenario maior. Corpus depositum est ad aedem S. Pauli, in Crypta Iuniae gentis, iuxta Coniugis ossa, ut ipse voluerat.

Vita Viri feliciter defuncti rebus humanis, ut ante quamplurimis profuit actionum salubritate, ita posthaec etiam prodesse debet exempli sanctitate, et multiplici admonitione, vel iuventuti apta vel senectuti. In eam igitur intueamur omnes, nec modo ut laudemus, sed multo magis ut imitemur, et ita demum Seni Venerando a nobis iusta facta putemus. P. P. Lipsiae Domin. VII. p. Trinit. a. C. MDCCCLXII.

M E M O R I A

D. FERDINANDI AVGVSTI
HOMMELII

CONSILIARII ELECT. SAX. IN IVDICIO PROVO-
CATIONVM PROF. O. PANDECTARVM ET CANO-
NICI NVMBVRGENSIS

In doctrinae partibus iis, quae terminis olim angustis conclusae, ita late patefecere fines, vt nunc spatium prope immensum amplectantur, vel maxime numeranda est scientia, quam profitentur hi, qui legum et iuris divini humanique doctores et interpretes appellantur. Nam cum ab initio nihil aliud fuerit, quam paucarum vnus civitatis legum, consuetudinum fori, et formularum notitia, quae nullis literis vteretur, nullis artis et scientiae compagibus teneretur, in qua solus vsus et memoriae vis valeret; post, in infinitum aucta paullatim legum multitudine et varietate, in quibus cognoscendis, interpretandis et ad causam quamque conferendis versarentur, qui se iurisperitos ferrent, omnium prope doctrinarum multa et magna adiumenta sibi adsciscere necesse habuit, et ad bene cognoscendum, et ad recte docendo agendoque vtendum. Itaque, si quis Iuris Consulti perfecti formam exprimere velit, profecto non minus, quam ille apud Ciceronem Crassus in Oratore, qui sit absolutus numeris omnibus, effingendo, multarum ac prope omnium artium ac disciplinarum scientiam ei adiungat, efficiatque, vt talem Iurisconsultum cogitare ac videre animo, nominare quemquem et reperire oculis nuspiam possimus.

Nam

Nam primum in eo requirat literas graecas et latinas omnium aetatum, ad leges omnes omnium temporum intelligendas et interpretandas: nec terminos angustiores ponat scientiae rerum gestarum, institutorum, consuetudinum, h. e. historiae et civilis et ecclesiasticae, ut non modo leges ipsas, sed etiam causas earum et consilia assequatur, in quo quanta vis sit ad intelligendum et ad iudicandum, et per se intelligitur, et est a Balduino, Schultingio, aliisque demonstratum praeclare. In hac autem ipsa quanta debet esse Geographiae et Chronologiae, et veteris et mediae, notitia? quae quantum saepe faciat in intelligendo momentum, quot exemplis, ut hoc utamur, utriusque Codicis demonstratum est a Gothofredis, Pagiis, et aliis? Ad eam autem omnem scientiam rerum atque verborum accuratam, cuius unus usus certus est, comparandam, lectione opus est prope infinita, non modo legum ipsarum, et civilium et ecclesiasticarum, quarum vix numerum ineas, sed scriptorum cuiusvis aetatis, et qui res humanas, et qui divinas tractare, unde lux petenda est legibus, earumque verbis et causis intelligendis. Tum ei adiungemus Criticam, quae corrupta ab integris, genuina a spuriiis discernat, vitiosa emendet, adulterina repudiet, rem longe difficilissimam: adeo multae lectionis, observationis, adeo magnae diligentiae, magnique iudicii est! Iam quantam ei attribuamus, quam accuratam scientiam iuris naturalis, ad intelligentiam et iudicium iusti et aequi, et cum leges interpretari volet apte ad usum vitae communis et fori, et cum iudicare de legibus ipsis, et cum bene consulere in legibus, vel veteribus emendandis, vel novis scribendis? Ad haec autem omnia quam necessaria instrumenta afferre et in promptu habere debet a Dialecticorum doctrina, et exercitatione artium dicendi, non modo ut recte et acute videat, in ambiguis distinguendis, in obscuris a perspicuis, veris a falsis discernendis, sed etiam, ut in docendo scribendoque via et ratione progredi, rem
quam,

quamque, sive definire volet, sive demonstrare, sive refellere denique, ut ergo distincte, perspicue, accurate etiam, eleganti et plena brevitate, explicare possit, ne vel impediat lectorem, vel confundat, vel decipiat, vel deterreat, aut fatiget atque enecet.

Sed in quo, dicere possumus, haec fuisse vniversa? Singulas partes aut aliquot in vno eodemque fuisse, nemo neget. Et admiramur, cum singula in aliquo videmus ita fuisse, ut excelleret: et gratias agimus etiam mortuis, quos aliquam ex illis partem ita reperimus tractasse, ut ei lucem ornatumque attulerint. Nam quis ex iis, qui latinas et graecas literas adamaverunt, non laudet Iureconsultos, a quibus eae sunt adiutae? qui fuere permulti et eximii. Latinitas quidem et Graecitas serior, ab ICTis prope solis, ab solis certe iusta diligentia, tractata est, ut Cangio. Theologus porro sit aut valde imperitus, aut superbe ingratus, si vel nesciat, vel negare sustineat, a ICTis, a Cuiaciis, Pithoeis, Puteanis, Gothofredis, Valensiis, Iustellis, plurimum, immo prope plus allatum esse historiae ecclesiasticae, ex ipsis monumentis antiquitatis sacrae, vel ad cognoscendum verum et illustrandum, vel ad repudiandos vulgatos et religiose probatos errores, vel ad Criticam ecclesiasticam, quam ab ipsis sui ordinis hominibus. Quis vnquam obiter inspexit eruditos illos Iac. Gothofredi in Theodosiani Codicis reliquias Commentarios, nec eum vidit, omne genus veterum, etiam ecclesiasticorum, tum graecorum tum latinorum, scriptorum, lectionis varietate et amplitudine complexum fuisse? Et fuerunt eius generis, praesertim in Gallia, plures. Vniversa historia, praesertim antiquior, cui plus debet, quam praeclaris ex eodem ordine ac studiorum genere viris, et per eam literae bonae vniversae. Nam cum Ecclesia foedis erroris, ignorantiae et superstitionis tenebris, res autem publica civilis, dominationis Romanae iugo iaceret oppressa, saevumque in omnia imperium per iniusta Pontificum iura obtineret, ICTi antiquum

quum et verum ius repetentes, dum in eo literarum et historiae instrumento necessario utebantur, harum ipsarum restituendarum felix initium fecerunt. Nec vero post expulsam barbariem, in alio doctorum hominum ordine plures fuere scribendi ac differendi subtilitate et elegantia insignes, qui magna cum suavitate legantur etiam ab his, quorum studia ab eorum propria professione discrepant: quos longo ordine enumerare non est necesse. Nam iuris naturalis excellenti scientia praeditos in iis multos fuisse, et hanc philosophiae partem in eum locum, vbi videmus, ab iis provectam esse, non sit mirum, nec dubium esse possit.

Enimvero, si non sunt haec vniversa in vno, nec ea capiunt angustiae vel ingenii vel vitae humanae: relinquitur omnibus tamen hoc, vt illam doctrinae iuridicae perfectionem intuendo incitent se ingenia, primum ad studium perfectionis, et ad diligentiae industriaeque tum contentionem tum constantiam; deinde vt saltem orbem illum doctrinae et eruditionis decurrant ante, quam sibi deligant partem aliquam aut plures, in quibus velut domicilium studii et vitae collocandum putent, nec in eo delectu sequantur vnam vitae suae necessitatem et copiam, hoc est, quaestum, quo nimis nunc inclinatur, vt in omni alio vitae genere, ingeniorum humilitas et minuta ignavia, sed etiam decus tum literarum et doctrinae eius, cuius se adsecras profitentur, tum suum et ingenii sui, ne post mortem similes sint vnicuique de plebe opifici, cuius quia vsus cum ipso tollitur, etiam memoria interit et cum cadavere sepelitur. Atque etiam in ipso actu exercendae professionis facere oportet intervalla laboris, et redire ad illa eruditiora, nec ita quaestus vinculis esse alligatum sellae operarum forensium, vt non liber aliquando sis et ingenio laudique indulgeas. Nam et alii erecto et alto ingenio viri, qui longe gravioribus rebus, reipublicae bello ac pace regendae, vacarent, tempora bene dispensando sibi reliquum fecere, quod in studiis

studlis doctrinae, oblectandi animi caussa, consumerent. Et quam multa, quam facile licet legere, observare, et parvo parum addendo efficere acervos rerum, et brevi tempore profligare plurimum, si illas, quae quotidie plus vice simplici sunt, aliisque inter manus elabuntur ac male pereunt, temporis micæ et quasi ramenta, velut bonus et attentus pater familias, tollat et in talibus collocet vir adfuetudine laborandi facile et efficaciter laborans? Neque enim existimare licet, magnos illos Ictos, praesertim Franco Gallos, qui tot ingenii monumenta reliquere, referta literarum et doctrinae exquisitae copia, nihil aliud egisse, quam ut in illa materia conquirenda et digerenda ornandaque laborarent, aut aliter egisse, quam diximus.

Fallimur, an id egit carus nuper nobis Collega, Ferdinandus Augustus Hommelius, Vir illustris. Nam primum ita praeparavit se doctrinae iuris percipiendae et tractandae, ut qui excellentis Iure Consulti laudem appeteret, assumendis literarum, historiae, philosophiae adiumentis, per disciplinam eorum, qui in iis excellere. Deinde initium docendi fecit ab iis partibus doctrinae ipsis, et per omne reliquae vitae tempus argumenta scribendi per occasiones Academicas ita miscuit et variavit, ut appareat, illum, quem supra diximus, orbem ab eo fuisse decursum, nec ullam partem doctrinae, quae vel proprie iuris esset, vel cum eo haberet eam copulationem, quam supra ostendimus, ab eo plane depositam fuisse. Descendit etiam ad Criticam, velut in Disputatione ea, in qua Novellarum exemplum archetypum defendit esse Latinum, non Graecum, contra quam viris principibus in hoc genere visum erat. Atque hoc cum alii videre et laudarunt, tum etiam iudicavit sodalitium eruditorum Teutoburgensium, quod eum iam senem, ante hos octo annos, honorandae doctrinae caussa, numero suo adscripsit. Sed eam varietatem doctrinae ipsi libellorum, quos conscripsit, tituli indicant, indicabit etiam

etiam vitae in studiis et in iure discendo; docendo, respondendoque actae ratio: quam, age, breviter a principio exponamus.

Hommeliorum priscae claritatis gens est. Sed primum per Io. Hummelium inclaruit eum, qui Memmingae, patre honesto natus, cum in Academiam nostram Vitebergavenisset, paullo post Georgio Ioachimo Rhetico, anno 1557. suffectus est in artium mathematicarum doctrina publica, Vir magnitudine ingenii, doctrinae subtilitate et copia, inventorum pulchritudine et utilitate, gratia denique Caroli Caesaris, et Principum Saxoniae, Mauricii et Augusti, florentissimus, cuius memoria Schelhornii diligentia proprio commentariolo illustravit, in *Amoenitatibus liter.* (T. XIV.) Hic, illius aetatis more, flexo ad latinam graecamque rationem nomine, Homelius et Homilius, promiscue coepit vocari. Et hanc quidem formam socer, Camerarius, sequebatur, quam et in sepulchri titulo expressit: illa ipsum vsum esse, Commentarii publici demonstrant, in quibus acta magistratus Academici a. 1552. gesti, sua ipse manu perscripsit. Atque ea gentis consensu obtinuit. Post eum, ex eadem Memminga huc venit Andreas, Ioannis e fratre nepos, qui Collegii Principalis vtriusque sodalis, Academiae Syndicus, et inter Curiae Oratores fuit, habuitque in matrimonio Ioach. Camerarii e Casp. Iungermanno neptim, Vir et ipse in suo genere egregius, qui et magistratum Academicum bis gessit. Per hunc familia Homelia in his terris fundata, etiam extra Lipsiam pluribus locis sedes habuit, sed tenui conditione sortis; donec eam pristina fortuna respicere coepit per nostri patrem, Gotfridum, qui Leucopetrae natus, cum sedem veterem gentis in his locis, Lipsiam, repetere ausus esset, in ea locum inter Curiae Procuratores obtinuit. Is habuit in matrimonio Benignam, Danielis Horneisii, civis honesti filiam: ex qua noster ei natus est anno superioris seculi primo et nonagesimo, die tertio Februarii.

Nibil

Nihil fuit Parenti potius, quam ut caram hanc sobolem a prima aetate et ad pietatem et ad doctrinam formaret. Eius curae adiutores assumsit praeceptores domesticos, pios et doctos: in quibus fuere duo, postea elari admodum doctrina honoribusque; nam alter, Liebius, clarissimae gazae numariae Ducis Gothani magnam doctrinae gloria praefuit, et Hommelius, cognatus, ad extremum Ducis Hilperhusani a Consiliis sacris et concionibus primo loco fuit. Hi fecere omnia, ut carum et felicitis ingenii alumnum et amore literarum doctrinaeque liberalis incenderent, et ad earum luculentam scientiam erudirent. Ita institutus accessit ad scholas maiorum disciplinarum, anno huius seculi tertio decimo, auditque assidue philosophiae causa, praeter Phil. Olearium, in primis Andream Rudigerum, historiae, Menkenium et Frankensteinium, eloquentiae denique, Mullerum utrumque. Tum se contulit ad Doctores iuris, Lüderum Menkenium, Barthium, Io. Frid. Olearium, Schoenium, et Freislebium, qui nunc Cancellarii munus apud Comitem Geranum e Ruthenis magna cum dignitate sustinet. Quibus audiendis cum plurimum proficisset, tamen ea scientia, quam his audiendis comparaverat, non acquievit, sed ad maiora adspirans, anno septimo decimo ad Halas vicinas abiit, auditque pari studio Thomasmum, Io. Petrum de Ludewig, Boehmerum, Gundlingium atque Heineccium. Sed ante, quam abierat Halas, ceperat in hac nostra Academia honores Magistri philosophiae, cuius etiam priuatim docendae ius adeptus est a. 18. per disputationem de *Idearum vera natura et indole*; in qua defendit, ideam omnem esse nihil aliud, quam sensationis antegressae recordationem; ex quo nullas ideas innatas esse colligit, et multa alia, ab multorum philosophorum placitis dissentientia. Quod facit ita, ut se in libris philosophorum clarissimorum, Cartesii, Lockii, Arnaldi, Clerici, cognoscendis diligenter esse versatum ostendat. Sed ut in ea re magistrum secutus erat Rudigerum,

gerum, ita in aliis ab eius praeceptis discedere, et contra eius rationes, vt in loco de Figuris Syllogismorum, modeste disputare non dubitavit, non a veteris magis philosophiae, quam novae servitute alienus. Nam philosophiam nulla servitus decet, et frustra iugum vetus excussimus, si nobis imponi sinimus aliud; quod fere agunt, qui novi philosophiae generis auctores videri imperitae iuventuti volunt. Sed honoribus Lipsicis Doctoratum iuris addidere ICTi Halenses a. 19. d. 12. Iulii: cuius impetrandi causa Exercitationem *de victoria quærelæ inofficiosa, quæ sit utilis alii*, defendit pro Cathedra. Ceterum reversus in patriam, cum ad ius obtinendi in ordine Iureconsultorum nostrorum loci adspiraret, aliam Disputationem, *de actione confessoria et negatoria*, proposuit disceptandam, fecitque cetera, quæ mos est fieri ab his, qui alibi creati, nostræ Academiae iura petunt.

His perfectis, et vtriusque disciplinae, tum philosophiae, tum iuris, tirocinio cum laude posito, ad docendum adiunxit animum. In qua ratione ab initio philosophiam cum iure ita coniunxit, vt vtriusque disciplinam profiteretur. Nec successu caruit institutum, multis eius disciplinam expetentibus in vtroque genere. Et ipse delectabatur docendo. Itaque in eo ad finem vsque permansit, nec minus in instituto altero, vt cum docendi industria coniungeret agendi prudentiam. Nam cum quaereretur, qui vicarias operas respondendi præstaret in Scabinorum Collegio, facile hanc ad se delatam provinciam recepit: in eaque summa cum fide permansit, donec in Professione Iuris Ordinaria suffectus Car. Guil. Gaertnero, Dresdam vocato, etiam in Collegium ICTorum Academicorum venit. Et tum ille quidem locum inter Professores Iuris vltimum tenuit; ceterum paullatim ad tertium pervenit, in quo propter imbecillitatem corporis permanere, nec vltra tendere decrevit. Itaque cum a Baueri morte locus vacaret primus, eius petitionem reliquit filio: nec quicquam gavisus est liquidius,

F

quam

quam quod filium pater supra se videret, moderantem Collegium tale, cum dignitate et sua ipsius et Patris.

Sed alia praeter haec ei laeta euenere: primum a matrimonio, quod anno 19. cum Ioanna Rosina, D. Io. Henr. Conhardi filia natu minima, Virgine lectissima, initum, prole numerosa beatum fuit. Nam novem filios, et quatuor filias hoc coniugium tulit: sed pars maior prolis vitalis non fuit, superstitesque Patri mansere tres tantum filii, Carolus Ferdinandus, de quo ante diximus, a Consiliis aulicis Principis nostri, Canonicus Martisb. et Prof. Decretalium, qui Patrem etiam, ducta a. 53. d. 3. Maii in matrimonium Amalia Sophia, Rudolphi Augusti Schuberti, nunc Consulis, filia, ingenio, virtute ornatissima, triplici prole exhilaravit, Carolina Sophia, Ioanna Friderica, et Augusto: Iustus Henningus, I. V. D. qui causas forenses agit, et Henricus Andreas, Iuris Vtr. Doctor et Scabinatus Assessor. Nec paruum fructum doctrinae, prudentiae et virtutis cepit, cum ante hos tredecim annos in Consilio regio, apud quod de provocationibus certatur, suffectus est Bauero: quem locum ita obtinuit, ut etiam augeret eam, quae ante fuerat, de se existimationem, essetque Collegis et propter dexteritatem probatus, et facilitate, comitate, humanitate gratus.

Erat enim in eo ingenium lene, et placabile: multum facilitatis, obsequii, comitatis, patientiae: nihil arrogantiae aut superbiae, nihil asperitatis, nihil pertinaciae in sententia et voluntate obtinenda: fides et aequitas summa. Itaque omnium hominum ac temporum erat: nec eo quicquam aptius concordiae cum Collegis servandae; contra quos cum obtinebat iudicium suum, cessasse magis, quam contra isse videbatur.

Nec magis probabatur ab iis virtutibus, quam ab laborandi assiduitate, pertinacia, et efficacia. Libenter laborabat, ut qui officium amaret: et ingenii bonitate, animi tranquillitate, et exercitationis diuturnitate et constantia consecutus erat, ut efficaciter laboraret.

Sed

Sed non ita laborabat in vna officii parte, vt destitueret aut negligeret alteram. Et ab initio coniunxerat, vt supra diximus, docendi studium cum respondendi et consulendi industria: quam coniunctionem perpetuo conservavit; nec religionis suae putabat, ita amplecti, quacunque de causa, partem officii alteram, vt altera, se postpositam, queri posset.

Docebat multum et assidue: nec cuiquam, doctrinam suam expetenti, negabat operam suam. Et qui doctrinae elegantiam et subtilitatem adamarat, tamen non recusabat horridiora, et minus iucunda: idemque et iuris partes omnes explicabat, et consuetudinem fori et modum causarum forensium, scribendo, cavendo, respondendo tractandarum, praeceptis, exercitationibusque tradebat. Erat autem eius disciplina perspicuitate praecipua facilis, delectu rerum et subtilitate demonstrandi utilis, diligentia fidelis: audiebaturque libenter, tum propter illa ipsa bona, tum propter lenitatem, et quandam quasi dulcedinem orationis, per quam et ipse influebat in animos audientium, et vna res ipsae influebant.

Sed ad omnium animos faciles aditus habebat per eadem vel naturae vel virtutis bona, quae supra sunt commemorata. Et conservabat facile benevolentiam per ea sibi conciliatam: quippe intactus ab invidia, aemulatione et obrectatione, nec curiosus rerum alienarum. Rarus foris, domi suae se delectabat studiis doctrinae, et officii cura, fruens suorum pietate, obsequio; quos vicissim complectebatur liberaliter amore indulgentiaque salubri.

Talis cum fuerit, non est mirandum, si mors eius acerba et luctuosa fuit suis, molesta Collegis, si denique omnium dolorem iacturae magnitudine aequavit. Ea causas habuit huiusmodi. Erat ei corpus multae dignitatis, nec sine robore, quod etiam temperantia vel augebatur vel servabatur: ceterum a prima prope aetate angustias praecordiorum senserat. Eas vitae genus, quod

sedendo peragit negotia, paullatim auxerat cum molestia respirandi. Sed cum de consilio D. Io. Christophori Pohlii, cui valetudinem regendam crediderat, balneis Lauchstetinis ante hos tres annos usus esset, ita se levatum sensit, ut nihil in consuetudine vitae et laborum mutare necesse haberet. Enimvero, anni sequentis mense Februario, primum vomitus repentinus et creber, paucis diebus post lateris dextri resolutio inuasit: e qua etsi ita medicamentis idoneis firmatus erat, ut redire ad laboris consuetudinem posse videretur, tamen consultum duxit, minuere animi corporisque contentionem, dimissaque respondendi molestia solam docendi diligentiam servavit. Sed haec ei levatio perbrevis fuit. Nam anno post, mense Aprili, subito latus idem tanta vi est convulsus, cum summa oppressione pectoris, ut sine mente ac sensu iaceret. Et sensus ac mens redire illi quidem, sed sine ullo lateris convulsi usu. Itaque ab eo tempore fere infelix, quod reliquum fuit vitae, transegit. Sic desertum ab corpore non deseruit placidus ille et expertae patientiae et tranquillitatis animus, qui iam sola coelestia et aeterna cogitare, atque etiam sui a corporis vinculis resolutionem, et ex eo ad meliorem vitam transitum expectare coepit. Is ei contigit hoc ipso anno, mensis Februarii die sexta decima, superveniente catarrho gravi, per quem suffocato pectore, vitae magna cum laude actae finis factus est.

Ita feliciter liberatus Vir praeclarus ab tantis malis, incredibile dictum est, quantum moeroris reliquerit primum Vxori fidelissimae et amantissimae, quae, suae valetudinis et senectutis mala vix sustinens, huius accessione penitus est oppressa, deinde filiis, tam boni et amanti Patris desiderium vix ferentibus, denique omnibus, qui Viri virtutes e propinquo cognoverant; in quorum numero nos fuimus in primis, qui Collegii vinculo eum nobis habuimus coniunctum, fuisse credibile est omnes, qui Doctoris Academici eruditi, laboriosi et fidelis bonum

num aestimare didicere: quales Vos esse putamus omnes, Cives Optimi et Carissimi, quibus qui bene cupiat, multos tales Doctores optet contingere. Quo magis confidimus, Vos cum grata benevolentia conservaturos esse, et fama ad posteritatem propagaturos Viri memoriam: quae per tot discipulos, et per tot scripta in omnes partes sparsa, sedem propriam habebit in hac Academia, et in aede Paullina, in qua eam monumento, tali Viro et Patre digno, et ad seram posteritatem mansuro, devinciet filii natu maximi nunquam eum eluctura Pietas. P. P. Dom. Invoc. a. C. cIdIdccclxvi.

M E M O R I A

IOANNIS FRIDERICI KRUMBHARII

SENATORIS CIVITATIS LIPS. MERCATORIS
PRIMARIJ

In Civitate ea, quae mercaturae fama allegerit quondam fugientes e Bohemiae finibus literas, iisque commodius multis et magnis rebus, iucundiusque domicilium praebeat, quam quocunque alio in loco habeant, in qua denique, ut ille in Campania dixit esse *Bacchi Cererisque certamen*, sic recte dicas esse *Certamen Musarum et Mercurii*: in ea igitur honestum est literis, sua, hoc est, laudis praemia, non modo his impertire, qui artibus doctis bene tractandis collegerint opes ingenii, per quas docte liberales esse in alios, ornare Civitatem suam literarum possint, sed etiam his, qui, mercatura perite, laboriose ac diligenter, honeste, feliciter denique exercenda, divitias comparaverint, quae profint suis, possint servire iuvandis multis, ornandaeque Vrbi et Patriae communi. Ex quo genere nuper fuit Io. Fridericus Krumbharius, Senator Ordinis Amplissimi, Mercator autem e primariis, planeque ad normam Ciceronis, ad quam dirigi mercaturae faciendae modum voluit, ut honesta esset, et iure posset laudari.

Neque enim Cicero illam asperam et abhorrentem ab humanitate, verbisque magis quam rebus speciosam sapientiam probavit, quae mercaturam e republica vitae humana tolli vellet, ut matrem vel nutricem vitiorum, quae Lycurgi ratio fuit, probata Plutarcho, haud paullo maioribus iudiciis, Platoni, Aristoteli et Polybio impro-

improbata. Etenim lenitati Platonicae et Aristoteleae adfuetus, sapientiam non modo magnas et severas, sed etiam humanitatis memores sententias loqui voluit. Et est in illis plerumque plus vanitatis superbae, decipientis aures verbis sonoris, in his plus veritatis modestae, iuvantis animum salubritate rerum. Necessitas profecto ipsa non modo innocentem pronunciat mercaturam, sed etiam honestam. Eam autem necessitatem cum multis aliis Plato, etiam in ea republica, (*de Rep. II. p. 371.*) agnoscit, quae magis ad philosophiae subtilitatem, quam ad vitae popularitatem accommodata existimatur. Nec vero discidium a natura habet mercatura cum honestate, iustitia, temperantia, nec necessario ex se gignit vitia, aut, si tamen gignit, sua propria culpa gignit, nec denique sola vitia, sed etiam materiam luculentam dat virtuti, in qua se multis modis, cum magna laude sua et vtilitate aliena, exerceat, et parat reipublicae et praesidia securitatis tuendae, et copias ornandae.

Cupiditas humana per insitam prauitatem fertur illa quidem ad vitia, sed non velut cum delectu quodam vnus generis, cuius materia et opportunitate sublata, vel tollatur vel coercetur ipsa. Ruit etiam in contraria, utque res se et occasio dederit, ita vel ad profusionem vel avaritiam incumbit, vere Proteus, et omnium formarum monstrum. Itaque nisi divinae sapientiae et auxilii coelestis viribus frangatur et in ordinem redigatur, frustra ab vna parte obstruere coneris; nam ab mille aliis erumpet: frustra vnus vitii materiam detraxeris; aliam alius vitii quaeret, et nimis cito reperiet: denique non oppressa iacebit, sed latebris fallacibus absconsa speculabitur tempora sua, quibus liberius euagetur. Ac fortasse reipublicae profuerit interdum, cupiditatis impetum alio convertere, vbi minori cum incommodo publico, certe pro tempore, infaniam, materia ei, velut igni, subtrahenda: ad virtutem, non dicamus vniuersam, sed qua parte opposita est vitiosae cupiditati, nihil profuerit.

Quod praeclare demonstrat in reprehensione Laconicae ab Lyncurgo disciplinae Aristoteles, *Polit. II. 9.* docetque, ab ademptis intemperantiae, magnificentiae, avaritiae, per convictum communem et proscriptam mercaturam, alimentis, et necessitate abstinentiae, alia vitia esse inducta, etiam intolerabiliora.

* Virtuti profecto nulla necessitas bene consulit, citiusque irritat vitiosam cupiditatem, quam debilitat aut coërcet. Nam liberam se virtus et velut ingenuam censet: nec ex parte curari vult, sed vniversa. Itaque non vitur libenter magistris Politicis, qui raro vniversam salutem hominum virtutemque amplectuntur consiliis et institutis suis, sed in partium earum veluti visco adhaerescunt, quas, quacunque de causa, maxime adamaverunt. In quo ipso rectissime Lyncurgi adversus voluptatem et luxuriam leges reprehendit Plato *de Legibus I. p. 635.* et libro secundo latius; quod, dum fortitudinem eam, quae in molestiis a paupertate, ab labore, a dolore tolerandis cernitur, institutis suis curaret, neglexisset alteram, quae est in voluptatis illecebris vincendis ac spernendis. Atqui haec est etiam maior et illustrior fortitudo; quod in illa fortitudine adfuetudo patiendi plurimum valet, in hac nihil admodum, acrioresque sunt morsus a voluptatis dulcedine, quam ab molestiarum acerbitate. Sed ille rem militarem amplexus vnam, dum fortitudini consulit ei, quae cum illa maxime esset coniuncta, alteram deseruit ac destituit.

Nec huius virtutis vnus immemorem disciplinam Lyncurgus sanxit, sed etiam aliarum, inprimis liberalitatis et beneficentiae, cuius facultatem praestant copiae, ab mercatura aliisque artibus quaestuosis ortae, quas omnes pariter ademit suis. Quid autem est, beneficentiam tollere, nisi partem virtutis humanissimam et iucundissimam, immo ipsius humanitatis partem abscindere. Nam vt sitis commendat potum, sic inopiae sensus quicquid acceperis, et nullum aliud exquisitius condimentum bonorum

rum

rum habet natura rerum, quam ab amore et misericordia praebeant: nec liberalior est voluptas animi, quam quae beneficiis largiendis venit. Quod enim existimet quis, ut est apud Xenophontem, de Rep. Laced. p. 682. gloriosius esse, per corporis laborem benefacere, quam sumtu faciendo et erogando; quod in illo animi, in hoc copiarum opus sit: id ipsum speciosius est verbis quam re, ut cetera, quae ibi pro tota illa ratione dicuntur, omnia. Nam facultas benefaciendi per impensas, est illa quidem a divitiis et copiis, sed beneficia ipsa et impensae sunt animi, non copiarum. Et difficilius homines per arcae suae copias benefacere, quam per animi consilium et corporis laborem, quis ita expers est usus communis, ut nesciat?

Quod si pars humanitatis est, quae est profecto permagna, sensum habere munditiae, elegantiae, pulchritudinis, eam appetere in aedificando, in vestiendo, in toto reliquo vitae cultu, eaque transit ab sensibus ad animum, ad sermones et actiones omnes; eam sane propemodum omnem cum copiis illis abegisse legislatorem in promptu est. Non eloquentia ibi vlla, non poetica, velut in media barbarie, nihil vspiam, nec publice, nec privatim, ab artificio vlllo visendum; nihil, quod allicere externos, quod retinere posset; nihil propemodum, quod non abalienaret, quod non fugaret, quicumque sensus satis humanos attulissent.

Et in copiis illis Lycurgo improbatis et repudiatis magno praesidio ad res gerendas privatam fuisse Spartam, et res ipsa docet, et praeclare demonstrat vir πολιτικώτατος, Polybius VI, 47. f. Nam bellis impliciti Spartani, primum necessario, defendendae adversus Persas libertatis causa, deinde aviditate imperii, pecuniariis caruere copiis, quibus non minus bella geruntur, quam armis et hominum vi, eamque ob causam coacti sunt ad indignitates omnes descendere: assentari Persis, antea hostibus, iisque prodere Graeciam turpi pace, tantum ut pecunias

ab iis acciperent; saevitia vti in exactionibus bellicis inter externos, etiam, ad quos belli nulla pars pertineret. Et nos alio loco, perspicue, vt opinamur, demonstravimus, in mercatura, vt in ceteris artibus quaestuosis, esse *λεϊταργίαν* quandam, et munus, quod reipublicae praestetur vsu et fructu, dum praestari videatur singulis.

Sed haec mercatura quomodo exerceatur, multum refert, auctore Cicerone, si honestatem naturalem retinere velit. Non vult eam esse tenuem, ne quaesticulis minutis appetendis sordes trahat, sed magnam et copiosam, multa multis locis apportantem et multis sine vanitate impertientem, vt liberalius lucretur, nec necesse habeat aut minuta lucra fordide venari, aut ad quaestum fraude contendere; vt porro multis, et dum exercetur, proffit, emendo, vendendo, et lucri copia, vnde redundare aliquid possit ad beneficentiam, ad vsus publicos, et necessarios securitatis, et liberales decoris, in aedificando colendisque agris, hortis, similibusque. Atque etiam satiabilem esse mercaturam vult Cicero, hoc est, quae aliquando, quaestu contenta vel exsatiata, redeat in portum otii honesti, atque hoc ipso se honestam et liberalem probet. Nam illiberalitatis inexhausta sitis est.

Sed ad hanc veluti legem sapientiae Virum amplissimum, de quo nunc dicimus, exercuisse mercaturam, in promptu est. Nam primum genus mercium tractavit eiusmodi, quod manuum artificio censeretur, elaborareturque intra patriae fines: post, cum inde rem fecisset, nec minus diligentia, parsimonia, ad aliud genus adiecit animum, in quo maioribus copiis res gereretur, vendendis operibus sericis et holosericis, quae ipse instituisset copiose texere officinis suis. Quod genus cum aliis de causis, vt est, ita censetur honestissimum ac liberalissimum, tum quod est ad pascendam tenuem plebeculam accommodatissimum. Et ille vere pascebat, nec faciebat id, quod interdum fieri in tali genere aiunt, vt quaestum sibi vberiore redderet operis tenuissima mercede habent-

habendis. Sed qua fama, fide, integritate, mercaturam fecerit, nullum certius documentum est, quam quod in ordinem Amplissimum est cooptatus. Denique cum eo successu fecisset, qui solet esse, cum tali modo res geritur, etiam finem sibi statuit quaerendi. Nam annis pluribus ante vitae finem, primum filium maiorem adscivit socium; mox ipse reliquit negotium, et vtrique filio permisit. Ex quo tempore ille totus vacavit et cura rerum publicarum, et exercitationibus pietatis, quibus se ad futuram vitam adeundam praepararet, praesertim cum et tempora incidissent molestissima iis, qui reipublicae procuracionem sustinerent, et coepisset subinde admoneri fragilitatis humanae et discessus ab rebus humanis faciendi, per sensus fortiores imbecillitatis senilis. Sed vt magis Viri virtutes et causae earum appareant, age totius vitae cursum persequemur.

Eius initium habuit Schleizae in Variscis, die prima et vicesima Decembris a. MDCXCIV. a parentibus honestis. Nam pater fuit Henricus, qui tum ibi in aula Comitum rationibus rei culinariae praeerat, post Blankenhaynae, quod est oppidum Comitum Hatzfeldiorum in Thuringia, Consulares honores cepit, habuitque in eo munere successorem filium Henricum Fridericum. Ab hoc parente susceptus est e Dorothea Schottia, habuitque praeter maiorem illum fratrem, et alterum, qui in hac nostra vrbe et ipse mercaturam fecit, et sororem Ioannam Dorotheam, quae nupsit Henrico Gottlieb Bleidnero, in Fisco Ducis Vinariensis exactori: ex quibus vnum fratrem minorem superstitem habuit, sed ad brevissimum tempus: quippe sexto decimo post eius mortem die apoplexia ablatum.

Puerum magna cura et diligentia aluere parentes, nec modo domi suae, in schola oppidana, erudiendum curarunt iis, quae communiter discuntur ab omnibus, ad religionis et vitae communis vsus necessarios, sed quamquam non destinatum studiis doctrinae, tamen adolescen-

lescentem miserunt Geram, ut ibi in Gymnasio publico disceret literas et artes, quibus ingenia ad humanitatem formantur. Et sic conformatus et excultus demum missus est in hanc urbem ad discendas mercaturae faciendae rationes; quarum cognoscendarum facultas ei summa dabatur, cum traditus esset in hanc disciplinam Christiano Henrico et Christophoro Georgio, Winkleris¹, qui magnam et copiosissimam mercaturam faciebant. Apud hos septem annos didicit, deinde etiam ad annum usque secundum et vicesimum meruit.

Hoc ipso anno coepit adiicere animum ad mercaturam suo nomine faciendam, vendendis operibus artis Phrygiae, quae in finibus nostris magna cum elegantia et exquisita pulchritudine confici curasset. In quo multum etiam adiuwabatur ab uxore, quam sibi paulo post adsciverat sociam vitae et laborum. Erat enim in ea et exquisitum talium operum iudicium, et cura negotii gerendi prope virilis. Sed ab hoc genere mercaturae transiit se ad maius et copiosius, instituitque anno quadragesimo in hac urbe, ut ante diximus, officinam texendis sericis et holosericis telis: quarum ita probabatur elegantia, ut copiosissime divenderentur, alliciente emtores etiam Domini aequitate et fide.

Quae res cum ceteris virtutibus ad eum convertit oculos primum Collegii mercatorii, deinde etiam Senatus. Itaque septem annis post, ab illo praepositus est rebus communibus curandis; ab hoc, ante hos decem annos, cooptatus est Senator: cui honori etiam Centurionatus Urbicus paulo post accessit. In his muneribus quanta fide versatus sit, non necesse est dicere, cum constet inter omnes. Sed inprimis fides eius eluxit proximo bello calamitosissimo, per cuius omnem decursum ille nullum periculum, nullas molestias, quae tum magna vi ingruerant in eos, qui rei Civitatis publicae praeesent, nullas ergo defugit, sed magna constantia in statione sua permansit, et vexationes omnes pro Civitate pertulit.

In

In hac autem tam laboriosa, ad extremum etiam aerumnosa vita, tamen, praeter successus rei gerendae, multa etiam alia laetissima habuit, praesertim e coniugiis, quae ei multis partibus felicissima contingere. Primum duxit a. MDCCXXIV. d. XVIII. Iulii Sophiam Margaretham, Io. Christiani Lentschii, Magistri restiariorum, filiam maiorem, nulla alia, quam virtutis et ingenii dote commendatam. Sed id coniugium non modo ea, qua ante diximus, causa, supra dotatissima felix fuit, verum etiam numero prolis et felicitate liberorum, quos superstites reliquit: nec aliud habuit triste, quam quod maior pars prolis vitalis non fuit. Nam peperit illa decies, sex filios, et totidem filias: Ioann. Fridericum, d. VIII. Maii a. MDCCXXV. Dorotheam Sophiam, d. XXVI. Aug. anno post: Io. Henricum, d. II. Maii a. MDCCXXVIII. Io. Gotthelf, d. XXI. Dec. a. MDCCXXVIII. Sophiam Margaretham, d. V. Octobr. a. MDCCXXXII. Christ. Henricum, d. XXI. Mart. a. MDCCXXXIV. Io. Carolum d. XXIV. Jun. a. MDCCXXXV. Io. Gottlieb et Rosin. Dorotheam vno partu, d. III. Sept. a. MDCCXXXVI. Ioannam Guilielmiam, d. XXVIII. Aug. a. MDCCXXXVII. iterum eodem partu filias geminas Io. Christianam et Marianam Rosinam, d. XXX. Mart. a. MDCCXL. Ultimo partu, d. IV. Dec. a. MDCCXLI. filiam enixa est, sed in vtero mortuam: quod triste signum matris aegrotantis fuit. Et illa ab eo partu statim ex inflammatione interna graviter laborare coepit, quae ei mortem paucis diebus post, d. X. Dec. attulit, magno cum luctu liberorum, et gravi moerore mariti, qui eius amore, fide, diligentiaque felici rei familiaris administrandae carendum sibi magno etiam cum incommodo suo videbat.

Ex illo toto numero prolis quamquam tantum tres superstites habuit, tamen in his etiam abunde ei materia suavitatis et laetitiae contigit: primum e filia Sophia Margaretha, quam, omnibus docibus ingenii et corporis ornatam, felicissime collocavit Io. Christ. Richtero, Mercatori

catori primario, et Procenturioni vrbano: deinde ex utroque filio, Io. Frid. et Ioanne Carolo, quos sua disciplina ad mercaturam cum laude faciendam institutos, et itineribus per Germaniam et Batavos faciendis excultos, suffecit sibi ipse in negotiatione ab se coepta, et per tot annos feliciter administrata, ut ante diximus, prospiciens ipse animo futuram utriusque, simillimam suae, felicitatem in re gerenda.

Sed amissa prima vxore, cum res domestica non videretur ferre viduitatem, adiunxit tandem, anno quarto post, animum ad alterum matrimonium, duxitque Christianam Dorotheam, filiam Carol. Frid. Menseri, Senatoris aedilitii, e Kumbthofia: nec id minus felix caritate mutua, etiam fecunditate fuit. Nam ex ea duos tulit filios, Fridericum Christianum, d. XIII. Sept. a. MDCCXLVI. et Ludovicum Gottlieb, d. IV. Sept. a. MDCCXLVI. utrumque patri superstitem: quos et ipsos parenti simillimos fore virtute, fortuna, speramus. Sed hanc quoque Coniugem amisit, d. II. Maii a. MDCCXLI. tanto maiore cum incommodo et dolore suo, quo magis eius cura et auxilio indigere coeperat corpus, aetate, laboribus, molestiisque bellicis adfectum et fractum.

Nam sub finem anni proxime superioris, pedes invaserat imbecillitas, quae etiam usum eorum in incessu impediret non parum. Sed ille molestias vincere adsuetus inductione et constantia animi, nihilominus functus erat muneribus, quae sustinebat, omnibus. Et fortasse vicisset etiam illam imbecillitatem per reliquias roboris pristini: at nova et gravior plaga illi animi, ab morte Vxoris carae, cum accessisset; tum vero labare periculosius corpus coepit. Nam imbecillitas tum pedum, tum totius corporis ita aucta est, ut domi se tenere, et negotiis publicis abstinere cogeretur. Revocare vires, et fulcire corpus labefactum omni ratione tentabant Medici clarissimi, Ludovicus et Seilerus; videbanturque profecisse aliquid, tum aliis balneis calidis, tum aquis Lauchstadinis, a quarum

rum usu meliuscule se habebat: cum paullo post res rediit ad superiorem imbecillitatem, ad quam accessit mox linguae difficultas sermonisque: ad extremum, principio mensis Augusti proxime superioris, tanta debilitas eum oppressit, ut progredi, nisi sustentatus ab aliis, non posset, et corpus ita prostratum committere lectulo cogeretur.

Adesse finem vitae sentiebat. Itaque totus conversus est ad vitae alterius curam et cogitationem: in qua adiuvabatur alloquiis crebris et efficacibus M. Io. Gotfr. Koerneri, Viri Reverendi, e cuius etiam manibus viaticum corporis et sanguinis I. C. pie et religiose accepit. Ita corroboratus animo, tranquille expectavit adventantem mortem, per quam ab illis molestiis, paucis diebus post, d. xv. Augusti, est liberatus, et ad coelestia gaudia translatus, magno sui desiderio suis, amicis, notis omnibus relicto.

Erat enim in eo ingenium placidum, animus lenis, benignus: nihil vanitatis, nihil arrogantiae: omnia honestate, probitate, concordiae studio moderata. Itaque suis erat indulgentia, benignitate, carus, omnibus facilitate, obsequio, aequitate, gratus.

Has igitur tales, tam ad caritatem et benevolentiam aptas et efficaces virtutes, imitamini, Cives Carissimi, ut et vivi amore Vestrorum omnium perfrui, mortui autem ornari possitis iudiciis ac desideriis bonorum, quae sunt *ἐν τὰ Φία κάλλιστα*, ornatus funebris pulcherrimus, immo, in quibus funus ipsum splendidissimum. P. P. Dom. I. p. Trin. A. C. cIdIdccclxv.

M E M O R I A

SOPHIAE REGINAE LVDWIGIAE

In praecipuis partibus animi exercendi ad sapientiam, quae ad veram et perpetuam beatitudinem adducat, sine omni dubitatione ponenda est ea, quae mentem a rerum sensibilibus vanitate avocata ad invisibilem veritatem traducit, iisque acriter et assidue contuendis adsuafacit paulatim pulcritudini earum cum suavitate sentientiae. Nam suavitas ea, quae est e motu corporis ab rerum externarum impulsione, praeterquam quod aliquid impuritatis a corporum contagio trahit, non magis habet constantiam et perpetuitatem, quam ille motus ipse; nec suavitatis talis appetitio et sitis quicquam commune cum sapientia, quam totam animi esse constat. At quae a rerum insensibilium contutu venit, ea primum puritatem habet et sanctitatem quandam, dignam animi praestantia, deinde constans est atque perpetua; tota quippe potestatis nostrae, et, quoties lubet aut necesse est, iterabilis, saepe etiam sua sponte occurrens nobis atque se offerens. Res sensibiles ipsae, quae quidem innoxiam suavitatem animo per sensus praebent, imitari suo quodam modo insensibilium constantiam possunt, si animi vi ad eorum similitudinem revocantur; meliusque et sanctius oblectant ex adspectu sensibusque ceteris sublatae, quam cum praesentes animum per sensus dulcedine sua movebant. Sed homines ita, et natura, et multo magis assuetudinis vitio, sensibus corporis eorumque suavitatibus adstricti tenentur, ut nihil esse putent, ubi nihil movet sensus, nec ullam suavitatem capere possint, nisi quae per corpus venerit. Itaque, ut in hoc genere

mane-

maneamus, perisse sibi existimant, quicquid ex oculis sublatum est, parentes, coniuges, liberos, amicos, et cum ipsis ademptum, quicquid suavitatis ab iis esse posset: unde luctus et moerores, saepe immoderati, et ab sapientia abhorrentes: quibus rebus ipsis profecto fit, ut plane perierit iis, quod non perierat, si cernere meliori sensu fruique didicissent aut sustinerent. Nam profecto melius et acutius videt auditque animus, quam oculi auresque corporis, magisque nostra sunt fructu, quae mente cernuntur, quam quae corpore; quippe illa et diutius cerni possunt, et quoties volumus. Pater quidem, discessurus a vita, filio adolescenti, iacturam imminentem vehementius querenti et lugenti, nihil melius ac verius consolandi causa dicat, quam si hac oratione adversus eum utatur: Amove vero, fili, hunc luctum et has lacrimas. Neque enim tibi moriturus sum: immo vivam tibi, quoad voles, et videbis me posthac etiam audiesque, quoties voles, et quam diu voles: immo melius me ac magis videbis mortuum, quam vidisti vivum. Nam hanc speciem oris ac figuram corporis solidam quod non videbis posthac, nec hunc sonum vocis auribus percipies: quantum quaeso temporis fuit illud, quo vidisti me et audisti, dum vixi! At animus etiam post mortem speciem hanc, hunc colorem et hanc figuram oris, poterit intueri diu noctuque, cum volet. Enim vero quam paruum ac leve est etiam hoc totum, quod in vivo vidisti, quam parum in hoc sono vocis atque orationis meae! Animum parentis videre, hoc est, amorem, curam salutis ac felicitatis tuae, in institutis meis, exemplo, cohortationibus, admonitionibus, obiurgationibus etiam, hoc est vere videre parentem, hoc est totum parentem videre. Hunc tu parentem, mihi crede, ut magis adoleveris, in virili posthac aetate, atque ipsa adeo in senectute, longe verius et clarius, et maiori cum suavitatis et amoris sensu, si sapias, cum a te discessero, videbis atque audies, quam ad hanc diem vidisti atque audisti, immo videre

G

atque

atque audire potuisti. Haec quin verissime dicantur et ad consolandum aptissime et sapientissime, dubitari non potest. Nam in vivis quam multa sunt, quae sensum suavitatis ex eorum bonis minuunt et obscurant, saepe etiam extinguunt? ut in parentum disciplina, cum cohortantur, cum castigant, obiurgant; in incommodis porro eorum ab fortuna adversa, valetudine, et similibus: a quibus liberatur omnibus pietas in mortuis, spectandis eorum sine mixtura malorum opinatorum bonis, ut puram et liquidam capere suavitatem possit. Sed haerens in sensibus vanitas humana assequi hanc sapientiam vix potest. Itaque ad inanes mente imagines potius se convertunt eorum, quos amavere, easque quam simillimas exemplis vivis, et accuratissime ad veritatem expressas cupiunt habere. Quorsum? ut in coloribus et lineamentis inanibus quaerant, quod haud paullo melius ac verius in semet ipsis reperiant. Quanto sapientius ille apud Xenophontem (Oecon. 10.) Socrates, qui multo magis cupiebat cognoscere virtutem feminae, ex Ischomachi mariti sermonibus, quam corporis pulcherrimam et exquisitissime expressam speciem videre: λέγε, inquit, ὡς ἐμοὶ πολὺ ἥδιον, ἀρετὴν γυναικὸς καταμανθάνειν, ἢ εἰ Ζεῦξίς μοι καλὴν εἰκάσας γραφῇ γυναῖκα ἐπεδείκνυσεν. *Dic, quaeso: nam mihi iucundius est, virtutem mulieris cognoscere, quam si Zeuxis mihi feminam pulcram pictura expressam ostendat.* Quid? quod solet maxime esse in promptu consolantibus homines in morte suorum, cum dicunt, in altera vita rursus in adspectum complexumque redituros; etsi melius est, tamen habet aliquid eiusdem imbecillitatis, ad sensum corporis et vitae huius rationem revocantis omnia, et alteram illius melioris vitae felicitatem ad huius similitudinem cogentis, quantum potest, et ad sensus corporeos trahentis. Quod contra nos debebamus omni modo abstrahere animum ab sensibus, et ad bona invisibilia cogitanda, ponderanda, transferre, ut dignam se et actionem haberet et suavitatem, praec-

praeparationemque ad ea tempora, quibus omnia sensibilia cum corpore evanescent, destituentque animum iis acquiescentem.

Haec scripsimus, memoriam commendaturi Sophiae Reginae Ludwigliae, feminae primariae, ex oculis nostris ante paucos menses sublatae, non suorum modo cum luctu maximo, sed etiam multorum aliorum dolore: in cuius fragili et imbecillo corpusculo animus habitabat iis bonis ornatus, quibus contuendis et consolari quisque dolorem posset, et suavitatem haud paullo maiorem capere, quam si figuram corporis expressam exquisita arte cerneret. Earum igitur imaginem, si non expressam penitus, at adumbratam proponemus. Sed ante, quae sensibus nostris patuerunt, et ad vitam in oculis nostris actam pertinent, breviter commemorabimus.

Nata erat in hac ipsa vrbe, anno seculi huius sexto et vicesimo d. XVIII. m. Augusti, patre, D. Io. Gottlieb Reichelio, Patrono caussarum ordinario in Curia superiori et Consistorio, matre Gertrude Sophia, D. Christiani Ludovici, Professoris Philosophiae Ordinarii, filia. Omen vitae inter multas et magnas molestias exigendae fuit mors matris, die nono post consecuta. Nam a sexto aetatis anno, a quo tempore adolescere maxime et confirmari corpus debebat, habuit vitam tot ac tantis aerumnis vexatam, vt tota naturae actio impediretur, et tum vitiosis succis corpus repleretur, tum imbecillitas eius gravis consequeretur. A quinto decimo anno meliori conditione vt coepit, recrearique, quantum fieri poterat, singulari cura amatae, Io. Rosinae, D. Christiani Mich. Adolphi tum vxoris, in cuius etiam domum recepta est. Ibi variis morbis, in his variolarum et morbillorum superatis, sensit sibi iam vigorem vitae et valetudinis accessisse. Nec minus confirmata est animo, disciplina eiusdem amatae, et ad pietatem in Deum et ad ceteras virtutes, scientiamque rei familiaris regendae, adducta. Sic ergo et resectae corpore et conformatae

animo, cum annum ageret vicesimum, adiecit oculos D. Christianus Gottlieb Ludwigius, Vir Celeb. eiusque animo sibi conciliato, duxit in matrimonium, secundum illud quidem, sed cum magnis molestiis et aerumnis. Nam quem primo partu edidit filium, Io. Christianum, is altero vitae anno aegrotare graviter coepit, nec convaluit. Ea valetudo pueri et multo magis mors ita fregit matrem, ut et imbecillitate corporis permagna opprimeretur, et variis saepe morbis infestaretur, in primis ex hypochondriis et laeso ventre imo. Itaque partus posthac difficiles et parum felices habuit. Nam cum quinquies masculam prolem enixa sit, vna tantum, eaque septimo mense edita, vitalis fuit. Vltimum, sed maturo partu, edidit filium, Christianum Fridericum, anno aetatis tricesimo, qui cum altero illo, Christiano, mortem matris optimae luget. In tanta autem corporis imbecillitate, quam et tranquillitas animi et severitas diaetae sustentabat, ita vigeat animus, ut et rem familiarem rite curare, et prospicere suis posset. Sed anno superiori, a vicesimo mensis Aug. die, ita acres habere coepit sensus eorum malorum, ut periculum subesse videretur. Expeditum est adversus id malum, quicquid et mariti et ceterorum amicorum solertia reperire poterat. Sed omnia vis mali superavit, cuius causae post cognitae sunt. Nam colum intestinum, qua sinistrorsum flectitur, exitque sub lienem, non modo angustum supra modum erat, sed etiam concreverat cum diaphragmatis extremitate sinistra, eratque in tantam amplitudinem inflatum, ut ventriculi dextrorsum semoti locum replet. Tum bilis reperta est iners a calculis, qui vesiculam felleam repleverant; unde illae crebrae alui obstructions ortae erant. Quorum malorum vim cum ars superare non posset, auctis indies angoribus, tandem inflammatio et sphacelus accessit, ex iisque mors, die Septembris tertia, hora octava vespertina.

Et haec quidem corporis fuere et sensibus obvia: non utique iucunda ipsi, neque cuiquam vel cernenti antea, vel

vel cum maxime audienti aut legendo cognoscenti: ad invisibilia veniamus, quae sub illa corpusculi imbecillitate latuere, haud paullo melius et iucundius animis legentium spectaculum datura. Ac nos, missis, quae naturae et indolis erant, ea persequemur sola, quae vim virtutis et pietatis demonstrent. Nam in illis beneficium modo naturae cernitur, quod gratulemur habenti, in his opus hominis, quod vere laudent et imitentur spectantes.

Ac primum spectaculo erat in omnibus istis malis tranquillitas perpetua animi, atque etiam, cum res et tempus ferebat, hilaritas oris sermonumque. Non tristitia in vultu conspiciebatur, non querelae in sermonibus audiebantur: etiam provocata vel cura vel dolore aliorum, aut verbis minuebat mala sua, aut alio avertebat sermones: ipsum sensum malorum sorbere et vultu tegere didicerat, memoriam autem praeteritorum, in primisque in pueritia exhaustorum, voluntaria oblivione ita deleverat, non modo nulla ut mentio in sermonibus esset, sed ut nec in factis ullum memoriae vestigium exstaret, omnia beneficiorum memoriae simillima essent.

Nec malorum suorum lenimenta petebat fuga laborum, parcens corpori et imbecillitati suae. Immo tanta cura rei domesticae univrsae, tanta sedulitas in omnibus eius partibus obeundis, tanta industria erat, quanta in valido corpore esse potest; ab ipso labore oblivionem et remedium malorum sperare putares. Admonentium benevolentiam, ut consuleret sibi, nec supra vires laboraret, blando vultu excipiebat; a consuetudine sua non discedebat. Nam non sua causa laborabat, sed officii, sed mariti, sed liberorum invicto amore incensa, sed amicorum et miserorum causa, quorum vel benevolentia, vel necessitatibus, supra quam dici potest, movebatur.

In amore quidem mariti et liberorum nihil viderit quisquam ardentius aut curiosius. Eorum bona ducebat sua, eorum gaudiis gaudebat pro suis, incommodis autem, molestiis, in primisque periculis morborum, incredibili-

ter angebatur, cum contemneret sua. Observare, concurrere, vigilare, fomenta ipsa admove, remedia ministrare, eorum amaritudinem blanditiis, precibus minuere, consolari, omnia una facere, quae etiam divisa fatigent plures. Nec ad iuvandos amicos vel mariti vel communes quicquam promptius fuit, non modo consulendo et curando, rogando, sed etiam agendo. Aderat ipsa in eorum incommodis, laborabatque vix in domesticis; plane in societatem malorum, etiam ubi opus esset, adferendo ac dando, veniebat. Ipsa experta malorum acerbiter, miseris succurrere didicerat; quae est disciplina misericordiae et benignitatis efficacissima. Omnino mirabiliter ad benefaciendum facta erat, emollito ad id pectore, non modo pristinorum aerumnarum sensu diuturno, sed etiam benignitatis alienae memoria, per quam miseris illis ereptam et recreatam diximus. Quae tam facile obliviscebatur malorum suorum, eadem beneficiorum memoriam constantissime retinebat. Itaque omnibus, qui premerentur aliqua necessitate, patebat eius benignitas, cuius haud quisquam frustra auxilium implovavit: nec aliud magis videbatur dolere, quam quod animi huius sui voluntatisque prolixitati pares fortunae non contigissent.

Sed principatum virtutum omnium tenebat patientia, et in dolore ipso constantia; cuius cum per omnem vitam documenta assidue dedisset, in ultimo vitae actu dedit eiusmodi, ut prope fidem exsuperare videantur. Nam dolores quidem quam acutos, quam acerbos et assiduos, morbus ille fatalis, de quo ante exposuimus, habuerit, etiam nihil tale expertis in promptu est intelligere. At ipsa, inter medios illos dolores, primum curam rerum domesticarum non omnino dimisit, multo minus suorum, quibuscum eadem, qua suevisset, tranquillitate loquebatur, etiam cum marito filisque mandata dabat, et consilia ad mortem suam pertinentia. Sed res humanas ita curabat, ut longe magis curaret divinas
et

et coelestes, ad quas sibi abeundum sentiebat. Et ea patientia, ad quam per omnem vitam se exercuerat in tam larga et assidua materia malorum, magnam ei dabat facultatem, tranquille et accurate cogitandi, quorum cogitationem insuetis patientiae primus talis morbi ac doloris impetus solet excutere, et, ut ille ait, expectare. Ultimo quidem die vitae, cum mors ante oculos esset, sudoribus iam frigidis per corpus manantibus, primum cogitationibus tranquille indulgit iis, quibus adversus mortis timorem firmaretur animus, et ad spem vitae, vere beatae mox adeundae attolleretur, nullo tristitiae aut anxietatis signo edito: deinde marito, filiis, amicis, quotquot adessent, valedixit placida oratione; et, inter haec lacrimantibus omnibus, ipsa sine lacrimis fuit. Nempe, in vitae cursu lacrimas dare iacturis rerum carum, humanum est: cum ad metam veneris, et palma ante oculos est, alienae sunt lacrimae. Nec tum iactura est rerum, quae ad te nihil posthac attineant.

Haec vero tanta patientia quantam significationem habeat pietatis Christianae, ut nos non dicamus, tamen sua sponte videant omnes. Et ea in omni vita eius conspiciebatur, nec modo externis et communibus signis sacrorum publicorum privatorumque obeundorum, sed etiam, et multo magis, actionum omnium constantia et ad legem divinam moderatione. In quo intelligi potuit, quanta vis esset pietatis, quae prima aetate suscepta, habuerit materiam assiduam, per quam severe exerceretur ac firmaretur. Nam illa mala, quae tam mature in nostram irruerant, cum opis humanae nihil appareret, efficacius eam abstraxerant a rerum humanarum vanitate, converterantque totam ad Deum, in quo vno spes sibi relinqueretur auxilii, solatii et tranquillitatis: confidimusque, animam piam, in illa nova et vera vita, inter liquidos felicitatis sensus, gratias saepe et egisse et acturam Deo, qui se hac via, asperiori illa quidem, at tutiori, ad metam, ad illam beatam aeternitatem deduxerit.

Hanc Vos illi totis animis ita gratulamini, Cives optimi, ut eius exemplo admoniti atque incitati, ad eandem metam, ea quisque via, quam Deus ostenderit, contendatis, pietate in Deum inter laeta et tristia conservanda et exercenda, et omnibus ad eam referendis, ut cum fatalis hora venerit, et ipsi placidum et tranquillum transitum ab visibilium vanitate ad invisibilium veritatem et aeternitatem habeatis.

Ita memoriam matronae optimae praestabitis, quae eius virtute atque animo digna sit. Sed ei cumulum quendam addamus favoris in eos, quos viva tanto amore tantaque cura complexa est, optemusque, quod ipsa solebat enixissime optare, ut filii feliciter adolescant, conformatique Patris praeclara disciplina, Civitati huic nostrae, ingenio, doctrina, industria, laboris patientia, virtutis severitate, boni publici amore, utilissimi, hoc est, Patri simillimi fiant. P. P. Dom. p. Trin. a. C. cIdcccLXVIII.

M E M O R I A

IO. CHRISTOPHORI GOTTSCHEDII

LOGICES METAPHYSICES POETICESQUE
PROFESSORIS

In rebus iis, per quas populi a feritatis barbarie advocati ad humanitatis elegantiam excoluntur, non ultimum locum obtinet sermonis cura. Nam primum humanitas ea, quæ proprie dicitur, est in his, per quæ secernimur a bestiis, et ad dignitatem naturæ et ad utilitatem vitæ. Sed in iis principatus est rationis, quæ sensum veri et falsi, honestatis ac turpitudinis, ordinis et pulcritudinis habet, et orationis, per quam accipias sensus alienos et aliis impertias tuos: vtriusque autem ea est colligatio, ut esse neutra sine altera, aut recte usurpari possit, aut ad perfectionem elaborari. Itaque ut magis valemus ratione atque oratione, eo magis a brutis seiungimur et sumus humaniores: nec aliam ob causam doctrinæ eae, quæ proprie ad rationem linguamque acuendam discuntur, humanitatis nomine sunt adpellatae. Sed intelligitur etiam, dicique solet humanitas, quæ cernitur in vitæ totius cultu, præsertim, qua pertinet ad consociationem communionemque consuetudinis, et in actionum omnium decore quodam, in sensus humanos incurrente cum aliqua suavitate. Ad hanc igitur valet plurimum, atque eius etiam necessaria et permagna pars est, sermonis elegantia et pulcritudo. Neque enim satis humanus esse ac videri potest, qui habitu, cultu, gestu ac motu corporis elegans sit, voce ac sermone absurdus et barbarus, qui placeat oculis, offendat aures: estque natura

absurdum, in cetera vitae elegantia, munditie et vrbantate, sermonis rusticitatem ac foeditatem probari ac seruari; sicut vicissim non consentaneum est, aures sentire sermonis vel deformitatem vel pulcritudinem, oculos autem esse hebetes ad sensum talem in vitae cultu et actione: nec male Graeci Latinique etiam vitae feritatem ac deformitatem, abhorrentem a dignitate naturae humanae, barbariem dixere; quod est proprie linguae ac sermonis asperi et inconditi vitium. Atque vt magis intelligatur vtriusque generis colligatio et quasi cognatio; alterum genus elegantiae fere vel praecurrit, vel sequitur alterum; denique vitia vtriusque ea, quae sunt in nimis exquisita, et naturalis simplicitatis modestiam excedente, et quasi deliciante ac lasciviente copia et ornatu, mutuis illecebris et alimentis irritantur et corroborantur.

Non opus est, causas eius rei exquirere subtiliter; quamquam sunt in promptu: satis est, eam omnium temporum ac populorum vsu firmari. Vitae cultusque humanioris auctores et principes fuisse Graecos, consentientis antiquitatis testimonio constat. Sed eosdem, dubio caret, instituisse primos, sermonem ad certas leges revocare, vt fieret constans et similis sibi: tum augere verbis et verborum formulis, ad distinctionem rerum illuminandam, et coniunctionis varietatem exprimendam aptis: orationem porro intra fines quosdam coercere, ne vagaretur, et sine ordine ac modo funderetur, quam periodum vocavere: denique modis ac numeris instruere ad concinnitatem et suavitatem. Nec vero nescit quisquam, aut negat, Latinos in vtroque imitatores Graecorum fuisse, et linguae Graecae elegantiam cum reliqua eorum humanitate ad se traduxisse. Enimvero, vt quondam Graecae copiae ac deliciae vitae sermonem mollem argutiis ludentemque reddidere, initio facto in Asia Graeca, quae fuit vitae copiis ac deliciis abundantior: sic apud Romanos, sub Caesaribus primis, orationem eadem pestis adflavit. Barbaries porro populorum omnium,

omnium, qui Septentrionis frigoribus relictis, temperiem coeli mitioris secuti sunt, humanitati locum facere coepit, non magis a vitae, quam a linguae melioris usu pulsa.

Quo etiam melius de Patria merentur, magisque laudibus ferendi sunt, qui curam linguae patriae emendandae ornandaeque suscipiunt, et bene ac constanter sustinent: praesertim, cum nec parvi ingenii sit, nec levis diligentiae ac laboris, omnes eas, quas supra descripsimus, partes vel mediocriter exsequi, et in iis utcumque satisfacere et rei ipsius naturae, et bene intelligentium ingenioforumque sensibus et iudicio. Nam oportet primum univversam tenere et communem linguarum bene cultarum, accommodate ad naturam rerum constitutam analogiam, vel sua diligentia animadversam, vel ab aliis notatam et praeceptis certis devinctam et expressam, eique rudem et incertam sine legibus linguam conformare. Nosse vero etiam oportet linguarum elegantium in verbis singulis formisque dicendi bona et copias, quibus lingua caret ea, cuius emendatio proposita est; nec minus figuras conformationesque sententiarum aptas et ad brevitatem et ad concinnitatem, easque transferre, quoad analogia linguae propria patitur, ut fiat copiosior, sufficiatque tum disciplinarum artiumque subtilitati, tum eloquentiae et poeseos ubertati. Nec modo aliena bona quaerenda sunt, sed etiam nova parienda, quorum veluti semina sunt in propria linguae indole et natura. Haec autem omnia quantum difficultatis habeant, et in intelligendo et in efficiendo, vel coniectura licet intelligere, et intelligeretur magis, si earum rerum agendarum vias et rationes persequi vellemus. Sed scholam hoc tempore non scribimus.

Enimvero haec ipsa tanta difficultas facit, ut aequiores esse debeamus iis, qui in hoc studio et conatu non usque quaque felices esse videantur: non ut Amasianos et Rabirios et Catios (Cic. Acad. I, 2, 6, Epp. ad Div. XV,

XV, 16. 19.) feramus aut probemus, et si qui incitiam cum impudentia coniungant; sed ut, quae ab his, qui rem tantam bono fortique animo adgressi sunt, in eaque agenda et vrgenda studiose constanterque elaborarunt, ab his igitur quae bene acta sunt, grati agnoscamus et laudemus, curemusque etiam pro nostra parte rem bene coeptam adiuuare. Neque enim ab vno, aut brevi tempore, in vilo genere perfectio attingi potest.

Neminem fore confidimus eorum, qui haec legerint, quin, quorsum pertineant, sua sponte intelligat, aut vllam aliam orationem aptiorem putet ornandae memoriae Io. Christophori Gottschedii, Viri Amplissimi, et cum aliis multis de causis celeberrimi, et de literis communique patria praeclare meriti, tum in primis propterea, quod et in emendanda ornandaque lingua patria, et in studio eius excitando incendendoque praeter ceteros, per longam annorum seriem, egregie, nec infeliciter elaboravit. Quadraginta amplius anni sunt, cum ab Monte regio Prussorum in hanc urbem domumque Io. Burcardi Menkenii venit, hospes gratissimus Viro, qui, cum ceteris omnibus, etiam patrias literas et amarat a prima aetate, et callebat egregie, et coli non leviter volebat. Huius igitur auctoritate confirmatus incensusque et augere scientiam facultatemque literarum patriarum, e disciplina regiomontana, in primisque Pitschiana deportatam, studuit, et vero etiam scholas habere instituit, quibus non modo, praecepta eloquentiae poesiosque vernaculae traderet, ducta e Latinorum Francorumque fontibus, sed etiam exerceret ad vtriusque facultatem iuvenes doctrinae elegantis studiosos. Et facile animadvertebatur disciplinae Gottschedianae praestantia. Nam quicumque tum in eo genere discere volebant, in eam se dabant: fuitque ipse per plurimos annos magister eius generis communis et vnicus. Itaque ex ea schola exorti sunt, et se profectos fatentur propemodum omnes, qui post eum laudem bene dicendi ac scribendi vernaculo sermone consecuti

cuti sunt, Ierusalemi, Kaestneri; Crameri, Rabeneri, Gellerti, Schlegelii, Zachariae, Weisii, longa serie alii. Et erat in eo ardor ille, in quo est magna boni magistri pars, coniunctus cum industria singulari, per quem ingenia incitabat, vrgebat, prope cogeabat assidue legere, scribere diligenter, et, quae scripta essent, bene pronuntiare. Acuebat etiam commentandi diligentiam monendo, castigando, etiam interdum severius, sed ut benevolentia appareret. Qui profecissent, eos hortabatur, ut privatim congressi, recitarent, quae aut exercendi aut edendi causa scripissent, ea mutuis severisque admonitionibus castigatione redderent, atque ita paullatim ad laudem bene dicendi ac scribendi procederent. Et audivimus, qui iucunde commemorarent illarum congressionum castigationumque severitatem, easque sibi plurimum profuisse faterentur.

Erat a multis annis instituta sodalitas quaedam eleganter doctorum virorum, qui statos conventus haberent poeseos germanicae exercendae causa. In eam cum esset receptus, suffragante Menkenio, qui totam illam rem gubernabat, celeriter inter sodales studio insignis factus, vniversis suffragiis primum locum, Senioris nomine, obtinuit. Tum vero totum illud institutum acrius coepit vrgeri et latius aperiri, ut et eloquentiam complecteretur et literaturam germanicam vniversam. Ipse, quoscunque consiliis communibus idoneos cognosset, allicere modis omnibus, incendere studio suo ad iuvandum ornandumque institutum consulendo, inveniando, scribendo, quod prodesset eloquentiae, poesi vernaculae, literis illis vniversis. Itaque plurima deinceps volumina libellorum ex eo genere ab sodalibus scriptorum, et communi iudicio probatorum, prodire, et separatim cum ipso non pauci ex iis laudem sibi scribendo peperere.

Nec earum rerum vis intra sodalitatis fines constitit; sed alios contigit permultos, qui hoc exemplo incensi, et gustu quodam elegantioris sermonis, ab eorum libello-
rum

rum et scriptorum lectione, imbuti, imitari eam rationem, et persequi in dicendo et scribendo nova bona coepere: unde paullatim aliam formam accepit sermo patrius, superiori illa profecto, quae publice privatimque valebat, meliorem. Quae res ab initio habuit invidiam, ut fit, apud eos, qui in vetere ratione, quia sua esset, minusque diligentiae opus haberet, nihil novari volebant; sed vicit veritas et melior causa. Itaque, si verum volumus dicere, plurimum in ea re debetur Gottschedio; non quo ille primus aut solus ista invenerit, praeceptis, exemplo docuerit: nam et alii ante ipsum fuere: sed quod ille industria, et invicta animi constantia perfecit, ut, quod fuerat paucissimorum, fieret, sitque cummaxime, quam plurimorum, non modo apud nos, sed etiam apud alios. Nam et Sodalitatis illius institutum, quod ipso gubernante maxime inclaruit, in clarissimis Germaniae Academiis ad imitationem vocari coepit, et libri Gottschediani per omnes Germaniae partes divulgati lectique sunt, denique discipulorum permulti eius disciplinam in alia loca detulerunt.

Sed ut magis forma universa totius muneris illius appareat, age, quid et quomodo ab eo actum sit, ut lingua patria ad similitudinem earum revocaretur, quae elegantiorum hominum iudiciis probantur, adsumeretque paullatim earum bona, quibus quasi gradibus in eâ re progressus sit, breviter commemoremus. A Monte regio attulerat eloquentiae, tum universae, tum maxime vernaculae, sensum non absurdum, nec contemnenda initia: audierat enim Quandium, Lilienthalium, et, quem in primis laudare solebat, Kreuschnerum, disertos et elegantes oratores in Ecclesia Montis regii: at praecepta dicendi nulla norat, quam quae a praeceptore Rhodio acceperat, similia iis, quae in cetera Germania valebant, in libellisque germanicis vulgaribus de arte oratoria trahebantur, ad quae vulgo dirigebant homines conatus dicendi, sive potius sine gravitate et gratia garriendi. Ea

re

re animadversa, monuit eum Menkenius; ut istis nugis spreto, veteres artis magistros, Ciceronem, Quintilianum, et si qui essent his similes, adiret verae eloquentiae discendae causa. Paruit eius auctoritati, ex illorumque libris tum praeceptorum silvam in modicum corpusculum redegit, quo in docendo uteretur. Id ille non statim, ut nunc faciunt multi, cum vix ad docendum accessere, in publicum edidit, sed per singula semestria inter docendum emendare, augere tentavit et locupletare, denique fingere diligentius: et sic demum, ut scribendi laborem demeret auditoribus, formulis librariis exscribendum permisit, adiuncta versione germanica libelli veteris de causis corruptae eloquentiae. Hoc corpusculum praeceptorum ille quidem posthaec magis magisque expolivit, etiam auxit, additis inter alia quibusdam proprie ad eloquentiam ecclesiasticam pertinentibus, quae ab iis parum aequis animis accipiebantur, qui ea suis dissimillima videbant; sed etiam maius eiusdem argumenti opus perfecit, adiectis exemplis praeceptorum omnium. Vtrumque saepe repetitum est: adeo probavit se multis.

Sed praecepta magis valent ad iudicandum, quam ad faciendum; viam demonstrant, qua eundum sit, sed vim ingrediendi non dant. Itaque fecit alterum, quod proprie facit ad transferenda linguarum bona, a quo in linguis aliis, ut latina, francica, factum est expoliendi, locupletandi et ornandi initium: coepit exempla graeca, latina et francica, germanice interpretari, Demosthenis Philippicas, Luciani quaedam, Ciceronisque Archiam et Ligarium, non verbum de verbo, nec ad summam veritatem grammaticam interpretando, sed sententias earumque formas verbis ad germanicam consuetudinem aptis utcumque exprimendo, quod erat ad illud consilium satis; itemque Flechierii Turennum et Fontenellii quosdam scriptos in sermone ac dialogo lepidissimos libellos. Atque ipsius exemplum secuti tum sodales eius in Collegio, de quo supra diximus, tum alii, multa de iisdem fontibus
per

per versiones in linguam nostram transfundere instituerunt, longe illi dissimiles his, qui nunc, vnius quaestus causa, promiscue omnia Francica et Britannica faciunt Germanica, vtilitatis communis immemores ac negligentes.

Eandem viam in re poetica ingressus est. Attulerat enim ille quidem in hoc quoque genere gustum quendam haud vitiosum, a Pitschio, egregio poeta, acceptum, et bonis quibusdam exemplis legendis, acueratque eum etiam naturalis quidam sensus recti in eo genere et pulcri; sed praecepta pariter nulla didicerat, praeter vulgaria, vt Menantis cuiusdam. Deduxit eum hic quoque in viam Menkenius, cuius ab admonitu legere coepit Aristotelis Poeticam, Rappoltique, nostratis, ex Aristotelicis ductam, Scaligeri de re Poetica opus, libellosque eiusdem argumenti Francicos plures, quos Bibliotheca Menkeniana suppeditabat. His igitur legendis cum veram poeseos naturam cognovisset rectius, rogatus ab nonnullis, vt sibi artis illius praecepta traderet ad eum modum, quo rhetorica soleret, ea coepit ita scribere, vt duodecim capitibus vniversam artis naturam vtcunque adumbraret. Ea initia primum lectionibus explicavit aemulantibus poetici artificii studia; paullo post diligentius elaborata edidit sub *Artis Poeticae* nomine, addita Parte altera, quae de generibus Carminum explicaret, primum (vt quarta repetitio habet) antiqua et communia, deinde nostratia et nova. Addidit etiam versionem poeticam Artis Horatianae, quam, ipse fatebatur, se, lectis demum illis, quos diximus, magistris, intelligere coepisse. In qua versione etsi quaedam abhorrere videbantur a verborum Horatianorum sensu: nam et Dacierius et alii interdum aberravere: tamen summa rei salva erat, quam maxime et ipse spectarat, et ab aliis spectari volebat. Sed opus hoc admodum offendit poetastros et vulgaris rationis magistros, qui se nullo numero fore intelligebant, si haec demum vera poesis esset, quam Ars illa traderet et com-

commendaret: ceterum probabatur vehementer ab aliis. Ac profecto haec Ars docuit multos rectius de re poetica iudicare, et rectos de ea sensus, qui antea perpauco- rum, h. e. eorum modo fuerant, qui literas Graecas et Latinas egregie callerent, latius propagavit. Nam quod non omnibus satisfecit vniversis partibus suis: nec erat expectandum, vt tale opus statim haberet omnes numeros, nec ipse ita de eo iudicabat. Itaque quoties repetendum erat, castigabat, nec facile se lenibus monitori- bus asperum aut repugnantem praebebat.

Sed ad huius artis praecepta, tum in aliis generibus carminum curam scribendi dirigebat, quod et multi alij de disciplina eius, familiaresque et sodales in Collegio, quod supra commemoravimus, ipso praeunte, faciebant, tum maxime in genere dramatico, ad quod studium suum paullo post in primis contulit; in eoque et ipse, et eius exemplo incitati multi alij, egregie elaborarunt, ac per hoc ipsum, de lingua certe patria, bene meriti sunt. Atque vt de genere hoc vniverſo dicamus, quod et insti- tuta oratio requirere videatur, et non sit alienum a lau- dibus Gottschedii: totum illud poetarum artificium, scenae serviens lusibus, rationem ab initio habuit hanc, vt vitia vitae communis ac civilis imitationis leni irrisione corrigerentur, nec modo, quae essent in actionibus et moribus, incurrentibus cum aliqua molestia in sensus hominum, sed etiam in sermone. Postea longius spectare coepit poetarum ingenium, sententias graviores de rebus divinis et humanis inferendo fabulis, in primis tragicis, vt a Sophocle et Euripide factum videmus, et vero et- iam comicis, vt praeclara illa e Menandro, Philemone aliisque excerpta demonstrant, ab ipsis Ecclesiae Chri- stianae Doctoribus, a Clemente inde Alexandrino, saepe commemorata, et ad illuminandas disputationes suas vsurpata, ad extremum etiam sub certa capita redacta, vt velut corpusculum Theologiae naturalis et doctrinae moralis efficeretur, in quo, vt B. noster Lutherus et Phi-

H

lippus

lippus Melanthon loquuntur, sonaret vox naturae, non obscurius, immo etiam clarius, quam in disputationibus philosophorum ipsis. Poetae autem ii, qui fabulas Comicas scripsere, sibi velut magisterium linguae sumserunt, primum haecenus, ut veram eius elegantiam puritatemque exprimerent, unde, ut hoc utamur, Aristophanes pro Canone Atticismi semper habitus est; deinde, ut vitia sermonis, non modo popularis, sed etiam oratorii, tragici, omninoque poetici, notarent; ut totus Aristophanes docet, si quis intelligere et discernere potest ea, quae pro suis, et quae irridendi causa ponit: est enim observatio eius discriminis non nimis facilis, et elegantis iudicii. Non dicemus, quomodo ab his consiliis et institutis aberrans consuetudo poetarum et scenae lapsa, infamiam contraxerit multis et iustis causis apud graves viros, in primisque Christianos, quorum etiam disciplina, haud paullo gravior et certior, supervacuam fecerat scenicam; ne et ipsi longius ab instituta oratione aberremus: illud non alienum est dicere, cum hoc genus poetices dramaticum inter ipsos Christianos usurpari coepisset ac tolerari, haec ratio haberi debuerat, ut esset sententiis et verbis rectum et purum, delectaretque honeste et cum aliquo ad decus et elegantiam vitae communis et civilis, sermonis popularis certe, fructu. Enimvero, in Germania, ne de aliis populis dicamus, quale fuerit superioribus temporibus ad nostram usque aetatem, si quis eius rei cognoscendae curiosus sit, facile cognoscat. Erat utique et rebus atque sententiis humile, ieiunum et fordidum, plenum salibus insulsis et absurdum verbis. Itaque etiam ab ipsis Germanis, vel qui non alieni essent ab oblectationibus scenicis, repudiabatur. Noster ergo Gottschedius non alienum putabat a sua, Poetae, professione, huius rei curam suscipere, eamque consulendo, monendo, praecipiendo scribendoque ad pristinum et verum consilium usumque revocare. Scribendi quidem, et fabulae suae serendae initium fecit in *Catone*, quem decies

decies repetitum, toties paene emendavit: sed multo plures de Francicis vertit et ipse, et per alios verti curavit. Sua et *Adelgundae* suae exempla sex deinceps voluminibus bis edidit. Vt paucis absolvamus, Franci quidem ipsi, quorum in eo genere elegantius iudicium putatur, Gottschedium de hac parte carminis germanici, deque vniversa re scenica, primum bene meritum esse fatentur, nuper etiam illustri*s Historiae ingenii humani* Auctor (T. XI. p. 297.).

Posthaec omnia, post tam longum vsum, ad Grammaticam linguae Germanicae scientiam popularibus suo modo tradendam adiecit animum, absolutumque opus novum, post diuturnam cunctationem demum, ante hos vnde viginti annos, primum edidit, quater deinceps castigatum ac repetitum intra quindecim annos, professus difficultatem rei, et timorem ac verecundiam iudicii publici, denique voluntatem parendi monitoribus peritis: quam re praestitit per omnia nova recensitionum exempla. Expertus est censores multos, non modo lenes, qui adnotatiunculas privatim ad eum misere, sed etiam publicos, quosdam et severiores. Quae res nihil habere debet admirationis in nostra lingua, in qua consentire Grammatici quomodo possunt, cum et dissentiant Graeci et Latini. Est etiam Grammatica res infinitae observationis, in minutisque rebus ac singulis saepe literis versatur; in quibus aliquid, immo multa praetermitti, aut peccari, prope necessarium est: quippe in Latinis, post tot seculorum, totque eruditissimorum virorum studia et observationes, tamen subinde aliquid desiderant, qui attentius vsum loquendi latinum observarunt. Verweius quidem, (*Nova Via docendi Graeca, praef. p. 7.*) vt de Graecis dicamus, quatuor Grammaticos scribit esse coniungendos, Wellerum, Caninium, Sylburgium et Vergaram, si quis Grammaticam Graecae linguae perfecte cognoscere velit. Et quam multa, post hos quoque, rectius ac diligentius observata sunt in singulis partibus Grammati-

ces Graecae et definita? Quae nobis quidem videntur desiderari posse, eorum quaedam, velut temporum definitio, eorundemque et modorum consecutio legitima et accurata, ea ergo pariter in Grammaticis Graecae et Latinae linguae libris superiorum seculorum desideramus.

His commemorandis arbitramur nos effecisse, ut omnes intelligant non modo id, quod maxime volebamus, et quod erat propositum, hoc est, a quibus initiis, quibus gradibus, et qua progressionem tum discendi, tum agendi, institutum suum sit persecutus, sed etiam alia non contemnenda, nec parum laudanda. Nam primum viam ipsam rectam esse, qua ingressus sit, qui initio a veteribus exemplis bene dicendi ac scribendi factis, et inde artis praeceptis haustis, bona aliarum linguarum in nostram, primum vertendo, deinde imitando, paulatim traducere, denique, post haec omnia, regularum vinculis adstringere modum sermonis patrii tentarit, id supra quidem iam ex parte admonuimus. Non autem hoc est optimi ingenii, quod, cum sibi iam aliquid esse in dicendo et scribendo videbatur, iam doctoris artium nomen et honores gerens, tam promte et facile paruit recte momenti, praesertim ea aetate, quae vel maxime, propter imbecillitatem iudicii, solet esse praesidens sibi, et monitoribus non nimis facilis? Quis ergo dubitet, si ei in tempore, cum in Regio monte disceret artes, monitor quidam talis obtigisset de literis Graecis et Latinis supra vulgarem rationem exquisitiusque discendis, quin promte studiosaeque eius auctoritati obtemperaturus fuerit? Illae vero perpetuae in singulis librorum editionibus castigationes eorum, quae vel sua sponte, identidem examinando, quae ante scripserat, vel ab admonitione aliorum, animadverterat, correctione aliqua vel accessione opus habere, quam diligentem modestiam arguunt?

Sed in tota illa causa non parua adiumenta habebat a Philosophia, cuius scientia et usu mature ingenium acueret tentarat, usus praeceptoribus bonis et fidelibus. Eius
autem

autem disciplinae adiunxerat etiam doctrinas mathematicas, sive, quia genus Philosophiae, quod primum a magistris Regiomontanis traditum tenebat, plus ceteris tribuit mathematicae subtilitati, eiusque disciplinam commendat diligentius, sive aliis quibuscunque de causis. Sequebatur in Philosophia vniversa rationem Leibnitianam, a Wolfio illustratam et propagatam latius, sed, vt ingenia non obtusa solent in omni ratione philosophandi, modo quodam suo et iudicio: dissenseratque statim a principio in quibusdam eius disciplinae propriis placitis, vt de modo coniunctionis, quae corpus animumque intercedit. Sed hac maxime de causa sibi in primis eam disciplinam dicebat probari, quod ordine et perspicuitate ceteris praestaret, in quo ne adversarii quidem eius disciplinae obloqui audeant, verissime iudicans, in his duabus rebus esse disciplinae Academicæ, vt in omni genere, sic maxime in Philosophia, caput. Nam res ipsae, maiores quidem, et maxime necessariae, fere sunt communes omnibus: Summa boni doctoris est in adsfaciendis disciplina sua ingeniis sentiendae primum, deinde imitandae in differendo perspicuitati rerum et verborum, et ordinis descriptioni: cum secus est, etiamsi optimae res sint, magis non intelligendi, quam sapientiae disciplina iudicari debet. Primus noster huic Academiae Wolfianam illam rationem intulit, imitatore mox nactus Ioecherum. Vtebatur primum Compendio Thumigiano; mox ipse vernaculo sermone exemplum illius disciplinae prodidit, et breuitate et perspicuitate aetati iuuenili accommodatum, cuius septima recensio facta est ante hos quinque annos. Nec nostris modo placuit opus: etiam externi suum facere instituerunt. Nam et Danice et Polonice versum est. Descriptio operis haec est: instrumento recte philosophandi et eius vsu tradito, notionibusque rerum summis explicatis, primum rerum corporarum, deinde intelligentium naturam demonstrat: post iura et officia humana, denique domus et reipublicae

bene regendae modum exponit. Philosophiam eandem quam sapientiam facit, a qua Philosophi iidem Sapientes olim dicti; sapientiam autem, Leibnitium secutus, facit felicitatis scientiam, intelligens humanam; nam divinam omnem ad consiliorum bonitatem referebat. Ad hanc definitionis veluti finem totam explicandae disciplinae rationem dirigit, quod est ei proprium. Praemissa est brevis Philosophiae historia. Quae per varias occasiones Academicas de quaestionibus philosophicis scripsit, quae sunt bene multa, commemorare non est necesse. Et nos festinamus totum Gottschedium, quibus parentibus ortus, quibus magistris usus sit, quem cursum totius vitae tenuerit, breviter describere, posteaquam eum, ut doctorem, et praecipua sui parte, spectandum proposuimus.

Natus est in villa haud procul a Monte regio in Prussia, Iudithae templum loco nomen fecit, Patre Christophoro, qui in ea villa sacra curabat, die Februarii altero, anno superioris seculi ultimo. Praeceptorem pueritiae habuit Patrem ipsum; e cuius disciplina missus in vicinam Academiam, usus est praeceptoribus, in humaniori quidem disciplina et Philosophia, Gerkio, Rhodio, Meiero, Henrico Sandio, Kreuschnero, Fischero, Blasingero, Strimesio, Rastio et Behmio, in literis hebraicis, Hahnio et Wolfio, in Theologia denique, Quandio, Sandio, Langhansio, Lysio, Masecovio et Lilienthalio. Cum novem annos in horum disciplina, quae traderentur audiendo, quae audierat exercendo et agendo, consumsisset, etiam famam aliquam disputando, dicendo scribendoque collegisset, Magistri artium et philosophiae honoribus acceptis, pro Cathedra disceptavit Diatriben de *genuina omnipraesentiae divinae notione*. Anno post, periculo antiquo territus, concessit in hanc Urbem, datoque nomine Civitati nostrae, iura Magistrorum nostrorum adeptus est Disputatione publica, super proposito de *Hamartigenia* libello, in quo res erat secundum Leibnitianam rationem explicata.

cata. Secundum haec locus ei datus est in Collegio Mariano, qui ab Hanschii discessu ex hac Vrbe vacabat. Ex eo Collegio post in Principale maius transit. Praemia alia doctrinae et meritorum habuit haec: primum Poeticam extra ordinem profiteri iussus est; quatuor annis post, Dialecticam et Metaphysicam publice inter Professores ordinarios: accessit Ephoria alumnorum Principalium, Collegii denique Paullini cura. Magistratu Civitatis nostrae sexies, Ordinis philosophici octies functus est. Conditiones externae aliquoties ei oblatae sunt, primum Petroburgensis, post Francofurtana, denique Marburgensis, cum Wolfius Halam revocatus esset. Sodalitium literarum Germanicarum apud nos rexit annis duodecim: Regiomontano et Goettingensi Sodalitii honorarius adscriptus, et Collegiis doctrinarum pluribus ascitus est Sodalitii, Berolinensi, Monachienfi, Augustano, Maguntino. Matrimonium bis iniit: primum a. mcccxxxv. cum Ludovica Victoria Adelgunda, D. Io. Georgii Kulmufii, Medici Gedanensis clarissimi, filia; de cuius ingenio, doctrina, virtute longum sit dicere: dixit ipse felix eo coniugio maritus, qui poterat optime. Eam cum amisisset e gravi et diuturno hydrope, ad alterum matrimonium adiecit animum, duxitque Ernestinam Susannam Catharinam, Viri generosi et strenui, Ioannis, e Neuneffis, Protribuni in Cohorte Ducis Gothani filiam, animi corporisque dotibus ornatissimam: quacum iucunde vixit annum totum. Eo vertente, media superioris anni aestate, invasit eum hydrops, quo paullatim confectus, leniter exspiravit die XII. Decembris.

Ita amisimus Virum ingenii excellentis, doctrinae multae, laboris efficacis et invicti, multis modis de re communi literarum meritum: amisimusque ante multo, quam putaramus, corporis robur animi vigore aestimantes. Et erat ei corpus bene compactum et validum, firmisque lateribus: sed laboris multitudo paullatim adfecerat, imique pedes ante multos annos tumorem con-

traxerant ab sedendi assiduitate, quem nec thermarum nec alia remedia discutere: ceterum ex eo nihil incommodi sentiebatur. Is repente sublatus praecordia invaserat, nec remediorum, naturalisque roboris vi expugnari et detrahi sede sua, salvo domino, potuit. Nam in eo conatu naturae, per quem est expulsus, omnis vitae vis ita est consumpta, ut languore paulatim deficeret, qui morbi ipsius vim sustinuisset et fregisset.

In tam diuturna et gravi valetudine in primis sustentabatur et recreabatur, tum sermonibus et solatiis Coniugis fidelissimae, tum et ipsius et Socrus indefessa et exquisitissima cura, amicorum crebris alloquiis, in primisque Viri Rev. I. A. Scharfii, cuius etiam de manibus vaticum corporis et sanguinis I. C. religiose accepit. De animi in eo periculo habitu interrogatus ab Theologo amico, ita se adfectum esse, magna oris constantia et tranquillitate, respondit, ut nec vivere, si Deo videretur, nec mori nollet.

Omnino erat in eo animus fortis et robustus, nec minus acer ac strenuus. Facile et assidue laborabat, et brevi tempore multum profligabat: habebatque ingenii pariter atque animi celeres motus, in his eum, quem Aristoteles ingeniosis communem facit, h. e. iracundiam, sed quae plerumque non minus celeriter deflagraret, quam exarsisset. Itaque interdum asperior in adversarios reperiabatur: sed nec facile quisquam acerbiores est expertus. Nec aliam ob causam interdum vel extollere supra modum videbatur literas suas, vel deprimere alienas, quam quod alienarum laudes ad contemptum suarum, aut suimet ipsius, de industria trahi viderentur.

Modestiam in iudicando de se ac decernendo de rebus literarum, cuius facile ac nimium saepe oblivio venit iis, qui in aliquo genere doctrinae diutius, in primisque docendi causa, et cum laude multorum, versati sunt, eam igitur modestiam haud facile desideret iudex non iniquus in eo, qui tam saepe in rebus difficilibus et obscuris libe-
rum

rum iudicium aliis reliquerit, etiam contra suam opinionem, ut in capite eo, quod animi cum corpore coniunctionem explicat. (*Philos. P. I. §. 1077.*) Et tamen in rebus magnis et vtilibus libertate iudicandi, vel contra aliorum opiniones, et cum invidia sua, utebatur, nec per inanem modestiae speciem deferens causam, quam probaret, nec assentandi fraude captans gratiam cuiusquam.

Docendi commendatio multiplex erat: prima perspicuitatis, quae intelligendi difficultatem etiam valde mediocribus ingeniis demeret: altera gratiae, quae discendum animos facile teneret. Ea non illiberalibus iocis, aut aliis fordidis artibus erat quaesita, sed ab orationis elegantia nata, nec minus ab ipso vocis sono, qui etiam animi quandam contentionem indicabat, cupientis et laborantis penitus imprimere audientibus, quae traderentur. Et sermone vernaculo utebatur, non ad negligentiam loquacitatis, quae res vtcunque cognitae aut cogitatae, verbis temere oblatis nulloque delectu, profunderet, neque ad licentiam iocandi aut maledicendi, sed ad exemplum bene differendi sermone patrio, hoc est, similimo ei, quo in scribendo vteretur.

In omni autem genere scribendi nihil tam sequebatur quam perspicuitatem et simplicitatem, quae et ipsi perspicuitati serviret, et naturae facilitatem imitaretur: unde quibusdam interdum, sive ita erat, sive videbatur, tenuior iusto et languidior credebatur, praesertim in carmine, quam dignitas rerum et carminis pateretur. Et facilis est lapsus in contrarium, si quid studiosius vel sequare, vel vites: nec quisquam in scribendo semper est similis sibi: quippe nec semper eadem diligentia uti possumus, praesertim in vita occupata, nec semper eodem quisquam modo est in scribendo adfectus. Itaque Plinius in edendis epistolis delectu sibi opus esse existimabat, ut tantum accuratius scriptarum rationem duceret. Quo delectu, praesertim in carminibus edendis, occurrili reprehensioni potuisset. Ac putabat, tolerabilius

in hanc partem peccari, quam in alteram illam, in quam nimio plus proclives nunc esse scriptores, iure querebatur. Nam et densandis nimis sententiis, praesertim quaesitis et contortis, obscurare orationem, et verbis male novis, atque ad francicarum britannicarumque argutiarum imitationem factis, fucare et corrumpere.

In amicitiiis expetebat maxime studiorum communionem, easque colebat officiis mutuis. In iuvandis quidem amicis, itemque ingeniis bonis, vel consulendo, vel agendo, nihil eo studiosius atque promptius vidimus. Nec semper bonam gratiam tulit.

Neminem, ut opinamur, plures adversarii exercuere: sed nec quisquam facile ex hoc literato vitae genere plurimum Principum gratias meruit. Nam ornatus est iudiciis, significationibusque multorum luculentis, donis etiam, in his Mariae Theresiae Augustae, Regis Prussorum, Friderici Christiani, Patris, et Mariae Antoniae. Posteritas, obrutis invidiae odiorumque causis, controversiarumque memoria oblitterata, cum solam rem causamque videbit, omnium de Gottschedio iudicia sic aequabit, ut de sermone patrio et omni bene dicendi ac scribendi genere, quae est non parva res, immortaliter meritum esse, omnes fateantur, et initia melioris sermonis et elegantioris ab ipso ducant. In cuius laudis societatem veniet vel maxime Academia nostra, in qua id lumen literarum luxisse patriae communi feretur.

Quo magis convenit, nos, Cives Optimi, favere memoriae Viri talis, eamque, ante capienda temporis futuri aequitate, iustis laudibus prosequi, nec committere, ut posteritati isti vel, propter inscitiam, non vidisse bona ab eo orta, vel, propter etiam turpiorem causam, agnoscere noluisse videamur. P. P. Dom. II. p. Epiph. a. C. clcxcclxviii.

M E M O R I A
FRIDERICI AVGVSTI IVNII

I. V. DOCTORIS ET CIVITATIS LIPS.
SENATORIS

Alienum esse ab hominis natura dolorem, tum alia arguunt, tum insitus ei et cum omnibus animantibus communis metus in doloris imminentis suspicione; sensus deinde ipse in doloris praesentis tormento, repellens, quantum potest, amoliansque causam rei tam ingratae; denique non minor suavitatis appetitus, et, dum ea percipitur, hilaritas animi, amplexantis omni modo id, unde illa ad se pervenit. Et tamen, ut rerum adversarum omnium acerbitas facilius toleratur ab animo humano, quam rerum secundarum suavitas; sic et corpora hominum citius debilitantur ac franguntur mollibus voluptatum fomentis, quam acerbis dolorum moribus: et cum corpus celeriter rerum dulcium, si assidue et copiose sumantur, fastidio fatigetur: doloris contra assiduitate ad perpetiendum firmatur, ut etiam minus doleat; ipsa consuetudine vim doloris frangente paulatim et minuente. Quam multi vitam inter multos et saepe magnos dolores ad senectutem traxere, dum alii multi bonae valetudinis fiducia ruerent, et per res iucundas vitam praecipitarent? Incredibile dictum est, quantis dolorum tormentis resisterint corpora multorum, etiam non nimis valida, quae longe minor et brevior voluptatis impetus peremisset.

Quae igitur est huius velut dissentientis a se naturae et secum pugnantis causa? quid illam deinde discordiam com-

componit ad naturae humanae incolumitatem et diuturnitatem? Dolor est adversus et inimicus naturae corporis humani: nam vim ei facit et minatur interitum: at in dolore citius perdurat corpus, quam in suavitate, quae dolori e contrario respondet, meliusque illius vim et quasi iniuriam fert natura, quam huius gratiam et blanditias: prope ut optabilior doloris quam suavitas sensus videri possit. Non indigna res videtur, de qua quaeratur, et ad cognoscendi iucunditatem et ad vitae usum. Hoc igitur, pro consilio hoc scribendi et pro facultate nostra, faciemus.

Scita est Socratis quaedam in Platonis Phaedone de voluptate et dolore disputatiuncula, non longe a principio: in qua dicit, mirabiliter sic esse constitutum natura, ut dolor et voluptas, quia simul eodemque tempore movere corpus humanum non possent, tamen velut extremis verticibus copularentur, doloremque voluptas, voluptatem vicissim dolor sequeretur. Nam plerumque voluptas, ut quaeque acrior est, ita magis ac celerius dolore expiatur, et voluptas quaeque honestior et constantior laboris dolorisve molestia emitur. Nec inter laboris et doloris molestiam multum interest, habetque apud Graecos uterque idem nomen: quamquam id reprehendit, et pro inopia graeci sermonis irridet Cicero in Tusculana altera; haud scio an temere, qui ipse non dubitet doloribus pedum, oculorum et aliarum partium corporis humani afflicto, laborantes e pedibus etc. dicere. Ipsa doloris depulsio et vacuitas, si nihil aliud sequatur, gratum certe sensum habet, commendatque etiam quotidianas et contentas oblectationes: vicissim a voluptate omni fere languent animi et corpora; et vel ipsa velut amissio sensus grati habet aliquid molestiae, saepe tantam acerbiter, quem dolorem nemo dubitet appellare. Sed agendum est pressius.

Atque ut a voluptate incipiamus, non est mirum, si eam haud facile aut diu tolerare corpus humanum potest,
cum

eum in ea nihil insit, quod roboret corpus animumve, aut vim insitam excitet augeatque: omnia, quae frangant opprimantque. Nam robur vel acquiritur vel augetur contentione tum ad agendum, tum ad resistendum, et exercitatione contendendi, praesertim quae fiat animi inductione, orta et confirmata ab ratione bene instituta. Sed horum nihil est in voluptatibus percipiendis et usurpandis: nulla in iis intentio, neque agendi neque repugnandi: nulla exercitatio habens aliquid laboris; nulla inductio animi ratione conformati, quae vel habeat ipsa aliquid roboris, vel imperando impertiat. Nam ut motus suavitatis voluptariae illabatur corpori animoque, ita ille recipitur totis sensibus, eique indulgetur penitus, donec aut actio imprimens eum sensum tollatur, aut fatigatio corporis animique fastidientis consequatur. Quae sunt omnia ignaviae et mollitudinis, in qua nihil neque roboris esse potest neque nervorum. Nam nec actio vlla animi intendentis se et vim suam intelligi potest, aut corporis. An igitur mirum est, si et animus et corpus fragitur a voluptate, et omnis eius vis obruitur atque sepelitur. Vere profecto liquefieri homines, scilicet ut nivis molliem a sole, et diffuere a voluptate Graeci atque Latini dicunt. Resistere voluptati, id est, cupiditati eius percipiendae ac fruendae, et animum iubere spem et voluntatem eius fruendae dimittere, et intendere mentem ad cavendum, hoc est roboris: nam in eo est actio aliqua animi contententis adversus voluptatem et comprimantis cupiditatem eius: at in indulgendo voluptati nihil huiusmodi est. Itaque et animum et corpus debilitet paullatim et vim eius extinguat necesse est, etiamsi nullae aliae causae accedant. Quae sunt plane contraria in dolore.

Primum ille conatus corporis vel fibrarum, in quibus efficitur sensus doloris; cum tenduntur supra naturae suae modum; earum igitur conatus, nitens adversus doloris vellicationes, habet ipse aliquam vim ad corroborandum:

randum: nec minus alter animi, repellentis sensum molestum. Tum, ut suavitas voluptatis cuiuslibet assiduitate fruendi minuitur, sic consuetudo ipsa doloris aculeos leviter primum reflectit, deinde etiam paulatim retundit, facitque tolerabiliorem multo, quam in primo morfu fuerat, dolorem, denique sensum eius prope totum extinguit. Videmus in militibus vulneratis, quantum intersit inter tironem insolentem vulnere, et illum veteranum, qui saepe antea vulneratus fuit. Pueri autem Spartanorum, etiam consuetudine patiendi adversus dolorem, ita obdurescebant, ut nec gemitum inter verbera, etiam cum sanguis manaret, ederent, nec vultum mutarent. Est quippe in consuetudine doloris et ipso actu patiendi quaedam exercitatio, etiam cum est mera perperessio, nulla mentis actione sustentata; qualem habet laboris assiduitas, etiam in invitis, per quam laboris omnis paulatim molestia demitur. Sed sunt exercitationis oppugnandi et frangendi doloris adiumenta permagna et efficacia ab cogitatione et meditatione, primum ante doloris accessionem, quam commentationem doloris possis dicere, deinde in ipso doloris sensu. Vanas etiam opiniones, si alte infederint animo, atque, dum dolor saevit, per cogitationis velut machinam ei admoventur constanter, vincunt acerbiter, non, ut ne sentiantur, sed ut toleretur sine eiulatu aut gemitu, aut alia etiam maiori turpitudine discedentis ab officio animi. C. Marius, cum varices secandos praebebat, noluit pedem alligari; quod fiebat vulgo in aliis, ne inter sectionem, per doloris impatientiam, inepte moverentur: negabat, decere virum militarem. Sola opinionis vanitas valebat ad comprimendum doloris sensum. Post etiam haud paullo vanior opinio valuit. Nemo post eum vir se passus est alligari in ea curatione. Tantum potuit exempli humani auctoritas! Nempe turpe putabat quisque, si quod alius sustinisset fortiter, ipse sustinere non potuisse diceretur. Paulo gravius fuit, quod Philosophis pro-

profuit ad vincendum dolorem, ne dedecori essent disciplinae, quae in dolore malum esse negaret, vt Posidonio Stoico, ex artubus laboranti; sed tamen non expers vanitatis. Quid ergo putamus, sententias vere graves sapientiae divinae, et exempla sanctissimorum hominum, in primisque divinum illud Iesu Christi, quantam vim habere, si in illa commentatione et exercitatione vsurpentur? Sed illud vitii est in ea re, quod haec quasi arma non ita aptamus nobis, vt, quemadmodum Romani arma appellabant *membra militis*, sic sint *membra nostra*, velut militum Christi: plerique etiam disciplinae militaris partem hanc ignoramus, nec exercitationis necessitatem agnoscentes, nec eius modum tenentes: quod non aliud est, quam si similem solis praeceptis audiendis arma bene tractaturum credas, aut medicinam profuturam per commendationem medici, ipsam fumere, et diaetam praescriptam observare non sustineas, nec necessarium putes. Sed de illius exercitationis modo dicere longius sit, quam oratio instituta patiatur: et est ea disputatio Philosophorum atque Theologorum, qui de modo virtutis omnis per idoneas exercitationes comparandae debent praecipere.

Dicat aliquis: est etiam adversus voluptatem pugnandi exercitatio, per quam vis eius frangatur. Audimus. Sed illa exercitatio pertinet ad animum abstrahendum ab ipsa voluptate, ne ei se dedat, nec ei fruendae indulgeat, sed potius delinimenta eius fugiat, eaque ne sentire quidem velit; in voluptate ipsa, cum percipitur et dulcedine sua animum permulcet, nulla est exercitatio ac disciplina eius frangendae ac tolerandae, ne noceat corpori, ne effeminet animum, ne sensum bonorum inadspectabilem obscuret atque extinguat, ne ab officii custodia abstrahat: quae sunt omnia in illa doloris commentatione et disciplina. Nec in voluptate, dum sentitur, quicquam est ad repugnandum, ad repellendum incitamenti, immo plurimum illecebrarum ad penitus, ad diutissime fru-

fruendum. Vix ostendenti se procul voluptati resistitur; nedum haerenti in pectore, in medullis. At dolor, ubi adest, quam fortiter excitat vel ad depellendum, vel, quia id fieri saepe non potest, ad minuendum ac debilitandum eius sensum per remedia, quae animus de suis quasi officinis praebeat, praeparata illa per earum rerum, quas paullo ante indicavimus, meditationem, admoventem autem dolori per cogitationis piae constantiam et assiduitatem, et inductionem animi imperantis infirmæ parti naturæ, ut se contineat, ut, quamquam cum difficultate aliqua, pareat tamen divinae sapientiae vocibus, hoc est, Deo.

Hæc nobis venere in mentem, cum vellemus memoriam Frid. Aug. Iunii, Viri Amplissimi, tum univérse, tum ex parte ea commendare, a qua profecto in primis digna commendatione et honore debet videri. Nam cum in eo fuerint multarum egregiarumque virtutum exempla, tum nullum aliud maius, quam patientiæ in doloribus et assiduis, et diuturnis, et acutis. De quo ut plurius dicere possimus, ante videtur de vita Viri univérse exponendum.

Natus erat in hac urbe nostra, Patre Vlrico Iunio, doctrinæ mathematicæ Professore clarissimo, et multis partibus de re nostra publica praeclare merito. Is in matrimonio habuit Annam Elisabetham, Io. Olearii, Theologi nostratis filiam, uxorem ante Christophori Pfauzii, cui in Professione mathematica, anno huius seculi vndecimo, successerat. Ex ea quintam prolem suscepit Fridericum Augustum die XIII. Nov. anni duodevicesimi. Matrem amisit bimus, patrem, cum annum octavum nondum expleffet. Mortuus est enim mense Martio anni sexti et vicesimi. Matris animum reddidit indulgentia novercæ, Annæ Eleonoræ, D. Iacobi, Senatoris Praetorii in hac Civitate nostra filiae; patris autem Fridericus Menzius, Professor clarissimus, et D. Iacobi, Medicus dextrissimus. Nam vterque cura pueri bene

bene educandi suscepta, nihil non egit, ut ingenium eius animusque acciperet cultum ei aetati aptum. Itaque primum privatis eum praeceptoribus tradiderunt erudendum, deinde etiam publicis in schola ad D. Nicolai, Dreslero, Ortlobio et Haltausio: sub quibus ita in studiis humanitatis profecit, ut anno aetatis undevicesimo ad lectiones Academicas audiendas mitteretur. Philosophiam didicit ab avunculo, Oleario, Professore utriusque linguae, et Fr. Aug. Mullero: mathematicas doctrinas cognovit per disciplinam G. Fr. Richteri. Eloquentiae causa sectatus est Gottschedium, historiarum autem, Mascovium, Menzium, Ioecherum, Kappium. His doctrinae partibus cognitis, totum se ad iura cognoscenda transtulit, audivitque assidue, quicumque in aliqua eorum parte clari habebantur, nec modo qui scientiam iuris cuiusque traderent, sed etiam, qui usum forensem in causis vel agendis vel iudicandis demonstrarent. Etiam Hebenstreitii, qui sororem eius in matrimonio habuit, lectionibus anatomicis interfuit, et quibus usum earum in forensibus causis demonstraret.

In his studiis et exercitationibus cum quinque annos consumsisset, viam sibi ad usum partae doctrinae munire instituit, primum petendis Philosophiae honoribus, deinde iure docendarum artium parando, disceptata pro Cathedra Exercitatione *de Sportulis Romanorum quotidianis*, itemque causarum in foro agendarum, editis legitimis speciminibus, denique iuris utriusque scholas habendi; cuius causa Doctor rite creatus est annos natus duodeviginti, scripta et defensa Exercitatione erudita *de Sortis remedio subsidiario in causis dubiis dirimendis*: in qua, superstitione antiqua in sorte breviter commemorata; omnem eius usum et in rebus privatis, et in re publica Romana, in foro, in iudiciis causisque forensibus demonstrat, nec modo ad cognoscendam antiquitatem, sed etiam ad praesentem fori usum. Ab eo tempore causas agere in foro coepit, magna cum dexteritatis, fidei et dili-

diligentiae laude. Quarum virtutum praemium habuit etiam hoc, quod ante hos novem annos in Ordinem Civitatis Amplissimum cooptatus est, cui easdem virtutes abunde probavit.

Inter haec animum ad matrimonium appulit, duxitque Fridericam Reginam, Christiani Ludovici Mirischii, Viri Amplissimi, Senatoris et Syndici Civitatis, filiam, forma oris et virtutibus ingenii animique praestantissimam. Sed id matrimonium multis suis et communibus malis exercitum, et sine prole fuit. Nam et ipse morbis saepe vexabatur, et vxor amisit subito Patrem, in mediis malis bellicis. Nec ultra octavum annum duravit: in ipsoque flore aetatis erepta est misero et vix consolabili marito coniux, quacum concordissime et, quoad mala corporis et temporis siverant, suavissime vixerat. Ex horum tot tantorumque malorum sensu vt recrearet se, finito bello, primum thermis Bohemicis vsus est; deinde Hamburgum profectus aestatem ibi consumsit in consuetudine amicorum, aliorumque virorum doctorum: post iterum ad thermas Carolinas, denique etiam Lauchstetinas abiit. Quibus rebus omnibus levatum se quidem sensit, liberatum a malo non esse animadvertit. Superiori autem anno, cum inter languores assiduos redeuntesque saepe dolores colicos aestatem exegisset, mensis Octobris initio, malum latens tanta vi prorupit, vt decumbere necesse esset. Initium fuit in deliquio animi, quo repente, dum in aëre libero veheretur carpento, oppressus est, secuto mox vomitu, quo multum atri cruoris reiecit, subinde in grumos concreti, tunicis firmis conclusos, ad tantam molem, vt ovorum gallinaceorum modum aequarent. Accessit paullo post hydrops, quem asciten vocant Graeci, et crebra reiectio, modo puris e dirupta pulmonis vomica, modo lymphae nutriciae.

In tam praesenti discrimine, medicus, quem valetudinis curandae causa adsciverat dudum, D. Heinius, Vir arte et fide in primis probatus, in consilium societatemque

que curationis assumendum putavit D. Ludvigium, medicorum nostrorum principem. Placuit, malum, cuius per vim medicamentorum expugnandi et depellendi spes nulla esset, trahendo lenire. Quod consilium ita bene successit, ut amici, qui ad visendum venissent, eum vivere posse sperarent. At ille indies magis languebat, magis vitae finem adesse sentiebat: qui ei etiam, compositis rebus suis omnibus, ad extremum placidus contigit proximo a Kalendis Aprilibus die. Cum patefactum esset corpus, ut caussae tantorum malorum cognoscerentur, reperta est primum intestini, quod colon vocant, brevitudo longe intra modum veluti legitimum naturae; quippe sesquicubitus vix aequabat; caeci porro intestini omnino nulla pars: intestinum colon ipsum quibusdam locis admodum angustum, in media vicissim zona supra modum dilatatum: qua autem parte sub iecinore excurrit, cum ipso et vesicula fellea, cuius admodum tenuia vestigia apparebant, denique cum intestino duodeno partibusque vicinis, quae et ipsae ad multam duritiem constrictae erant, ita concreverat, ut etiam cultri acie aegre dissecari possent. Nam et ductus bilem deferentes omnes, cysticus, hepaticus et cholodochus, plane in unum fasciculum coaluisse videbantur.

Haec etiam legentibus tristitia putamus fore et doloris plena: quantum tormenti cruciatusque attulisse videantur ipsi tam vitiosi corporis aerumnoso incolae? At noster ita adfuefecerat animum istis tolerandis, ut neque hilaritas et comitas tolleretur, aut tristitia et morositas quaedam existeret, neque per impatientiam dolorum acerbiorum diceret aut faceret, in quo reverentiam adversus Deum, aut officium ullum laederet, aut a constantia, viro, eique Christiano, digna, discederet. Quo exemplo certe nemo ullum dolorem non ferendum audeat dicere. Sed ille per intervalla mali saevientis prae-parabat se adversus impetus eius repentinos meditationibus iis, quae animum ad ferendum roborarent, compo-

nens etiam hymnos ad rationes suas accommodatos, quorum commentatione animus, a cognitione malorum tantisper avocatus, ad coelestia traduceretur, quorum tranquillitatem exspectando et praesentiendo dolores leniret. Sed in eo genere etiam profuerunt ei plurimum non modo alloquia Virorum Venerandorum, qui mali magnitudine commoti ad eum ventitabant consolandi et confirmandi causa, Stemleri, Eichleri, Bosii, Koernerii, aliorum, quorum et orationem audiebat libenter, et preces sequebatur toto animo; sed etiam sororis germanae, Eichleriae, feminae primariae, expedita et invicta cura mali illius per omnia fomenta et delinimenta verborum ac rerum emolliendi.

Sed non hic modo tam tristis et ultimus vitae actus plenus fuit excellentia virtutis Christianae: etiam reliqua vita plurimum habuit commendationis egregiae. Erat in eo magna cura ordinis et elegantiae in rebus omnibus, comitas sermonis et humanitas exquisita, obsequii plurimum et officii adversus omnes, quibuscum esset, studiumque placendi, non a vanitate ortum, sed ab animi bonitate et liberalitate, per quam nullo modo sustinebat dicere aut facere, quod offensionis aliquid apud quemquam habere posset.

In rebus gerendis, ut negotiis iis, quae ab aliis mandata recepisset, in causis forensibus agendis, in partibus muneris publici omnibus, diligentia et religio erat tanta, ut interdum supra modum tendere videretur. Sed in alienis rebus nullam nimiam diligentiam esse credebat: facilitatem cedendi ac remittendi in rebus suis laudandam esse, in quibus etiam nunquam eam desiderari patiebatur, in alieno negligentiae et iniuriae loco ponebat: omninoque diligentiam et fidem primas et sacrosanctas in negotiis gerendis ducebat.

Amicitias eadem fide colebat: humanitate, obsequio, etiam liberalitate, alliciebat. Sequebatur autem in primis amicitias hominum doctorum, proborum et gravium: calli-

callidos, simulatores, vanos, assentatores, morosos, plane fugiebat. Quorum autem fidem et benevolentiam cognorat, eos omni officio prosequabatur. Plerisque etiam testamento legata pro rerum suarum modo scripsit.

Nec minus necessitudines suas caras et sanctas habuit. Cum sorore, de qua supra diximus, cum noverca, socru, utriusque liberis, cognatis, affinibus omnibus concordissime vixit, eorum bona et mala sua duxit. Itaque sororem germanam sic scripsit heredem, ut etiam focus, novercae, fratris sororisque, nepotum et neptium e sororibus mortuis, Hebenstreitiis, aliorumque memor esset.

Atque etiam ad externos in posterum aliquid redundare de suo voluit, destinata DCCC. scutorum summa, cuius fructus annui cederent adolescenti pauperi studia iuris aemulanti. Adeo ille omnibus, quantum fieri posset, benignum se praebere et memoriam sui, etiam liberalitatem commendatam relinquere voluit, non aliam ob causam, quam ut eos sibi plane caros fuisse ostenderet!

In huius commendationis societatem etiam nos omnes venire fas est, qui virtutem Christianam amamus, et animum benignum et liberalem non utilitate nostra, sed pulcritudine ac dignitate sua, aestimare didicimus: sanctaeque animae quietem a malis in corpore exantlatis ita gratulemur, ut nos adversus mala similia iisdem, quibus ipse, armis, muniamus, ne cum nos imparatos invadant, eorum vi oppressi succumbamus. P. P. Lipsiae Fer. I. Nat. Chr. a. C. cldccclxviii.



M E M O R I A

CHRISTIANI FVRCHTEGOTT
GELLERTI

In via virtutis vel demonstranda, vel ingredienda, facile ac saepe fit, vt a veritate et recto cursu aberrant opinionibus et institutis suis, etiam qui virtutis nomen carum habent; eamque bono animo aggrediuntur vel cognoscere ac demonstrare aliis, vel ipsi expetere. Nec ea fraus obrepit modo illis, qui humanae sapientiae lubrico nituntur, destituti certis doctrinae divinae fundamentis, sed etiam his, qui divina se praecepta et exempla sequi profitentur. Originem fraudis huius genus vniuersum habet maxime hanc, quod in iudicanda causa virtutis, varie afficiuntur homines, vel a communi nationum, vel suae ingenio naturae, morum, temperamenti, consuetudinis vivendi sentiendique de rebus bonis et malis, expetendis ac fugiendis, quod seculum vocat vetus latinitas, imitante Francogallorum sermone. Itaque vt ab his rebus moventur, ita in iudicio studioque virtutis in aliam aliamve partem et veluti sectam viae deducuntur, nec rectum cursum vel videre iudicio vel tenere in agendo possunt. Ciceronis est hoc, super varietate opinionum de summo bono, qua inter se discrepabant eiusdem Socratis discipuli, cum omnes auctoritatem magistri sequi se contenderent: cum Socrates de bonorum humanorum generibus ita disputasset, vt modo scientiam, modo vacuitatem a dolore, alio item tempore virtutem, alio aliud genus laudaret studiosius, aliam ab alio exceptam

ptam disputationem, et ad summum bonum, velut de Socratis sententia et iudicio, tractam esse, prout quisque inter disputandum se maxime affectum sensisset. In quo ipso, dubitari non potest, quin vel ante susceptae opinioniones valuerint, vel sensus quidam proprius, per quem ad bonorum quodque genus inprimis amplectendum traherentur. Stoicae disciplinae auctor Zeno profecto non alia caussa ad illam tantam, et ab humanitate longius abhorrentem severitatem asperitatemque et praeceptorum et vitae tractus est, quam quod ipse natura durior esset atque asperior: nec illa placuit fere, nisi quibus eandem ingenii duritiem induisset natura, ut Catoni. In ipsa Ecclesia Christiana accidisse hoc videmus, ut, qui tetrica essent natura, et ab affectione quadam corporis vitiosa proni ad tristiorum rerum imagines concipiendas, indulgerentque libenter tristibus cogitationibus, hi igitur ut virtutem Christianam effingerent, in qua omnia tristitia essent, plenaque severitatis et prope saevitiae in semet ipsos, eoque traherent interpretando dicta quaedam Christi et Apostolorum. Itaque modum pietatis virtutisque colendae ponebant in exercitationibus et afflictionibus corporis per ieiunia, vigiliis, et in abstinentia ab earum rerum usu, quae gratum sensum haberent, et ad corporis curam animique oblectationem pertinerent, nihil veriti Christi et Pauli iudicium, qui hoc genus plane improbarant, et hypocriticum pronunciarant. Nec tamen minus in vitio fuere alii, qui dum virtutem et pietatem ab illa nimia et inani severitate atque tristitia liberare vellent, et accommodare ad naturae vitae communis rationes, eam negligentem, voluptariam propemodum et ministram cupiditatum humanarum fecere. Adeo difficile est, etiam in hac tam gravi re, medium secare, et in neutram partem nimium esse, magisque parere veritati divinitus propositae, quam suorum sensuum ludibriis obsequi.

Vix alia fuit ante hanc nostram aetatem, quae magis in ore haberet virtutem, eius laudes praedicaret, existimaretque, per earum exquisitum artificium efficaciter se commendare virtutis studium; cum interea virtutis vera exempla indies fiant rariora. Atque nos hoc tempore non de vniuersis vitiis dicimus, quae in ratione virtutis, et seculi praesentis more tradendae commendandaeque, reperiuntur; in quibus sunt etiam, quae pertinent ad religionem: illud non alienum sit ab instituta oratione attingere, quod pertinet ad usum et vim praeceptorum, per quae volunt homines amore et admiratione virtutis et odio vitiorum imbuere, ut iis sensibus ad virtutem ipsam expetendam et exercendam alliciant, et ab vitiorum consuetudine absterreant.

Ac videmus primum, multos ex iis, qui se virtutis magistros et praecones ferunt, ferunturque fama et opinione multorum, non de plebe, sed qui plus sapere aliis, et sensu acri pulcri et honesti valere existiment, eos igitur hoc maxime agere, ut in tota illa ratione sint ingeniosi, et placeant legentibus. Itaque referciunt disputationes suas locis communibus, sententiis bellis et acutis, imaginibus rerum hominumque exquisita arte pictis, etiam motibus, eaque omnia verborum floribus conspergunt. Sunt etiam, qui fabularum artificio, non de genere Aesopico, sed historiam aemulantium vtantur, per quas imagines virtutum aut vitiorum exprimant, vel ad imitandum vel ad fugiendum. Nec desunt adstipulatores homini Francico, qui scenam ipsam, praesertim tragicam, pro schola virtutis commendent, quod ea vivas virtutum vitiorumque imagines exhibeat, sitque plena et motibus et sensibus ad eam rationem pertinentibus; quibus imprimendis amorem virtutis, odiumque vitii, virtutem denique ipsam venire.

Causa novae huius sapientiae profecto est a seculi ingenio et moribus. Nam dum in rebus omnibus, in ratione aedificandi, sive aedibus ornandis, in suppellectili omni,

omni, in vestitu, in cibis, similibusque rebus, exquisitior cultus, et suavitas conditior quaeritur; dum indulgetur sensibus mollibus et teneris, vel ad suavitatem, vel ad moerorem, dum phantasiae bella ludibria placent, hisque sensibus qui moventur, eae bellae animae et sentientes (nempe quae solae sensum habeant) dicuntur, dum hoc iam seculum est ac dicitur, res a vanis et ludicris etiam ad seria et gravia deducitur. Nec ambigi potest, totum hoc ortum esse a gestiente ad suaviter patiendum, et pruriente ad placendum ingenio Francogallorum: eam scabiem paullatim ad nationes alias transisse, inprimis quod mireris, ad illam gravem et severis studiis deditam praeter ceteras Britannorum, cum deformitate hoc maiori, quo minus illis ingeniis, natura ferocioribus et austerioribus, accommodari tam levis et mollis in rebus gravissimis ludendi persona potest. Sed dulcia vitia, ut scabies, facilius ad alios transeunt, recipiunturque celerius et avidius,

Ac nos non sumus ii, qui ista sic contemnamus, ut nullam iis partem utilitatis relinquamus, aut in his generibus neminem elaborare velimus. Immo vero iis, qui in his tractandis recte versantur, laudem ingenii libenter concedimus; virtutis verae idoneos et efficaces magistros esse, haud dubitanter negamus. Nec ipsi fortasse, si verum fateri velint, aliam quam ingenii laudem expetere se dicant, eaque si ipsis tributa sit, summam spei et consilii se adeptos putent. Nam in totum hoc genus profecto convenit, quod dictum legimus a Francogallo, non occurrit, quo, de oratoribus laudes alienas oratione celebrantibus: non tam hoc spectari ab iis, ut laudent admirenturque auditores eum, cuius laudes audierint, sed ut ipsos, ipsorumque in laudando ingenium et artificium. Estque hoc commune omnibus, quorum labor et ingenium in artificio exquisito versatur, ut pictorum, statuariorum. Non tam placere volunt eos, quorum speciem exquisito opere expressere: nam et in deformibus artifi-

cio suo vtuntur: quam semetipsos et artificium suum. Illud vero et rei natura moti, et vsu multo confirmati, serio affirmamus, e toto illo genere nihil praeter oblectationem, non illam quidem illiberalem aut turpem, sed tamen ad virtutis ipsius rationem nihil profuturam, expectari debere. *Quid? qualis tibi visus est orator iste?* interrogabat aliquis egredientem vna de templo amicum. *Mirifice, inquit, delectatus sum oratione hominis: adeo pulcre peccati foeditatem pinxit:* hoc ipso verbo vsus. Felicem vero Evangelii praecogem, qui hoc effecerat! Immo miserum, si id ipse spectarat. Si spectarat aliquid amplius et maius, et quod spectare debebat; misere falsus fuit, qui ita dixerat, vt tali laude mactaretur. Profecto et rei natura hoc clamat, et vsus ipse docet, aliud nihil esse in illa nova virtutis docendae commendandaeque ratione, nec vero esse posse. Nam et totum illud genus dicendi ad solam oblectationem inventum est, eaque est communis sententia omnium idoneorum dicendi magistrorum. Itaque omnes etiam illam ingeniosam rationem dicendi a rebus veris, gravibus, magnis, in quibus non oblectatio quaeritur, sed vera utilitas publica et privata spectatur, abesse volunt, et solis vmbraticis scholae declamationibus super caussis fictis relinquunt. Nec profecto aut sapientia ea, quae sit magistra vitae et virtutis, expultrixque vitiorum, sustineatque munus omnium, dignitate gravissimum, difficultate in efficiendo maximum, potest dignum esse, rem tantam ad oblectationem inanem audientium, et ad laudem belle dicendi ac scribendi referri, aut animus humanus, a virtute alienus, vitiisque obsequi suetus, per blanditias verborum extorqueri sibi sinat, quod tam diu adamaverit, aut serium impetum et conatum capiat virtutis insuetae et difficilis capeffendae per actiones sibi insolitas et molestas. Vera sapientia, cum hoc agit, non sensibus et phantasiae per oblectationes blandiatur, aut animo per earum celeriter transituros motus adrepat, sed ei per constantiam intel-

ligen-

ligentiae imperet seria et perspicua officii necessitatisque cognitione: imiteturque medicos, qui morborum, ut graviores sunt, ita amariora et asperiora remedia proponunt, nec valetudinem restitutam dulcibus corroborant cibis; quos omnino gustari volunt, non copiose sumi ad oblectationem sensuum.

Atque bene esset, si inani oblectatione consumeretur illa ratio, non oboesceret etiam virtuti, et eius verae ac salutaris disciplinae. Sed nobis est persuasum, ista oblectatione, qua imbuunt animos isti arguti et ingeniosi virtutum praecones, et vitiorum blandi et suaves adversarii, induci languorem et molliitudinem animi, per quam nec audeat subire labores, nec sustinere possit, quibus vitium frangatur, et virtus in animo fundetur, denique etiam severis officii praeceptis vim suam paulatim detrahi apud homines, in disciplina virtutis cognoscendae et exercendae, aduetos voluptati tali, et in cognoscendo summam ponentes in oblectatione aurium et suavis motibus sensuum, et rem longe gravissimam et maximam in ludicram voluptatem converti. In cibis quidem ad confirmandum recreandumque corpus comparatis, videmus fieri, ut illam vim amittant, sintque onerandis magis corporibus, quam sublevandis, cum ad suavitatem sumuntur, omninoque cum in ciborum delectu suavitas maxime expetitur.

Nec vero, cum a virtutis disciplina vera et salubri aliena dicimus genera et artificia ista, in quibus oblectatio quaeritur, propterea praecepta vitae recte instituendae disciplinamque virtutis spinosam et obscuram sententiis, aut vitiosam et sordidam verbis, nudamque ab omni gratia esse debere defendimus. Est aliquid inter sordidum et vnguentatum, inter amaritudinem fellis et dulcedinem mellis. Quamquam ille Stoicorum princeps Zeno, cum ei esset obiecta verborum tristitia, et exprobrandi causa laudata eloquentia aliorum, non absurde respondisse fertur, etiam Alexandrinos numos esse longe pulcres

criores Atticis, at hos ponderosiores; et sine dubio melior est et salubrior Epicteti et Antonini tenuitas et quasi siccitas, quam arguta et dulcis luxuries Senecae, qui, auctore Tacito, non quid rectum esset, sed quid auribus seculi mollis placeret, videbat. Oportet utique magistrum virtutis cognoscendae et studiis hominum commendandae non esse barbarum, horridum, exsanguem ac prope infantem: oportet esse disertum, et qui ita dicat, ut alliciat ad audiendum ac legendum, non deterreat, ut erudiat et prudentiores reddat, ad animum admoveat orationem; sed haec omnia apte faciat ad naturam rerum, in quo est, auctore Aristotele atque Cicerone, bene dicendi ac scribendi principatus; pugnetque sententiarum et argumentorum bene ac diligenter explicatorum pondere, ut habeant homines, quod salubriter cogitent, cui cogitando immorentur, ut vis se per ipsam cogitandi tranquillam constantiam insinuet in animos, flectatque ad obediendum, hoc est, ad verum studium virtutis; quacum ipsa demum verus amor virtutis veniet. Nam amor virtutis ille, quem vulgo iactant, quem volunt esse a demonstrata pulcritudine et praestantia virtutis, per illas artes, de quibus diximus, mera et inanis cogitatio est, habens aliquid oblectationis celeriter transiturae, non amor, qui proprie dicitur, incendens et alens virtutis exercendae studium: sicut nec doctrinae amor proprie est in iis, qui eius nullam aliam commendationem norunt, quam a laude aliena, sed in his modo, in quibus est ipsa; amaturque semper pro magnitudine sua.

Quo magis agnosci debet ac praedicari sapientia et gravitas nostri nuper Gellerti, Viri Clarissimi, qui ab hac seculi nostri labe ut pura esset disciplina sua in docenda iuventute, et in scribendo, providit, teneretque viam, quam supra tetigimus, mediam inter illam ludicram et quasi voluptariam virtutis tradendae rationem, et horridam alteram invenustorum hominum, et barbariae sordibus obsitorum. Nam etsi et ipse scripsit, quae magis
ad

ad oblectationis, sed tranquillae et liberalis, nec inutilis adeo, consilium referrentur, ut fabulas scenicas e genere comico, itemque philosophicas, ut de Comite Suecica; tamen ea nunquam ad virtutis, quae proprie appellatur, rationem retulit. In ipsius quidem virtutis disciplina semper gravitatem et severitatem praecipendi primam duxit, paullulum loci tamen relinquens elegantiae orationis, non per quam proprie virtus aliquid lucraretur, sed quae animos in cognoscendo teneret, et aditum gravibus, nec sua natura admodum iucundis, patefaceret et ad intelligendi facultatem, et ad obediendi qualemcunque inclinationem. Et tamen animadvertit et agnovit magno cum dolore, etiam in iis, a quibus assidue audiretur, et, quae in hanc partem scripsisset, studiose legerent, laudibusque ferrent, multos esse, qui ea magis ad oblectationem inanem viderentur referre, quam ad animi conformationem et virtutis verae studium severum et constans; quod opus virtutis in iis non appareret, sed intra sententias, utcumque exceptas, et verba honesta res subsisteret. Quem dolorem suum etiam, non longe ante obitum, per occasionem aliquam communicavit cum amico.

Sed qualem virtutis auctorem eum habuerimus, et quam dignum ipsum tali disciplina, planius intelligetur, si tota vita qualis fuerit, quae instituta discendi docendique, quod ingenium, qui habitus animi, qui sensus moresque, quae fortuna, qui vitae exitus, breviter commemoraverimus. Hoc igitur agamus.

Natus autem est anno seculi huius quintodecimo, die quarta Iulii, patre Christiano, qui, in oppidulo (*Haynich*) inter Fribergam et Chemnicium, sacra per quinquaginta annos amplius fecit, magna cum fide et religione. Initium discendi literas fecit in ludo oppidano; cuius disciplinae post accessit paterna domi. Inde missus in scholam Misnensem, didicit sub magistris non contempendis. Ibi et initia facta sunt amicitiae, quam habuit cum Rabenero et Gaertnero fidelem et iucundam ad finem

finem vsque vitae. Venit post Lipsiam, ad maiores doctrinas literarum percipiendas: audivitque Ioecherum, Kappium et Christium, literarum elegantiorum causa, Adolphum Frider. Hofmannum in Philosophia, vtroque in genere Gottschedium; in literis hebraicis Hebenstreitium, Klausingium et Weissium in Theologia. Ita cum quartum annum ageret, revocatus est domum, quod pater sumtibus in eo faciendis non amplius sufficiebat. Erat enim ei numerosa suboles, et nostrum iam quintum filium in Academia aluerat. Non diu apud patrem fuerat, cum ei, de Loescheri, Theologi Dresenensis clarissimi, commendatione, desertur paedagogia in domo viri generosi; qua deposita posthaec, apud patrem primum literas docuit e sorore nepotem, eique comes venit anno primo et quadragesimo in hanc urbem, non modo studia eius moresque ut regeret, sed ut et ipse disceret nondum percepta, et, quae didicisset, exerceret. Itaque iterum audiit Hofmannum Philosophum, cuius in superiori commoratione magna captus fuerat admiratione, quod ei visus erat ceteris subtilior: eumque ita audivit, ut omnia verba eius, velut totidem oracula, exciperet ac scriberet: ceterum nihil omnium, quae audisset scripsissetque, se intellexisse confitebatur inter amicos, idque etiam scripto de vita sua vidimus esse testatum. Et tamen saepe spem fecerat doctor subtilis, magni inter Philosophos nominis. Inter haec ipse alios erudiebat exercebatque ad vernaculae linguae facultatem, quam et paullatim ipse experiri, iudiciumque super ea peritorum cognoscere tentabat; de quo post dicemus plura. Sed cum in hanc urbem reversus, vota fecisset, ut in ea sedem fortunarum nancisceretur, intellexit, sibi opus esse honoribus literarum et Philosophiae Academicis, per quos et potestas privatim docendi daretur. Itaque illos quidem capeffivit anno tertio et quadragesimo, hanc autem adeptus est non ita multo post Disputatione publica, *super Poesi Apologorum et eius auctoribus*. Tum vero lectiones habuit assidue

due ac diligenter, quibus praecepta Poeseos et Eloquē-
tiae traderet, exercebatque plures in utroque genere fa-
cultatis comparando. Nec institutum carebat successu,
pluribus disciplinam expetentibus, quam sibi profuisse
testarentur, qui erant ea usi, famaue eius per plura
opuscula utriusque generis scribendi aucta, inprimis per
fabulas varii generis. Quae res etiam hanc vim habuit,
ut ei Professio Philosophiae extra ordinem daretur. Eam
adiit oratione *de vi bonarum artium ad animum moresque
fingendos*; cui scripto *de Comoedia commovente* prolusit.
Quomodo autem eam Professionem ornarit lectionibus
oratoriis, poeticis, et philosophicis, ad rationem morum
pertinentibus, quanti concursus ad eum, praesertim in
ultimo genere, facti sint, non est necesse commemorare,
cum sciant omnes. Atque ei propterea ante plures an-
nos Cathedra Philosophiae moralis destinabatur, cum a
morte Maii vacabat: sed nulla ratione perpelli potuit ad
accipiendum, quod offerebatur, quanquam suadentibus
atque adeo urgentibus amicis; malleque se, dicebat, re-
ligioni suae, quam voluntati aliorum et utilitati suae ob-
sequi, quae a multis in causa tali maxime spectatur, se-
curis virium suarum utilitatisque communis. Etenim
negabat, se, propter valetudinis infirmitatem, onus talis
professionis, et urgentium saepe ac necessariorum labo-
rum, sustinere posse. Nec eam rem obesse utilitatibus
eius sivit liberalitas publica, aucto per beneficium Prin-
cipis stipendio; quo antea fuerat usus, ad eum modum,
ut commoda Cathedrae non acceptae vel aequaret vel
superaret: cum ipse vicissim, quod ad docendi vel assi-
duitatem vel diligentiam attinebat, non modo nihil re-
mitteret a superiori consuetudine, sed etiam eam prope
supra vires intenderet, praesertim in lectionibus publice
habendis; quas ille ducebat primas, cum multis soleant
esse ultimae.

Erat autem univēsum docendi genus perspicuum in-
primis, et, in genere quidem morali, paullulum ad popu-
la-

pularitatem concionum in templis habendarum accedens. Nam et hortabatur interdum ad studium virtutis cuiusque, et laudabat officia magna, indignabaturque vitiorum foeditati: nec ingenium magis agnoscere viri, quam pectus: et ipse tum ingeniis, tum animis vitaeque consulere cupiebat. In quo adiuwabatur etiam amore adversus se audientium, et ipso vocis sono, ad capiendos molles animos, et a natura, et consuetudine, et ipsa imbecillitate corporis, temperato et facto. In rebus ipsis diligentiam ducebat primam. Commentabatur ante, quae traderet; non ut de scripto recitaret, sed ut curatius in sententiis et verbis diceret. Nihil extrinsecus accessitum: nullae digressiones: nullae neque sui aut disciplinae suae iactationes, neque aliorum obrectationes, neque aliae artes malae iuventutis imperitae captandae. Itaque schola eius erat non solum doctrinae disciplina; sed etiam modestiae, qua nulla citius ac saepius adhiberi debere intelligebat iuventuti, studia doctrinae aemulanti, praesertim his temporibus, cum omnia insolentia, arrogantia, ostentatione et obrectatione, etiam petulantia foeda, redundant. In exercitationibus scribendi, quibus plurimum uti volebat ad hanc laudem contendentibus, severitatem et diligentiam ita moderabatur, ut nec castigando morosius deterreret ab eo studio tardiores, nec vanam fiduciam iniiceret ingeniis felicioribus laudando: ceterum ut magis quisque profecerat, ita severitatem castigandi augebat; memor veteris instituti, quo erat cum amicis, Schlegeliis, Crameris, Gaertneris, Rabeneris, usus. Nam cum certis diebus convenirent ad praelegendam, quae quisque scripta attulisset, iis limam quisque admovebat eam, quae nihil quidem intactum relinqueret, quod pulcritudinem ceteram obscurare videretur; ceterum ita molli manu regebatur, ut nihil doloris consequeretur, essetque tanto quisque gratior, quanto fuisset in castigando diligentior et severior.

Atque

Atque in illa ipsa exercitatione communi et acuerat aciem ingenii ad videnda vitia orationis, quamvis tenuia et latentia, quae ille non minori, immo etiam maiori diligentia indagabat in suis, quam in alienis, et contraxerat religionem in scribendo tantam, ut sibi saepe diffideret ipse, raro satisfaceret. Itaque non dubitabat profiteri, quaedam de suis non satis sibi probari, et quae probabat, nunquam simpliciter laudabat. Nec aliam ob causam et in scribendo, et multo magis in edendo, cunctabatur, lambens usque fingensque foetus ingenii, dum speciem acciperent, quam speraret se idoneis iudiciis probaturum. In quo etiam adhibebat aliorum iudicium, saepe multorum, ut in fabulis fecit, nec dubitabat ex eorum admonitionibus castigare opera sua. Quo magis mirum videri possit, in illis ipsis, in quibus maxime curam et severitatem castigandi adhibuerat, eam inesse facilitatem sententiarum et verborum, ut ea facillimo partu effusa, non longis et difficilibus nixibus edita videantur: nec est fortasse aliud maius ac certius felicioris ingenii argumentum.

Scripsit bene multa, etiam maturiori aetate, quae omnia probata sunt plurimum, saepe repetita, etiam in alias linguas Europaeas conversa; suntque paucae nationes Europae, apud quas, vel quarum sermone, non legatur aliquid scriptorum eius: nec modo mercenarios, aut linguarum talium magistros obscuros iuvenesque, nactus est interpretes, sed etiam quosdam eos, quorum iudicium ipsi honorificum esset. Nec ille rem ad vanitatem trahebat, ut fit plerumque, etiam ab iis, qui suos sibi ipsi instituunt interpretes, rogando, pollicendo, aliisque humilibus artibus, eosque per omnes occasiones commemorant.

Ipse in scriptorum suorum numero maxime probabat *Hymnos sacros*, ad quos scribendos accessit annos natus quadraginta, absolvit anno tertio, non tam artis et ingenii, quam dignitatis et utilitatis ratione: quanquam et ab

illa parte permagnam habent commendationem, propter sensuum virtutes et orationis bona; nec dubitemus eum inter principes carminum sacrorum numerare. Fuerunt, qui spiritus sublimitatem in iis desiderare viderentur, et illam, quam Francica consuetudo *vnctionem* vocat, verbo de Mysticorum lacunis ducto, et forte nulli satis intellecto, qui maxime in ore habent; hoc est, quibus displicet, nimis intelligi omnia. In quo nostra ab illis plane discrepat ratio, qui facilitatem illam intelligendi, simplicitatemque sensuum et verborum, in hymnis sacris prorsus necessariam et primam virtutem putamus, si sint vsibus omnium promiscue scripti, propterea, quod populo nostro et omnino non exercitatis ad intelligenda insensibilia per rerum corporearum imagines pulcras in tropis, nihil tam lubricum et fallax est ad intelligendum, quam illa pinguis et fragrans vnguentis rhetoricis oratio: nec vlllo modo Pindaricarum aut Horatianarum Odarum sublimitas, doctis et elegantioribus hominibus inventa et destinata, convenit religiosis carminibus, quae ore populi ac plebis cantentur ad exercendam pietatem. Profecto de vsitatis publice hymnis omnium minime intelliguntur, hoc est, profunt pietati, qui habent spiritus poetici et vnctionis plurimum.

Plurimum famae habuit a *fabellis et narrationibus*: nec vllum aliud scriptorum eius plus habet ingenii in inveniando, munditiae et gratiae in simplicitate mirifica, denique in contextu cuiusque et oratione. Quarum virtutum nullum aliud certius argumentum est, quam a facilitate, primum intelligendi, deinde retinendi mente et memoria. Nec enim puella facile, vel quinquennis, tam est vlla obtusa ingenio, vt non fabulam quamque celeriter arripiat, et memoriter reddat. Vidimus ipsi talem puellam, quae, a variolis sanata, inter convalescendum, lecto adhuc decumbens, primum earum volumen legisset, cum surrexisset de lecto, quam quisque posceret fabellam recitaret sine haesitatione. Nam sicut in mus-

eis,

cis, cum modi carminis sunt naturae sententiarum et verborum aptissimi, et simplicitatis naturalis maxime retinentes, aliquoties cantato, ut sit in scena, carmine, propemodum omnes repetere canticum possunt: sic, in orationis quasi cantu, ex illa facilitate retinendi naturalem pulcritudinem et ingenii plane elegantis vim agnoscere debemus.

Non parem ceteris laudem tulisse videbat *Carmina didactica*, quanquam sunt et ipsa e genere morali: ipse sine ambagibus fatebatur, ea sibi probari, supra plura alia opuscula sua. Nec nostrum ab eius opinione diffidet iudicium: sed argumenti gravitas et severitas non capiens tractationem et exornationem satis aptam ad delectandum, quae est in ceteris, fecit, ut lectores ex genere, de quo supra disputavimus, voluptario, qui sunt plerique, hic non multum haberent, quod sibi placeret, quod laudarent: nec illa carmina lectores multos habere, aut idoneos habere potuerunt, hoc est, doctos, graves, amantes veritatis salubris; qui sunt et erunt semper pauci; sed quorum paucitas viro sapienti carior esse, et, ut ita dicamus, numerosior videri debet, quam ceterorum infinita copia.

Scripsit et fabulas aliquot scenicas e genere comico, primam eam, quae, *feminam hypocriticam* exprimit plane ad vivum. Sed et univsum hoc genus scriptorum suorum maturiori aetate ei non amplius satis probabatur, minime omnium ea, quam nominatim posuimus, fabula; sive expiare cupienti invidiam, inde ortam apud homines talis formae, sive, idque per se verius, et ingenio Gellerti similis est, quod intelligere coeperat, vitia ea, quae ad religionem pertinerent, non esse ad risus levitatem et scenae oblectationem trahenda, propter facilem et primum transitum ad religionem ipsam.

Nec laude caruit *ratio epistolarum scribendarum*; quae pars artis oratoriae hodie minus frequentatur in scholis Rhetorum, cum olim, instauratis literarum studiis, tra-

deretur et exerceretur inprimis, quod in ea esset orationum ac disputationum graviorum et longiorum quaedam veluti prolusio: nec aliam ob causam in parte necessaria et perpetua disciplinae scholasticae collocata est Ciceronianarum epistolarum interpretatio, quae in hoc genere scribendi principatum tenent, habentque solae perfectum exemplar, quod ad imitandum debet esse propositum. Et erat ipse scribendarum epistolarum egregius artifex et magister, quamquam magis e genere eo, quod liberaliter iocatur, venuste narrat, aut officio aliquo humanitatis fungitur, quam quod graviora tractat, magisque ad Plinianam venustatem, et ad vitae privatae hilaritatem, quam ad Ciceronianam simplicitatem, subtilitatem, et gravitatem, et usum in republica; qui olim putabatur primus.

Sed his aliisque scriptis, et ingenii solertiam venustatemque expressam reliquit, et laudem sibi longe lateque apud omnes hominum ordines et genera paravit: vita ipsa pulcriorem etiam imaginem animi habuit, laudis tanto plus habituram, quanto plus est boni in animi religiosi et veris virtutibus condecorati sanctitate, quam in ingenii solertis et acuti excellentia. Et huius opera caduca sunt, illius aeterna.

Erat ei natura animus ad lenitatem, placabilitatem et facilitatem temperatus: simplex idem et rectus: tener ac mollis ad omnes sensus honestos atque humanos: sine latebris fallacibus apertus: nulla invidia suffusus. Aetate florente inerat etiam hilaritatis non parum: virili aetati hypochondriorum vitia aliquid tristitiae addiderant, quae in ore, habitu totius corporis, in ipso vocis sono animadvertebatur; nisi qua res maior erexisset eum et firmasset. Erat eadem de causa timidior et diffidens sibi ad futura: cum res venisset, fortis et constans reperiebatur.

Sed omnium sensuum acerrimus erat religionis, quem ipsa mala corporis acuerant: eum omnium ceterorum moderatorem habebat. Nec alium aut protulit saepius,
aut

aut expressit efficacius, aut secutus est constantius, sive diceret aliquid, sive ageret. Sed erat ille sensus, ut ceteri, placidus et tranquillus; ut qui a perspicua et certa scientia duceretur, nullis phantasiae ludibriis permixtus, animi totus, non corporis.

Virtutem veram ducebat ab vno religionis fonte, quae ab alia esset, quamvis speciosa aut innoxia, causa, eam laudabat hactenus, qua labore constaret, et utilis esset publice privatimque; veritatem sive perfectionem ei vix tribuebat: et inflare animos. Itaque, ut volebat legi scripta veterum Graecorum et Latinorum, eloquentiae et doctrinae causa; ita non probabat, ea commendari ob praecepta officii et virtutis: quae esse illa quidem pulcra, sed homini nimium tribuere: unde virtutem nasci arrogantem. Nempe Stoicos modo Latinos cognoverat, et magniloquum Senecam. Nec tamen ignorabat, quid interesset inter virtutem ignavam, quae tota coelestis doni esse vellet, nullo suo labore parari, et alteram, quae ita laboraret, tanquam tota laboris sui esset, ita modesta in effectu laboris, ut omnia Deo tribueret.

Honorem verum non extrinsecus, sed ab conscientia animi, et recte in publicumque utiliter factis, ducebat; nec omnino felicitatem ab adventitiis bonis repetebat. Occasiones augendi honoris et rei familiaris non modo non quaerebat, sed etiam praetermittebat saepe. Libris suis alios ditescere aequus videbat, dum ipse nihilo plus haberet, ut qui omnibus scriptis suis per tot annos, non ultra mille scutatos lucratus esset. Et eam ipsam pecuniam fere ad beneficentiam conferebat, gaudebatque, ingenio se reperisse, in quo animus, ad alienas misérias mollis, benefaciendi materiam haberet. Nam et vestitu, et suppellectili, et victu tenui utebatur, nec aliud, quam necessitatem mundam, sequebatur.

Itaque animum eius nulla invidia tetigit, ut qui invidendi causas nullas haberet: eratque omnibus facilis, aequus, lenis, nisi qui improbiore essent, praesertim in

publicum: his quidem graviter irascebatur; quippe et disciplinae privatae ac publicae severitatem probabat, indignabatur indulgentiae, a qua licentiam venire peccandi.

Vix alius aptior amicitii iungendis colendisque fuerit. Omnium hominum atque temporum erat: summis et imis accommodatus sermonibus, moribusque vniversis. Nec facile quisquam alius ita vel miscuerit vel aequaverit omnium benevolentiam et gratiam. Et habebat aliquid proprium, etiam in ipso orationis sono, quo influeret statim in animos, praesertim a lectione scriptorum eius praeeparatos et quasi patefactos.

Quibuscum autem proprie amicitiam instituerat, eos ad extremum, non modo sine offensione vlla retinuit, sed etiam in dies magis sibi devinxit, vt nihil in hoc genere posset esse constantius. Et erat in amicitii eius non modo id, quod commune est amicitiae cuiuslibet veritati, sed aliquid amplius ac proprium, aliquid velut ardentius et prope ἐνθουσιαστικόν, ab acerrimo videlicet sensu bonorum. quae ex animo, sermonibus eius actionibusque, eminerent: cuius contagio etiam ad alios, saepe minus arte ipsi iunctos, transit. Ipse amicis totus patebat; nec modo vt consilia, studium, labor, pecunia in promptu essent, sed vt etiam retegeret, quae alii clam habent, vitia sua et peccata, praeteritae et praesentis aetatis, naevos item operum suorum: in quibus amici saepius religionis redundantiam, et timoris calumniam, quam veritatem agnoscebant.

Erat omnino timidior, sed vt magis corporis, ab hypochondriis male affecti, vitium, quam animi imbecillitatem agnosceres. In primisque prae se ferebat apud amicos mortis horribilem quendam et invictum timorem: cum mors ante oculos esset, nullae timoris illius reliquiae animadvertiebantur; omnia fortia et constantia reperiebantur. Nempe illic corpus horrebat mortem, animus tempora contemnendae mortis expectabat. Et contemptus mortis longinquae fere in verbis est: in propin-

pinquum cum res venit, tum cadunt fortia adversus mortem longinquam verba.

Mortis causam habuit ab obstructione alvi pertinaci, nec vlla vi expugnanda. Vix triginta annos natum invasit morbus hypochondriacus, cuius malis, repetito Carolinarum aquarum usu, levatus ille, omnino liberatus nunquam fuit. Sed sustentabatur tamen corporis robur temperantia severa, et animi tranquillitate perpetua. Itaque etiam bis graves morbos superavit, primam febrim continuam, cum purpura alba, alteram pleuritidem, annis vndecim post. Sed ab hac ita vis corporis fracta iacuit, ut nunquam erigi ad alacritatem pristinam posset. Crebri capitis dolores: alvus fere segnis, cum omnibus incommodis inde oriri solitis. Mensis Decembris autem proxime superioris initio plane constitit. Accurrit primus D. Heinius V. C. quo medico inprimis curioso, et amico fideli, utebatur. Mox ascitus, praeter D. Hebenstreitium V. C. in curae partem Ludwigius, Vir artis medicae apud nos princeps. Experientur omnia, quibus cieri emortua alvi vis posset. Frustra. Miserat mox, periculo viri commotus, Princeps Elector Demianum, de Archiatriis suis, accuratissime commendata cari capitis cura. Huius quoque consilia effectu caruere: et apparuit, mortem subesse. Quam ille appropinquantem placidus et bene compositus excepit, uti diximus. Amicis praesentibus, in his praecipuo, Wagnero, Viro illustri, qui comes Demiano venerat, vale dixit constanter, et magna cum amoris significatione, nec absentium immemor fuit. Tum toto animo conversus ad iter ex hac misera vita ad beatiorum pie et religiose ingredendum, preces facere et ipse, et aliorum pro se orare, in his Thalemanni, quocum et crebros ad sustentandum animum adversus doloris subinde aegrescentis acerbitatem, et ad alendam excitandamque felicitatis imminentis spem sermones habuit. Finem dolorum et vitae fecit

inflammatio intestinorum et gangraena, die tertia decima Decembris.

Triste spectaculum praeuit corporis aperti facies. Ventris imi intestina omnia arctius iusto cohaerebant: ileum coecum et colon supra modum expansa et turgida: colon etiam ex parte callo duratum et valde coarctatum: induratae glandulae et ulcerosae: tunicae vtriusque ita expansae et flaccidae, ut rupturae fuisset viderentur, nisi mors praevenisset: faeces intus nigrae ab atra bile.

Mortis nuncius quomodo affecerit civitatem omnem, vix dici potest: non aliter absentes locis omnibus affecit. Nec facile alius cuiusquam mors tot tam multorum significationibus doloris honestata est, certantibus etiam ingeniis in eo ornando, qui ingenio Germanico tantum honoris etiam apud externos peperisset. Sed his honoribus maiorem et iustiore affarent, qui virtutes ingenii animique Gellertiani assequi studebunt, et scribendo agendoque ad decus publicum patriae communis proferent: qui honos ut eius nomini a permultis adiungatur, vel ipsius causa serio optamus. P. P. Domin. VIII. p. Trin. A. C. cldccclxx.

ELOGIVM
GOTTFRIDI HEINSII

MATHEMATVM PROFESSORIS PVBLICI ORD.

In comparatione ingeniorum graecorum et latinorum, etsi concedendum videtur Romanis, vt Graecos in iis generibus artium eruditarum, quae pulcritudine, copiis, et amoenitate iudicantur, aequasse, in nonnullis fortasse etiam, expolitionis certe diligentia, superasse dicantur: tamen in ceteris doctrinis, quae subtilitate iudicii, et perspicientia rerum abditarum tenentur, fatendum est, Romanos longe a Graecis superatos esse. Nam in Philosophia quidem palam est, inveniendi gloriam Graecis totam propriam esse, in eiusque communionem vt venirent, Latinos ne laborasse quidem videri. Sed in hac tamen, videmus, eos hoc egisse, vt eorum, quae Graeci inuenissent, ne quid ignorarent, eaque ad vsus suos publice privatimque vt accommodarent: at in mathematicis doctrinis multo etiam longius semper abfuerunt a Graecorum scientia et solertia; nec vel vnum possis aut commemorare, qui in iis excellenter, et ad Graecorum subtilitatem, versatus fuisse dicatur, aut ostendere, qui scripserit, quod mediocritatem vel attingeret, vel superaret. Eius rei de causis, longum sit, hoc loco differe- re, nec ad consilium orationis institutae pertineat. Sed eam putamus esse causam, quare in primis verae doctrinae instaurandae, quae aliquot abhinc seculis facta sunt, initiis, nihil admodum artes mathematicae lucratae re- periantur. Nam initia illa fere orta erant a libris latinis, qui e bibliothecarum Italicarum Germanicarumque tene-

bris proferebantur, et per novam artem, a Germanis repertam, cum Italisque communicatam, vulgabantur: cum graecorum librorum et tenues copiae essent, multo pauciores vero interpretes, necdum eorum per eandem artem vulgandorum aut initium factum esset, aut res ad libros mathematicos venisset. Nam et alii libri graeci, ut poetarum et historicorum, ab initio magis per versiones latinas, quam per se, cogniti sunt. Sed quicumque illis temporibus artes mathematicas profundius, quam antea factum esset, cognovere, ii e graecis illis Mathematicorum exemplis, per Graecos exfules, inprimisque Bessarionem, in Italiam illatis, profecerant, in quae incidissent, dum ibi peregrinarentur, literarum vel alia de causa. In quo numero, satis constat, in primis Io. Regiomontanum fuisse, per quem etiam exempla graeca, ut Ptolemaici de Astronomia operis, et Theonis in id commentariorum, Archimedis etiam librorum, et Eutocii in eos expositionum, aliorumque exempla Germaniae sunt illata, accepta per Bessarionem et alios Graecos, quos ille in Italia doctores literarum graecarum habuerat, ut G. Trapezuntium, Gazam. Nam et fuit in Bibliotheca Noribergensi Ordinis Ampliss. Codex latinus Geographiae Ptolemaicae, manu notatus et correctus Gazae, sed ablatum est mala manu *). Ierat autem cum Purbachio comes Bessarioni in Italiam, ut literas graecas disceret, quarum scientia aditus rectius cognoscere Mathematicos graecos, inprimisque Ptolemaei Syntaxin, posset, cuius Epitomen accuratiorem vulgata, Bessarionis instinctu, Purbachius **) instituerat, Regiomontanus absoluit. Sed quas Italia extulerat copias eius generis, eas

*) v. Raidelius de Ptolem. Geogr. p. 23.

**) v. Gassendus in Vita Purbachii et Regiomontani p. 76. in qua et index est librorum graecorum ex Italia in Germaniam a Regiomontano deportatorum, quos edere destinarat p. 87.

eas Noribergae deposuerat, cum eo commigrasset ad opportunitatem edendi *).

Sed doctrinae mathematicae, tum vniversae, tum imprimis, Geometriae et Astronomiae, et maior perfectio et frequentiora studia maxime debentur, in Germania certe, literatoribus, qui non essent rudes illius doctrinae; cuius generis seculi sextidecimi principio plures fuisse in promptu est, Philippum Melanchthonem, Ioach. Camerarium, Simonem Grynaeum, Th. Venatorium, in Italia Petr. Victorium, et alios, per quos editus est textus graecus Euclidis, Archimedis, Ptolemaei, Theonis aliorumque Mathematicorum graecorum, ex illis ipsis fere copiis Regiomontani. Nam his edendis aucta esse et emendata in Scholis disciplinae mathematicae studia, multorum literis traditum est, et res ipsa docet. In ea autem re praecipuum quoddam est nostrae Academiae vel meritum vel decus. Nam ante illos iam, quos commemoravimus, viros, habuerat, tum aliarum doctrinae mathematicae partium, tum Astronomiae doctorem, superioribus haud paullo meliorem, Casparum Bornerum, literatorem eundem, et denique etiam Theologum: quem Camerarius, a quo parentis in modum colebatur, testis est, (in Vit. Melanchth. p. 71.) ita exquisite, et tanta industria, situs, loca, figuras, ortus obitusque siderum signorumque caelestium observasse, eiusque contemplationis ita planum iter ostendisse studiosis, vt omnes superiores superaret. Et nos alibi **) ostendimus, eam illum scientiam tractandis Mathematicis graecis consecutum esse, quos in Italia cognovisset, inprimisque Ptolemaei opere, cuius et Indices diligentissime ab eo confectos habet Bibliotheca nostra Paullina. Ab his porro initis res orta, habuit incrementa, et Vitembergae per Philippi, et

*) v. praef. Camerarii ad Theonis Comm. et Venatorii ad Archimēdem. Gassend. l. c. p. 87.

**) Opusc. Orator. pag. 451.

et hic, per Camerarii praecepta et instituta, vrgentium voce literisque disciplinae mathematicae, inprimisque Geometriae et Astronomiae studium; quod et ipsae sua pulcritudine dignae essent, quae accurate discerentur, et sine earum scientia nemo perfectus, nec literator, nec philosophus, nec vero etiam Theologus posset fieri *).

Sed inprimis reperio, illorum temporum literatores excellentiores Ptolemaicum opus solitos studiosius legere et tractare, nec modo ad vsus proprios disciplinae suae, h. e. ad intelligendos et interpretandos poetas, et philosophorum graecorum principes, Platonem et Aristotelem, sed ad communes doctrinae vniuersae; quod ad veram subtilitatem ingenii et iudicii, et ad ἀκριβειαν in rebus sublimibus tractandis, non aliam munitiorem viam esse iudicarent: quam in sententiam egregie disputat Grynaei praefatio. Atque huius iudicii adstipulatorem cognovimus etiam illud Italiae literatae decus Benedictum Averanium, qui ita delectatus est Ptolemaei opere, ut eius etiam interpretationem latinam scribere instituerit superioribus elegantiore et accuratiorē **); quam dolendum est perfectam non esse, itemque versionem Theonis in Ptolemaeum commentariorum, ad exemplum edito plenius, interceptam esse. Et sunt profecto in eo Ptolemaei opere, praeter ipsam argumenti pulcherrimi tractandi ἀκριβειαν summam, cum pari perspicuitate, praecepta communia doctrinae plura, exquisito philosophi iudicio digna, et plurimum vtilitatis ad bene cognoscendum habentia.

Sed, ut illuc redeamus, in his, qui proxime a Bornero in hoc genere doctrinae et ipsi illustres fuere, et Scholam nostram illustrare, princeps sine dubio numerandus

*) Legant studiosi Philippi praef. ad Euclidem latinum, ab ipso editum Bas. 1537.

**) v. Ios. Ayeranii Vitam Benedicti Averanii in Opp. postum. T. I.

randus est Io. Homilius (nomine ad formam graecam flexo ab Hommeliano) quem Camerarius ait *) ab excellentibus quoque in eo genere studiorum, quae ille potissimum professus esset, viris, hoc est, Mathematicis, principem earum artium iudicatum esse. At ille cum ceteras earum partes eximie calleret, tum vero inprimis excellebat in Astronomia; ad cuius vsum etiam nova, eademque exquisitissima ratione inventa et composita, instrumenta et machinamenta struxerat, propter quae et *Carolo* Caesari, et *Augusto*, Principi Electori, gratissimus et prope familiaris fuit, ab iisdemque magnis auctus est praemiis.

Ab illo tempore etsi non defuere huic Academiae, qui illam partem doctrinae cum laude, et ad vsum iuuenilis aetatis accommodate, docerent: nam et Camerarius eo, quo diximus, loco fatetur, (vtrum ita senserit, an humanitatis causa dixerit, non decernimus) iacturam in Homilio factam bene reparatam esse successoris dignitate; et possunt commemorari alii non obscuri eius magistri: tamen in illa studiorum perversitate, quae, post illud felix literis apud nos seculum, sive Philippicum malis, sive Camerarianum dicere, invaluit, et per totum amplius seculum duravit, nihil, quod insigne esset, habuit civitas nostra, nec omnino Germania multum; cum illis temporibus, de quibus ante diximus, principatum in hoc genere teneret. Qua in re nostra aetate felicior fuit, vt vniversa Germania, ita nostra etiam civitas. Nam et illa habuit, qui in principibus Mathematicorum, ingenii altitudine et inventorum subtilitate ponerentur, certarentque de principatu cum Britannis et Franco-Gallis aliisque externis; in his longe principem Leibnitium, ipsum Lipsiensem, sed ereptum Lipsiae patriaeque communi per incitiam invidiamque: et Schola nostra duos excellentes in ea disciplina viros, et omnibus superioribus eius
in

*) In Or. de Io. Homilio 1563.

in hoc genere doctrinae professoribus longe superiores, Hausenium et Heinsum, hunc vero, in Astronomia quidem, et ipsum sine pari. Quo magis intelligitur, quantum eius morte iacturam nuper fecerimus. Id ut magis intelligatur, breviter, quomodo natus educatusque sit, quo cursu ad illam tantam doctrinam pervenerit, quae instituta docendi ac scribendi, qui habitus ingenii, animi, morumque, qui finis vitae fuerit, exponemus.

Gens est a pluribus aetatibus Numburgi ad Salam Heinia: non illa quidem honorata, at honesta cum primis, nec sterilis bonis ingeniis, claris etiam inter nos familiis, ut Deutschmanniae, innexa. Ex ea fuit Iacobus quidam, Magister Collegii restiariorum, paterfamilias diligens et rei honestis artibus faciendae peritus. Is ex Reinecceria, civis Pegaviensis filia, suscepit Gottfridum, de quo dicimus, anno seculi nostri nono a. d. IV. Kal. Maias. Celeriter prodidit se ingenium pueri, et tum facilitas, tum cupiditas discendi. Itaque quantum aetatis annum agens mitti potuit in Scholam publicam; in qua, per omnes ordinum gradus, ad primum usque pervenit: nam et ipse puer literarum studia sequi cupiebat, et praeceptores Patri auctores erant. Sed in ea Schola tum ceteras partes puerilis doctrinae studiose ac diligenter didicit, tum in primis, captus per occasionem aliquam doctrinae mathematicae cognoscendae cupiditate, impetravit a Blossio, qui ei Scholae regendae tum praeerat magna cum doctrinae et dexteritatis laude, ut sibi eius initia traderet. Hunc tum ceterae eruditionis, tum mathematicarum doctrinarum amorem in Academicam disciplinam pertulit, annos natus viginti. Et ille ad Iuris quidem civilis doctrinam se conferre statuerat, audiebatque, praeter Philosophos, qui tum maxime clarebant, illius scientiae magistros: ceterum mathematicae doctrinae, tum universae, tum in primis Astronomiae amore ita captus tenebatur, ut ad extremum in ea domicilium studiorum collocare decerneret. In quo plurimum

rum valuerat magistri, Hausenii, quem ante commemoravimus, excellens scientia, et docendi tum solertia, tum fides. Nam ut nihil de scientiae altitudine dicamus, vis docendi et demonstrandi erat tanta, ut, etiam in difficilioribus rebus, et intelligere, et assentiri, cum suavitate quadam cogeret. Nos quidem adhuc illius sensus delectat memoria, quem nobis impressit docendo, cum primum e quamvis accurata Hassii, Mathematici Vitembergensis, disciplina ad eum venissemus, traditi viro a fratre nostro, qui nuper est mortuus, ipsiusque de consilio audiremus publicas super Mechanicis, quas tum maxime instituebat, Lectiones; in quibus non modo ea vel explicabat, vel corripiebat, quae essent in Germanicis Wolfii elementis, sed etiam universam de legibus motus theoriā, ut ipse vere dicebat, primus in hac Academia tradebat, idque sine libro: quae nos deinde domi scribebamus, redeuntes per vestigia rerum perspicue nobis impressa ab illis vividis et efficacibus demonstrationibus, ipse vel emendabat, vel explebat, si qua lacuna apparebat. Itaque qui doctrinae mathematicae studium cogitamus assumere, memores alicuius orationis paternae, ad acuendum ingenium, et ad verae in disserendo ac demonstrando subtilitatis sensum imbibendum, ita capti eramus doctrinae illius dulcedine, ut ad eam toti adhaesissemus, nisi nos Stiglitii, alterius parentis nostri, quamquam illorum studiorum amantissimi, consilium abstraxisset. Sed bonitas disciplinae nullo alio documento certius intelligitur, quam discipulorum haud ambigua claritate. Et Hauseniana disciplina Kaestneros, Baermannos et Heinsios tulit. Sed, ut ad Heinsium redeamus, non modo privatas ille praeceptoris, imprimisque publicas lectiones, quae erant optimae et diligentissimae, imprimisque destinatae iis, qui iam aliquid profecissent; non ergo has modo assidue studiosèque audiebat, sed etiam separatim eius opera utebatur ad sublimiora cognoscenda. Nam nosmetipsi ex Hausenio audivimus in sermone tum fami-

familiari, *Phororomiam* a se Hermannianam explicari Heinſio, qui in mathematicis disciplinis excellentius verſari geſtiret.

Ceterum cum ita profeciſſe magiſtro videretur, vt ipſe poſſet alios docere; prius voluit experiri ingenium ac profectum ſcribendo ac diſputando. Itaque ſcripſit libellum, *de viribus motricibus*, (a. 1733.) Hauſenio praeſide pro cathedra diſceptandum: ex quo nata eſt controverſiola, ipſum inter et Stubnerum, virum in philoſophia et mathematica doctrina egregie verſatum, aliquot libellis agitata erudite et liberaliter. Nam cum ipſe de ea re, et de virium motricium meſura, ſecundum Carteſium iudicaſſet, eiſque rationem contra Leibnitianam defendiſſet; Stubnerus Leibnitianae deſenſionem contra Carteſianam ſuſceperat, Leibnitianae demonſtratione proponenda. Ei cum oppoſuiſſet noſter Animadverſiones quasdam, Stubnerus alio libello ei ſatiſfacere tentavit: cui ille mox reſpondit (a. 1735.) ita, vt notiones et diſcrimina virium vivarum et mortuarum explicaret apte ad quaefſtionis iudicium. Ita finis factus eſt liti.

Interea ipſe Magiſter artium et philoſophiae creatus, (a. 1734.) paullo poſt ius privatim docendi adeptus eſt alia Diſputatione propoſita, quae modum longitudinis tormentorum bellicorum definiendae per principia mechanica explicaret: a qua Diſputatione ſtatim mathematicas diſciplinas tradere lectionibus privatis coepit. Duobus annis poſt (a. 1736.) cum aliam pararet *de vi inertiae*, per quam ſibi aditum ad Collegium Philoſophorum pateſaceret, oblata eſt ei a Petropolitaniſ Profefſio Aſtronomiae extra ordinem docendae, per quam etiam adiungeretur Iosepho Nicolao Inſulano (*de l' Isle*) Profefſori Aſtronomiae primario, in obſervationum Aſtronomiarum negotio; cuius cauſſa ei et locus inter Academiae Sodales dabatur. Ea conditione accepta, hinc profectus venit Petropolim meſe Septembri anni 1737. expectatus vehementer per commendationem Hauſenianam.

Quam

Quam expectationem ipse non modo scientiae subtilitate, et caelestium observandorum assiduitate ac diligentia egregie sustinuit, sed etiam superavit. Erat enim tantum studium speculandi caelum nocturnum, et observandi, si quid esset dignum animadversione, ut nec vigiliis fatigaretur, nec frigoris molestia. Ipsum audivimus, cum narraret, in illa acerrima hieme anni 39. se non omisisse observandi consuetudinem, etsi saepe interrumpere observationes propter frigoris vehementiam, et fricare nive manus necesse haberet ad excutiendum torporem. Atque hinc nata sunt ea, quae saepe exhibuit Academiae specimina observationum suarum, fere in Commentarios Petropolitanos relata. Itaque cum Insulanus a. 1740. in Siberiam iret, et ad speculandum, prope ipsum Obii fluminis ostium, Mercurii per solem transiitum, qui die altera Maii futurus erat, et ad alia item observanda, quae Astronomiae pariter et Geographiae usui forent; nostro omnis speculae Astronomicae cura credita est, adiunctis Kraftio et Tidemann, viris doctissimis, qui ei operam in ea cura navarent. Qua curatione accepta etiam magis incensus est, non modo ut ipse pro se omnem in ea re diligentiam assiduitatemque exhiberet, sed ut etiam alios ad observandi dexteritatem diligentiamque acueret. Itaque instituit quosdam adolescentes assumere, quibus primum observandi caelestia modum et artificium demonstraret, deinde exercitatis ipse in observando vteretur. Itaque etiam nunc eius in administratione illius muneris curam, fidem, assiduitatem ita laudant Petropolitani, ut omnibus, qui post ipsum fuerint, haud ambigue praeferant. Ceterum illa procuratione suscepta, finem lectionibus publicis fecit, quibus elementa mathematica adolescentibus tradiderat secundum Weidleri, Mathematici Vitembergensis, *Institutiones*; ad quas tamen duobus annis post rediit. Nec ille omisit commentari interdum, quae in conventibus Academicis praelegeret: quale fuit, quod de *Orbitalum planetarum*

L

appa-

apparentiis (Graeci vocant *Φάσμις*) scriptum praelegit, exhibeturque in *Commentariis Petropolitanis* (Tom. XIII. p. 260.) item eodem anno, cum Eulerus, vir in hoc genere doctrinae summus, ad Academicos commentarium misisset, in quo methodus traderetur orbitae parabolicae describendae, quam cometa decurreret; ipse secundum eam descripsit modum eius reperiendae, per quandam constructionem, quae tribus punctis sive locis orbitae datis fieret. Sed eam methodum etsi Academicis praelegerat, tamen edi formulis chalcographicis noluit. Nam quae de eo, quem Astronomi vulgo vocant, annulo Saturni, scripsit, cum anno 43. et 44. conspicuus in caelo non fuisset, ea apud nos in Schedis literariis tum edita sunt, post diligentius ab ipso elaborata.

Haec et his similia cum ageret, floreretque iudiciis omnium, ecce per Weidlerum ei Vitemberga nunciatur, cathedram mathematicam, quae morte Hassii vacaret, ipsi Principis decreto destinatum esse. Ibi tum sensit se tangi patriae amore; decrevitque accipere, quod esset oblatum: nec ita multo post se accinxit itineri, venia abunde impetrata. Et eam impetravit ab invitis ille quidem, cum omnes talem sibi virum eripi dolerent, sed tamen ab non ingratis, nec ut effunderetur gratia, meritis collecta per plures annos, ut sit; estque sic dimissus, ut honoris causa in numero Sodalium Academiae maneret, cum stipendio annuo ducenorum scutorum: quod ei ad finem usque saluum fuit. Sed cum velut ad Vitembergenses abisset, venit ecce ad nos. Et erat aequum, Lipsiam meliori iure et conditione in eo esse, cuius doctrina Lipsiae deberetur. Etenim dum est in via, moritur Praeceptor eius Hausenius, cuius videndi desiderium et ipsum valuerat in consilio repetendae Saxoniae. Is cum morti vicinus interrogatus esset ab iis, qui adessent, collegis, quem sibi successorem iudicio suo destinaret; Heinsium, respondit: nec alium ultra edidit. Quo iudicio motus Ordo Philosophorum institit orare Principem

ut

vt hunc potissimum sibi collegam daret: idque facile impetravit. Nec ipsi non poterat longe acceptior esse hic locus, quo capeffendo etiam gratum se Lipsiae alumnum praestare posset. Adiit ergo hunc docendi locum per legitima et solemnia ei rei specimina doctrinae. Eum porro quemadmodum ad finem vsque non modo tueri perrexerit, sed etiam ornare, in re clara non diceremus, nisi ea, quae ad hanc doctrinam pertinent, minus nota vulgo ac plerisque adeo ignota essent. Neque enim popularia sunt ista studia. Et nos non illum populum modo dicimus, qui proprie dicitur, sed etiam qui se indoctis hominibus numerat, et viros magnos creare non dubitat.

Itaque primum docendi non modo subtilitas et accuratio, sed etiam perspicuitas erat tanta, vt prope, sicut, qui in clara luce apertis ad videndum oculis ambulant, necessario vident, quae sunt ante oculos, ita, qui eum demonstrantem res propositas audirent, non possent non intelligere, quae traderet: nisi si forte essent, qui ab ipsa lucis magnitudine caligarent, vt fit in sole nimis multo. Nec id incerta fama praedicamus, aut ex laudibus modo adolescentium, quos nosmetipsi eius disciplina vti iussimus, sed ex iis, quae audivimus saepius in examinibus eorum, qui Magistri artium creari vellent. Nec infrugifera eius disciplina fuit etiam in hanc partem, qua supra diximus maxime Doctores praeclaros spectari. Etenim satis constat, plures per eius disciplinam ita praeclare profecisse, vt ipsi docere artes mathematicas cum laude possent: quos nominare non est necesse.

Sed cum maxime vacaret scholis habendis, publicis privatisque, etiam quae singulis haberentur, praesertim, qui exquisitius discere cuperent, non neglexit etiam scribere, quae doctoribus prodesse: primum per occasiones Academicas, deinde, vt essent, quae in Commentarios Petropolitanos suo nomine infererentur, nec in hoc genere scribendi commemorari possunt. Libros maiores non scripsit. Non ita facile est, in huius doctrinae

subtilitate, et erudita tenuitate, libros magnos efficere: neque enim in ea licet loquacem esse et belle nugari. Et compendiis vulgaris doctrinae scribendis ad laudem affectare viam, indignum sua Professoris clari persona ducebat. Inventis hic novis paratur gloria, et accurandis iis, quae ad ἀριβείας perfectionem nondum sunt adducta. In quo et verbis paucis opus est, et brevitatis est gratior. Atque etiam non tulisset laboris continentis, in magnis operibus scribendis necessarii, contentionem et molestiam. Etenim quamvis robustum natura corpus, partim frigoris magnitudo, partim victus Petropolitanus, cuius consuetudinem dimittere non sustinebat, ita affecerat, ut, praesertim per hiberna tempora, parum videretur. Inprimisque ventriculi imbecillitate afflictabatur, et iis, quae inde nascuntur, incommodis; de quibus post commemorabimus.

In ingenio Viri, praeter acumen in intelligendo et iudicando, maxime laudaverimus diligentiam in cognoscendo, et in cogitandi veluti progressionem considerantiam: ex qua existit et in intelligendo perspicuitas verissima, et in iudicando assentiendoque securitas. Ad eam et ab ipsa natura factum erat ingenium, et vero inprimis, tum univervo doctrinae, ad quam se dederat, genere, firmatum, tum assuetudine illa et assiduitate observationum caelestium et supputationum astronomicarum; quarum ipsa indoles prope cogit esse diligentes et considerantes, etiam in rebus minimis. Ab eademque nata erat illa docendi in rebus tam subtilibus dexteritas, de qua ante commemoravimus, felicibus ingeniis apta pariter et tardioribus. Nam cum eadem constantia et considerantia progrediretur in explicando ac demonstrando, tum ingeniorum felicium ac celeres motus habentium festinationem cohibebat salubriter, eaque, veluti equos ferocientes atque exultantes solent domitores, per arenas ire suspenso gradu cogendo, subigebat, tum aliorum imbe-

imbecillitatem ac tarditatem sublevabat: in quo est disciplinae virtus maxima.

At illa virtus nec ab tristitia quadam naturae ducebatur, nec eam induerat ingenio. Etenim in vita communi et in circulis amicorum multum hilaritatis erat, plurimum etiam ioci et facetiarum. Neque enim ita dissidet atque distracta est severitas doctrinae mathematicae cum hilaritate ingenii atque vitae, ut in eodem esse non possint. Ille ipse Praeceptor communis Hausenius in sermone communi erat plenus facilitatis et hilaritatis. Nam etiam tristitia scribendi in utroque, interdum inclinare in obscuritatem visa, non ab ingenio vel naturae vel doctrinae erat, sed quod exercitatio ingenii ad scribendi facilitatem et hilaritatem defuisset: sine qua difficile est obscuritatis speciem effugere, si diligentior in rebus reconditis explicandis esse velis. Quod contra videmus aliis viri discipulis, qui illa exercitatione sunt usi, Kaeſtneris et Baermannis, nihil esse in scribendo facilius, etiam nihil lepidius, cum in argumento, materiam venustatis habente, versantur.

In philosophia et omni genere doctrinae comparando omnia tribuebat diligentiae et assiduitati exercitationis in cognoscendo, praeceptis paullulum loci relinquens: valdeque probabat Hermanni, Mathematici summi, iudicium, quem narrabat iussum Petropoli praecepta logica tradere studiosis, cum prima hora de ideis, altera de nexu et relatione idearum, sive, ut Dialectici loquuntur, subiecti et praedicati, dixisset, finem fecisse praecipendi: quod nihil praeterea scire se diceret, quod ad bene intelligendum et iudicandum necessarium esset: cetera usu et exercitatione constare.

In omni numero scriptorum eius facile primas tribuerimus commentariolo *super Cometa*, qui annum abhinc septimum et vicesimum (1744.) Astronomis insignem fecit: tanta inest diligentia in observando, in principiisque constituendis, et subtilitas atque severitas

in ducendis inde conclusionibus, et ad explicanda ea, quae observata essent in cometa ipso et eius decursu, et ad intelligendam communem cometarum naturam! Initium facit ab commemorandis opportunitatibus observandi, quae in illo cometa supra ceteros omnes fuere, in quibus speculandis constet Astronomos ante laborasse. Sequuntur observationes ipsae, a prima conspecti sideris die (d. 5. Ian.) ad ultimam: quinta et vicesima Februarii fuerat: in quibus, quoniam libellus non Astronomis subtilissimis aut solis scribebatur, magis earum rationem duxit, quae ad naturam cometarum cognoscendam prodesse, quam quae ad positum quemque sideris illius, astronomica accuratione definiendum, pertinerent. Tum aggreditur, iter eius ipsum circa solem, per anfractum Apollonicum sive parabolicum, (quod est genus curvae de genere sectionum conicarum) e vestigiis observatis definire, comparatque cum cursu terrae simili, h. e. per eiusdem generis orbitam, et versus eandem coeli plagam. Inde de figura et magnitudine, tum corporis cometici ipsius, tum syrmatidis lucidi, caudam vocant vulgo, et lucis a sole acceptae modo tradit. Post persequitur ad spectabiles situs, figurae, lucisque in syrmatide varietates, comparatque cum principiis cometicis; quam theoriam cometicam appellant: quod facit singulari diligentia, quae in multitudine rerum, etiam minutarum, quarum ratio haberi debet, inprimis est ad securitatem iudicandi necessaria: descripta etiam et designata via, per quam et quomodo in eo negotio incedi debeat. Nec tamen certa hic facit omnia, sed coniecturis paullulum loci relinquit. Syrma cometarum, secundum Neutonianam rationem, e vaporibus cometae ducit, et ad extremum in aethere dissipat: nec dubitat, quin brevis modo Neutoni nimia locum fecerit dubitationibus. Ipse de syrmatidis illius miraculo ita disserit, ut primo natales vaporum in atmosphaera cometae indaget, deinde vel surgentes, vel effluentes ad immensa spatia, et in aethere natantes, per-

sequa-

sequatur, ad extremum modum surgendi ad illum tractum lucidum efficiendum definiat: vsus principiis certis mathematicis et physicis in explicando, et vsitata illa diligentia sua, etiam in circumspiciendis animadvertendis-que difficultatibus, et de medio tollendis: estque ea longior, et luculentior, et ad legendum iucundior libri pars. Nam et tum maxime miraculo est cometa, cum illa *pan-dit spectacula caudae*, et eius miraculi explicatio maxime expetitur. Ex vno hoc vngue cognoscet Heinſium poſteritas intelligens, in magnisque viris eum, et veris Lipsiae decorebus, numerabunt, pauci illi quidem, sed non de vulgo, hoc est, a quibus se solis ipse cupiat probari laudarique.

Sed libellus tamen hic minus latam famam habuit, quod erat sermone patrio scriptus, nec legebatur nisi a popularibus, aut linguam Germanicam doctis: nam erat iis destinatus proprie. Ad exterarum pariter nationum Astronomos *) nobilitavit viri nomen inprimis Commentariolus, quem latine scripsit ab reditu in urbem nostram (a. 1745.) inscripsitque, latinitate mathematica, *de apparentiis annuli Saturni*: in quo praeter ea, quae de re universa disputat, summa diligentia persequitur, quam speciem lucidus ille circulus, qui Saturni orbem paribus undique intervallis amplectitur, in quolibet sideris positu, obiciat spectantibus e terra, quocunque in loco curricula terrestres. Et haec ille primus enucleatius tradidit; in priori illo post plures alios elaboravit.

Religionis pietatisque reverentiam et amorem malebat sensu, a perspicua et certa rerum divinarum scientia orto, et rebus eo sensu dignis probare Deo, quam auribus et oculis humanis per verborum sanctorum et actionum externarum ambiguam speciem. In tota vitae ratione simplicitatem sequebatur, probitatem, fidem: sua magis curare, quam aliena speculari: nihil machinari

L 4

contra

*) v. de la Lande Astronomie T. II. p. 1259.

contra alios: nulli sermones maligni, et alienorum vel animorum vel factorum interpretes. Fratribus et ceteris propinquis pietate, collegis, amicis, fide, integritate, etiam facilitate et suavitate satisfaciebat. Quod erat a labore docendi vacuum tempus, fere meditando, legendo, scribendo, consumebat. Itaque multa volumina Excerptorum, Observationum et Commentationum reliquit: quippe domi plurimum, raro foris erat. *φίλον οἴκου ἀγίον* ducebat. Cum tamen foris vel prandebat vel coenabat, et frontem et animum, ut ante diximus, ita explicarat, ut nulla domesticae severitatis vestigia appa-
 rerent.

In corpore conspiciebatur proceritas sine gracilitate, et cum dignitate virili: color oris, qualis esse bene valentium solet, rubor nigricans. Vox gravis erat, et sermo cum dignitate tardior, praesertim in differendo ac docendo. Corpus ipsum a natura firmitatis ac roboris plurimum habuerat; sed naturalis ille vigor fractus erat aliquantum iis, quibus supra demonstravimus, rebus. Inprimisque tentabatur subinde, per hiemem, destillationibus: quod malum etiam augebatur ipsa valetudinis et incommodi illius cavendi cura. Nam munire corpus a gravedine cupiens, cum non modo aërem liberum et frigidiores vitaret, sed etiam calidiori cubiculo vteretur; languorem contraxit, non modo qui membra corporis, sed etiam qui viscera obtineret. Eum saepius excussit ille quidem, per aestivos menses, itineribus ad propinquos suscipiendis, et aquarum vel Carolinarum vel Pyramontanarum, aliorumque remediorum usu, ut etiam per autumnum, et primos menses hibernos, commode valeret, sufficeretque agendis iis, quae muneris publici rationes poscerent: at ultimis plerumque redibat languor anniversarius, prope semper cum aliqua accessione. Anno autem duodeseptuagesimo eum longe citius oppressit, atque etiam gravius. Nam mense ipso Septembri ita elanguerat, ut hiemem valde molestam medicus timeret.

Nec

Nec timor vanus fuit. Et remedia quidem adhibebantur a Ludovico nostro, cui etiam amicitia auxerat curam, efficacissima; sed eorum vis vincebatur a corporis inertia, quae nulla exercitatione in aëre libero expelleretur. Itaque consecuta sunt, quae solent, ἀνοξία et δυσπείσια: quibus cum humorum et elaboratio, et per corpus circumactio, impediretur, ita brevi fractus est, ut prima et vigesima Maii mensis die exspiraret, anno exacto sexagesimo cum mensibus tribus, diebusque totidem,

Mors fuit similis vitae, placida et tranquilla. Et firmaverat animum adversus terrores mortis, et desideria vitae terrenae, partim per vitae ipsius tranquillitatem et prope solitudinem, non multis aut arctis vinculis adstrictus bonis et negotiis terrenis, partim per cogitationes rerum caelestium, non modo earum, quarum contemplator fuerat assiduus, i. e. adspectabilem, sed etiam, quae sub adspectum non cadunt, solaque mente per doctrinam Iesu Christi cognoscuntur; ad quarum cogitationem, etiam inter morbum, per sermones L. Koernerii adducebatur. Nec in ea cogitatione languor animi animadvertebatur, similis ei, qui corpus dejecerat: sed vigor praesto erat mentis, a perpetuis cogitationibus rerum intelligibilium exercitatae. Nam is et in corporis languore non exstinguitur, aut totus deserit hominem: cum apud eos, qui rebus sensibilibus immerfi sunt, raro et segniter mentem ad invisibilia attollunt, etiam in magno corporis vigore, animus ad insensibilia langueat.

Nunc sublatus a terra, ut confidimus, ad novum et sine nubibus caelum, gaudet, sub pedibus videns illa nota ante et cara sidera, spectansque e propinquo universae mundi machinae architectum, et motuum caelestium omnium moderatorem, Deum, mentesque circa ceteras beatas; quibuscum haurit animo toto Deum,

in eoque haerens cogitatione, liquidissima perfunditur beatissimaque suavitate.

Hanc felicitatem ei ita gratulari convenit, vt ad eam nos quoque adspiremus, avellendō animo a sensuum vanitate et ludibriis, et ad rerum invisibilium veritatem traducendo, ne cum tempus hinc abeundi venerit, tergiversemur, sed vt ad longe meliora transaturi, obedienter et cum gaudio discedamus. P. P. Fer. I. Pasch. A. C. cIdccclxx.

M E M O R I A

RVDOLPHI AVGVSTI SCHVBARTI

ICTI PR. ELECTOR. SAX. A CONSILIIIS AVLICIS
CIVITATIS LIPS. CONSVLIS

In partibus magistratus bene administrandi, quae sunt et multae et graves, principem, vti profecto est, ita iudicabat Socrates, consentientibus summis reipublicae recte gerendae auctoribus, hanc, vt, qui eum gereret, cives legibus obediētes efficeret. Nam si in legibus sunt fundamenta et praesidia tum securitatis, tum vniuersae felicitatis publicae, eas etiam conservari necesse est, non modo sic, vt ne per levitatem et inconstantiam abrogentur et tollantur, sed etiam, idque multo magis, vt iis obediatur ab civibus vniuersis; quod qui iis non parent, ab his eae, quantum in ipsis est, abrogantur ac tolluntur. Sed ea res non tam poenarum metu efficitur, qui nec certam et constantem in vlllo genere obedientiam affert, nec ad omnes ex aequo leges pertinentem, quam disciplina quadam, apte excogitata ad animos hominum regendos et ita conformandos, vt paulatim consuefiant obedire legibus sine vi et metu. Ea autem inest in institutis, maxime publicis, ad eam rem valentibus, in quibus inest ea, quam *Civitatis disciplinam* appellant, et vero etiam privatis et propriis civitatis gubernatori. Etenim vt disciplina domestica non modo communia quaedam instituta habet, a maioribus reperta et tradita, sed etiam praecipua quaedam, a patrisfamilias prudentia et diligentia habere potest: sic et in publica Civitatis disciplina, ad instituta vsu recepta accedere possunt ab rectoris sapientia,

tia, virtute et diligentia, apte ad temporis cuiusque rationes excogitata, per quae illa ipsa disciplina publica corroboretur, ne labet primum vel vniverſa vel parte aliqua, deinde praeceptis eat atque intereat.

Huius ergo talis disciplinae tum publicae tum privatae quanta vis fit ad id, in quo praecipuam partem magistratus bene gerendi eſſe diximus, omninoque ad ſalutem felicitatemque publicam, et res ipſa declarat, et ſapientiffimi viri omni tempore iudicavere. Vt nihil dicamus de Platone, cuius praeclari de Legibus libri, a principio inde, verſantur maxime in diſciplina conſtituenda: quaecunque civitates, vel a tenuibus initiis ad magnam felicitatem venerunt, vel ab hac ad priſtinam tenuitatem interitumque reciderunt, iis, conſenſu traditum eſt, diſciplinae vel bonitatem et conſtantiam, profuiſſe maxime ad felicitatem, vel vitia et negligentiam mala maxima interitumque attuliſſe. Gubernatores autem civitatum maxime laudantur ii, quos propria quadam diſciplina, i. e. iſtitutis quibusdam ſuis, in republica adminiſtranda, et civibus in officio continendis, vſos conſtet fuiſſe; et quae illi Civitati ſuae bona attulere, ea non modo rebus fortiter ſapienterque geſtis, ſed etiam, ac prope magis, eorum iſtitutis tribuuntur, quibus, et cives domi, et milites foris, parentiores et legibus et ſibi reddidere. Spartanæ quidem Civitatis et cetera bona et diuturnitatem conſenſu veteres a diſciplina Lycurgi repetunt, per quam Lacedaemonii a pueris inde ad obedientiam promte et conſtanter legibus magiſtratibusque praestandam adſueti ſint. In Cyro autem nihil magis laudatur, et ad Perſici imperii felicitatem valuiſſe traditur, quam eius diſciplina ea, quam pulcerrimo opere explicavit Xenophon. Itaque Cicero cum Ciliciam provinciam accepiſſet regendam, non modo hoc egit, vt eam ex legibus adminiſtraret, ſed vel maxime hoc, vt diſciplina quadam vteretur ſua; in qua ſe, ipſe dicit, Cyri iſtituta imitatum eſſe: (Ep. ad Div. IX, 15.) nec alia re magis illam tantam laudem eſt

con-

consecutus, qua tota tum Asia personabat. Illa ipsa nobilis ad Quintum fratrem epistola, quae eximiam provinciae bene administrandae formam exprimit, vel maxime est in disciplinae ratione explicanda, ad quam fratrem vult dirigere omnes magistratus in Asia provincia gerendi partes.

Sed ut in domo privata, permagna pars disciplinae est in patrisfamilias exemplo; sic in Civitate nulla legum conservandarum, et hominum ad obedientiam adducendorum, morumque ad eam rem accommodate fingendorum, certior et efficacior ratio est, quam magistratus exemplum: in quo est viva quaedam, et omni oratione disertior et legibus ipsis potentior disciplina. Nam ceterae artes atque instituta severitatis, constantiae, ac diligentiae, quibus vel caveri peccata civium possunt, vel adduci homines ad servandas leges continendasque cupiditates inimicas legibus, h. e. salutis publicae, eae et tam multae sunt ac variae, et in exercendo tantum curae vigilantiaeque habent, ut facile vel fatigent animum hominis, quamvis laboriosi, et in rebus agendis exercitati, vel eludantur multorum tum calliditate, tum impudentia. At magistratus, leges, quarum custos est, ipse servans diligentissime, faciensque constanter, quicquid ab aliis postulet fieri, nec suas utilitates praeponens publicis, deinde vero in omni vita integrum se et liberum praestans a pecuniae lucrique cupiditate et avaritia, moderatum ac sobrium in toto vitae domesticae cultu, gravem in incommodis publicis privatisque perferendis, adversus omnes, etiam infimos, facilem, comem, multas multorum ineptias stultitiasque perpetientem, arrogantiam perferentem, ad aliorum magis arbitrium quam ad suum viventem, is vero ipsius exempli sui vel reverentia et gravitate pudefactus abstrahit a contrariis vitiis, vel pulcritudine amabili captos allicit ad virtutum amorem. Si omnia alia irrita sint, saltem os occludit hominum improborum, nihil facilius ac libentius, quam per magistratum

stratum vel vitia vel peccata suis excusationem quaerentium.

Atque huius talis disciplinae exemplum egregium nuper amissimus in Rudolpho Augusto Schubarto, Viro Magnifico, Civitatis nostrae Consulari: quem cum cetera dexteritate, diligentia atque fide, in primis illa saluberima exempli disciplina in magistratu Civitatis gerendo uti vidimus. Neque enim quicquam esse a nobis in eius disciplinae partibus positum confidimus, quod non, qui Viri animum, vitam moresque perspexerit, Schubarti agnoscat. Nam ut nihil dicamus de facilitate adversus omnes, in rebusque omnibus, et comitate, in laborando industria, in incommodis et molestiis tranquillitate et patientia: quantum in eo fuisse dicamus moderationis, qui nec honorum meritis partorum magnitudine efferri se siverit, nec fortunarum ceterarum, honesto labore et diligentia liberali quaesitarum, copias ad magnificentiae vanitatem contulerit, sed semper in pristinae vitae modo se continuerit, tantum ille remotus a fordibus, quantum abesset a profusione, vni serviens dignitati, quam, sapienter iudicabat, inter utrumque vitium medium tenere locum; quem plerique magis verbo praedicare, quam re vel nosse, vel petere solent. In hoc autem talium virtutum, tamque illustri loco positarum, tanto exemplo, haud difficile est existimare, quantum bonum habuerit Civitas nostra, quam necessarium his temporibus, quibus aviditas pecuniae, etiam malis artibus, per fraudes iniuriasque, quaerendae, et per vanitatem perdendae, invasit, quae vix aliis quam divinorum malorum remediis coerceri posse videatur. Quo magis ille tam praeclari tam salubris Vir exempli dignus est, quem totum perspiciant omnes, quem etiam posteritas et ad laudandum et ad imitandum cognoscat.

Ac primum ortus est genere, et paterno et materno, quod maioribus claris nobilitatum esset. Nam Pater Io. Augustus, qui mercaturam primum fecit, post in Con-
filiam

filium adscitus est, quod rei mercatoriae per terras Brandenburgicas praeesset, natus erat Andrea Christophoro, Halis ad Vlrici aedem sacrorum antistite, eodemque tum Ecclesiarum atque Scholarum in Dioecesi Salana Ephoro, tum in Consilio Ecclesiastico Senatore. Is autem duxerat in matrimonium Christianam, filiam Andreae, sacerdotis Halensis, in cuius maioribus fuit is, qui propter insignem iuris Canonici scientiam *Lucerna iuris* est appellatus: mater autem, Catharina Sophia, Io. Rudolphi, mercatoris nostratis filia, genus referebat ad magnum Lutherum nostrum. Nam pater eius fuerat Io. Martinus Lutherus, Senator in Consilio Dioeceseos Misnensis, qui patrem habuerat Io. Ernestum, avum autem Paullum, Martini filium. Ac his igitur parentibus natus est noster Rudolphus Augustus in vrbe nostra, superioris seculi anno quarto et nonagesimo, die XXVI. Octobr. Statim ab iis destinatus est literarum studiis, cupientibus per eum veterem gentis in eo genere claritatem vel conservare vel instaurare. Nam cum vix biennis esset, referri curarunt nomen eius in Album Academiae nostrae, matureque fecerunt omnia, per quae amor literarum iniiceretur puero, adhibendis magistris idoneis, a quibus doctrinae liberalis initiis imbueretur. Quae res ipsis successit feliciter. Nam ita incensus est filius studio discendarum literarum, ita etiam profecit, vt nec parentes consilii poeniteret, nec ipse aliud vitae genus appeteret, quam cui a parentibus destinatus esset. Itaque cum eum cepisset profectum, qui in privata disciplina esse posset, missus est Misenam, in Scholam principalem: in qua sub magistris Stubelio, Schrebero, Silligio et Kauderbachio didicit; et didicit eo studio, ea severitate, vt esset iis probatissimus, amareturque ab omnibus in filii modum; praesertim qui ipsos filii pietate coleret, et studio doctrinae parem probitatem atque modestiam in rebus omnibus iungeret. Itaque eum sic e disciplina sua, exacto quinquennio, dimiserunt, vt omnibus bonis omnibus prosequerentur, et testimo-

nio

nio luculento iudicii sui ornarent. Et erat illi etiam sen-
ita iucunda temporis in schola illa exacti, et praecepto-
rum, quos ibi habuisset, eorumque de se iudicii memo-
ria, ut eam libenter ac saepe, etiam inter amicos, vsur-
paret. Rediit ergo bene ingenio animoque conformatus
ad patrem filius Halas, quo domicilium sedemque fortu-
narum Lipsia transtulerat. Ibi primum audivit eos, per
quorum disciplinam et augere literarum humaniorum
scientiam, et Philosophiam accurate posset cognoscere,
in his imprimis illud Philosophiae lumen, Christianum
Wolffium; quem sibi in ea parte doctrinae praeceptorem
contigisse, in haud parva felicitatis parte ponere solebat.
In iuris autem doctrina, et iis, quae cum ea haberent
aliquam coniunctionem, doctoribus vsus est Christiano
Thomasio, Ludovico, Gundlingio et Boehmero, viris
longe lateque claris, et de doctrina literisque immorta-
titer meritis; in quorum scholis hoc profecit felicius,
quo magis praeparatus literarum humaniorum disciplinis
ad eas venerat. Sed cum inter haec parentes amisisset,
Halis relicta, in patriam, Lipsiam, transiit, ubi adiu-
menta vitae et studiorum a maternis cognatis sperabat.
Quae spes eum non fefellit. Nam cum ceteri, tum avia
materna, Carpzovia, ita amanter excepit nepotem, ita
liberaliter suppeditavit, quibus ei opus esset, ut, ab hac
quidem parte, parentes non desideraret, possetque coe-
ptum Halis studiorum cursum sine praecipitatione perse-
qui ad finem. Itaque audivit, in doctrina iuris universi,
Lud. Menkenium, Io. Christoph. Schacherum, Baudisium,
et Kemmerichium, qui post Vitebergam abiit: in fori
autem consuetudine cognoscenda, et causarum agenda-
rum modo, magistrum habuit Kaestnerum. Ita quin-
quennio velut legitime in scholis Iureconsultorum finito,
ad forum transire instituit, probatoque per legitima exa-
mina profectu, agendarum in foro causarum ius accepit,
creatus etiam Notarius, anno huius seculi duodevicesimo:
qui ei adeo fuit primus vitae agendo peractae. Sed ille
forum

forum non ita, vt fit a multis, ingressus est, vt, velut in novum orbem delatus, veteris vitae consuetudinisque oblivisceretur: immo vero vnumquodque doctrinae genus, et illud, quod ad humanitatem pertinet, et hoc, quod ad vitae in foro agenda rationes spectat, pro temporis, a rebus agendis vacui, modo coluit, vel ad animi cultum et delectationem, cui a longo tempore adsuevisset, vel ad subsidium actionum forensium, quarum vera ratio niteretur doctrinae subtilitate. Itaque in ipso prope novi curriculi ingressu, exercitationem *de dimidia investitura rei immobilis allodialis* pro cathedra, sub D. Carolo Frid. Romano, defendit ita, vt illa difficiliore et agrestiori iuris parte non mediocriter tinctus videretur: et quatuor annis post, pro Doctoris gradu, Helmstädi Decadem quaestionum e iure Cambiali lectarum, quas libello Academico explicatas proposuerat, dextre solerterque disceptavit. Etenim hanc iuris partem sibi delegerat, in qua cum primis elaboraret, suppeditante usu assiduo a familiaritate et consuetudine mercatorum primariorum Civitatis nostrae. Atque ita constabat inter omnes de eius in hoc genere scientia, vt, statim ab acceptis Doctoris honoribus, a Collegio mercatorum assumeretur, cuius consiliis communiter vterentur. Nec tamen cetera genera causarum leviter cognorat. Itaque et causarum maiorum in ecclesiastico iudicio, itemque in Curia superiori agendarum ius ei creditum est, et tum a Collegio rerum metallicarum Islebieni Syndicus et Procurator ascitus est, et a Curatoribus Salinarum Koetschaviensium: in quibus generibus omnibus et dexteritate et fide abunde satisfecit. Et ille ex hac varietate rerum hunc fructum capiebat, vt nullum genus causarum ipsi novum ac non tritum esset, et cum multis variisque hominum generibus amicitiam familiaritatemque contraheret, et ad dignitatem, et ad suavitatem fructuosas, denique tantam in omni genere negotiorum, privatorum publicorumque, tractandorum dexteritatem, vt nemo esset superior. Quae

M

res

res etiam movit Senatum Civitatis, ut eum sibi Collegam expetendum putaret; estque ei Ordini adscriptus anno secundo et quadragesimo: in quo celeritur ita eluxit fides eius in rebus publicis et solertia, ut non modo in primis adhiberetur, si quid maioris negotii esset gerendum, praesertim in bello superiori, sed etiam per gradus omnes ad Consulatum proveheretur; quem primum anno primo et sexagesimo, et post, novem annis, quinques gessit. Accessere inter haec Cura Scholae templique S. Thomae et locus in Scabinatu, et super omnia honores Consiliarii in aula Principis.

In hac tam negotiosa et laboriosa vita sustentabatur maxime virtutibus multis et magnis, de quibus paullo post dicemus: et vero etiam domesticis et familiaribus lenimentis et suavitatibus plurimis et maximis. Nam primum in matrimonium duxit anno septimo et vicesimo Sophiam Eleonoram, Georgii Rükerei, mercatoris primarii filiam, sibi ingenii morumque facilitatē, lenitate et pietate simillimam; quacum ad extremum usque concordissime atque suavissime vixit, nec aliud maius habuit humanum lenimentum incommodorum senilium extremorumque malorum, quam ab illius pietate, per quam in eorum omnium societatem aequae dolendo consolandoque veniebat; cum ipsa vicissim nihil per omne coniugii tempus tristitiae ab marito habuit, quam illa ultimae senectutis incommoda et ex iis mortem. Cumulum his matrimonii tot ac tantis bonis magnum addidit proles, non numerosa illa quidem, at optima; una in re non satis laeta parentibus, quod non vitalis tota fuit. Nam cum duae iis filiae contigissent Amalia Sophia et Rahel Christiana, et in utriusque ingenio magna materia laetitiae ostenderetur parentibus; altera spei pars periit, minore extincta, anno tertio et quinquagesimo: At eo maior seges adolevit in maiore. Nam proximo anno post, felicibus et ratis ominibus eam collocavere Carolo Ferdinando Hommelio, Iuris Professore clarissimo; velut festi-

festinante providentia divina extinguere iacturae illius sensum, quam in altera filia fecissent: idque coniugium iis laetissimum fuit, concordia, saecunditate et ceteris fortunae bonis. Nam ex eo duas neptes primum, Carolinam Sophiam, anno quarto et quinquagesimo, Ioannam Fridericam, duobus annis post, totidemque nepotes viderunt, Augustum et Rudolphum; quorum alter anno sexagesimo primo, alter septimo; et sexagesimo natus est, omnes ingenio, in quo egregia genti spes ostenderetur: deinde, cum ipse Schubartus ad summum in Ordine Amplissimo gradum, ut ante diximus, pervenisset, vix duo anni intercessere, cum filiae maritus ad primum in Ordine Iurisconsultorum proventus est: fuitque, raro exemplo, in eadem familia, eademque domo, focer Consul, et gener Ordinarius. Quibus rebus secundis ita ille usus est, ut ceteris, quae in eum per omnem vitam confluxerant, omnibus, ut nec efferretur animo, nec iis ad aliam quam vanitatem abuteretur.

Erat enim et natura, et magis etiam studio et exercitatione, ita ad aequabilitatem temperatus, ut idem semper et in omni fortuna esset animus, idemque vultus; nec supra modum elatus, nec infra eundem demissus. Unde erat illa singularis tranquillitas orationis, totiusque vitae, apparebatque, eum non extrinsecus, sed totum ex se pendere, et omnia ad pietatem et officia referre: eamque ad extremum, etiam in morbi fatalis molestiis, ipsoque mortis articulo, conservavit.

Atque ab hoc fonte ceterae virtutes fluxerant, quae in tota eius vita conspiciebantur, inprimis illa singularis facilitas et lenitas adversus omnes, invicta patientia in molestiis laborum, constantia in rebus agendis et muneribus publicis administrandis. Et ad illius animi aequitatem etiam alios, quibus cum aliquid ageretur, quorum causas et negotia tractaret, solebat vocare. Qui facile cederet aliis, remitteretque citius de iure suo aliquid, quam contra tenderet acrius, etiam alios ad illam facilitatem

tatem lenitatemque, consulendo, monendo, hortandoque ducebat, nec tamen ultra, quam fides sua et ipsorum vera utilitas pateretur, quae saepe magis cedendo, quam summum ius vrgendo tenetur. Nec vero aliam magis ob causam libenter ei se causasque suas, tutelam etiam liberorum, credebant, quicumque sibi suisque bene consultum vellent.

Nihil eo fuit aptius amicitii, vel iungendis, vel suavitatem consuetudinis et officiorum fide tuendis. Itaque habuit tam numerosas, ut nemo alius plures. Nihil erat, quod honeste praestare amicis posset, quod ab eo non expectare cum fiducia liceret: offerebatque etiam officia, cum eorum facultas daretur. Sermo erat in consuetudine familiari, in conviviis, lenis: iocus, non ille quidem frequens aut quaesitus, sed liberalis et moderatus: vultus hilaritate et gravitate suaviter mixtus, omnia ad liberalem suavitatem cum dignitate temperata. Et erat omnibus hominum generibus accommodatus: cum vnoquoque aptos ad ipsius vitae studiorumque rationes facere sermones poterat, qui, per vitae consuetudinem, omnium negotia et studia cognoverat: inter doctos et literatos eruditus reperiabatur, ut qui nunquam studia doctrinae dimiserat, sed ea lectiunculis assiduus alebat, suppetente librorum ex omni genere optimorum copia: inter mercatores, mercatorem audire putares: inter omnes, eiusdem generis ac vitae studiosum.

Sed illa tranquillitas maxime nitebatur religione et pietate, ipsa illa placida, et sine ostentatione quaesita incurrens in oculos: nec enim aliter vera et constans esse potest: quam et legendi et cogitandi exercitationibus confirmabat et nutrebat. Atque eius vis maxime in ultimo vitae actu conspecta est, non modo illa patientia in doloribus, sed etiam sermonibus, aversis ab rerum humanarum cura, vnius religionis et felicitatis futurae, a Deo per Christum sperandae, memoribus: inter quos etiam d. XXVII. Oct. anni superioris ita facile placideque

ex-

expiravit, ut mors eius non lugenda, sed ipsi atque suis gratulanda esset: quam tamen virtus Viri luctuosam toti Civitati fecit.

Mortis causam attulit imbecillitas senilis, quam non modo laborum per omnem vitam exantlatorum magnitudo et assiduitas maiorem fecerat, quam in corpore robusto a natura, et moderatione et temperantia perpetua, futura erat, et haemorrhoidum fluxus crebrior et copiosior auxerat; unde marcor gravis, et respirandi difficultas orta erat, cui, irritis omnibus, quae adhibebantur, remediis, succubuit.

Vixit annos sex et septuaginta: quae est longa vitae aestimatione humana: sed brevis ad eam, quam nomen eius in Civitate nostra habebit, si grata adversus praeclare de se meritos esse volet. Sed nulla maior gratiae adversus eum referendae ratio erit, quam quae imitandis virtutibus eius, et studio in rem publicam demonstrabitur, tum etiam votis faciendis, ut quae ipsi fuit felicitas, ea ad seros posteros eius propagetur.

MEMORIA
AVGVSTI FLORENTIS RIVINI
ICTI FACVLTATIS IVRIDICAE LIPS. ASSESSORIS
SENIORIS

In Oratoris virtutibus cum veteres dicendi magistri primam esse volunt hanc, vt sit vir bonus, non alium magis Oratorem in animo habent, quam forensẽ, forensesque controversias apud iudices tractantem, immo hunc propemodum solum. Nam et natales habuit in foro iudiciisque eloquentia, estque ad defendendas iniurias, obtinendumque ius cuiusque inventa. Sed virum bonum Latini cum propriis dicunt, locupletem intelligunt, beneque de re familiari constitutum: a qua significatione ducta paullatim altera, quae spectat ad animum moresque, dum frequentatur magis, veterem prope totam primum ex usu vitae communis, deinde etiam e memoria hominum depulit. Nempe in viri boni partibus prima ponitur fides. Ea autem propriam sedem habuit apud veteres in re pecuniaria, cum solvitur ad diem, quod debetur. Hanc igitur fidem quia maxime praestant locupletes, quod et habent vnde solvant, et carent magis caussis fidei fallendae illecebrisque vulgaribus, propterea viri boni nomen translatum est ad fidem hanc, deinde et ad ceteram, quae in servandis vniversis promissis cernitur, et in officiis inde natis; omninoque viri boni dicti sunt, quibus credi pecunia, omnes vtilitates nostrae, consilia arcana possent, a quibus nulla in re timendum esset, ne per fiduciam nostram ab iis deciperemur, et damni quid acciperemus. Sed tales esse magistri elo-

eloquentiae volebant in primis eos, qui in foro uti eloquentia vellent, ad causas civium agendas; non modo propterea, quod iis facillime crediturus esset quisque res et iura sua, sed etiam, quod in causis forensibus tractandis, praesertim tum, cum sine mercede agebantur omnia, magna esset materia, per quam ad perfidiam fraudemque trahi facile posset, qui non haberet pectus adversus illa irritamenta firmatum; denique in agendis causis ne quid negligenter, neve maligne, faceret, sed summa diligentia et honestis artibus omnia.

Quod igitur in Oratoribus forensibus primum volebant illi bene dicendi auctores, id nostris moribus totum convenit in eos, qui causas civium vel agendo, vel respondendo, vel iudicando tractant; in iisque iure primum omnium requiremus, ut sint viri boni, qui cum scientia iuris et prudentia rerum coniungant diligentiam in cognoscendo, industriam in laborando, aequitatem in decernendo, cautionem et providentiam in agendo; qui bonis artibus et, per leges obtineant causas, non, causae malae disputando ut bonae videantur, efficere tendant; qui nihil ad lucrum, aut gratiam, aut odium referant, omnia ad veritatem, iustitiam, et fidem, sintque similes Aquillio, in quo exemplar illius virtutis proposuit Cicero, (*Or. pro Caecin.* 27.) „cuius prudentiam „populus R. in cavendo non in decipiendo perspexit: qui „iuris civilis rationem nunquam ab aequitate seiunxit: qui „tot annos ingenium, laborem, fidem suam Pop. R. promptam expositamque praebuit: qui ita iustus et bonus vir „est, ut natura, non disciplina consultus esse videatur, ita „peritus, ac prudens, ut ex iure civili, non scientia solum „quaedam, verum etiam bonitas nata videatur: cuius tantum est ingenium, ita prompta fides, ut, quicquid inde „haurias, purum liquidumque te haurire sentias.“

Sed ad huius exempli similitudinem compositum nuper amissimus Iuris Consultum, oratoremque causarum forensium, in Augusto Florente Rivino, Viro pri-

mario: qui, cum esset natus ex gente ea, in qua, velut in Mucia olim Romae, hereditaria esset, a centum annis amplius, iuris, et respondendo et agendo exercendi, scientia, perfecit, ut quicquid in superioribus boni ex eo genere fuisset divisum, id unus ipse haberet universon. Atque, ne de scientia iuris multa dicamus, memoria tenemus, ante triginta annos, summos quosdam huius Civitatis Ictos audivisse nos, qui scientiae quidem iuris et elegantia et subtilitate filium haud dubie praeponerent patri. In causis porro agendis quanta dexteritas fidesque fuerit, quis nescit? cum ei constet causas maximas creditas fuisse, illustrissimasque familias eum habuisse praecipuum, cuius consiliis atque opera in omni genere rerum vterentur, in quibus scientia iuris et fide opus esset. Cum denique ad causarum agendarum consuetudinem accessisset respondendi de iure provincia, fatentur omnes, quos in Collegio Ictorum nostrorum habuit consortes laborum suorum et testes, nihil eo fuisse diligentius et in cognoscendo et in decernendo, ut qui rationes et momenta causarum omnium ita severa et exacta trutina penderet, ut sibi interdum vix satisfaceret ipse. Malebat pensandi mora satisfacere religioni suae, quam decernendi celeritate et festinatione utilitati servire: illa quippe consuli causis; hanc periculosam esse veritati, et inimicam securitati litigantium. Sed non modo personam Icti et Oratoris forensis quomodo egerit et sustinuerit, dicendum est: qualis in omni reliqua vita fuerit, exponendum videtur.

Et quomodo quidem, et e quam clara familia natus in hac urbe fuerit, nihil attinet dicere; est enim notum omnibus, et in Patris memoria ante annos non multos traditum *). Eum fuisse constat Io. Florentem Rivinum, Iuris utriusque Professore apud nos ordinarium, Canonicum Martisburgensem, et Collegii Canoniconum Wur-

*) v. Opuſc. Orator. pag. 254.

Wurcensium Decanum: a quo susceptus est die XXX. Ian. anno huius seculi septimo e Clara Elisabetha, Tilemanni Andreae Rivini, Professoris Linguae hebraeae, et Archi-Diaconi ad aedem S. Thomae, filia. Ab his parentibus primum imbutus est sensu religionis, pietatis in Deum, et honestatis acerrimo, quem deinde docendo aluere et confirmavere praeceptores pueritiae primae, lecti diligenter ad hunc finem. Sed literas omnes, per quas ingenia iuvenilia praeparantur ad capiendam sublimiorum doctrinarum scientiam, tradidit dextre et fideliter I. Balthasar Hofmannus, qui etiam nunc Scholae literarum in Vrbe Martisburgensi publicae praeest. Civitati nostrae nomen dedit mature: lectiones Academicas ICTorum audire coepit annos natus sedecim: habuitque magistros iuris, praeter Parentem et Patrum, Andr. Florentem, qui post in Academia Vitebergensi primum locum inter Professores Iuris obtinuit, quicumque scientia iuris clari essent. Curriculum huius disciplinae decucurrit annis quatuor, Magister Philosophiae interea creatus a. XXV. et eiusdem privatim docendae ius adeptus Disputatione publica, super libellum de *Interpretatione philosophica, eiusque usu in loco de societate*. Eodemque anno, Parente praeside, disceptavit publice, quae scripserat de *Iuramento Vicario*, quod ICTi in alterius animam fieri dicunt. Ea disputatione sibi primum aditum patefecit ad honores Iuris Academicos, Doctorisque ius et nomen, cuius capeffendi potestatem accepit annis duobus post, alia Diatribe disceptanda, quae de *poena gladii e legibus Romanis* explicabat. Doctor Iuris inauguratus est mox solemni ritu in aede Paullina. Ita tirocinio Iuris posito, animum adiunxit et ad docendum, et ad causas in foro agendas: mansitque diu illa vtriusque exercitationis coniunctio, ut et instructior esset a doctrina iuris in causis maioribus agendis, et studiosis, a quibus audiretur, usum doctrinae in agendo luculentius posset demonstrare, denique ut, si quando in Collegium ICTorum venisset, ha-

beret etiam a scientia iuris praesidia necessaria: nam et ita creatus erat Doctor Iuris, ut in id Collegium suo tempore reciperetur, et eius iuris obtinendi causa disceptaverat libellum de *impedimentis dotis a vidua dotalitii gratia inferendae*. Sed docendi consuetudinem post, multiplicatis negotiis forensibus, dimisit, totusque fuit fori: in quo celeriter perfecit scientia, dexteritate et fide, ut inter principes causarum Oratores numeraretur. Et ille non modo communi iure agendarum in foris causarum utebatur, sed etiam maioribus generibus, ut causarum ecclesiasticarum, et quae in Curia maiori disceptantur. Credita est ei etiam a Duce Saxoniae, qui Leucopetrae sedebat, Io. Adolpho, cura universarum causarum, quae Praefectarum Thuringicarum nomine in Curia maiori agerentur.

Nec alia honorum ornamenta defuere, quae meritis eius tribuerentur. Academia, ante hos triginta annos, ei mandavit munus Syndici Academici: sed id ille susceptum, paucis mensibus post, propter quasdam difficultates, praeter ipsius opinionem oblatas, deposuit. Anno post inter Canonicos Wurcenses cooptatus est: in quo Collegio per gradus omnes ad Decani locum ante hos octo annos pervenit, quem et pater obtinuerat, praefuitque ei Collegio magna cum fide et dignitate. Receptus est etiam in Collegium Iure Consultorum, quod in Academia nostra de iure respondet, in eoque, ad extremum, locum secundum a Praefide tenuit: quem ille quomodo ornaverit respondendi et consultandi dexteritate, diligentia, fide, diximus supra. Nec minus ei satisfecit in ceteris partibus, ut in examinandis iis, qui vel facultatem causarum agendarum in foro, vel honores iuris Academicos peterent: quorum etiam honoribus interdum prolusit erudite, et ad usus forenses accomodate.

Sed huius muneris rationes, et illa ante laudata virtus in eo administrando, cum magnam assiduitatem in
legen-

legendis actorum forensium commentariis, contentio-
nemque animi in cognoscendo ponderandoque exige-
rent, omninoque vitae vniuersae ratio, de qua post com-
memorabimus, corpus eius adfecerant, ipso diu non
animadvertente; quod animum ab se ad labores aversum
habebat, et in vita sobria, atque a curis aliis vacua, lan-
guor per multos et minutos admodum gradus venerat;
praesertim cum naturali et nullis iuvenilibus vitiis fracto
robore sustentaretur. Idque adeo sentiebant amici, qui-
bus ex intervallo longiori conspiciebatur; ipse primum
sensit, cum a doloribus capitis et vertigine infestari coe-
pisset. Vis mali maior erupit in principio anni duode-
septuagesimi, cum repente ita vis animi corporisque de-
iecta est, vt maioris mali periculum ostenderetur. Id
periculum etsi depulsum videbatur per aetiva remedia,
ab vsu aëris liberi, aquarumque Pyrmontanarum: tamen,
ineunte hieme, recurrit vehementius. Corpus macie
exarescebat, pallor in ore luridus conspiciebatur: lan-
guorem ipse per omnia corporis membra sentiebat, in-
tercurrentibus etiam motibus corpus convellentibus:
nullus cibi appetitus erat, nec sumti digestio procedebat.
Sustentabatur tamen malum vtcunque per abstinentiam
a laboribus, tranquillitatem animi, et medicamenta ad
corroborandum inventa. At repente, sequentis anni
principio, mensis Februarii die sexta decima, fatalem
plagam ei infixit apoplexia, per quam manus, pes, to-
tumque latus sinistrum vehementius convulsus est: vn-
de debilitas corpus totum tanta oppressit, vt mensis pro-
xime secuti die duodevicesima exspiraret, exactis annis
vitae duobus et sexaginta cum sesquimense.

Fuit illi finis vitae tranquillus et placidus, retinens-
que constantiae illius Christianae, ad quam totam vitam
direxerat; cum plenus ipse esset sensuum piorum et
honestorum, qui et in actionibus eius conspicerentur,
nec modis, quae proprie essent ad exercendam inter-
nam pietatem et expromendam comparatae, sed etiam
in

in his, quae ad officii publici privatique conservationem pertinerent: in quibus et ipsis bona fide, diligenter et honeste, procul habitis quaestus et vanitatis rationibus, obeundis, est pars religionis et pietatis Christianae, minus illa quidem speciosa in partem hanc, at verior plerumque et minus fallax. Et cum esset parentibus natus iis, quibus diximus, et adolevisset in domo ea, quae praecipue dedita esset religioni exercendae et colendae, nec ab illo ingenio degenerasset; tamen nemo quisquam aut verbum eius audivit unquam ad ostentandam religionis reverentiam comparatum, aut gestum conspexit.

Secundum Deum, praecipua pietas fuit, primum adversus Parentes et ab iis genitos, post etiam adversus Coniugem et liberos. Et illa quidem tanta fuit, ut esset exemplo. Nam et ita iucunda fuit ei assidua cum parentibus sororibusque in domicilio convictuque quotidiano coniunctio, ut sero demum matrimonii ineundi, et suae domus constituendae consilium, nec sine cohortatione Parentis, in mentem venerit, qui per eum maxime genus suum nomenque propagari cuperet. Nec ipse in parvo bono matrimonii ita initi numerabat, quod id Parenti, quoad vita fuerat, senserat esse, vehementer non modo probatum, sed etiam iucundum. Cuius pietatis fructum iucundissimum tulit, nactus privignam et ex Coniuge filiam, quae non alio in se animo essent, quam ipse in Parentes fuisset.

Sed eas filias accepit per Ioannam Christianam, Triptonis, mercatoris quondam primarii, filiam, feminam primariam. Ea ante fuerat in matrimonio Io. Augusti Suabii, mercatoris; unde eam, quam ante diximus, privignam attulit marito novo. Id coniugium, effecerat ipsa celeriter suis virtutibus, ut Coniugi esset, supra quam dici potest, suave et iucundum; quod ille nec, ut ceteros sensus suos, clam habebat. Nec illa suavitas diminuta est unquam, sed viriditatem ad extremum conservavit: praesertim cum eius magna accessio facta esset
per

per susceptam ex Coniuge tali filiam, cui Ludovicae Florentinae nomen fecerat. Nam ea simul ac sensum talium parentum habere ac prodere potuit, ita patrem amore, officiis, rebus omnibus coluit, ut nihil supra, aemulante eam filia privigna, Suabia, et inducente certamen inter sorores pulcerrimum, vtra magis parentem amaret, magis parenti cara et iucunda fieret. Itaque nec ipse discrimen aliud filiarum norat, quam quod natura fecisset, confuderatque amoris aequalitate ipsius discrimina naturae: quippe et in collocanda privigna in matrimonio Adolphi Christiani Wendleri, Icti et Senatoris Civitatis Lipsiensis amplissimi, ita laetabatur, ut si suam collocaret, et huius coniugii secunda et adversa non alio animo accipiebat, quam parentis naturalis. Ipse vicissim ut pater, ita maritus optimus, paterfamilias ex optima maiorum disciplina erat: cuius domus nihil vidit, quod non esset religione sanctum, gravitate honestum, bonitate liberale. Cetera vita prorsus ad tranquillitatis finem dirigebatur; non quae ignavia et socordia teneretur, sed vacuitate malarum curarum, quibus implicantur, qui cum multis habent familiaritates, rationesque vivendi, convivendi, similiumque rerum contractas. Erat a re familiari per hereditatem paternam bene instructus. Eam non admodum curabat augere, qui unam haberet filiam; sed augebatur sua sponte, per laborum praemia, et vitae universae moderationem, in qua pecuniae nec per vanam magnificentiam ostentarentur, nec per luxuriam absumerentur; quae et ipsa tranquillitatis pars est non parva. Itaque non erat obnoxius aliis; neque per vitae necessitates, aut lucrandi cupiditatem, vilius vel emendicare gratiam, aut captare artibus humilibus, vel iram metuere necesse habebat; totus sui et officii, quod nullius potentis beneficio, sed libero ipse delectu suscepisset; tutus denique ab aemulatione, invidia, aliisque malis, inimicis tranquillitati animi, a quibus parum cautum est in alio vitae genere. Laborabat pro aliis libenter, in laborando industria pariter et dili-

diligentia conspiciebantur. Ita minus ille interdum profligabat, sed magis iis, quibus laboraret, consulebat. Audivimus eum, cum suadenti, ut labanti valetudini succurreret, deponendis laboribus necessariis et urgentibus, quos in Collegio Ictorum sustineret, ei igitur cum diceret: credo consilium salubre esse corpori: at quae vita sine laboribus?

In vita communi multum facilitatis et humanitatis erat: nemini se per vanitatem antepone: suas opiniones non aliis potiores velle: sermones ad varietatem personarum ac temporum accommodare: in neutram partem nimis; nec severitate tristior, nec ad hilaritatem effusior. Et qui totus oppletus iuris subtilitate videbatur, tamen in sermonibus ostendebat, se non expertem ceterae doctrinae. Nam et iuvenis, ut supra diximus, studiose tractarat literas et philosophiam, nec earum studia prorsus dimiserat, cum se ad graviores disciplinas contulisset. Atque meminimus eum, cum iam per plures annos Doctoris gradum tenuisset, exercitationibus oratoriis, inter eiusdem similisque gradus amicos, studiose uti, interdum etiam subito et sine commentatione, super argumento, quod fors dedisset, orationes habere: neque enim in illa sodalitate de memoria modo recitabant, quae scripta essent, sed etiam ad extemporalem facultatem dicendi exercebantur: quam facultatem necesse est ali lectiunculis e vario genere doctrinae.

In tali ingenio, animo, et vita, non est mirandum, si maximum sui desiderium reliquit suis, Coniugi in primis eximiae, liberisque, et genero amplissimo, magnum Collegis, amicis, denique etiam Civitati nostrae, quae in eo ultimum Rivinorum clarorum amisit. Quo magis fas est, nos cum universa civitate memoriam Viri diligenter conservare, omninoque gentis universae Rivinae, quae rara felicitate per sesquiseculum et utilitatis et ornamentum plurimum reipublicae Lipsiensi attulit. P. P. Domin. Iubilare a. C. cldccclxxi.

MEMORIA

M E M O R I A
C A S P A R I S R I C H T E R I
S E N A T O R I S A E D I L I T I I M E R C A T O R I S
P R I M A R I I

Qui primi, relictis Scholae Pragensis dissidiis, consilium novarum sedium in hac Vrbe nostra quaerendarum inierunt, eos, memoriae proditum est, non aliud magis in eo delectu esse, quam celebratas vrbis a mercatura copias, secutos: propterea, quod per eas se hospitium, et ad multas res, et velut necessitates literarias, opportunius, et vero etiam ad liberalem studiorum cultum benignius, habituros existimarent. In quo eos vidisse plurimum, nihil ipse videat, qui sustineat dubitare. Eventus certe consilium hominum, sive a rerum modo humanarum scientia natum, sive etiam divinitus iniectum, comprobavit. Nec vero in ea re communis modo mercaturae natura valuit; etiam Lipsicae propria quaedam bonitas animadversa est.

Iam primum, cum mercatura vniversa sit communis vitae humanae ministra, non tam in necessitatibus, etsi in his quoque, suppeditandis, quam in iis, quae ad commoditatem, ad liberaliorem vitae cultum, ad copias publice privatimque profuturas valeant, vndique comportandis, vt, quod vbique, vel a naturae bonitate oblatum, vel ingenii solertia inventum, denique manu quaesitum elaboratumque sit, id domi cuiusque natum et factum videatur: per eius ministeria etiam literarum studiis suppeditari, in promptu est, vel instrumenta doctrinae comparandae atque augendae, quae vbivis reperta sint, vel

vel materiam, in qua tractanda vis ingenii, vel ad naturae cognitionem, vel ad humanae vitae utilitatem, exerceri possit. Quod si eadem artes has, quae pulcritudine exquisita operum suorum censentur, suis copiis aluit semper, acuitque ingenia ad eas solerter tractandas et perficiendas: quis dubitet, ab eius veluti liberalitate etiam ad doctrinas literarum iuvandas excitandasque aliquid posse redundare. Etenim, ut alia mittamus, copiae eius quam saepe perveniunt, vel hereditatibus legitimis, vel matrimoniiis, vel aliis viis, ad literatos homines, iisque dant facultatem hanc, ut et ipsi in maioribus instrumenti literarii copiis esse, liberaliusque tractare studia doctrinae possint, denique adiuvere ingenia aliorum, ab fortunis nudorum, in persequendis literarum studiis; qui sunt fructus divitiarum, in homine literato, haberi-que debent pulcherrimi atque iucundissimi. Omnino copiae a mercatura ortae, non, quo primum venere, ibi, velut in propria sede, haerent, latent in occulto, sed ostendere se plerumque solent, communicantque se cum multis, et commeant inter eiusdem urbis cives multis et variis viarum divortiis. Ex quo fit, ut etiam ad literas multa multis modis, et ad perspicendum, et ad enumerandum difficilibus, transeant.

Atque ut nihil aliud habeamus, quo studii literarum apud nos profuisse mercaturam dicere possimus: illa ipsa, quae commemoravimus, non parva iudicanda sint in hoc genere bona. Sed sunt et alia mercaturae Lipsicae propria, etsi fortasse minus in oculos incurrant, tamen nec parva, nec ignoranda. Nam illud quidem quantum est, quod ea semper aluit, alitque cum maxime, haud parvum numerum, per frequentiam paedagogiarum, sustentavitque multa ingenia bona, ut non modo absolvere cursum studiorum legitimum sine festinatione possent, nec necesse haberent praecipitare studia sua, sed etiam ut remanere posthac, exercerique ad vitae institutae genus, etiam honores capere, sedem fortunarum in hac ipsa urbe collocare,

care, et ubi doctrinam suam comparassent, ibidem ad usus publicos conferre. Quod etiam haec ipsa tempora auxerunt bonum, modo sumtum, in vita Academica faciendorum, ita aucto, per repentinam illam pecuniarum copiam, quae superioribus annis fuit, et inde natam adfuetudinem mollius vivendi in omnibus hominum generibus, ut pauci sint, qui sua suorumve pecunia ultra biennium ali possint, multi, qui ne ad eum quidem terminum: unde fit, ut multi vel in medio cursu consistere cogantur, nec nisi inchoatam modo atque imperfectam doctrinam deportare possint.

Atque etiam liberalis adversus literas mercatura nostra publice privatimque reperta est: publice, constitutis per testamenta donationesque beneficiis, quae prodesse paupertati, discere cupienti, in posterum; privatim, beneficiis mensuris distribuendis, per quae bonis et probatis ingeniis succurreretur. Quod genus liberalitatis ut frequentius fuerit superioribus temporibus, quibus, non dicamus maior pecuniae copia, sed minor aviditas et maior frugalitas erat; tamen ne nunc quidem abolevit, servaturque, ut familiare a maioribusque traditum institutum a nonnullis bonis et gravibus viris, reliquias quasdam veteris frugalitatis retinentibus: audivimusque aliquem, ante multos annos mortuum, cum diceret laudanti eius talem liberalitatem: aequum esse, de lucro eo, quod mercatura faceret e multitudine eorum, qui studiorum causa hic peregrinarentur, aliquid redundare eo, unde profectum esset, in eoque se genus quoddam quasi gratiae referendae positum putare.

Ex hoc genere habuimus nuper, et magno cum dolore nostro amisimus, Casparum Richterum, Senatorem Urbis aedilitium, et Mercatorem ex optima parentis optimi disciplina: qui cum aliis in rebus liberalis esset egregie, artesque alias fruendae pecuniae exerceret, etiam ad iuvenes, studia doctrinae aemulantes, qui a paupertate laborarent, de suis copiis redundare non parum

N

fuit;

sivit; habuitque semper, primum duodecim velut ordinarios, quibus binos menstruos scutatos daret; deinde praeter hos extra ordinem alios, a bonis viris sibi commendatos, quos pro modo necessitatis sibi demonstratae iuaret: eratque pecunia, quam hoc nomine quotannis erogaret, ut in tali re, utique permagna, liberalitas autem, quae, etiam si a Principe aliquo veniret, his quidem temporibus, admiranda foret. Quo magis hic talis vir ex toto etiam cognoscendus est civibus nostris, et posteritati ad sempiternam memoriam cum laude tradendus.

Natus erat in hac ipsa Vrbe, patre Christiano, mercatore primario, eodemque Collegii mercatorum magistro, et cohortis urbanae succenturione, matre Ioanna Regina, ex Auërbachiorum, clara mercaturis faciendis gente, matrona spectatae sanctitatis; quam annos natus tredecim amisit. Natalem habuerat diem a. d. XVI. Septembris, anno huius seculi octavo. Erat Patri in primis cara proles, quod per eam primum pater factus esset: nam alios tres habuit filios, quorum vnum, natu minimum, mercatorem in vrbe Gerana primum, superstitem noster reliquit. Itaque hoc magis curavit pater, ut optime a primis annis educaretur filius, nulli curae in ea re parcens sumtibusque nullis. Nam a praeceptoribus domesticis imbutum religionis et literarum initiis, misit Geram, in disciplinamque Gymnasii literarii publicam; qua utebatur cum fratre altero ita, ut et domesticum magistrum haberet, essetque primum in domo et convictu primarii in ea vrbe antistitis sacrorum, D. Cade-manni, hoc deinde mortuo, D. Gerstenbergii, Icti clari. Volebat enim filium ille quidem vitae genus suum sequi, quo et ipse sua sponte ferebatur; sed non rudem a literis, itemque ad morum integritatem et vitae humanitatem bene conformatum. Neque enim mercatorem e vulgari formula fieri, sed sibi quam simillimum, cupiebat, qui et ipse ad eam discendam literis non leviter instructus venisset.

Mer-

Mercaturae artes eum non apud se discere voluit, siue indulgentiae paternae adversus tam carum filium non satis fidens, quae interdum etiam severis rectique exempli, qualis ipse erat, parentibus fraudi est, siue alia quae de causa, ab ingenio artis oblata: misitque Dresdam, ad peritum artis et spectatum fide mercatorem, Balthasarem. Apud quem cum tantum profecisset, quantum in eo genere mercaturae, quod in tali vrbe exerceretur, sperari posset, annos natum iam viginti, ire iussit Amstelodamum ad Liffium et Feilerum, quibuscum multas ipse res rationesque habebat contractas, ut maiorem disceret mercaturam, quae ab iis ample et copiose fiebat, mercibus pariter pecuniisque tractandis. Ibi cum tres annos fuisset, diutiusque manere haberet in animo, de consilio et voluntate Patris; casus tristis et repentinus consilii rationes turbavit. Nam a primo et tricesimo, Pater, cum tempore verno Amstelodamum venisset, negotiorum suorum causa, et vero etiam filii visendi, dum redit inde domum, in via, prope Osnabrugam, opprimitur coli intestini dolore tanto, ut ei moriendum esset. Quo nuncio ad filium Amstelodamum perlato, proficiscitur sine mora, ut Patri funus faciat, ducitque Osnabrugae in Basilicam Marianam; ubi tristes exuviae post altare maius repositae sunt. Ibi tum rationes hereditatis cernendae, ordinandarumque rerum domesticarum, coeungere, Amstelodamo relicta, Lipsiam repetere, vocantibus etiam fratribus, qui sine fratre maximo non sustinebant res communes attingere.

Sed rebus omnibus cum fratribus fraterna concordia compositis, etsi res videbatur suadere, ut in locum Patris succederet, communiterque cum socio paterno, Neuhausio, negotia societatis administraret: tamen maluit, cum adhuc id aetatis esset, cui nimis grave onus tantae procurationis videretur, absolvere, quae ante mortem paternam instituisset. Itaque primum Amstelodamum repetiit: post, peractis, quae ibi inchoata reliquerat, in

Angliam Londinum abiit, aliasque vrbes nobiles, quibus adeundis cognosceret, non modo quae sibi posthaec in mercatura facienda profutura viderentur, sed etiam alia, quae ad ingenii vitaeque cultum pertinerent. Cui consilio cum satisfecisse se putaret, reversus in patriam assumitur ab eo, quem ante commemoravimus, Neuhusio in societatem rei gerendae, nec ita multo post, (erat annus sextus et tricesimus) etiam in generi locum, collocata ei filia secunda, Christiana Sophia. Id matrimonium, cum ceteris partibus laetum ei et felix esset, in prole triste ac lugubre habuit; cuius nihil vitale fuit. Nam prima non multum ultra annum vixit, reliqua omnis, nondum partu edita, in vtero matris interiit. Hic prope annuus dolor, cumlatus etiam maiori luctu, anno quinto et quadragesimo, per mortem ipsius infelicis matris e phthisi, mixtus fuit dolore ex obitu Christiani Gottlieb Neuhusii, quocum per necessitudinem affinitatis, et societatis in mercatura exercenda, iunctus fuerat. Nam is paucis ante vxoris obitum diebus decesserat. Sed illa iactura gravior, duobus annis post, feliciter reparata est, ducta in matrimonium Neuhusii illius, affinis, vidua, Christiana Regina, e gente Hezeria, matrona eximia ingenii et corporis morumque forma. Itaque id coniugium iucundissimum ad extremum habuit, nec ad felicitatis absolutionem aliquid ei defuit praeter liberos. Nam qui ei nati sunt, vel paullo post partum obiere, vt Casparus, et Christianus, et Ioanna Christiana, vel in prima aetate, vt quae prima nata erat Caspara Christiana: ea non ultra quindum annum vixit.

Hic tam assidue recurrens dolor, quantopere affligerit animum viri, ad nullum humanitatis sensum duri, haud difficile est existimare. Sed lenimenta efficacia habebat ab Coniugis suavitate, et ipsa doloris societate, per quae sensus cuiusque acerbitas minueretur paulatim atque extingueretur. Nec vero hoc vnum genus mali expertus est; etiam alia eum exercuere: in his morbi graviores;

viores; qualis eum primum Amstelodami invasit, tanto cum vitae periculo, ut pro deposito haberetur. In utroque bello superiore, quo haec Civitas afflicta est, quam multa passus est, non modo communiter cum omnibus, sed etiam proprie cum paucis, in societatem et exactio-num, pro parte virili, et malorum, quorum tormenta ad exprimendas pecunias adhiberentur, veniendo, nihil detrectans aut defugiens, ad quod vel faciendum, vel erogandum, vel patiendum vocaretur. Quamquam ille minus in his, quam plerique alii, cruciabatur, cum esset et exercitatio in dolore, et in impensis publice faciendis remissior. Et compensatae sunt eae molestiae rebus iucundis quam plurimis, vel a re privata, vel a re publica. Domi negotiatio maior celeriter et copiosior facta: foris honores, quicumque in eam conditionem vitae caderent, confluxere: signifer factus cohortis urbanae, succenturio, in ordine amplissimo Senator, Centurio urbicus, Aedilis: et haec non magnis intervallis. Mandata est etiam Curatio ergafulorum publicorum, et hospitii orphanis alendis: eaque ita bene collocata putabatur, ut apud eum ad finem usque manserit. Qui ei venit tali modo.

Cum ad annum vsque sexagesimum aetatis ita valuisset, ut alacritatis plurimum appareret, nihil languoris suspecti, aut, e morbis gravioribus quae solent esse, reliquiarum: repente animadversus est in eo quidam languor, qui etiam inter negotia, et inter amicorum coetus, ei offunderetur. Res suspecta visa est. Itaque medicamenta adhiberi coepta, quae illas somnolentiae veluti nebulas discuterent. Nec ea sine effectu periere: visusque est solitus vigor inesse ad initia vsque aestatis anni superioris. Tum destillatione gravi laborare coepit, per quam pituitae plurimum e pectore, et ceteris partibus, quibus illud vitii colligitur, expelleretur. Eum quoque morbum remedia depulere, adiuvante diaeta severa. Sed anno vitae ultimo, pridie Kal. Augusti, dum res agit in Curia, subito tentatur apoplexia: ex qua illo quidem die

recreatus est, auxilio remediorum idoneorum; sed ad breve tempus. Nox inquieta: dies posterus nova accessione infestus: inde debilitas tanta, ut et ipse rem suspectam haberet, et medici amique spem vitae servandae dimitterent. Itaque ad animum aegroti corroborandum curae conversae sunt, in partes vocato D. Mathesio, Viro Rev. inter easque curas et cogitationes pias animi, nihil refugientis mortem, meliori vitae etiam spe et voto occurrentis, leniter expiravit, die VII. Aug. expletis annis vno et sexaginta, cum decem mensibus et viginti diebus.

Erat in eo plurimum solertiae: animus imbutus sensu pietatis et virtutis: integritas, fides dictis factisque constabant. In rebus privatis laborabat perite et diligenter; in publicis dextre fideliterque.

Sed in primis liberalitas conspiciebatur, nec modo privatim erga suos et amicos, et alios, opis alienae egentis, de quo supra diximus, sed etiam publice. In curatione quidem, quam ei proprie creditam fuisse commemoravimus, satis constat, plurimum de suo erogasse.

Omnino officii plenus erat: facilis et comis adversus omnes: inter amicos facetus et hilaris, sed intra modum. Itaque consuetudo et amicitia eius a multis expetebatur.

In vita et cultu decus et dignitatem sequebatur: nullae sordes, nulla profusio apparebat. Si quo in genere largior erat, ut forte in aedificando, ea quoque largitas ad alienos, ad tenuiorum hominum, artificum necessitates, et amicorum oblationes referebatur.

Corporis statura erat iusta, habitus inter tenuitatem et obesitatem medius: in ore dignitas, e gravitate et comitate temperata: in sermone et motu omni grata et constans moderatio.

Quarum

Quarum rerum virtutumque omnium commendatio non profecto debet cum morte Viri praeclari extingui, sed etiam in mortui memoria apud nos, apud Vos imprimis, Cives Carissimi, vel ob eam, quam supra demonstravimus, liberalitatem singularem, manere, cum laude et praedicatione perpetua, atque etiam, quantum potest, cum posteritate communicari, tum grati animi testificandi causa, adversus tantam liberalitatem, tum ut alii ad eius imitationem alliciantur. P. P. Domin. XXII. p. Trin. a. c. cIdccclxxi.

ELOGIUM *)

CAROLI CHRISTIANI DEYLINGII

CHRISTIANI ERDMANNI FIL.

SALOMONIS NEP.

In morte virorum, egregie, de religione, literis, et alia qua parte reipublicae, vel merentium, vel meritum, solet esse in ore hominum commemoratio et conquestio iacturae, quam respublica in iis fecerit. Neque profecto aut iniusta est ea querimonia, aut parva est iactura talis existimanda; quae et ad rerum humanarum maximas pertinet, et omni alia iactura latius patet, denique in paucitate perpetua, excellentium in omni tali genere virorum, omnium difficillime reparatur. Nam quod in iactura veri et egregii amici plurimum habet acerbitatis, propter quod, talis iactura, maxime lugetur a singulis, id plane, in illorum virorum, qui proprie reipublicae amici et sunt et habentur, amissionem potest conferri. Citius, exercitus, classes, pecuniae, similesque opes reipublicae, reparantur, amissae, quam virtus et sapientia virorum excellentium, per mortem erepta.

Enimvero, cum adolescentes, et excellenti ingenio a natura praediti, et vero etiam ingenio ad eximiam doctrinam et virtutem conformando studiose et constanter dediti, extinguuntur, non minor est in eo iactura reipublicae, ac prope maior, quam cum tales, quales ante diximus,

*) Hoc Elogium scriptum est nomine Excell. Borzii, illo tempore Rectoris Academiae Magnifici. Itaque omnino non Io. Aug. Ernesti, qui scripsit, sed potius Borzius loqui censendus est.

mus, viri, de vita decedunt. Nam, et segetis herbescentis spem non superat flavescentis maturitas, nisi propinquitate fructus percipiendi, et vtriusque interitus pari momento ponderatur. In iis autem, qui matura iam aetate, iam aliquandiu, aut longa annorum serie meriti, eripiuntur reipublicae, suus tamen constat fructus, aut reliquiae tantum fructus sperati pereunt; at, in adulescente ad maturitatem excellentis ingenii iuvene, tota multorum annorum spes intercepta lugetur: et lugetur etiam, propter ipsam aetatis teneritudinem, dolentius: sicut et in hortis magis indignamur in arboris ad fructus edendos se adhuc corroborantis interitu, quam annosae fecunditatis ruina.

Sed talem, tam tristem iacturam fecit civitas nuper in morte Caroli Christiani Deylingii, iuvenis, de quo, genus, ingenii, animi, et vitae institutae forma, omnia praeclara, nihil mediocre iubeant sperare. Nam, ut mittamus generis felicitatem, de qua post commemorabitur, ingenium erat plane ex eo genere, quod, verissima Socratis aestimatione, felix haberetur, hoc est, quod et celeriter perciperet, quae traderentur, percepta autem facile retineret, denique esset omnium eorum discendorum appetens, quorum cognitionem utilem privatim, fructuosam publice, haberi, a bonis auctoribus didicisset. Animi autem impetus erant in omni honestatis genere persequendo acres, in vniversa vitae morumque ratione placidi. In studiis doctrinae et officii cura, severitas et constantia, in aequalium consuetudine, hilaritas, ad decus iuvenilis modestiae temperata, reperiebatur: non minor facilitatis et obsequii adversus omnes commendatio; denique magna et religionis reverentia, et in parentes pietas dictis factisque constabat.

Ab hac indole, et ab his moribus, quod non sperare, quamvis severus pater, quamvis severi magistri potuere? quid non sperasse putemus, quicumque ipsum, vel usu suo, vel eorum, qui tractassent ingenium eius,

iudicio cognovissent. Sed ut in iis bonis multum natura ipsa valuerit; plurimum tamen naturam adiuvit disciplinae, qua usus est, bonitas. Et erit maior fides laudibus nostris, si quomodo natus, educatus institutusque fuerit, et cetera his coniuncta commemoraverimus.

Natus igitur est in hac vrbe nostra, anno labentis seculi quinto et quinquagesimo, Patre Christiano Erdmanno, Salomonis Deylingii, Theologi nuper apud nos primarii filio, I. V. D. Curiae supremæ in hac vrbe Assessore, et Senatore Praetorio, matre Io. Friderica, Christophori Beyer, mercatoris apud nos quondam primarii, filia. Omen vitae felicitis habuit hoc primum, quod eius nati nuncius, ayum, aetate, morboque, ita confectum, ut lecto decumberet, sine spe resurgendi, tanto gaudio affecit, ut, velut novis repente viribus infusus, ad nepotem novum visendum festinaret, in cunisque vagientem omnibus optimis ac precibus sanctissimis pro salute eius et felicitate prosequeretur. Idque illi ultimum gaudiorum humanorum fuit. Nam decimo die post ab hac vita discessit. Ita parentibus gaudio e nova prole obscurato, vicissim laetitiae illius intercurfantis sensus, dolorem parentis talis amissi, mitigavit. Sed ut primum pueri mens coepit dispicere, et e primæ infantiae veluti caligine lucem rationis et intelligentiae sentire, ratio habita est a parentibus, ut curæ corpusculi tuendi adiungeretur non minor animi ad intelligendum ac discendum excitandi, et sensibus honestis et sanctis imbuendi. Quam curam acuit etiam postea mors fratris Friderici Christiani, in primo ætatis flore (quintum enim annum agebat) tristissimo fato erepti: cum nihil quicquam prætermittendum putaretur, quod ad hoc vnum nominis ac generis Deylingiani subsidium et conservandum, et ita conformandum ingenio atque animo pertineret, ut familiae ac nominis dignitatem acceptam, et ipse retinere, et posteris a se auctam posset relinquere.

Initium

Initium curae illius a religione; vt fas erat, factum, assumpto magistro, qui eius scientiam puero, et ad intelligendum et ad sentiendum accommodare, traderet: quod est in ista aetatis imbecillitate haud paullo difficilius, quam in adultorum firmitate. Addita mox est literarum disciplina pro aetatis modo: quarum initiis perceptis, traditus est puer M. Christiano Lebrecht Rudolpho, viro egregie docto, qui nunc sacra facit Ileburgi: a quo literarum earum scientia imbueretur, quibus aetas illa prima ad humanitatem eruditur, quem et Pater nostri, ipse literarum bonarum omnium et amantissimus, et calientissimus, consiliis in ea re adiuvit. Placuit sequi, in latinis quidem literis, rationem eam, quam Tan. Faber aptam ei aetati iudicavit, vt, initio a Phaedri fabulis factis, ad Pomponium Melam et Eutropium transitus fieret, Corneliumque deinde Nepotem: quod illius suavitate facile capitur puerilis animus, horum autem cognitio et simplicitatis naturalis sensu imbuunt ingenium, et praeparat ad ceterorum scriptorum intelligentiam. In Graecis initium factum est a Ioannis Evangelio, aliisque facilioribus N. T. partibus. Huic magistro successit Ferdinandus Fridericus Graefenhain A. M. iamque ad D. Thomae Concionator Sabbathicus, vir elegantiorum literarum omnium egregia scientia praeditus. Is eum iam ad maiora adducere instituit, et cum ceterarum, tum vero etiam graecarum literarum amore incendit, sicut et eum propter ingenii animique bonitatem amabat maxime, pariterque ab eo amabatur. Itaque eo duce noster Cebetem, Xenophontem, Aeschinem Philosophum, Theophrasti Characteres, Isocratem, etiam Aristophanis aliquas comoedias legit, et Ciceronem cognoscere coepit. Tum vero ad Academiam, in primisque Ernesti senioris disciplinam est adductus, qui eum propter ea, quae ante commemoravimus bona, et vero etiam Parentis Avique causa, amabat maxime, et per omnes occasiones ad studium doctrinae virtutisque incendebat. Audivit ergo eum

eum studiosissime, interpretantem Ciceronis Verrinas, et historiam vniversam, antiquitates Romanas, et eam, quam Archaeologiam literariam appellat explicantem; nec minus alterum iuniorem Ernestum, Orationes Livi-
anas et Plinii Panegyricum, denique Ciceronis officia in-
terpretantem. Inter haec et ad Philosophiam aditus ei
de consilio Parentis patefactus est, mathematicis discipli-
nis cognoscendis: in quibus primum ad Arithmeticae et
Geometriae elementa percipienda magistrum privatim
habuit Funccium nostrum, deinde inter alios sodales,
Zwanzigerum, Viros Clarissimos: a quibus bene praepa-
ratus nos audivit, cum Wolfii Initia mathematica expli-
cabamus. Post illam igitur talem praeparationem, supe-
riori anno ad Philosophiam adiunxit animum, coepitque
audire Garvium V. Cl. tanto studio, vt in hoc quoque
genere doctrinae egregie proficeret. Sed haec agentem,
atque iam de aliis doctrinae generibus cognoscendis cogi-
tantem, oppressit morbus fatalis, per quem istis omnibus
et tantae Parentis magistrorumque spei finis factus est.

Erat iuveni corpus iustae proceritatis; color oris, in
cetera dignitate, qualis optime valentium esse solet:
vigoris et alacritatis in omnibus actionibus sane multum.
Et ita bene valuerat ab initio inde vitae, vt nunquam e
morbo decubuerit. Quo maior parentibus erat spes
longioris vitae; nec timebatur eius valetudini a morbis,
quibus aetas illa solet infestari. Vnus variolarum mor-
bus suspectus erat, cum superiori anno grassari coepisset
infectior. Itaque, quaecunque ad eius morbi vim vel
avertendam, vel, si incideret, leniendam, putantur vale-
re, ea curiose provisae sunt omnia, cum ipse etiam, in
cibo, potu, ceteroque vitae modo caveret sibi ab omni-
bus, quae vel morbo ipsi faciliorem aditum facere audis-
set, vel impetum venientis incitare. Sed ista omnia ef-
fectu caruere: invasitque eum fatalis morbus; ex quo
cum die Septembris primo et vicesimo decumbere coe-
pisset, non surrexit.

Ac

Ac principia quidem mitia erant, nec vltima timebantur. Nam et valetudinis pristinae bonitas spem faciebat, et pustulae leniter effloruerant. Aderat etiam a primo initio Hebenstreitius, Chirurgicarum artium exquisita scientia et vsu singulari, qui et observaret omnes morbi motus, et faceret omnia, per quae vis eius frangeretur. Adiunctus est ei etiam tertia die, frater, non minor rerum medicarum scientia et vsu, qui omnibus et consiliis et remediis occurrere tentabat morbo, et sustentabat aegrotantis imbecillitatem. At cum pustularum et puris maturitas maxime expectabatur; ecce naturae vis subito remittere visa: pustulae resedere, nec vlla remediorum vi attolli potuere. Inde cum ad pectus materia maligna defluisset, ita arctatus, ad extremum etiam oppressus est spiritus, vt die nono, qui fuit vltimus Septembris, ipse occumberet, vitae annis, septendecim, mensibusque duobus expletis.

Vitae finem fecit ita iuuenis optimus, vt appareret, nec imparatum a morte opprimi, nec invitum ac recusantem a vita abripi. Nam cum morbus in cursu esset, nec dum vltimum periculum ostentaretur, tamen ita se gessit, iis precibus assidue vsus est, vt intelligeretur, ei mortem ante oculos esse. Et cum in propinquo mors esset, praeunte preces, Patre, atque Praeceptore, se, animamque suam, Deo patri, et Servatori Iesu Christo, constanter permisit. Hunc animi habitum sustentavit et firmavit alloquiis et precibus D. Eichlerus, quo et praesente mentis vis sopita est, paulloque post, in cari praeceptoris amplexibus placide discipulus optimus exspiravit.

Nemo, scimus, fuit, qui non et illius morte, quae tantam spem extinxisset, et Parentum tanto dolore, quantus esse debuit in filii vnus, praesertim talis, iactura, ipse doluerit. Restat, vt tam praeclari ingenii animique memoriam omnes conservemus, in primisque Vos, Comilitones Carissimi, in huius vestri nuper Comilitonis exemplum intuentes, virtutes eius tam multas, tam pulcras imitemini, perficiatisque, vt nihil vobis accidere queat, cui non bene praeparatum pectus opponere possitis.

ME-

M E M O R I A
G O T T F R I D I W I N C L E R I
S E N A T O R I S A E D I L I T I I M E R C A T O R I S
P R I M A R I I

Cum omnes res humanae habeant aliquid ambiguitatis, nec vlla sit ad vtilitates humanas ita fructuosa, vt nihil ab eadem mali esse timerique possit: non est mirandum, si et mercatura, tum ad vniversas societatis partes, tum, vt alias a nobis est demonstratum, ad literas, doctrinarumque et artium studia plurimum commodi habens, in iisdem illa interdum vehementer noxia et putetur et reperiatur. Nec vero ea res magis in ipsa, quam in ceteris, ad invidiam aut contemptum trahi debet; sed ad cavendi diligentiam et in quaerendis bonis eius vsurpandisque moderationem converti. Omnino enim hoc, ab vltimis inde temporibus repetendo, reperimus, per magnas et inusitatas pecuniarum copias, sive a bellorum feliciter gestorum victoriis, sive a mercaturae amplitudine et vbertate fluxissent, civitates florentissimas non longo tempore perdidisse. Quod adeo non obscurum aut dubium olim viris sapientiae et prudentiae recte consultis fuit, vt essent, qui longe alieni a nova, hac sapientia, quae in copiis pecuniarum vndique affluentium felicitatem publicam maxime ponit, iactari solita maxime ab his, qui cum ingenii studiorumque naufragium fecerunt, hanc eius naufragii veluti tabulam arripiunt, per quam in portum fortunae aulicae invehantur: qui igitur illas copias, vt pestem publicam, abominarentur, et, cum eae extitissent, vltima mala timerent, quae etiam vt vel depello-

pellerentur, vel, quoad fieri posset, minuerentur, omni ratione, legum, institutorum, omninoque disciplinae cuiusdam severitate laborarunt.

Etenim nihil est aliud, quod tantam materiam habeat, vel alendarum irritandarumque omnium cupiditatum earum, quae corpori animoque noxiae in primis sunt, quae privatim publiceque maxime exitiales, vel etiam cum acri quodam suavitatis sensu explendarum. In iis, velut in vberissimo et pinguiissimo solo, facillime ac celerrime adolescit, et cum lascivia quadam convalescit vanitas in toto vitae cultu, aviditas et luxuria in exquirendis assidueque hauriendis voluptatibus, fastus et arrogantia, circumspiciens copias suas, despiciensque sordes et inopiam aliorum, et ad suae insolentiae ministeria cogens. Quae superbia etiam attollitur admiratione et gratia aliorum, istarum copiarum splendore captorum, inprimisque potentium; cum fit, ut hoc utamur, id, de quo queritur apud Ludovicum Regem Agobardus, Episcopus Lugdunensis (*de insolentia Iudaeorum*), cum apud aulicos plus dicit Iudaeos, in quorum fere tum manibus erat mercatura Francica cum pecuniarum copiis, valere, quam Episcopos, ceterosque doctores, et vero etiam religionis christianae commoda, literarumque bonarum. Atque etiam illa mala, veluti contagione quadam trans-eunt ad omnes, cupientes in societatem vitae illius, ut putant, beatae venire; unde malae artes pecuniae quaerendae oriuntur, quam imitatione vitiorum illorum perdant: omninoque paulatim vitae genus univsum fit sumtuosius, quam res plerorumque ferat; quod omnibus mox oneri esse incipit, etiam his, qui animo sunt a vanitate illa et voluptatis amore alieni; praesertim cum copiae pecuniariae univrsae, ut saepe fit, causis repentinis minuuntur, destituuntque animos iis aduetos: quibus malis nos premi cum maxime, quis non videt? quotusquisque non queritur?

Enim-

Enimvero etiamsi ingenii humani vitio fit, vt perdifficile sit, illa mala cavere: tamen intelligi quaedam disciplina publica et privata potest, per quam vel avertatur illa perniciēs, vel comprimatur, efficiaturque, vt in mercaturae quamvis magnae et feliciſ copiiſ, tamen frugalitas vitae ſalva ſit, eiſque fructuſ publice privatimque ſalubreſ fiant, ſalva etiam virtuſ reliqua, cui adeo pro inſtrumento ſint: cum ita perſuaſum eſt hominibuſ, vt fructum et laborum ſuorum, et copiarum inde ortarum maximum et pulcerrimum putent eſſe in benignitate, per quam et ad ſalutem vtilitatemque patriae vniverſae, et ad neceſſitateſ ſingulorum, conferantur. Sed vt mittamus nunc diſciplinam publicam, in privata quidem nihil efficaciuſ eſt exempliſ domeſticis; cum ii, qui in talibuſ copiiſ nati ſunt, niſiil neque a parentibuſ audiunt, quod admirationem divitiarum habeat, neque in eorum vita cultuque vniverſo vident, quod a frugalitate abhorreat, nec ſit ad modeſtiae et honeſtae ſine ſordibuſ parſimoniae rationeſ compoſitum ac temperatum: quam vim ea exempla habent etiam in hiſ, qui ad mercaturae bene et feliciter faciendae arteſ erudiuntur, earumque exercendarum adiutores et miniſtri ſunt adſciti.

Atque huiuſ talis diſciplinae veluti per manuſ a maioribuſ acceptae, et ad poſteroſ propagatae, cum alia exempla ſemper multa, ſuperioribuſ in primis temporibuſ, habuit civitaſ noſtra, tum nulla familia plura et luculentiora, quam Wincleria: in qua et mercaturae exercendae felicitate, et in illa felicitate frugalitate liberaliſ, praecipuum ac veluti proprium domicilium habuit. Quiſ vidit illum huiuſ, de quo nunc dicendum eſt nobiſ, Gottfridi Wincleri, patrem Danieleſ, quin meminereſ idem, in eo civitatem noſtram vniverſam luculentum huiuſ talis diſciplinae exemplum habuiſſe: in hoc Gottfrido autem quiſ ſuſtineat negare, noſ eiſ exemplum praecipuum amiſſiſſe?

Natus

Natus erat educatusque in re lauta: magnae divitiae ei a patre relictæ, quæ et honestissimis artibus, hoc est, rei gerendæ peritia et diligentia augebantur. At nulla in eo divitiarum ostentatio, nulla, nec in cultu, nec in tota cetera vitæ ratione, magnificentia, nullum vestigium luxus cernebatur: omnia sine sordibus frugalia, omnia sine profusione elegantia reperiiebantur. Atque ad huius exempli formam etiam filium nobis reliquit, in acerrimo pulcri sensu et magno artium pulcrarum amore, nihil ab avitæ patriæque moderationis regula discedentem, sed omnia studia intra eius fines continentem.

Huius talis, tam digni communi imitatione exempli vir, natus est vertente seculo superiore, a. clcIccc. d. XVII. Maii, patre, quo diximus Daniele, Mercatore primario, et Senatore ad extremum aedilitio, viro in omni vitæ ratione exempli probatissimi; matre autem Ioanna Rosina, Andreae Guldii, mercatoris item primarii filia. Cum destinaret filium pater ei vitæ generi, quò ipse vteretur, omnia fecit diligentissime, ut id bene ingenio animoque præparatus posset capessere, in eoque ad exemplum suum honeste, recte, fructuoseque versari. Ad eam rem cum primam et maximam vim sciret esse in animo, imbuto acri pietatis adversus Deum sensu, et honestatis virtutisque Christianæ vero amore et studio: curavit ante omnia, ut per idoneos magistros ad religionis officiorumque cognitionem adduceretur, cum interea magistri institutionem ipse exempli sui in omnibus dictis et factis velut altera disciplina subsequeretur, eique plurimum et commendationis et auctoritatis apud filii animum adderet. Et erat filio natura ingenium placidum, molle, et ad omne obsequii honesti genus factum. In scientia vero mercaturæ faciendæ, etsi ipse inter principes numerabatur, nec parcebat curæ in filio ad eam adducendo: tamen eum aliena etiam disciplina uti voluit, misitque annos natum duodeviginti Hamburgum ad amicum suum, Wehnerum, qui ibi magnam et felici-

cem mercaturam factitabat: apud quem cum per tres annos didicisset ita, ut magistro illius negotiationis plane satisfaceret, revocatus est domum, ut iam sub oculis parentis, quid profecisset, posset re gerenda expromere. Hic cum quinque annorum usus accessisset: tum demum pater ad exteros mittendum putavit, ut clarissima in Britannia, et Batavis, et Germania emporia videret, et cum nobilissimis quoque in loco negotiatoribus amicitias ineundi copiam haberet, etiam, si res ita ferret, res rationesque contraheret. Ex hoc itinere reduci non ita multo post pater, iam aetate gravis et confectus, etiam luctu crebro e iactura liberorum, totam negotiationem, quae ei cum fratre Hartmanno, etiam aedilitio Senatore, communis fuerat, permisit: nam et filios omnes (fuerunt autem praeter Gottfridum quinque) amiserat, itemque A. 1725. coniugem. Nondum annum parentis vicem sustinuerat, cum excessit e vivis pater (A. 1730.) qui ultimum e suis gaudium habuit hoc, quod anno ante mortem altero filium maritum factum vidit Ioannae Sophiae Wincleriae, filiae Hartmanni, quae, post tot annorum matrimonium, tamen mortem coniugis optimi, ut in recenti coniugio, luget.

Ex hoc matrimonio nati sunt ei filii duo, alter Gottfridus A. 1731. d. 16. Febr. alter Daniel A. 1734. a. d. III. Kal. Nov. Et hic quidem vitalis non fuit, tertio anno post functus fato: at illum alterum Gottfridum indulsit ei benignitas divina, et in eo magnam gaudiorum materiem, senectutis etiam levamentum reliquit. Nam et ipsum habuit a prima inde aetate plenum pietatis adversus se obsequiique, adultum deinde ad virilem usque aetatem omnium bonarum rerum studiosissimum, artiumque mercaturae recte exercendae imitorem, diligentissimum, ut ei etiam ante plures iam annos suas in negotiationis societate partes delegare posset: et vidit eum in matrimonio, coniugis Ioannae Henricae, D. I. Valentini Schmi-

Schmidii filiae, virtutibus et foecunditate, (nam quatuor ex ea nepotes habuit) beatissimo.

Sed ipse in se habebat largam tranquillae laetitiae materiam. Erat enim ingenio a natura facili atque leni, quod nulla re, neque secunda, neque adversa, vehementius moveretur; idque naturae bonum pietate adversus Deum, et virtutum omnium studio, usu denique multo, firmaverat. Vultus semper idem erat, idem vocis sonus: tranquillitasque animi omnibus in oculos incurrebat: tum idem tenor vitae; in qua essent omnia ad certam rationem, ad moderationis et gravitatis legem, temperata. Itaque omnibus videbatur, ut erat, amabilis, eiusque consuetudo ab optimo quoque expetebatur: unde multas ille amicitias optimorum virorum habuit, quas omni genere officiorum colebat. Nam omnino erat ad benefaciendum, ad gratificandum, ad iuvandos, quos posset, consilio, re, factis, promptus semper atque paratus, fructumque copiarum suarum iucundissimum, uti est omnium sapientium iudicio, ita putabat, posse per eas prodesse quam plurimis. Nam ab avaritia quidem; non modo ea, quae malis artibus pecunias quaerit, sed etiam, quae a partarum usu et dominum et alios ardet, alienissimus erat; tam procul etiam remotus a sordibus, quantum a magnificentiae profusione.

His tantis virtutibus commendatus, ante triginta amplius annos cooptatus est in ordinem Civitatis nostrae amplissimum: in quo ita probata est eius industria, diligentia, fides, etiam constantia bello superiori in vexationibus hostilibus pro republica sustinendis, ut ante hos decem annos ad Aedilitatem produceretur, duobusque annis post Curator Aedis Petrinae crearetur.

Corpus erat non admodum validum: sed quod ei robur natura negaverat, id ei tum animi perpetua tranquillitas, tum temperantia singularis in rebus suavis usurpandis praestabat. Itaque raro a morbis, neque iis vehementibus ac periculosis, tentatus est, beneque, et

quantum ad res publice privatimque gerendas, satis esset, valebat. Ad extremum, nec longe a morte, ventriculi gravior imbecillitas eum invasit, accedente etiam dorsi acuto dolore: sed is paucis ante mortem diebus ita remisit, ut a. d. III. Kal. Sept. anni 1771. annos vnum et septuaginta natus, sine ullo doloris sensu obdormisceret. Nec ab hac modo parte placidus vitae exitus fuit, sed etiam ab omni alia. Nam mortem, cum ante oculos esse coepisset, ita prospexit, ut nullum, neque in ore, neque in sermone, timoris vestigium appareret. Pristina illa, quam per totam vitam tenuerat, tranquillitas, etiam in morte constabat. Nam radicibus conscientiae rectae, et spei Christianae, alte haerebat: quae sola nullis timoris ac terroris velut ventis labefactari aut convelli potest.

Hunc talem vitae exitum quis non optet sibi contingere? Sed continget imitatione vitae a viro beato in his terris actae. Itaque, cum grati erga Virum, tam bene de Civitate nostra meritum, animi causa, memoriam eius retineri a nobis aequum sit, tum vero etiam nostra causa in oculis ita semper habere debemus eius exemplum, ut eodem illo vitae cursu inter omnia secunda et adversa tenendo, portum illum tranquillitatis perpetuae laeti contingamus. P. P. Domin. Rogate A. C. c1771ccccLxxiii.

M E M O R I A

I O. T H O M A E R I C H T E R I

PR. ELECT. SAX. A CONSILIIS FISCO
MERCATORIS PRIMARI

Liberalium ingeniorum semper haec vis et ratio fuit, ut se non contineri sinerent earum finibus rerum et actionum, quae ad vitae suae genus proprie pertinerent, sed latius vagarentur, et complecti tentarent multa alia, quae ad cognitionem vtilia et iucunda viderentur, praesertim si haberent aliquam coniunctionem cum iis, in quibus vitae suae veluti domicilium collocassent. Nam in ingeniis illis est fere insatiabilis scientiae cupido, quae nullis se certarum regionum finibus includi finit, sed semper novas et incognitas regiones persequitur, semper aliquid invisitati circumspicit, quod velut alimenti novi vim et suavitatem adferat. Nec id in iis modo deprehenditur, quorum vita in studiis doctrinae alicuius versatur: quos etiam coniunctio eius cum aliis generibus scientiae ad eam rem invitat, quae interdum est tam magna et tam multiplex, ut nihil perfecti esse in illa possit, nisi horum cognitione adiuncta, sed etiam, atque adeo magis, in iis vitae generibus atque artibus, quae in rebus corporeis versantur, manibusque tractantur, praesertim cum eae vel natura rerum, quibus occupantur, vel aliis fortuitis rebus temporum atque locorum alligant atque invitent ad cognitionis et scientiae studium. Ut alia genera mittam; mercaturam, satis constat, multos olim sui studiosos, etiam per necessitatem quandam, ad astrorum motuumque coelestium cognoscendorum

studium adduxisse, ad naturamque earum rerum accuratius cognoscendam, quibus emendis vendendisque pecunias quaererent, aut quas, mercaturae causa peregrinantes, vidissent audivissentve. Athenis quidem plures ex eo genere fuerunt, qui philosophiae cognoscendae operam darent: quorum etiam in tabernis considerent interdum philosophi, ut de Socrate memoriae proditum est, ut colloquendi secum de philosophia copiam facerent studiosis sapientiae: omninoque multa exempla reperimus mercatorum tradita, qui cum negotiatione vel mercium, vel pecuniarum, coniungerent lectionem librorum ad sapientiam divinam et humanam, ad artes elegantiores pertinentium, historicorum item: quippe etiam, antiquioribus quidem temporibus, non raro illi ipsi, qui studia sapientiae atque doctrinae tractarent, seque philosophos, aut mathematicos profiterentur, aut etiam in civilibus rebus tractandis versarentur, eosdem mercaturam vel negotiationes exercuisse constat, ut Thaletem Milesium, Hippocratem Mathematicum (Plutarch. in Solone pr.) et alios, per quos facile studium doctrinae transire poterat ad eos, quibus cum negotia illi haberent. Nec vero dubitari potest, quin coniunctio talis mercaturae cum quodam genere philosophandi salubris sit et liberalis, quod ea valere potest ad cavendum, ne animi nimis adhaerescant quaestus studio, et eius veluti sordibus inquinentur, deprimanturque ita, ut nec accipere honestos sensus, nec ad rerum divinarum amorem et studium erigere se possint.

Atque talis mercatoris et negotiatoris exemplum amissimus nuper in Io. Thom. Richtero, e mercatoribus et negotiatoribus huius urbis primariis. Nam cum mercaturam et negotiationem non feliciter magis, quam diligenter et perite tractaret, idem etiam multum temporis tribuebat lectionibus librorum, ex vario genere doctrinae, imprimisque de artibus pulcrioribus, cuius generis librorum etiam copiam tam exquisitam tam magnam habebat,

bebat, quae viro docto honorifica esse posset. Itaque etiam libenter versabatur cum hominibus eruditis, ut cum iis sermones faceret, et cum per Franciam peregrinabatur, non magis mercatores clariores requirebat, quam viros doctrina claros, et omnis generis artifices: etiam hic, per tempus hibernum, septimo quoque die apud eum agebatur conventus artificum, in quo super operibus artis, ex omnibus regionibus allatis, praesertim ex genere eo, quod figuras rerum aeri incidit, differebatur. Nec minus curiosus erat rerum naturalium, inprimisque ex genere metallico, quarum etiam thesaurum novum instituerat, opportunitatem earum colligendarum ei praebentibus fodinis Saxonis, quarum partes multas ipse tenebat, tum etiam clarum illud Museum Richteri patui. Itaque iure eum mercatorum philosophantium numero adscribemus, adscriptum agnoscet elegans posteritas.

Hunc talem virum edidit Lipsia nostra d. X. Augusti a. C. dlocccxxviii. patre Io. Zacharia, mercatore huius urbis primario, et Senatore aedilitio, de cuius laudibus ante annos non multos diximus, matre Anna Margaretha Behrmannia, Hamburgensi, quam annos natus duodecim amisit, secuto patre ante annos vndecim proxime superiores. Pater, pro ea virtute prudentiaque, quam in ipso fuisse sciunt omnes, qui cognitum habuere, fecit omnia curiose ac studiose, per quae eius ingenium atque animus ad veram pietatem formari posset, et earum rerum scientia institueretur, in quibus esset praeparatio ad id vitae genus, cui eum destinaverat, eiusmodi, quae similem ipsi faceret omni genere virtutis, artis prudentiaeque. Quod quam feliciter ei successerit, res demonstravit. Et ipse in omnibus illis rebus ei magister praeciando, monendo, maximeque exemplo fuit: quod est genus disciplinae optimum, raro illud infructuosum. Hac ergo disciplina cum satis confirmatus videretur, eum misit pater cum fratre minore Io. Friderico

peregrinatum, per partes Europae cultiores, in quibus et mercaturae maioris in omni genere cognoscendae, et inprimis artium pulcrarum, spectandis exemplis earum perfectissimis, cognoscendarum vberior copia daretur, etiam amicitiae cum claris mercatoribus et artificibus conciliandae, e quorum consuetudine et sermonibus posset proficere. Atque ita ille omne Belgium, Britanniam, Franciam, Italiam, Helvetiam, Germaniam, Hungariamque peragravit, ex eoque itinere, exeunte anno tertio, salvus sospesque, deinde magnis copiis non modo scientiae, sed etiam operum naturae et artium locupletatus, rediit, gaudente patre optimo, suo in ea re consilio eventum tam bene respondere, nihil ab eo, ut saepe fit, in eo itinere, vanitatis et levitatis assumtum esse, sed bona a se instituta egregie aucta. Itaque paullo post negotiationis omnis socium sibi adiunxit; in quo se patri plane probavit. Etenim in eo plane alterum se videbat, fide, dexteritate, diligentia, ceterisque virtutibus omnibus, tum communibus, tum propriis negotiatori, qui cum laude vera in ea ratione vitae versari velit. Et cum iam in illo labore tritum usu videret, ei auctor matrimonii ineundi fuit, circumspiciendique sociam vitae, per quam molestiae laborum emollirentur, et domestici otii iucunditas pararetur. In quo ille delectu felicissimus fuit, ducta Dorothea Elisabetha, B. D. Gottl. Gaudlitii, Pastoris ante plures annos Thomani filia natu maiore, omnibus ingenii corporisque dotibus ornatissima, quae coniugium, quanquam experts sobolis, tamen venustate, facilitate, pietate aliisque virtutibus ita iucundum fecit, ut etiam sensus orbitatis extingueretur. Nec vero ei alia vitae oblectamenta defuerunt, primum e copiis fortunarum, quibus ille, inprimis quidem ad utilitatem publicam, ad liberalitatem erga pauperes, inprimis ex iis, qui literis operam darent, usus est, sed etiam ad oblectationem suam per illa, quae diximus musea, per hortorum praediorumque cultum elegantiorum: in quibus tamen
hac

hac moderatione utebatur, ut oblectationis studium nihil detraheret laborum curae et patientiae, utque nihil profusionis in illo genere cerneretur; omnia essent personae, temporibus et facultatum modo attemperata: in quo cum facillime peccent etiam liberalia et elegantia ingenia, decepta studio suo, intelligitur, quam bene apud eum omnes virtutes iunctae et copulatae fuerint. Sed ei etiam alia contigerunt virtutis praemia, quae ei iucunditatis plurimum attulerunt. Senatus ei curam pauperum mandavit; quod munus apud eum optime collocatum iudicabat, qui ipse liberalissimus erga miseros esset: nec ei locus in ipso ordine amplissimo defuturus erat, si diutius vixisset. Societas Oeconomica eum in numerum suum adscivit: et, quod maximum ei ad honorem et iucunditatem fuit, Princeps Elector ei ornamenta consilarii apud Fiscum contulit. Sed eius honoris fructus, proh! dolor, brevis fuit. Nam eodem anno oppressus est morbo, qui vitae finem attulit.

Erat corporis species ea, quae tum dignitatis plurimum haberet, tum roboris, et valetudinis firmæ opinionem faceret: sed subinde destillationibus tentabatur, et prurigine cum exanthematibus, quae cutem eroderent, et saniem funderent, denique etiam calculorum molestiis infestabatur. Levabantur illa quidem mala idoneis remediis, quae Vir artis medicae consultissimus D. Bosius, adhibebat; sed subito eum invasit febris, arthriticos motus excitans, quibus materies morbi versus caput cerebrumque pelleretur. Inde convulsiones ortae: quae quidem brevi sublatae sunt ita, ut sensuum integritas rediret; sed paullo post novo ad nervos impetu recruduit malum, atque eum ita oppressit, ut vitae finis fieret, a. d. 27. Novembris, cum annos XLV. et menses tres exegisset. Corpore mortui sectione aperto et inspecto, magna copia calculorum minorum reperta est in vreteribus, cum vivus iam plures eiecisset: in pelvi renis sinistri vnus maior, qui vreterem illum plane obdurarat.

Ita amissimus citius, quam speraramus et optaramus, Virum longissima vita dignissimum, non minori omnium civium, quam suorum luctu. Et erant causae multae et magnae communis luctus, qui etiam ad externos propagatus est. Nam, non minus officiosus erat et liberalis adversus peregrinantes, quam cives. Et erant in eo multa, quae eum carum redderent, et iucundum omnibus, quibuscum versaretur: comitas, facilitas adversus omnes: in amicitia fides, in congressibus amoenitas ingenii et sermonum, aequitas in iudicando, elegantia in differendo de rebus ad artes pertinentibus; studium earum artium iuvandarum praecipuum. Sed maxime venerabilem et amabilem Virum reddebat religionis reverentia, et pietas in Deum luculenta; cuius etiam fructum magnum cepit in fine vitae. Ea dolores levabat acerrimos, et adversus eos animum armabat vera patientia; ea mortis instantis imaginem terrore omni privavit, ut eius adventum placido animo vultuque exciperet, neque tam mori, quam obdormiscere videretur. Huius talis Viri ergo, tam multis nominibus de civitate nostra bene meriti, memoriam, etiam grati animi causa, conservare et favore praeconiisque prosequi fas est, atque vota facere, ut divina providentia universam Richterianam gentem, cui tam multa debet civitas nostra, et in qua verum seminarium optimorum inprimis mercatorum et civium habet, per multa secula salvam conservet, eamque omnibus rebus florentissimam esse iubeat, quibus felicitas humana censetur. P. P. Dom. I. p. Tr. A. C. cIdIdccLxxv.



MEMORIA

M E M O R I A

IACOBI HENRICI BORNII

CIVITATIS LIPS. CONSVLIS PRIMARIJ

Fuit hoc olim in institutis disciplinae eius, qua vterentur hi, qui ad causas in foro agendas adiicerent animum, ut omne genus literarum atque artium liberalium studiose ac diligenter tractarent, non modo magistris earum audiendis, sed etiam libris omnibus eorum assidue et studiose legendis, qui in iis excelluissent, philosophorum, historicorum, politicorum, oratorum, auctore Cicerone, ut opinor, in primo de oratore libro, qui ipse hanc viam ingressus erat ad causarum in foro bene agendarum facultatem et inde ad rem publicam. Atque ita hoc consecuti sunt ii, qui hoc modo ad illam facultatem causarum agendarum venissent, ut non modo in eo genere probarentur, sed etiam ad rem publicam bene gerendam idonei putarentur. Itaque etiam cum Christiana ecclesia constituta esset, ii, qui in foro causas bene egissent, in primis idonei existimati sunt, qui ecclesiis praessent, et cum ii se ad Christi religionem contulissent, ei egregiam operam docendo navarent, et in eo excellere praeter caeteris. Satis constat, doctores ecclesiae latinae praestantissimos e foro venisse, Tertullianum, Cyprianum,

prianum, Augustinum in Africa, alios alibi, per quos etiam doctrina theologica in multis accuratior et subtilior facta est ipso verborum delectu, quae ad notiones theologicas exprimendas adhiberentur, et causa religionis optime defensa est. Quem Italica ecclesia habuit parem Ambrosio in docendo voce et scriptis? At ille ea via ad scientiam iuris et causarum agendarum facultatem venerat. Itaque et causas egregie egit, et e foro traductus est ad munera civilia, assumtus Consiliarius a Praefecto Praetorii Probo, consularia ornamenta accepit, et provinciis praefectus est Liguriae et Aemiliae, deinde, etsi adhuc Catechumenus, Episcopus Mediolanensis factus est, cum nemo Episcopatu illo dignior putaretur: quo accepto cum se et studia sua ad doctrinam sacram contulisset, ita eius et scientia et literis explicandae facultate excelluit, ut nemo ei par esset. Sed hoc totum habuit ab illa ratione, qua in discendo iure et comparanda causarum agendarum scientia erat usus, per quam erat hoc consecutus, ut, ad quodcunque genus scientiae se contulisset, in eo quam celerrime ita proficeret, ut excelleret. Neglecta est haec via temporibus barbaris. Itaque vulgo ne legebantur quidem libri Iuris Romani, sed fere in compendiis, summas vocabant, studium iuris, ut nunc fit, conclusum fuit. Sed ex his angustis et ab hac ieiunitate revocatum post fuit iuris studium, cum in Francia maxime exstitissent multa ingenia praeclara, quae aditum sibi ad meliorem iuris scientiam munirent per literas humaniores et studium linguarum veterum, unde Budaei, Pithoei, Cuiacii, Duareni, Donelli aliique similes effluere Icti iidem praestantissimi et literatores elegantissimi, saepe etiam politicis negotiis fungendis et curandis adhibiti, quod et prudentia in iis esset e scriptorum antiquorum curiosa lectione hausta, et facultas de rebus publicis bene accurateque, digne denique Principis persona dicendi ac scribendi, quae facultas a prudentissimis

tissimis Principibus semper est in iis spectata, qui rebus civilibus tractandis adhiberentur. Sed hoc genus iuris discendi etiam in hanc nostram Academiam inductum est a Petro Lorigo, qui huc, auctore Camerario, ab Augusto Electore vocatus, tanto iuvenum concursu docuit, ut auditorium non caperet eorum multitudinem, cum caeterorum barbarorum doctorum scholae prope inanes essent. Erant enim per Camerarii disciplinam imbuti sensu recto de studiis humanitatis, ut facile sentirent praestantiam illius rationis, qua Lorigo in docendo iure utebatur, et ad eius imitationem allicerentur. Hinc igitur profecti sunt ii, qui ante quam doctoris honores caperent, et ad docendum aut honores in re publica petendos accederent, aliquamdiu in scholis latinarum et graecarum literarum publice docerent: ex quo genere fuit Ioannes Scheffelius, qui a Caspares Bornio, scholae Thomanae tum Rectore, impetravit, ut se socium docendi assumeret, ut assidua exercitatione docendi graecas et latinas literas, qua et ante in schola Dresdensi usus erat, et illarum scientiam augeret, et ingenium, linguam, stilumque ad scribendi, differendi dicendique subtilitatem acueret: qua ratione cum per aliquot annos esset usus, Doctoris honores et iura cepit; et cum ius in Academia publice per aliquot annos magna cum nominis fama docuisset, in senatum civitatis nostrae cooptatus, ad consulatum pervenit, in eoque munere praeclare de re publica meritus est. Atque huius generis Ictos plures habuit Civitatis nostrae Senatus, etiam proxime superiori aetate, Carpozovios, Graevios, et nostra Goezios, Baudisios, Mascovios, qui magnum splendorem Academiae nostrae atque urbi attulerunt.

Ictis literatissimis illis et eruditissimis annumerandus iure suo est is, quem ante biennium fere magno cum dolore amisimus, Iacobus Henricus Bornius: quem cum
Pater

Pater literarum humaniorum fautor maximus iuris studiis destinasset, omnia fecit diligenter, vt ad ea literis humanioribus discendis bene praeparatus posset accedere, quarum etiam amore ac studio ita incensus fuit per bonos magistros, vt earum studium nunquam dimiserit. Itaque ille et iuris vtriusque consultissimus fuit, et in scribendo ita egregius, vt nemo ei par esset in omni genere dicendi scribendique subtilitate et elegantia, omnesque eum in vtroque genere admirarentur maxime et laudarent. Sed eius, aeg, de vita vniversa breuiter dicamus, et ipsum eiusque virtutes omnes describamus.

Originem ille duxerat e gente, nobilitate tum generis et natalium tum ingeniorum et meritorum de re publica splendidissima: natus Patre Iacobo, Procancellario in Aula Electorali, et Consule Civitatis Lips. Seniore, matre Susanna Regina, e nobilissima Silesiae superioris gente Puschia generata.

Mature emicuit in puero vis ingenii et discendi cupido. Quod cum sentiret pater, statim curavit eum tradi idoneis magistris literarum, qui ingenium et acuerent magis ad studium discendi, et literis ad humanitatem fingerent; in his Christiano Ludovico Crellio, scholae ad D. Nicolai aedem Rectore, quo ipse quondam literarum humaniorum magistro vsus fuerat, et post hunc Wollio et Haltusio, Viris doctissimis. Ab his bene praeparatus accessit ad studia academica, et Philosophiae, Mathesi, Historiae, et Iuris omnibus partibus accurate discendis operam ita dedit assiduam, vt linguarum et humaniorum literarum veterum ac recentiorum studium nunquam nec omitteret nec remitteret. Nec vero aetatis mediae scriptores neglexit. Sed eos, et omnia illius aetatis monumenta tam diligenter cognovit, vt in ea re Mascovianae et Haltusianae disciplinae alumnum facile agnosce-

agnoscerent omnes. Itaque paucis annis perfecit, ut primum bonarum artium et philosophiae magister egregia cum laude annos natus vnum et viginti crearetur; et anno post vtriusque Doctor iuris. Inter haec subinde specimina eruditionis humanioris egregia edidit, et diatribas pro cathedra defendit diserte et subtiliter: in his duas, quae praeter iuris publici Germanici scientiam, qua ille in primis excellebat, etiam amorem erga patriam civitatem probarent, *de iure stapulae ac nundinarum civitatis Lipsiensis*. Post eum incessit cupido-visendi academias externas, et, annuente Patre, profectus est in Batavos, ibique usus virorum clarissimorum consuetudine, rediit magna rerum optimarum scientia et multo usu auctus. Nam Burmanni, Duckeri, Drakenborchii, et alii viri summi adamaverant eius ingenium et egregiam literarum scientiam et summum amorem. Itaque et libenter eius consuetudine utebantur, et eum praeceptis consiliisque salutaribus instructum a se dimittebant: cuius generis multa ex ipso nos magna cum voluptate audire meminimus. Redux inde ad suos, paullo post cooptatus est in Ordinem Civitatis amplissimum. In quo talem se in omni genere negotiorum praestitit, ut nunquam eius dexteritas, fides, scientia et prudentia desideraretur: propter quas virtutes etiam paullatim per omnes gradus ad locum primum i. e. consulatum pervenit; quem ille tanta cum dignitate gessit, ut in eo exemplum consulis perfecti exstaret, qui et utilitati civitatis publicae in omnibus rebus consilio, prudentia, disciplinaeque severitate et auctoritatis consularis conservatione optime consulere. In quo etiam amore patriae suae insito movebatur; cui se hoc et sua et maiorum causa debere existimabat, qui in ea semper et honoratissimi et omnibus rebus secundis ornatissimi et beatissimi fuissent. In illa autem maxima negotiorum curarumque multitudine, qua in muneribus publicis premebatur, nunquam ille studia doctri-

doctrinae et literarum neglexit, sed assidue legitum antiquos tum recentiores ex omni genere libros. Qui apud nos Consulatam gerunt, eo anno Scabinatus laboribus liberi sunt. Quod ergo ea re tempus ab iis vacuum habebat, consumebat libris, biennio superiori comparatis, atque sepositis, legendis, cum literis, ut per iocum addebat, quasi in gratiam rediturus. Et erat in eo scientia librorum optimorum egregia: quae et Bibliothecae Senatus valde profuit, cui a Mascovii morte praefuit, quamque optimis libris permultis locupletavit. Atque etiam libenter cum viris eruditis sermones ex hoc genere conferebat, a quibus etiam maximi fiebat, et ut summus literarum patronus colebatur. Itaque etiam hi maxime eius mortem luxere, in quo maximam iacturam se et literas fecisse existimabant. Ea ille oppressus est ante biennium a. d. V. Non. Decembres Dresdae, quo publice ierat, ut, in conventu ordinum Saxoniae, et communibus patriae universae et huius nostrae inprimis civitatis rebus consuleret, unde eius corpus ad urbem nostram deductum est, et in maiorum eius sepulcro conditum, celebrantibus hoc funus omnibus, qui bene de Lipsia sentirent, et viri tanti merita atque virtutes nossent.

Erat in Bornio nostro summa vis ingenii, summum acumen, sensus veri, recti, etiam pulcri acerrimus. Celestiter ille et rectissime, in quo esset caput rei et causae cuiusque, videbat: omnia ei celerrime veniebant in mentem, quibus res quaeque contineretur, et quae rectum iudicium suppeditarent, nec modo in rebus ad eruditionem pertinentibus, aut ad ius dicendum, sed etiam in politicis. Itaque ei aula nostra non modo summum in Academia nostra Ordinis Iuridici locum aliquando destinavit atque obtulit honorificentissime, sed etiam ipsa eius opera uti cupiit; sed ille, amore civitatis patriae, nullum locum accipere sustinuit, nisi qui eum non ab illa
abstra-

abstraheret, vt in summo provocationum consilio, et munus Cancellarii in Regimine Misenensis Episcopatus, quo ille magna cum dignitate et auctoritate functus est. Nec in hoc modo genere vsus est digna meritis suis virtutibusque fortuna, sed etiam in reliquis omnibus. Nam ei primum matrimonium contigit fortunatissimum, ducta Ioanna Christiana Schacheria, Quirini Schacheri Ordinis Medicorum Decani perpetui filia, virgine omnibus muliebribus bonis ac virtutibus ornatissima, et prole optima ex ea suscepta, filio primum Iacobo Henrico, quem ad suum exemplum formatum vidit in aula Principis nostri Electoris in Consilium Aulicum receptum, deinde filiam Susannam Christianam Henricam, ingenii corporisque dotibus ornatissimam, quam paullo ante mortem felicissime despondit generosissimo et praestantissimo Viro, L. B. Gottlobo, e nobilissima Beustiorum gente oriundo, Ducis Serenissimi Gothani in Curia Regiminis Altenburgi bene merenti. Contigit etiam ipsi et familiae eius splendoris aliqua accessio, antiqua gentis nobilitate novo diplomate Caesareo firmata. Sed haec omnis Viri gentisque fortuna nihil fastus attulit animo eius celsiori, quam vt vlla re ad fastus humilitatem deduci posset, retinuitque semper illam facilitatem et comitatem, qua in omnium animos influeret, quam ille etiam in consuetudine familiari, hilaritate modesta, et faceta oratione condiebat, vt nihil esset eius consuetudine iucundius.

Huius ergo talis ac tanti viri, et tam praeclare de Civitate nostra meriti, iactura quanta sit, quis non intel-
ligat? et quis eam non perpetuo lugendam civitati nostrae putet? Causam eius attulerunt vomicae, quae in pulmone cum latuissent, repletae materia maligna, subito ruptae, eam effuderunt in pectus, vnde cum gangraena mors venit.

P

Sed

Sed non satis est lugere iacturam, quam fecimus: immo faciamus, ut eam, quantum fieri potest, reparemus. Quod fiet memoria eius, et virtutum illius ac meritorum de republica nostra, conservanda et crebro usurpanda, ut ad eius imitationem impellamur oremusque Deum, ut familiam eius perpetuo omnibus rebus secundis florentissimam reddat, et in ea plures existeri iubeat, qui maioribus suis se similes et Borniano nomine dignos praestent. P. P. Domin. III. p. F. Tr. a. C. ~~MDCCCLXXVII~~

ORATIO PANEGYRICA
IN
FRIDERICVM V
REGEM DANIAE

Quod maxime optabile videri solet iis, qui in magno primariorum virorum doctissimorumque hominum conventu dicere instituunt, Auditores, vt prodeuntibus in eum, vnde verba faciant, locum, comitem se praebeat Favor, cuius potenti commendatione, ac veluti lenociniis, conciliati sibi ac deliniti Auditorum animi, in iis, quae non satis eleganter dicta videri possint, neque nimis acute cernant, neque fastidiendo adhaerescant: id mihi, hac die, in amplissimam hanc concionem progresso, singulari quadam felicitate, contigisse, vehementer laetor. Ea est profecto argumenti, in quo mea versabitur oratio, dignitas, tanta magnitudo, vt eam vel summus orator, neque ingenii vi satis sustinere, neque dicendi copia aequare, posse videatur. Etenim Patriae meae, Daniae regno, gratulandus est novus Rex, quem hac die solemniter ritu inaugurari gaudet: gratulandum porro imperium amplissimum Regi, ita omnibus ingenii et animi dōtibus regiisque virtutibus abundanti, vt singulari quodam benignissimi Numinis munere ac beneficio Daniae concessus videatur: quibus rebus tot ac tantis par oratio, neque ingenio reperiri, neque elaborari diligentia, potest. Quare, si in hunc Vestrum conventum nullam aliam commendationem afferrem, nisi ingenii dicendique facultatis, cuius tenuitatem et ipse video, et haec aetas mea satis arguit: facile intelligerem, fore, vt, me consilio, pio illo quidem in Regem et Patriam, ceterum, et ad reliquam de me existimationem parum prudenti,

P 3

*) Haec oratio scripta est an. MDCCXXXVII. nomine Christiani Friderici a Kragh, Equitis Dani, qui tum Regi inaugurationis et coronationis sollemnia in templo Academico Lips. celebrata gratulabatur.

denti, et ad Vestrum, in hoc genere, iudicium minus
 eleganti, vsum esse, iudicaretis. Sed me, post pieta-
 tem, maxime, et ante in hanc mentem impulit, et nunc
 in dicendo confirmat, haec cogitatio: quod sic mihi
 persuasi, atque ita animum induxi meum, vt, extra Da-
 niam quidem, nullum locum inveniri posse crederem,
 in quo maiori favore se audiri speret in Regis laudibus
 occupatus, quamvis mediocris, orator. Etenim tanta
 inter Reges Daniae et regnatricem Saxoniae Domum
 coniunctio ac necessitudo, inde ab Augusti, Principis
 Electoris, felicissimis cum Anna Danica nuptiis, inter-
 cessit, tot aliis illa matrimoniis adstricta postea et confir-
 mata, eos porro Principes mistus vtriusque Domus
 sanguis dedit Saxonibus, vt nulla alia natio magis favere
 Daniae, Danicorumque Regum felicitati et laudibus, de-
 beat. Nam, vt alios mittam, Christianum, Ioannem
 Georgium: ex Anna Sophia, Friderici III. Daniae Regis
 filia, natum esse scitis, Fridericum Augustum, Principem,
 ingenio, virtute, rebus gestis, maximum, qui primus re-
 gium nomen in familiam suam intulit: in eiusdem autem
 gremio ac sinu nutritum, educatum, et ad hanc incredi-
 bilem pietatem, indulgentiam, liberalitatem, constan-
 tiam, ceterasque admirabiles virtutes, conformatum esse
 alterum hunc Fridericum Augustum, sub cuius mitissima
 tutela Saxonia nunc adquiescit. Quod si regia Domus
 nostra, atque vniverſa adeo Dania, ista gloria sua in pri-
 mis delectatur, et, hoc etiam nomine, omni, quae futu-
 ra est, posteritati se commendatam putat, denique,
 Vestris Principibus mirifice favet, Vestraque felicitate
 vehementer laetatur: est profecto pervulgatae illius Ve-
 strae humanitatis, nostram quoque, Danorum, felicitatem
 et gloriam communem putare, et Regis nostri laudibus
 favere: praesertim cum etiam matrem habeat eam, quae
 ab ipsa Augusti Vestri sanctissima, et amore Vestro, et-
 iam post mortem, dignissima matre, ad regiae fortunae
 animum et magnitudinem sit erudita. Atque haec non
 eo

eo dicta sunt, quasi humanitati Vestrae diffidam: sed ut intelligatis, me, in favore Vestro sperando, nihil mihi ingenioque meo, omnia Vobis atque facilitati Vestrae, tribuere. Sed, quod spe favoris Vestri ausus essem fortasse, si postularetur, ad id etiam ultro appetendum me incitavisse fateor illud maxime, quod nullo alio in loco Rex noster dici de se ac praedicari malit, quam in Saxonia, atque in hac in primis Vrbe: cui Illum, quod omni genere literarum, et doctissimorum elegantissimorumque hominum copia, prae caeteris, affluit, pro incredibili illo in bonas literas amore, quem Vobis postea demonstrabo, impense favere scio. Quare, cum hanc semper consuetudinem docti homines coluerint, ut Principes eos, qui literas amarent, omni modo ornarent, omnique favoris ac laudis genere prosequerentur: quomodo tandem dubitem, quin et Vos Daniae talem Regem, Regi autem imperium, totis animis gratulandum putetis? Quid? quod etiam sapientiae Vestrae atque prudentiae est, optare, ut omnes ii, qui divinae maiestatis, inter homines, Vicarii et sunt, et habentur, quam simillimi sint ei, cuius personam sustinent, et, si tales etiam aliis terris contigisse Principes videatis, qualis Vestrae Patriae divino munere datus est, non modo communis humanitatis causa, verum etiam propriae utilitatis cogitatione, gaudere. Est enim omnium gentium quaedam inter se coniunctio et quasi cognatio: neque populorum magnorum vel felicitas, vel miseria, iisdem, quibus ipsi, finibus coercetur: sed plerumque vagatur latius, et cum permultis aliis gentibus longe lateque communicatur. Summa iam pace haec Vestra Patria, sapientissimi Regis Vestri providentia et beneficio, adquiescit. Quid vero? an propterea non sentitis calamitates, quibus alias regiones aliorum Regum dominandi cupiditas affligit? Quis est Vestrum, qui non optet, ut bellis, quae ubique geruntur, compressis, pax omnem Europam obtineat? Quis porro nescit, quam saepe haec Saxonia septentrionis opibus, vel sublevata et adiuta, vel infestata et afflicta sit? Gaudete

igitur, gaudete, inquam, et Daniae vniversaeque Europae gratulamini, cum divina benignitas Danis Regem concessit, qui ita natus, ita educatus et institutus, ita omnibus regalis fastigii virtutibus instructus est, ea denique iam sui specimina et documenta dedit, vt non modo sperare, sed etiam confidere, possimus, in eo religioni verae, literis, communique Daniae et Europae securitati, paci, et saluti, magnum praesidium donatum et constitutum esse.

Verissimum profecto illud est, quod Ioannes, Daniae Rex, in ore habere solebat: salutem et felicitatem populorum non esse sapientiae humanae opus, sed solius providentiae divinae beneficium. Sed quoniam id praestare populis solet maxime per eos, quos suae potestatis Vicarios esse voluit in terris, hoc est, per Principes: nullum sane maius bonum contingere populis potest, quam Principes boni, hoc est, sapientes, benigni, fortes, bonique publici amantes. Non autem est humani arbitrii et consilii, tales Principes habere. Coeleste illud donum est, quod iis populis impertitur Deus, quibus inprimis bene cupit. In quo convenit admirari quorundam populorum fortunam in vtramque partem. In omnibus, ecce, Israelitarum, inde ab Ieroboamo, ad Hoseam vsque, Regibus, ne vnus quidem bonus Princeps est repertus. In Syriae quondam Aegyptique Regibus Macedonicis, post Seleucum Nicatorem, Ptolemaeosque duos, quam pauci, qui ferri quodammodo possent, quam multi, qui nihil prope humani, praeter figuram corporis, haberent? Romanis porro, post Augustum, vsque ad Vespasianorum tempora, quis nescit, nullum bonum Principem contigisse? Aliorum contra populorum, videmus, per plura secula, Principes omnes deinceps fuisse tales, in quorum nullo quicquam, nisi fortasse meliorem interdum fortunam, desiderare possis, ceterum ingeniis, animis, virtute, praestantissimos, et Principali fastigio dignissimos. Non longe ieritis, Auditores. Huius Saxoniae Principatus, ex quo tempore penes eam, quae nunc tenet, Domum fuit, quam

quam gloriosus Principibus omnibus, quam felix civibus, fuit: cum plurima et maxima, Principum sapientia et virtute, ad cives bona, nihil incommodi, culpa magis ipsorum, quam fortunae inclementia, quam praestare nemo potest, profectum sciatis? Quid? quae terrae parent Luneburgicae Domui, e qua Regina Daniae origines ducit, quantum divini Numinis curam et benignitatem, in eodem genere, sunt expertae? Quis enim fuit, ne altius ascendamus, inde ab Ernesto illo, qui Friderici Sapientis, Saxonis, sororem in matrimonio habuit, e quo natus est Vilelmus is, qui novae Luneburgicae Domus auctor est, ab illo igitur Ernesto, vsque ad hunc Georgium Augustum, Britanniae felicissimum Regem, quis fuit, quin omnibus principalibus virtutibus, rebusque praeclare gestis, nobilitatus sit? sub cuius imperio, si non nova incrementa potentiae dignitatisque accederent, quod plerisque contigit, tamen cives omnes beatissimi et essent, et haberentur.

Atque eadem hac felicitate etiam Daniam usam esse reperietis, a tempore illo, quo divinitus haec Danis mens iniecta est, ut summam rei publicae ad Oldenburgicam Domum deferrent. Horret animus memorare, et meminisse refugit, qualis, quam turbulenta, antea regni Danici fuerit conditio, cum privatae cupiditates publica salute potiores essent, perpetuisque fere discordiis intestinis respublica agigaretur. Quorum malorum omnium finem, plurimorum autem maximorumque bonorum initium, advocata fessis rebus Domus Oldenburgica attulit. Nam cum ea in Daniam commigravit, primo, prudentia, quam, traditum memoriae est, vnice spectatam esse in primo illo Christiano, qui e tribus Theoderici filiis est delectus: deinde, sapientiae et literarum amor, cuius aeternum monumentum idem ille Christianus in Academia Hafniensi, ab se condita, reliquit: denique, non modo conservandi, sed etiam augendi, regni mira felicitas. Tempus me deficeret citius, quam oratio, si, de omnibus, qui post hunc Reges

Daniae fuere, a quibus quidem Fridericus noster genus ducit, separatim dicendo, demonstrare instituerem, quam diligenter illi omnes, non modo istius Christiani virtutes, tanquam imperii et felicitatis publicae certissima pignora, conservarint, verum aliis etiam, veluti fortitudine bellica, religionis verae retinendae propagandaeque, vel ad ultimos orbis terrarum fines, studio, in adversis rebus constantia, auxerint. Cuius rei certissimum argumentum hoc est, quod Lex Regia, per Fridericum III. induc̃ta, ita cupide quondam a volentibus Danis gaudentibusque accepta est, ut ab aliis populis solet repudiari, ita nunc, post tot annos, probatur, ut nemo antiquum statum desideret, sed malit quisque, rerum summa talium Regum sapientiae et potestati permessa, solida felicitate, quae ipsa libertas est, frui, quam, rei publicae statu per factionum dissidia turbato, vanis libertatis simulacris eludi. Atque, ut non negem, aut dubitem, in ea re vim permagnam habuisse exquisitam quandam, et constantem, et propriam ei familiae, disciplinam, quae animos ad regalem fortunam capiendam, sapienterque utendam, conformaret: tamen etiam singularem quandam divini Numinis providentiam intercessisse arbitror, quae, praecipua quadam in Danos indulgentia, secunda illarum virtutum semina spargeret in animis omnium, et conservaret, neque antiquam illam praeclaram indolem exolescere potius, quam confirmari, pateretur. Cuius rei novum atque illustrissimum documentum Te iam habemus, Friderice Potentissime, Patriae Pater indulgentissime: in quo, placuit benignitati divinae, illud antiquum suum, in Reges Daniae, ipsamque adeo Dania, beneficium non modo tueri, sed etiam augere. Etenim adeo non fivit indolem Tuam; ullo in genere, quicquam degenerare a Maiorum virtutibus, ut potius, quae illis singulae contigerant, eas in Te contulerit universas. Tibi id ingenium, eum animum, dedit Deus, ut nobis sanctissimi Parentis sapientiam et pietatem referas.

referas, Avi benignitatem in cives reddas, Proavi fortitudinem restituas. In Te admiramur Abavi moderationem in secundis, constantiam in adversis: cuius demonstrandae vtinam Tibi, post acerbissimam Patris mortem, nunquam usus veniat! in Te Friderici II, et Christiani IV. incredibile in literas studium amamus.

Atque ista tam divina naturae bona excellens et vna Principe, inprimisque Danici Regni herede, digna disciplina etiam vehementer auxit et confirmavit. Etsi enim ita eminebant illa, ita non leviter adumbrata, sed expressa, erant omnia, vt Eum divina quaedam ipsius naturae, omni humana potentior, disciplina conformasse, et humanam operam supervacuam fecisse, videretur, omnesque, veluti perfectum simulacrum coelo demissum, intuerentur: tamen, nescio quomodo, promovit infinitas virtutes, magisque conspicuas fecit cultus, et roboravit doctrina. Ex quo intelligi potest, quam sapiens illa, quam perfecta, quam efficax, fuerit, quae tanta bona, vel adstruendo cumulare, vel poliendo elaborandoque in melius fingere, potuerit. Sapientissimus ille Socrates, excellenti indole praeditus, et ad res magnas gerendas, salutemque generis humani, factos esse, dicebat, eos, qui celeriter perciperent ea, quae traderentur, percepta firmiter retinerent, tum omnium doctrinarum appetentes essent, per quas quis rem privatam et publicam bene administrare, omninoque hominibus, rebusque humanis omnibus, dextre vti, posset. Talem Friderico indolem datam esse videbat Divus Pater, videbant omnes, quibus, propius Eum contingere et inspicere, dabatur. Nam, cum in disciplinam datus esset iis, qui literarum et sapientiae principalis doctrinas traderent, quod factum est ea aetate, quae in aliis nondum admittit hunc ingenii cultum, tanta erat in arripiendo celeritas, vt magistrorum expeditissimum studium, properantemque industriam, non modo aequaret, sed etiam, felici quadam festinatione, praecurreret: tanta in retinendo firmitas ac tenacitas, vt
omnia,

omnia, non in molli cerebro scripta et impressa, sed in aere ac marmore insculpta, viderentur: ea denique sollertia in intelligendo ac iudicando, vt nihil tam obscurum esset, quod non ingenii lumine illustraret, nihil tam retrusum, ad quod non penetraret acumine, nihil insita quadam veri falsive specie tam ambiguum, in quo non verum celeriter cerneret. Quae autem est disciplina, quae ingenium, vel ad intelligendi iudicandique elegantiam fingit, vel ad honesti, iusti, aequique, scientiam erudit, vel ad prudentiam rei publicae, pace belloque administrandae, acuit: quae porro animum, vel ad magnitudinem celsitudinemque extollit, vel ad constantiam fortitudinemque roborat, vel ad lenitatem humanitatemque mitigat, vel ad liberalitatem beneficentiamque allicit: quam non, vltro adamatam, cupidissime appetierit, appetitam studiosissime coluerit, excultam denique in lucem conspectumque proferre cupierit? Sed, quanto excellentiorem Ei insitam indolem cerneret sapientissimus Parens, tanto magis eam dirigendam perficiendamque disciplina putabat. Itaque non modo Rector iuventutis datus est, qui scientia et vsu rei publicae gerendae excelleret, Rosencranzius, Purpuratorum princeps, sed etiam viri exquisitae elegantisque doctrinae sunt delecti, qui Eum omnibus, tam praeclaro ingenio et regio fastigio dignis, disciplinis erudirent. In primis duo illa maxima Daniae eruditae, atque adeo orbis literati, ornamenta, Grammius et Scheidius, amabili huic et felici ministerio admoti sunt. Et Grammius quidem historiam docere iussus est, vnde fata, cum aliorum populorum, tum Sui aliquando futuri, disceret, magnorum virorum, in primis maiorum Suorum, virtutes et res pace belloque gestas, cognosceret, artes bene glorioseque regnandi hauriret, prudentiam denique vtriusque fortunae recte et magnifice ferendae pararet. Scheidius autem iura tradidit, non modo ea, quae civibus descripta sunt, sed etiam, quibus gentes inter se devinciuntur, Principumque fortunae ac spes continentur. Addita etiam sunt

sunt praecepta philosophiae, non ieiunae et umbratilis, quae ingenia minutis et inanibus quaestiunculis frangit et opprimit: quam profecto non intelligebat Plato, cum philosophiam bene imperaturis commendaret: sed eius, quae vitae et imperio inventa est, quae, secundum Socratis definitionem, ad res privatim ac publice gerendas adducit, animos mansuetos facit, calamitates, necessarias quidem, moderate ferre, ab inscitia autem oriundas cavere, docet. Sed quantumvis praeclara et fructuosa fuerit talium virorum talis doctrina: tamen est. Ei cum aliis communis: at proprie usus est ea, quae ingenium animumque ad sanctissimi Parentis, omniumque maiorum Suorum, imitationem erudiret. Haec longe pulcherrima, haec efficacissima, haec sola Ipso digna, disciplina fuit.

Arbitror, Vos intellexisse, Auditores, comparandoque animadvertisse, simillimam, planeque geminam, esse hanc disciplinam ei, qua Celsissimum illum Vestrum Fridericum Christianum adhuc usum esse, et scitis, et gaudetis. Quare attendite, quaeso, porro, quam vberes, quam laetos, et praeclaros illa, in Friderico Rege, iam tulerit fructus, commemorantem, et, quos deinceps editura sit, non fallaci, aut levi coniectura augurantem, sed certa, et haud dubia, spe, et fiducia, praedicentem, atque vel sic, quae Vestram Patriam felicitas et gloria maneat, prospicite.

Ac prima quidem, in primisque, extulit se altius insita illa facilitas et comitas, quae cum animos hominum, in quocunque ea sit, mirifice ad benevolentiam allicit, tum maxime amabilis est in iis, quos longissime supra ceteros mortales posuit Deus, et hoc ipso ab eorum commercio prope seiunxit. Videbat humanissimus Princeps, magnum Parentem ita maiestatem et comitatem, Regem et hominem, miscuisse, ut hoc prope vno maior omnibus et altior videretur, quod omnium salutem curaret vnus. Accedebat literarum et sapientiae studium, quod, semper hanc vim habuisse, observatum est, in magnis viris et
Prin-

Principibus, vt eos ab altitudine sua ad inferiorum consuetudinem veluti demitteret, et propemodum aequaret, cum omnibus, tum praesertim iis, quibuscum similitudine studiorum coniungerentur. Occurrebat ergo nobis humanitate sua, et resitantes cunctantesque altitudinis verecundia, alliciebat comitate: contingi Se et compelli, velut vnum e nobis, cupiebat, et, quanto quisque in adeundo, alloquendo, respondendoque, promptior et liberior, tanto Illi gravior et iucundior videbatur: tantumque aberat, vt Suae illos magnitudini aliquid detraxisse putaret, vt ab iis vel maxime coli Se et honorari iudicaret. Cuius rei, mihi saepe contigit, vt testis et admirator essem, cum admissus ad Ipsum, cum aliis aequalibus, nulla re alia maiorem nobis et altiore, quam ingenii et virtutis magnitudine, viderem, nulla re superiorem, nisi quod communis nobis ad sapientiam et virtutem hortator et magister esset. Nolite enim existimare, Auditores, nihil aliud, aut Principem, in nobis admittendis, quaevisse, quam, vt nos humanitate sua impertiretur, nihil aliud nos, nisi honoris illius dulcedinem, retulisse. Princeps Ille iuventutis, non tam nomine, loco, ac dignitate, volebat videri, quam sapientia, virtute, doctrina: et, vt Pater Principis Daniae nomen, beneficiis in vniverfos, providentiaque, tueretur: sic Ipse iuventutis Se Principem, hortando, monendo, consulendo, probabat, eiusque iuventutis Princeps esse optabat, quam Sibi simillimam Ipse fecisset. Itaque semper hoc, et maxime, agebat, vt nos ad sapientiae et virtutis studium incenderet, omnesque honestissimo aemulationis certamine committeret. Fecundissima Ille virtutum semina felici spargebat manu, quae iam in multis laetissimam segetem tulerunt, ferentque haud dubie in pluribus. Mihi quidem ante oculos semper obversatur Principis vultus, adhuc sonant in auribus, haerentque pectore, incitantes ad virtutem voces, meque dies noctesque monent, vt dignum me beneficiis Eius, consiliis, exemplo, utilem patriae, sapientiae virtutis-

tutisque studio, reddam, neque conquiescere me, aut vlllo labore retardari, in eo curriculo, ac defatigari, sinunt. Sumus ergo et erimus omnes opera Tua, Sapientissime Princeps, Tuique muneris ac beneficii erit, quicquid doctrina et virtute poterimus. Te sibi providisse ac consuluisse ante, quam imperares, grata agnoscet patria, Teque Patrem Patriae factum ante iudicabit, quam appellare.

Non possum Vobis, Auditores, omnia nunc omnium virtutum documenta commemorare, quae, ante imperium susceptum, edita sunt ab Optimo Principe. Etenim, tanta eorum est multitudo, ut comprehendi huius orationis finibus nullo modo possint, festinatque animus ad laetum illud tempus, quod Eum ad summum Daniae imperium extulit. Itaque continebo me in vno genere, et, quae magnitudo et celsitudo animi se in Principe iam tum exseruerit, docebo: qua virtute nullam esse scitis, neque ad hominum admirationem excellentiorem, neque fastigio principali digniorem. Huius autem virtutis exemplum maximum, et commemoratione dignissimum, edidit, vix septimum decimum egressus annum, magnam materiam vicina Suecia praebente. Tanta ibi tum erat rerum perturbatio, ut ad interitum ruere res publica videretur. Foris vrgebat hostis, et potens, et vlciscendi cupiditate incensus: domi ardebat discordia, civibus in diversas factionum partes distractis. Neque iam consilio videbatur locus esse, cum per tumultum omnia agerentur. His malis relictam esse tandem Sueci medicinam unam hanc videbant, si Regi, senectute et laboribus fessio, Princeps potens, sapiens, fortis, Regni hereditate data, adiungeretur, quocum curas et onus imperii partiri, et ita subvenire laboranti rei publicae, posset. Hic magna pars, consilio, destinatione, ac votis, rem deferebant ad Fridericum nostrum: ei fortunam regni, ei salutem suam, rectissime credi videbant. Sed eorum consilia, voluntatem, ac spem, partim metus retardabat, partim aliorum

aliorum aduersa consilia destituebant. Quid ibi Fridericus noster? qua mente, quo animo, fuit? Multa ei veniebant in mentem, quae a rei, etiamsi concordibus voluntatibus deferretur, recipiendae consilio avocarent. Sciebat, Numam Pompilium, ab initio, abnuisse imperium Romanum, quod turbulentum esset, bellicque magis, quam pacis, artibus adsueta. Audierat, Fridericum Sapientem, Saxonem, Imperii Germanici ad se delatam tutelam, propter temporum illorum gravitatem, suscipere noluisse. Meminerat, ipsos quondam Danos Regnum suum Adolpho, Christiani I. avunculo, propter intestinas Regni turbas, frustra obtulisse, et ad alium reiectos esse, Horum autem gloriae non modo nihil, eo consilio, decessisse, sed accessisse plurimum, didicerat. Occurrebat porro, non tam referre, quam multis praefis, sed quam beatis, et in Principes quoque convenire, quod Virgilius agricolis praecipit: laudanda ingentia rura esse, mediocria melius et fructuosius coli. Sed contra intelligebat etiam illud, magni animi esse, alieno magis, quam suo, otio consulere: Deum esse, iuvantem mortales mortalem: hac via ad immortalitatem omnes magnos homines esse graffatos: hac enifos maiores Suos, aeternam gloriam attigisse: hac, magno passu, cum maxime vadentem Parentem sequendum esse. Itaque sic induxerat animum, ut non dubitaret, omnia discrimina subire, si iis redimere Sueciam volentem a perniciie posset: praesertim, cum Regni paterni securitati et felicitati, propter viciniam, magnum praesidium ea re videretur posse adiungi. Ceterum, vim adhibere, etsi poterat, succinctus quippe Regni paterni viribus, adiutusque partium suarum, in ipsa Suecia, opibus, tamen, cum, nec invitis imperandum, nec ad salutem cogendum quemquam, arbitraretur, constanter, et magno animo, recusavit. Nam, cum regia potestas ad conservationem tutelamque generis humani inventa sit, non ad superbiam singulorum, aut perniciem parentium: maiorem gloriam sibi existimabat, ab tali moderatione,

ratione, quam ipso regno, venturam, in quo comparando vlla vis, aut cuiusquam clades, intercessisset. Ac profecto, cum nullius rei humanae maior, quam Regni, dulcedo sit, haud paullo difficilius maiorisque animi est, spem eius oblatam sponte dimittere, quam vi et armis persequi, in primis, si suppetant, et, cum quadam iuris specie, capi posse videantur.

Huius autem moderationis cum maximum hunc dulcissimumque fructum capiat Patria nostra, ut iam Regem Optimum totum teneat sola, solam Ipse curet ac foveat: tanto maiorem illa sibi necessitatem amandi, in oculisque ferendi, Regis impositam videt: si necessitas esse potest in eo, quod volens, lubens, gaudensque, facit. Quanquam vel sic Ille, iam tum, Patre vivo, ita amabatur ac colebatur, ut nullam accessionem capere posse tantus amor videretur. Praeterquam enim, quod mira Danis est regii nominis et sanguinis caritas: sive ea indoles ingeniorum est, sive potius ita maiores meruerunt: hunc Fridericum, inde ab ultima aetate, ita in deliciis habuerunt, ut nomen Eius, oratio, vultus, incessus denique ipse, voluptati esset: ut prodians in publicum omnium aetatum concursus faceret, omnique populi significatione floreret. Quod cognitum est maxime in solemnibus felicissimarum, cum Celsissima Sua Ludovica, nuptiarum. Etenim, illo tempore nemo fuit, quin omni modo profunderet abditum intus et luètantem erumpere amorem, gestientique laetitiae habenas totas permetteret: veluti vereretur quisque, ne non satis amare tam amabilem Principem, non satis laetatus esse bonis eius ac felicitate, videretur, nisi omnibus laetitiis incessisset. O! quae tum voces, modo Principi, modo suam sibi, felicitatem gratulantium audiebantur! Profecto curae esse Deo res Danicas, cordi esse Fridericum suum, cui Coniugem tam amabilem, tam omnibus corporis animique dotibus ornatissimam, hoc est, Friderico dignissimam, dederit! Nihil esse iam,

Q

quod

quod non sperent ipsi, nihil, quod metuant posteris: consultum esse sibi, provisum ferae posteritati! quam enim subolem e tali coniugio nasci, nisi laetissimam Parentibus, felicissimam civibus, posse? Valerent ergo ambo cum Parentibus regiis! Viverent ad seram senectutem, omnesque vitae dies, huic pares gaudio et felicitate, agerent!

Audisse Numen videbatur tam pia, tam nulla adulatione conficta, tam nulla alia, nisi amoris, vi expressa, vota: cum ecce! Patrem Friderici, laetum regni felicitate, et Filii ingenio, virtutibus, coniugioque, gravis morbus invadit, mox mors humanis rebus eripit. O! quantus tum dolor Filio, quantus luctus civibus, venit! Etenim, amissus erat is, quem Filio natura, univ ersis animus, fides, indulgentia, caritas, Patrem fecisset. Sed maximus ex eo casu sensus ad Filium pervenit: quippe cives sola pietate et amore movebantur, securi publicae felicitatis, cuius certissimum pignus Filium Regis haberent: Illum autem cura quoque gravis et multiplex angebat. Ea aetate Sibi sapientissimum Patrem ademptum, qua maxime sapientia Eius prudentiaque frui posset, atque cuperet: subeundum esse tam grave tanti Regni, atque insuetum onus, quod paternis humeris tam bene sedisset: ea autem tempora esse, ita Europam bellicis tumultibus concuti, ea misceri pluribus partibus, atque parari, ut vix senili prudentia gubernata rei publicae navis enavigare cautes, et otii tranquillitatisque portum tenere, possit. O! pietatem amabilem! o! modestiam singularem! o! documentum parisi imperio animi certissimum! Malle, Patre vivo, diu parere, quam, mortuo, celeriter imperare: magis gaudere sapienter monentis iubentisque, quam comiter parentium, et imperari sibi aliquid postulantium, vocibus: contentum esse hereditate, ea, quae, Patre salvo et vivo, cernitur, virtutis scilicet paternae, tardam et seram optare eam, quae Patris morte venit: imperata capessere laetum et festinantem, imperium

perium cunctantem et tristem ! Haec sunt pii, haec magni regiique animi, haec pulcherrima Regni optime administrandi argumenta et pignora certissima. Ergo, veram esse veterem sapientum vocem, doces, Princeps Magnanime, quae, eum demum bene imperaturum, pronunciat, qui bene libenterque paruerit, nullamque meliorem Principatus disciplinam putasti, quam, quae obsequio ad imperandum erudiret. Ergo Tibi datum fuit, ut veros circa Te amicos haberes, quod vulgo negatum Principibus creditur, et, aut nunquam audita Tibi, aut statim reiecta est, improba illa assentationis Siren, quae aures Principum maxime, pueris adhuc, et vix propemodum natis, incredibiles sapientias et prudentias occinendo, infestat. Profecto, si nullum aliud Tui specimen ante dedisses, qui dedisti plurima, et maxima, et pulcherrima, hoc vno Te agnosceremus talem, qualem sibi praeesse populus, non inimicus salutis suae, velit.

Vere hoc, arbitror, me dicere posse, nullum unquam Principem, maiori et iustiori omnium civium de se spe et favore, ad imperium venisse. Neque Ipsum latebat, qui Suorum de Se sensus essent, quae virtutis fiducia. Etenim ita, in omnium vultu et sermonibus, eminebant, ita in adspectum omnium se profuderant, ut non sentire nullo modo posset is, qui etiam occulta, penitusque reclusa, intelligere didicerat. Neque adeo poterat ignorare sua bona : quis esset, quid didicisset, quid per plures annos egisset, ad quid Se exercuisset. Sed nihilo minus Ille, velut ignarus istorum omnium, velut nondum cognitus Suis ac probatus, nihil aliud agere, nisi, ut, novis Sui experimentis edendis, bonam de Se spem commoveret in posterum, et auspicia imperii, praeclaris indies institutis factisque, inprimisque beneficiis in singulos et universos, commendaret.

Et initium quidem duxit a Pietate in Divum Patrem, non tam magnificentissime eum efferendo, quamquam sic quoque, quam consilia eius, instituta, decreta, federa,

conservando ac retinendo: quae est vna maxime et Patre et Filio digna laudatio, tanto illa maior et illustrior, quanto solet esse rarior, quantoque maior factorum est, quam verborum, fides. Nemo beneficium, locum, a Parente acceptum, per Filium amittit: nemo causam tristitiae e morte Patris habet, praeter amorem: neque in iniuriam trahitur cuiusquam dolor: sed tanto plus Sibi honoris habitum Rex iudicat, quanto plus memoriae paternae tributum videt. Iisdem consilii publici auctoribus, rerumque gerendarum administris, quibus Pater, utitur: nihil gravius, et gloriae Suae inimicius, existimans, quam de Parentis tam prudentis, tam bene de Se meriti, iudicii iudicare, nihil tam abhorrens a sapientia, quam a sapientissimi Regis consiliis discrepare. Neque vero cuiquam in mentem venerat, aliter futurum, suspicari. Cognoverant enim Pietatem Principis: sciebant, saepe, vivo Patre, consiliis publicis interfuisse: quid, quomodo, a quoque ageretur, nihil privatis commodis, aut ambitioni, omnia bono publico tributa, viderat: quae agerentur, comprobabat: ut, si a Patris consiliis discederet, a Se ipso dissentire videretur: id quod ab Eo tanto videbant esse alienius, quanto constantiorem in bonis sapientiae studia fecissent. Ergo securus quisque dignitatis ac fortunarum suarum ad Te, eademque, qua ad Patrem antea Tuum, alacritate, adiit, Rex Optime, cum Te Regem salutatum veniret: Tu autem eodem, quo Pater, vultu excepisti, et nunc quoque excipis omnes, tenax illius comitatus atque humanitatis, qua dudum in animos summorum atque infimorum influxeras. Neque enim simulationem eius assumseras, sed natura penitus insitam iudicio confirmaras: neque eam temporibus dederas, sed civium amoris tribueras. Haec igitur prima, atque, haud scio, an maxima, imperii Tui commendatio.

Quid vero? an illa Vobis parva videtur, quam literarum ornandarum iuvandarumque singulare studium attulit? Amat Sapientissimus Princeps literas, quia didicit:

cit: amari et coli a Suis vult, quia publice privatimque fructuosas Ipse cognovit. Et amoris quidem huius demonstrandi facultatem amplam et insignem praeclarum Academiae Soranae opus praebuit: quod Ille, a Divo Patre institutum et profligatum, magnifice peregit. Voluit Ipse eius dedicationi interesse: non modo, vt novam Musarum sedem studiis civium commendaret, sed vel maxime, vt eam praesens Ipse in tutelam suam fidemque reciperet. Nullum ibi genus indulgentiae et humanitatis in quemquam omisum constat. Admissi in conspectum, qui literas docerent: excepti vultu, ad omnem benignitatem explicato: dimissi laudantis adhortantisque vocibus pleni, irent certi securique benivolentiae Suae, tanto quisque magis, quanto magis literas et studia discentium iuisset: meminissent, florem iuventutis Danicae, spem patriae, futuraeque felicitatis curam, sibi commissam. Iuventutis autem ipsius, quae ibi literas disceret, studia quomodo incensa Regis praesentia et favore putatis? Videt enim sibi discenda, quae Rex Ipse amet, intelligat, vtilia rei publicae credat, sentiat: tanto quemque vtiliorem patriae, atque hoc ipso gratiorem Regi, fore, quanto plus in literis elaborarit, profecerit. Atque etiam Sibi in animo esse Rex pronunciavit, in honoribus tribuendis, primam quidem ac summam rationem dignitatis ducere: ceterum, in iis, qui pari dignitate essent, cives potiores fore: non, vt excluderet quemquam ab honorum et beneficiorum Suorum spe: extingueret enim ingeniorum certamina, quae cupit incendere: sed vt aemulationis stimulos subderet animis civium, tantoque acrius omnes sapientiae praemia, spem suam, persequerentur.

Neque vero quasdam modo partes rei publicae Sibi cordi esse demonstrat, sed etiam vniuersam cura Se et sapientia amplecti ostendit. Videbat, Sibi regnum relictum esse saluberrime constitutum, legibus institutisque sapientissime temperatum, concordia intestina coagmenta-

tum et firmum, mercaturis magnis et fructuosis locupletatum, literarum etiam studiis et ingeniis florens, verbo, consentiens maiorum Suorum sapientiae et meritis, dignum Se Rege. Sed istorum bonorum omnium neque perpetuitatem retineri, neque fructum maturescere et percipi posse, intelligebat, nisi conservata pace, quae esset cum dignitate coniuncta, et ab omni metu remota. Nam, simul ac belli metus, etiam inanis, ingruat, debilitari hominum, literis operantium, studia, diminui mercaturam, labefactari fidem: ubi autem bellum ipsum exarserit, prorsus affligi omnia, filere ipsas leges, universam denique rem publicam penitus conturbari. Itaque nihil Se, hoc est, sapientia Sua, animi magnitudine, et amore in patriam, dignius iudicavit, nihil prius Sibi agendum, Sapientissimus Rex, putavit, quam, ut, Se pacis auctorem ac defensorem perpetuum fore, probaret. Cepit ergo hunc etiam e literarum et verae sapientiae studio fructum, ut intelligat, veram nominis et gloriae magnitudinem non rerum in bello primis gestarum titulis, parari, quibus heu! nimis, cum summa perniciem generis humani, capiuntur vanae magis, quam magnae, Principum animae, et magnae potius, quam bonae, appetentes famae: non, quamplurimo sanguine innoxio et Christiano profundendo, urbibus diripiendis ac diruendis, regionibus ferro ignique vastandis: quae, quis bona fide credat, esse pulchra, magna, et laude digna, ac non faevorum Neronum, Domitianorum, Attilarum, quam magnorum Principum, similia? Vnde ergo magnum nomen, veramque immortalitatem petendam putat? Nempe, a maxime pacis artibus, a beneficiis in singulos et universos, a civium conservatione, ac Regni universi felicitate. Hac via ad gloriam et aeternitatem contendisse, didicit, omnes, qui verae sapientiae iudicio magni habentur: his nominibus in Deorum numerum quondam homines, fama et opinione populorum, fuisse sublatos: his agendis ad similitudinem Dei, qui solus optimus, maxi-

maximus vere dicitur, ascendi. Vult ergo pacem, non minus, quam cives Sui: sed pacem, altissimo animo Suo et gloria dignam, civibusque salutarem, hoc est, plenam dignitatis, et timore vacuam: quam non ignaviae dulcedo commendet, periculi timor suadeat, virium inopia et necessitas imperet: quae non suspicionibus agitetur, ad malos rumores trepidet, vilius denique minas expavescat: sed, quae aequitatis studio nitatur, publicae salutis cura confirmetur, virium denique fiducia acquiescat. Est in Rege nostro summa virtus ac fortitudo, insita illa ab ipsa natura, animi quadam inductione roborata, atque insuper aetatis vigore inflammata: est exercitus magnus et firmus, classis ampla et instructa: sunt cives, pro Regis tam cari gloria, nihil non subire parati: sunt etiam spei amplissimae, cognationis arctissimae, magnae denique gloriae, potentes illecebrae. Sed haec omnia longe vincit ac superat sapientia, et salutis tranquillitatisque publicae, omni alia re potentior, cogitatio et amor. Inter haec tamen omnia aguntur ita, ut bellum cogitari apparique videatur, cum nihil aliud, nisi pacis praesidia, et securitatis munimenta, quaeratur. Etenim videt Prudentissimus Princeps, eam demum certam et liquidam pacem esse, in qua semper de bello cogitetur: quae specie belli mox suscipiendi, summisque opibus gerendi, commendetur: quae bello omnia similiora habeat, quam sibi. Atque talem tutelam sui cum semper pacem desiderare intelligat: tum maxime flagitare iudicat hoc tempore, cum non modo illud bellum, quod per plures annos magnam Europae vastavit partem, nondum deflagravit, sed etiam nova incendia timentur. Etenim, bellum ardere, non hac tantum de causa, ut opinor, dicitur, quod eius vis ita omnia sternit, diruit, absumit, ut, in quibus terris ea versata est, ibi magnum et diuturnum incendium saeviisse videatur, sed etiam alia quadam incendiorum, haud paullo periculosiori et perniciosiori, imitatione. Nam, ut incendia non ea modo perdunt,

quibus primum infederunt, nec vicina tantum appetunt, ad quae facilem transitum alliciens ignem arripiensque materia praebet: sed etiam ad remotiora saepe loca, favillis igniumque globis eructandis, repente transsiliunt: sic belli furor, praesertim ubi diuturnitate irritatur, non continetur iis, quibus coepit, finibus, sed modo vicinos, non satis cautos, infestat, modo, intermediis omissis, ad disiunctissimas intervallis regiones, magno ac subito impetu, defertur. Cuius pestis suae exempla, si quod aliud unquam bellum, hoc certe, quod nunc geritur, plurima edidisse et maxima, magno cum dolore, cognovimus. Non igitur praeclarissimum Rex noster prudentiae suae documentum dedit, cum altissimam illam, qua Dania, a permultis annis, fruitur, pacem Martis opibus roborare et fulcire instituit? Etenim, quo spectare alias putatis ea, quae agi pararique in Dania, saepe audistis? Mitti milites, qui nec aetatem, nec vires militares, habeant: acerrimos delectus, per Regnum univsum provinciasque, haberi: novas e Norvegis, fortissima et robustissima gente, legiones scribi: arma parari: rem tormentariam curari: legiones copiasque ab ipso Rege diligentissime inspicere ac recenseri: naves novas aedificari, omnibusque rebus instrui et armari. Haec, inquam, omnia quo consilio putatis institui, agi, curari? Non profecto ad civium sollicitudinem; non hoc amor in ipsos sinat: non porro ad externi, bene animati, periculum ac terrorem: non aequitas Illius patiatur. Quorsum igitur? Nempe ad securitatem omnium: ad pacem, non Regni finibus expellendam, sed stabiliendam potius, et omni ope retinendam. Atque istis consiliis et res eventusque respondet, summa securitate etiam ab iis, qui, nostrae felicitatis invidia, infesta nobis consilia agitabant, parta, et fructus alii longe vberriimi constant: ea inde Regis fama et gloria, ea potentiae Danicae opinione orta, ut ceteri Reges ac Populi certatim Eius amicitiam appetant, opesque Danicas implorent. Quibus
rebus

rebus laetatur Ille quidem, gaudetque omnibus: sed magis tamen securitate Suorum, quam opinione quamvis illustri, aliorum: neque aliter hanc amplectitur, nisi, quatenus e salute et felicitate Suorum efflorescit: quam Ille malit, si necesse sit, sine gloria, quam famam amplissimam, cum incommodis, iniuria, et gemitu civium.

Quod si hac indole atque animo, his consiliis, institutis, factis, etiam exteris initia imperii, omninoque nomen Suum, commendare potuit Fridericus: si Vobis, Auditores, ut mihi videor intelligere, sapientiae, literarum, virtutis, communis securitatis causa, admiratione et amore prosequendus videtur: quas mentes, quos animos, esse putatis iis, quos propius admovit virtutibus Eius patria communis: quibus proprie consultum, tali Rege concedendo, benignitas divina voluit: qui denique omnia illa, quae instituuntur, aguntur, ad suam utilitatem, ad suam salutem ac felicitatem, excogitari pararique vident? Si tanta est sapientiae, virtutis, in primisque animi magni et excellentis, pulchritudo et admirabilitas, ut, cum aliquid sapienter, fortiter, magnifice, dictum factumve ab aliquo, legimus, vel audimus, suaviter commoveamur animo, eumque, quem nunquam vidimus, etiam mortuum, amemus, favore ac laudibus prosequamur: quo amore, quo studio, incensos et elatos putatis eos, qui istas virtutes tantas, non de fama et auditione, norunt, sed suis ipsi oculis adspiciunt: quibus coram intueri datum est Fridericum illum suum, in quo, tanquam in augusto templo, ac vivo sacrario, tot ac tantarum virtutum pulcherrima signa, divinitus consecrata, fulgent? Agri terraeque steriles colentium curae respondent: bestiae saepe ipsae dando flectuntur, et benignitate alliciuntur ad fidem dominorum: alienissimi denique homines beneficiis conciliantur, et ad benevolentiam adiunguntur: Dani autem neque tanta salutis suae cura ad grati animi officium movebuntur, neque beneficentia ad amorem incenduntur, neque felicitatis

suae tantae spe ac sensu ad omnem laetitiam incitabuntur? Non ita neque ad intelligenda bona sua obtusum pectus gerunt, neque ad beneficia celebranda duro ingratoque animo retardantur. Immo vero, si recte novi populares meos, si de meo vnus sensu atque animo, iudicare ceteros licet, omnes toti sunt Regis sui, ita fide, benevolentia, et amore, additi ac devoti vniversi, vt nemo sit, quin omnes fortunas suas vitamque, pro Eius salute et gloria, dimittere, non dicam, paratus sit, sed optet ac gestiat.

Huius autem diei, qua more maiorum, solempni ritu, inauguratur, laetitiam, certo scio, esse tantam, vt eam ne capere quidem vniversam animi possint. O! quam vellem, mihi quoque datum esse, vt istius celebritatis pars esse, vt isto tam praeclaro, tam memorando, tam iucundo spectaculo, sensus pascere animumque possem. Quam vellem videre die hac, primum, Augustum ac Coeleste Par, Regem Fridericum, cum Regina Ludovica, illud vtiusque instar, illam tantam maiestatem oris, paremque gratiam: plena ac referta, a concurrente ad spectandum, ex omni Regno, multitudine, omnia: festinationes cursusque, Reges videre, adire, et contingere dextras, gestientium: audire porro, plaudentium infinitos clamores, totoque pectore gratulantium voces: interesse denique coetibus sermonibusque hominum, redundante gaudio adversus omnis alius voluptatis sensum occupatorum, celebrantium mox Regis pariter Reginaeque pulchritudinem, maiestatem, humanitatem, virtutes, mox patriae, suam, suorum, posterorumque, felicitatem, ad omne denique genus laetitiae, toto impetu, non per hunc modo, sed multos post dies, effusorum. O! vos ter et amplius beatos, qui istam tantam laetitiam praesentes haurire sensibus, atque dulcissima, et nunquam parum habitura, voluptate explere animos, potestis!

Nunc, quoniam istam tantam felicitatem mihi invidit fortuna, permitte, quaeso, Rex Indulgentissime, Pater Patriae

Patriae Optime, ut Tibi absens, sed mente, animo, fideque praesens, acclamem Felioiter! Feliciter! Teque, laetissima voce, ac devotissimo Tibi animo, salutem. Salve! o! salve! iterumque salve! Friderice, Rex Potentissime, idemque Optime, cum Augusta Tua Ludovica, Regni atque Tori Tui dignissima exoptatissimaque Consorte. Salve! Auctor atque Stator Danicae Salutis atque Felicitatis. Per Te securitas Patriae corroborata, pax constabilita, omnium felicitas fundata. Per Te leges vigebunt, iustitia et aequitas convalescet, literae atque artes omnes florebunt, mercatura amplificabitur, omnium denique rerum copia redundabit. Tui muneris erit, quod vivemus, Tui beneficii, quicquid laetabimur, Tui denique consilii, quicquid in omne tempus sperabimus! O! gaude istis tantis bonis Tuis, et fruiere virtute Tua et gloria! Sustine porro illas Tuas pro nobis curas, cogitationes, et labores, neque vlllo tempore nobis conservandis, fovendis, omnique felicitate cumulandis, defatigare. Nos interea, pro Tua Augustae que Coniugis, ac totius Domus Tuae, felicitate vota faciemus: nos Tuis dictis et imperiis, aequissimis et saluberrimis futuris, libentissime parebimus: Te fortunis nostris, manibus, ac sanguine, defendemus: Te summa veneratione prosequemur, Tuumque nomen ad omnem posteritatem gratissimis laudibus propagabimus.

Tu autem, Summe Deus, tuere et conserva nobis hoc tuum tantum, tamque amabile, munus: serva Patriae Regem, sapientia et virtute maximum, animo, indulgentia, beneficentia, optimum, cum Regina Augusta, magni Patris dignissima filia, iisque prosperrimam valedudinem largire, simillimamque subolem, cui grandaevus Pater, et vitae gloriaeque satur, populorum Suorum curam, Suaeque fortunae maiestatem, tradere queat: e qua nascantur deinceps, qui acceptam Regni, virtutis, gloriaeque, hereditatem, ad rerum usque humanarum finem, obtineant! Adiuva Eius curas, quibus pro salu-

te

te humana excubat, et consilia prospera, omnibusque his, quae, pro re Christiana et publica, pace belloque, instituet, aget, successus eventusque felicissimos et celerissimos concede.

Sed eadem cura et indulgentia Tua amplectere magnum Regis socerum, Georgium Augustum, et quoscunque Tua providentia Regi, vel cognatione, vel affinitate, vel federe, iunxit: inprimisque Potentissimum Regem, Fridericum Augustum, cum Augusta Coniuge, et vniversa Domo Augusta, eumque, et sua virtute et gloria, et Suorum, populique sui, felicitate, quam diutissime frui iube.

Perfunctus sum officio, quod incredibili meae in Regem Pietati, in Patriamque Amori, debebam. Id cum per se mihi fuerit, vti debebat, suavissimum, tum vero aliquanto iucundius factum est singulari humanitate, et audiendi facilitate, in primis Tua, Illustrissime Comes de Manteufel, Aulæ Saxonicae, vniversaeque Saxoniae, primum ornamentum, literarum autem praesidium maximum, deinde Vestra, Auditores reliqui, Rector Academiae Magnifice, Comites Illustrissimi, vtriusque Civitatis Proceres amplissimi, Commilitones generosissimi, humanissimi. Quo magis cupio Vobis esse persuasum, huius beneficii nunquam mihi oblivionem venturam, memoriam, per omne vitae tempus, gratissimam et iucundissimam futuram. Ita ite, et mea vota favore Vestro omnibusque comprobate.

E L O G I V M
IO. AVG. ERNESTI

PVBLICE SCRIPTVM

AB

AVG. GVIL. ERNESTI

Iacturam fecit in Ernestio suo Academia nostra, qualem non vidistis, *Cives*, nec visuri estis; vt olim in Metello Roma, ipso teste adversario, numquam maioris civis funus spectatura. Sed quid Academiam tantum dico, quum vniverſa Saxonia non minorem noſtra ſuam iacturam agnoverit? Nec vero intra huius fines conſtitit tanti damni dolor tantus, ſed omnem Germaniam occupavit, et porro, velut ex publica calamitate, totius orbis litterati reſſus omnes penetrabit; plane, vt, ſi cuius vmquam magni viri amiſſi, huius vtique luſtus ac deſiderium publicum ſit futurum, nec futurum modo, verum et manſurum, dum verae doctrinae atque elegantiae ſenſus, illo inprimis auctore inſtauratus, vigeat. Ita enim ille natus erat, ita educatus, ita inſtitutus, ita multo magis per ſe factus, divinitus quidem, tanta meritum et multitudinem et magnitudine conſpicuus, tanto diſcipulorum optime de omni republica merentium coetu ſtipatus, tanto virorum ſummorum, etiam regum ac principum, favore inſignis, tanto denique opere cunctis celebratus, vt, ſi ſaeculis ſingulis plures Ernestio pares Academiae noſtrae contingere potuerint, vltra conditionem rerum humanarum felix ea et beata cenſenda videatur.

Talem quidem, et litteratorem, et theologum, ante haec duo ſaecula habere deſimus, tum Philippum Melanchthonem, communem Germaniae praeceptorem, tum Ioachimum Camerarium, proprium Academiae noſtrae lumen, ſuae ſcholae conditorem, qui et ipſe per quadraginta amplius annos docendo ſcribendoque Lipſiam ſuam ornat. Multae apud nos vivo illo, multae mortuo, multorum varii generis ſcholae ſunt conditae, ſed

vna

vna cum auctoribus suis sepultae conticuerunt. At illius schola, quae solidiorem doctrinam cum bonis litteris et subtiliori ratione coniungeret, etiam nunc non laudibus modo iustis floret, sed formulae quoque suae aemulos retinens, eo vivacior perstabit, quod per Ernestium nostrum veluti postliminio revocata revixit. Nempe vir ille erat, caeteri a quibus infestaretur, quos multos expertus est, etiam discipulos, nullius numeri; illius memoriam omnis posteritas colit, horum nomina tantum fastis academicis inscripta in obscuro sunt; ut multorum Romae consulum nil aliud quam consulatu functorum.

Habet omnino hoc vniversa natura, ut non nisi raro a legibus suis recedat, nec mensuram modumque rerum, ne corporearum quidem, in singulis generibus excedi saepius aut magnopere velit; immo ita constans est suique retinens, ut, si quando in vtramlibet partem contra aliquid conspici voluerit, hoc ipso perpetuitatem suam certamque rerum normam demonstrasse videatur. Quod ita esse vel mortalitatis humanae diligentes speculatores agnoscant omnes. In tanta enim tamque infinita varietate, quae in corpus humanum cadat, sensuum, virium, convenientiae partium, vniversi habitus, lineamentorum ductus, vultus conformationis, ut alia taceam, tanta tamen similitudo eminet, qua coniungantur omnes omnino homines, ut vniversae et certis numeris absolutae humanitatis veluti conspirationem atque concentum admirabundi notemus. Raro enim caeci nascuntur, nec multo saepius lyncei; raro pusilli, nec frequentius proceri; raro insigniter deformes, qui vere dici queant, ut Theristes Homericus, nec minus raro pulchri, ut Nireus. Media fere, ut in hisce, ita in caeteris naturae generibus et mediocria frequentantur, sed infinitis modis mixta illa e diversis et temperata.

Idem fere sequuta invenietur natura in effingenda vniversa mente humana, ingeniique et animi dotibus distri-

distribuendis, ut raro ultra mediocritatem adfurgi vellet. Pleraque enim ingenia destinavit singulis rerum, operum, munerum generibus, iisque in omni vitae ratione tenuioribus. Sat multi, modo sequerentur vitae genus, cui essent a natura destinati, in eoque tantum industriae, quantum possent ac deberent, eadem natura comite, ponerent, sat multi, inquam, supererant, qui, in suo quisque genere, pro singulari quadam ac praecipua mentis indole, duces sese auctoresque aliis praearent, proferendisque et amplificandis artis suae finibus vere prodesse. Hos quidem natura dicavit, non singulis muneribus, civitatibus, gentibus, sed universae virtuti, doctrinae, humanitati donavit: non multos tamen, vel quod pauci sufficerent reliquis acuendis, vel, quod arduum esset; unde in tot pictoribus unus Zeuxis, unus eminuit Apelles, in tot statuariis Phidias et Praxiteles. Neque eloquentiae sortem conditionemque aliam fuisse Cicero monet (Brut. cap. 49.) quum omnes ait cupisse dicere, non plurimos aulos esse, potuisse paucos (cf. cap. 78: init.) Tot ergo velut sidera praelucentia inter ignes minores, omnemque doctrinae ambitum illustrantia, quo minus exorirentur, praeter causas ante commemoratas, iniquitas temporum subinde offecit, invidiae malignitas, institutorum perveritas, morum levitas, vitae remissioris segnities, morae denique ac taedii laborisque impatientia. Quae quidem impedimenta si quis arte ac ratione, quam coniungeret cum rara ingenii felicitate, omnia vel removet, vel pericit, ut bona sua quaquaversum promanarent, et ad omnes gentes a litteris non alienas redundarent, eum vero non in beneficiis naturae singularibus, non in virtutis doctrinaeque maximis exemplis numeremus? ei non vel praecipuum ius dicamus esse, praemiorum undique expectandorum? in eius morte, si vel maxime fera eum interceperit, privatam tantum iacturam, non publicam, eamque magnam agnoscamus ac lugeamus?

R

Agno-

Agnoscimus vero nos et lugemus in Ernestio nostro maximam publicam iacturam: et, ne leviores aut hebetiores videamur, aut exteris et posteritati concedamus, nunc quidem omnia illa, et naturae, et vero etiam viri beati propria bona contemplando, ac veluti tabulam vitae praeclare actae, pulcherrimumque spectaculum, proponendo, animi nostri pietatem grati adversus Deum, neque ingrati adversus defunctum, aequo spectatori probabimus. Nam univrsam illius vitam persequi, vberiusque exponere, integri libri, nec parvi illius, opus et argumentum fuerit, quem ab eo scribi optabile est, qui magnitudinem et eloquentiam viri adsequi possit, vt Melanchthonis vita parem scriptorem Camerarium est naeta.

Et ingenio quidem utebatur ille, non fervido aut vehementiori, ne magnopere quidem alacri, sed leniori, sedatiori, mansuetiori, faciliori, eleganti tamen et acuto eodem, vtque vno verbo defungar, Ciceronis, quam Demosthenis, similiori: quod aptum esset solidiori doctrinae vel percipiendae, vel edifferendae atque illustrandae, litteris vel maxime abstrusis et reconditis excutiendis ac rimandis, optimis artibus cognoscendis et exercendis, orationis denique flumini puro et leni fundendo, sed eidem omni vbertate copioso, et amoenitatum plenissimo. Iudicio autem valebat peracri, sed sedato et recto, quod aberrare illum a vero non facile pateretur, vt qui voluendo versandoque, quid inesset cuique rei, quid in ea ambiguum atque impeditum, quid cuique causae proprium, aut rursus ab ea alienum, cui quidque prodesset vsui, acute celeriterque intelligeret; quum praesertim subegisset ingenium infinita lectione, non intemperanti et eruda illa atque indigesta, sed, quam composuisset, finxisset ac regeret cogitatione assidua, plurimo rerum vsu, docendi denique ac scribendi perpetua exercitatione; memoriam autem, cuius vigeret et tenacitate et facilitato ac celeritate egregia, adeo fidam sibi et officiosam, ac velut dicto audientem ac promptam reddidisset, vt ab ea
non

non temere destitueretur, essetque illa ei plurimorum instar thesaurorum, quales alii per otii abundantiam colligere, scriniisque suis, vnde sapiant, inferere consueverunt: nimirum quia omnia legebat cum sensu, notatione, et vsus varii destinatione ac velut repraesentatione. Animo denique eius nihil generosius, nihil sanctius, innocentius nihil erat. Contemptis voluptatibus sapere ausus fuerat, laborare didicerat, laborando prodesse publice privatimque concupierat; nec vero id ad famam laudemque referebat, sed ad conscientiam recti, quem verum Dei cultum putaret. Sensus de religione, quos vel innatos vel informatos educationis beneficio concepisset, ratione duce, caelestis veritatis adiumento, inductione denique et adfuetudine, ita auxerat, emendarat, corroborarat, vt pietate in Deum, rerum divinarum studio, virtutis omnis amore et cura fideli ac simplici, omnia metiretur. Huic animo tam excelsio idoneum natura domicilium dederat, corpus non exile illud et viribus debile, sed, in iusta statura eximiaque dignitate, firmum, vegetum, valetudine prospera ac fere inoffensa, quam ad septuagesimum vsque annum mira diligentia ac temperantia conservavit. Inprimis fronte, quae mixtam hilaritate severitatem, ac paene austeritatem, referret, animus patebat feriorum amans, amabilis ipse, sed multo amabilior propter humanitatem, facilitatem, etiam festivitatem ac sales vere Tullianos, numquam a modestia ac prudentia alienos: quibus rebus effecit, vt summis, infimis, qui quidem saperent, gratissimus esset atque desideratissimus.

Tantae liberalitatis in ipsum expromptae atque effusae ne poeniteret naturam, summo studio adolescens adhuc providit. Quum scholam Portensem relinqueret, Schreberus, Rector, etiam de ipso optime meritis, ad eius fratrem scribens, a quo noster domum arcessebatur, inter alia, quae in ipsius laudem commemorabat eximia et praeclara, hoc quoque posuit: *ille vero plures libros*

cognovit et legit, quam studiosorum quisquam, qui abiturum ex Academiis parat. Ipse etiam saepe professus est, historiae litterariae et notitiam et amorem primum e Portensis bibliothecae usu, qui sibi liberrimus concessus fuisset, se conceptum duxisse, in eoque studio Freytagium sibi egregie profuisse. In Academia autem Vitembergensi Io. Guil. Bergerus, quem humaniorum litterarum causa sectatus est, discipulum eum habuit, singularis industriae nomine, longe carissimum. Apud Wernsdorfium, Theologum acutum et elegantem, quum inter sermones privatos aliquando de difficultatibus, quae legenti sibi epistolae Paulinas crebrae occurrerent, questus esset, hoc responsum tulit: *intelligo te sapere.* Nempe questus erat is, cuius commilitonibus, tantum non omnibus, libri N. T. pro ea, quae tum erat, vulgi opinione, facillimi esse videbantur. Horum nostri commilitonum vix quisquam, tantam veri acute videndi recteque interpretandi facultatem, philosophando et mathematicas disciplinas tractando erat adsequutus, et ad cognoscendos libros sacros attulerat, quantam ipse, qui etiam bonarum litterarum praesidiis esset instructus; adeo ille iam tum inter caeteros eminebat! Habuerat autem in philosophia ducem Schlosserum, formulae Wolfianae philosophum, sed praeter caeteros elegantem, e cuius scholis tantum philosophiae amorem imbiberat, ut Lipsiam delatus cum Gesnero, in privata consuetudine, propemodum nil aliud, quam philosopharetur. Qui quum cognovisset et subtilitatem nostri et elegantiam, hortatus est eum atque impulit, ut matheseos et philosophiae Initia latinitate donaret. Hauserat autem rerum mathematicarum scientiam non Vitembergae tantum e scholis Hassii, excellentissimi geometrae, sed etiam ex Hausenii nostratis: quem vel ipse Kaestnerus ille praeceptorem sibi contigisse laetari solet. Eius frequentavit praelectiones de mathesi sublimiori, cum duobus tribusve commilitonibus, in quibus Hermannus erat, nunc in aula Dresdensi con-

concionator primarius, Venerandus senex, quum caeteri sodales, qui ab initio scholarum amplius quadraginta erant, fuga molestiae ac difficultatis, vt fit, signa deseruissent. In theologia Boernerum ac Deylingium sequutus est; eloquentiae Germanicae praecepta tradentem audivit Gottschedium, qui tum in eo genere optimus ac paene vnicus habebatur. Hoc curriculum emensus est triennii spatio, cuius dimidium tamen hic Lipsiae ne totum quidem studiis suis impendere potuit, avocatus ac districtus liberorum Stiglitiae domus institutione, quam provinciam ille in itinere domum faciendo, transiens per hanc urbem, Freytagio suo ipsum commendante, susceperat. Adeo celeriter proficitur ab iis, qui bene prae-parati, nec nimis iuvenes, ad Academicas doctrinas accedunt! Ad hoc vsque tempus cathedrae ecclesiasticae totum se destinaverat, quum ecce Stiglitius, praeclarus ingeniorum spectator, locum Conrectoris in schola Thomanica ei offert, quem, diu cunctatus, agnito tandem nutu divino, alacriter speique plenus, adiit. Quae igitur studia in subsidium tantum adhuc theologiae, ac velut ministros vsus, tractavisset, ea iam profiteri et propter se ipsa colere praecipua cura et opera, novo isto vitae genere cogebatur. In hoc munere administrando, vtut iuuenis quatuor et viginti annorum, cui regendus esset coetus alumnorum, inter quos conspicerentur haud pauci, multo, quam ipse, aetate provectiores, tamen, auxilio divino confusus, prosperrimos successus habuit. Quae ille divinae providentiae documenta singularia, inter lacrymas infinitas praedicavit, quum ante hos tres et viginti annos, collegis coram et vniverso coetu, modamine et cura illius scholae sese abdicaret: quam quidem inde a Gesneri in Academiam Gottingensem discessu, summa omnium cum laude sustinuisset. Huic tanto viro, Gesnerum dico, annum ipse agens septimum et vicessimum successor tum datus fuerat, a patronis quidem sapientissimis, nec vlli sumptui, in arcessendis vel e lon-

ginq̃uo viris doctis, quod et in Gesnero ante factum esset, parcentibus. Sed enim cui rectius cura illa demandaretur, non erat; et ille per omnia doctrinam, industriam, prudentiam denique suam patronis, nominatim Stiglitio suo, abunde probaverat. Neque dedisse se nostro beneficium Stiglitius postea saepe dicebat, sed ab eo accepisse. Ita virtute duce, comite fortuna, immo divino favore, doctrina denique conciliatrice, adolescens consequutus est, quod non nisi a viris praestantissimis expeti posset. Ab hoc iam tempore fama et existimatio eius indies invaluit, non modo apud nostrates, sed inter externos etiam. Quam enim de se expectationem commoverat, eam, licet gravem saepe adversariam, adolescenti utique, eique feliciori, semper egregie non sustinuit modo, sed plane vicit. Editio quidem eius opera Cicerone, Olivetus ille, Ciceronis editor et ipse doctissimus, et interpretres elegantissimus, prior ad eum scripsit, nec quidquam iam non magni ab eo expectari fas esse pronuntiavit. Similibus huic pluribus plurimorum de ipso iudiciis adeo parum abusus est ad arrogantiam sumendam, ut incitamenta illa sibi subiiceret ad industriae ac sollertiae progressum atque constantiam. Itaque praeter morem receptum, qui in schola senatoria docentibus aditum ad cathedram academicam eo tempore intercludebat, tulit noster etiam Patriae Parentis iudicium honorificentissimum, quum iuberetur ante hos vndequadraginta annos extra ordinem litteras humaniores iuventutem academicam publice docere, cui privatis praelectionibus tum philosophicis, tum antiquariis, tum denique philologicis iam per aliquot annos egregie profuisset. Tum vero maior indies ad eum multitudo confluere, sive historiam catholicam, Romanasque antiquitates enarraret, sive Graecos Latinosque auctores interpretaretur, nova quidem hos ratione, id est, ea, quae accommodata esset ad ostendendam et exponendam cogitandi subtilitatem, ad excitandum sensum universae elegantiae, ad mentem rerum cognitione ditandam, ad animum

mum denique virtutis amore imbuendum, postremo ad
 verum usum docendum legitimae interpretationis sacra-
 rum litterarum, quin et legum civilium, aliorumque
 librorum, quorum vera cognitio, verus usus verteretur
 in subtilitate interpretandi. Namque litterae humanio-
 res, propter inscitiam aut perversitatem eas profitentium,
 a philosophiae, historiarum, optimarum denique artium
 cognitione alienissimae tum putabantur, quum ad syn-
 taxin grammaticam, ad vocum formarumque dicendi
 commutationem, ad contortarum traiectionum ineptias,
 ad imitatiuncularum crepundia, ad orthographicas alias-
 que his similes lites et minutias vulgo revocarentur: quas
 quidem profecto non possunt esse ingenii atque animi
 alimenta. Enimvero quum, quidquid Graecia Latium-
 que monumentorum transmisit ad nostram aetatem, plen-
 ius ac melius deinceps cognovisset, plane ut sensum at-
 que ingenium vimque omnem veterum ipse adsumeret
 atque indueret; quum rei ecclesiasticae accuratam cogni-
 tionem ex ipsis fontibus hausisset; quum denique philo-
 logiae sacrae et interpretandorum librorum divinatorum
 veram rationem, a Grotio praemonstratam, priscorum
 loquendi usu notando, et LXX virali versione comparan-
 da, inire didicisset, doctissimis ecclesiae patribus, prae-
 cipue Graecis, in eo genere ducibus usus, quid mirum,
 in theologicis eum et acutius videre et rectius sentire
 potuisse? quid mirum, si, quicumque deinceps aliquid
 feliciter et recte conati sunt in libris sacris interpretandis,
 auctorem illum sui sensus et habuerunt et lubenter prae-
 dicaverunt? Tali autem consensu tantum non omnium
 doctrinae partium esse vere censendum theologum sibi
 persuaserat. Crediderat scilicet mature Philippo Me-
 lanchthoni, vel e poetis veteribus sensum veri, etiam in
 theologia, petendum esse: qui quidem, auctore Victorino
 Strigelio *), dicere solebat: *Post lectionem biblicorum nulla
 lectio*

*) in locis theologicis, quibus loci communes Phil. Melanch-
 thonis illustrantur etc. Neap. Nem. 1582. 4. p. 27.

lectio utilior est, quam tragoediarum, Aeschyli, Euripidis, Sophoclis et Senecae etc.

Hanc ille facultatem rei sacrae usum iuvandi, quod ab initio sibi propositum habuisset, collectam tot annorum studio, et philosophiae inprimis ac bonarum artium intelligentia comparatam, in lucem tandem proferre destinavit, docendo scribendoque ea, quae ad libros sacros, praecipue N. T. recte interpretandos pertinerent. In quo quum experiretur calumniam multorum, verae laudis comitem, qui abstinendum ei fuisse dicerent a rebus theologicis, quarum docendarum facultatem habere nullo modo posset, ut qui honores theologicos capeffere non esset ausurus: non tamen a vero tramite deflecti aut deiici se passus est, satis certus, qui suae scientiae confidere posset, consiliumque sequeretur probum, simplex et salutare, quod neque alio modo efficeretur, neque ab aliis rite teneretur, eum vero curare talia dicta, tales opinioniones, non debere, ne tempore suo infructuose abuteretur, quod in sacrarum litterarum posset emolumentum conferre. Et edebat scripta varii generis, nullo non theologo orthodoxo dignissima: cuius rei, ex omnibus, vnum nunc nobis argumentum sit, quod Anti-Muratorius eius Catalogo librorum prohibitorum Romano insertus est: qui honos plerisque eorum, qui vulgo sibi quae ipsis orthodoxi videntur, quod ab eorum scriptis non ita error sibi metuere debet, haud facile contingit. Ac ne quis hoc ita positum calumnietur, quod et in impie scriptis idem fiat, age, quis umquam heterodoxi quidquam in nostro notavit, aut ei obiecit, aut ab eo propositum ostendere potuit, atque adeo voluit? Quippe qui et contra secus sentientes veram formulam subinde subtiliter, sed modeste, vindicatum ierit, ut in Vindiciis arbitrii divini in religione constituenda, et, in brevi repetitione et adsertione doctrinae de S. Coena.

Quum igitur exteri nobis monstrassent theologum nostratam atque invidissent, ut periculum esset, ne nobis eripe-

eriperetur, tum vero arctius eum Academia nostra complecti coepit, aulae procerum cura atque intelligentia: primo per eloquentiae professionem ei datam, deinde per locum inter professores theologos. Atque illud quidem munus quum per quatuordecim annos ornasset, quo non alius dignior veram eloquentiae vim commonstravit: quod vel scripta eius latina loquantur, quorum vera elegantia tulit, vt Germanorum Cicero diceretur: et Rhetorica eius, Initii doctrinae solidioris subiecta: quumque primus plane inter nos exstitisset verae ac virilis elegantiae auctor, a cuius conditione plurimas ineptias segregarit, plura idem ad eam pertinere ostenderit, quae neminem ante advertissent: ne vernaculae quidem linguae aut inscius aut negligens, cuius simplicem puritatem graviter vindicavit, sibi et aliis caverit ab ineptiis corruptorum: eloquentiae ergo docendae provinciam, coniunctam sustinens cum professione theologica, quasi duplici personae non sufficeret, sedulo administratam in manus indulgentissimi Principis sponte reddidit. In theologorum autem ordine ad primam vsque cathedram deinceps evectus est, fuitque primarii professoris nomen in eo non fortuiti ordinis velut fatale beneficium, sed verae ac propriae dignitatis insigne.

In hac tam laboriosa vita quum inde a secundo et vicesimo aetatis anno singulis diebus complures horas scholis habendis infunderet; tantum tamen temporis ei supererat, vt libris scribendis, et veterum scriptis edendis vacare posset. Tot ergo ingenii sui monumenta condidit, quibus doctrinae divinae humanaeque complures partes illustrarentur, vt libri totidem ab aliis bene multis vix legendo cogniti fuerint. Tantum autem illius scripta plausum tulerunt, vt typographias Belgicas, Anglicas, Francicas eorum repetitio exerceret. Tam avide vero expetebatur eius opera, optimis auctoribus veterum impensa, vt librariis exteris satisfacere omnibus haudquaquam posset. Sed enim haec fere omnibus vulgo

nota. Illud fortasse minus notum fuerit, quam facile, quam lubenter, quam feliciter operi vacarit: cuius rei testes habuit eos, quibus interdum in aliqua philologica indagatione adiutoribus utebatur. Ipse praedicare solitus erat divinum quoddam adiumentum, quo sibi vel offerrentur in tempore, vel subiicerentur, quibus ad tollendam aliquam in solidiori doctrina dubitationem, aut ad locum aliquem vel difficilem interpretandum, vel obscurum illustrandum sibi maxime opus esset. Nam ad casum talia semper referenda quis dixerit? Etsi non minimum ei adiumentum aderat sensus ille et destinatio usus, ad quam, velut ad formulam aut normam sic omnia iam tum in legendo notata retulisset, ut ea per ipsas animi humani leges, quum usus posceret, ex similitudine et consociatione ipsi tamquam instaurata obversarentur.

Sed habuit et alia laborum suorum vel adiumenta, vel adlevamenta, inprimis a matrimonio, quod septem et triginta annos natus inierat cum Rahele Friderica Amalia Dathia, Venerandi Dathii nostri sorore natu maiori, virgine ornatissima bonis omnibus sui sexus, quacum laeta ei concordia vixit. Quamquam parum diuturna haec ei felicitas fuit, ut quae primo vxoris puerperio abrupta finiretur. Eo diuturnior ei fuit laetitia e prole inde suscepta. Hanc ille filiam, Sophiam Fridericam, vtriusque parentis veram imaginem, adeo diligenter educavit, ut desiderium suavissimae coniugis indies ipsi magis minueretur, haberetque illam mature sociam vitae alteram. Hanc neque ad iustae doctrinae formulam plane fingi atque excoli, neque indoctam utique torpere voluerat, maximeque ad obeunda munera, illi sexui assignata et propria, adsuesfaciendam curaverat. In quo certe utriusque maxime consultum fuit. Pater enim habebat, cui administratio rei domesticae rectissime committeretur. Filia autem, pro pietate in patrem indulgentem singulari, et ipsa habebat, in quo sibi maxime placeret, quum et levaret eius curas, et consuetudine sua atque adloquio eum
exhi-

exhilararet. Sed tamen neque se tali filia satis beatum, neque illam patre theologo dignam existimabat, nisi etiam, quos tenellae adhuc informaverat sensus verae religionis, ii denique in pietatem adversus Deum veram et non fucatam evaluissent: id quod summo cum gaudio factum animadvertibat. Talem enim et sibimetipsi olim hereditatem vnam, sed longe amplissimam et omnis hereditatis instar, ab utroque parente venisse saepenumero praedicabat, eoque nomine ipsi memoriam illorum sanctissimam esse, ut verbis non adfirmaret, lacrymae obortae disertius comprobabant. Felicem vero etiam nunc Ernestium nostrum tali educatione et accepta et data. Datae fructum vberimum hunc quoque tulit, ut magnam partem inscius, quod inter preces et amplexus filiae Deo carae ipse Deo carissimus exspiravit.

De hoc vitae exitu morboque praegresso antequam plura dicantur, quibus parentibus illam debuerit, quibus institutis ac moribus compositam rexit, paucis nunc exponendum videtur.

Natus est Tennstadii, in Thuringis, anno huius seculi septimo, d. IV. Aug. patre Io. Christophoro, S. Theol. Doctore, Ecclesiae Tennstadiensis antistite et ecclesiarum scholarumque ephoro, quae tum per dioeceses Thuringicas, Salzensem, Visenensem et Sangerhusanam, Electoralis ditionis essent; matre Catharina Sophia Hedena, Arnstadiensi. Hi eum tum ipsi praeceptis et exemplo religionem ac mores docuerunt, imbueruntque sensu honestatis et erga Deum pietatis, tum, postquam acceperat a praeceptoribus domesticis rudimenta, scholae oppidanae tradiderunt, litteris latinis, graecis, hebraicisque erudendum: in quibus illic, duce inprimis Ittershagio, tantum profecit, ut patre defuncto, sedecim annos natus in scholam Portensem deduci posset, ubi per quatuor annos sub praeceptoribus, quos ante nominavi, meruit. Accepto ingenii cultu pleniori et amoeniori Vitembergam, solidioris ac robustioris doctrinae caussa, profectus est, unde,

ditatus a praeceptoribus, quos et ipsos supra laudavimus, adiit hanc fortunae suae sedem, laudisque hoc domicilium certum, quod, vtrum eum ornaverit magis, an ab eo magis ornatum atque illustratum fuerit, aliis arbitrandum relinquimus.

Sane plurimum illustrata est a Beato Lipsia nostra, (quid enim impedit, quo minus ex hoc genere addamus nonnulla, quae superius a vitae curriculi angustiis non capiebantur?) per scripta eius potissimum theologica. De scholis enim theologicis quis nescit nostratium aut dubitat? Institutionem quidem interpretis N. T. Albertus ille, theologus et litterator Lugduno-Batavus, quum inter suos *plane aureolam* dixisset, adeo non suffecerunt exempla illuc transmissa, vt continuo nova libelli editio a typographis Belgicis paranda esset: cuius formula quot, non modo studiosis rei tantae, sed et magistris, quasi signum sustulit, viamque aperuit recte in ea versandi? Bibliothecam autem theologicam in extrema Scotia lectitatum esse, litterae theologorum quorundam Edimburgensium ad nostrum datae docuerunt, quibus litteris adiunxissent nonnihil scriptorum suorum, quorum in Bibliotheca illa mentionem fieri vellent. Sed, ne vobis, *Cives*, vestraeque scientiae, (nostis enim, vt de hoc genere tantum dicam, praeter Scotos aliquot, multos e Belgio, Dania et Suecia fuisse inter vos, qui Ernestii audiendi causa huc venissent) ne igitur, scientiae vestrae, aut etiam ipsis laudibus viri beati, vbique personantibus, diffidere atque adeo derogare videamur, pluribus huiusmodi adferendis superfedemus.

In ipsa autem arte theologica *Θεολογίῃν* malebat, quam *τεχνολογίῃν*, quum putaret, veritati et simplicitati maxime consulendum esse. Itaque in ipsa formula non vnus doctrinae plura immutavit, salva tamen causa atque sententia librorum sacrorum: qua re malam gratiam iniit ab illis, qui systematis arbitrarii tenacitate orthodoxiam censerent; plebeculae similes, quae, cationibus sacris in
melius

melius mutatis, cultum divinum in deterius mutatum, ipsamque religionem detrimentum fecisse, opinatur. Ipse contra lenis admodum et facilis, etiam adversus illos erat, qui merito corrigendi ac notandi essent, diligenterque discernebat hominis personam et eius errores, aut lapsus; nihil magis decere theologum ratus, quam servare praeceptum librorum sacrorum, iubentium comiter et blande in viam reduci eos, qui ab illa aberrassent. Itaque facillime patiebatur diversam tum theologiae tradendae, tum libros sacros interpretandi rationem teneri ab aliis, quamlibet in ipsum essent iniqui, ut pro heterodoxis falsisque haberent, quae a sua ratione desciscerent: maxime in vulgari adhuc plurium locorum interpretatione: e quibus perperam intellectis eiici atque incidi nervos argumentationis infirmae aegre passi, dogma ipsum convelli ab eo calumniarentur, quod non effici ex vero sensu dicti argueret, utut aliunde certum constare minime negatum iret; immo aptiora subinde et firmiora praesidia commonstraret. Hos, non tam Christi, quam suam gloriam spectantes, tamen, ut maius vitaretur malum, ferendos, neque irritandos esse statuebat. Vel iniuriis laceffitus, etiam a discipulis malevolis et ingratis, eamdem constantiam et animi aequitatem servabat.

In docendi munere summam diligentiam, breviter et perspicue omnia explanandi, nemini non probabat; saepe professus inter suos, numquam se, nisi commentatum, in cathedram ascendere: in qua concionari, declamitare et vociferari non solerent, nisi qui aut sibi placerent, aut inopiam doctrinae studerent utcumque velare. Illud etiam constanter servabat, ut temporis angustiis, hoc est, singulis binisve semestribus, se suasque lectiones coerceri non pateretur, immo auditoribus esse plane satisfaciendum pronuntiabat, et eorum, qui praelectiones et scholas properando absolvent, aut bene docendo vel in dimidia earum parte subsistere cogerentur, hos excusatus peccare dicebat. Nec vero eamdem quasi cantilenam usque ingerebat, sed, quae aut legisset interea, aut notasset subtilius, aut etiam rectius vidisset, lubenter et simpliciter ac benigne cum auditoribus communicabat.

In concionando quantam subtilitatem popularitate et gravitate temperatam, quantam et rerum et verborum copiam argumento cuique accommodatam, exseruerit, alienum sit pluribus commemorare. Illud dissimulare non licet, plus temporis eum in commentando absumpsisse, quam, pro istis eloquentiae praesidiis, ab eo requiri videretur; in hoc etiam similis magno Clario, cui non sufficisse constat unius hebdomadis spatium ad concipiendam unam orationem ecclesiasticam; neque enim iuvare quemquam, edoceri, firmari, incitari, erigi noster existimabat

recitandis iis, quae unicuique a teneris innotuissent; facile vero effundi tales sermones, sed magno cum auditorum damno, qui officiorum non satis admonerentur, certe non edocerentur, quid esset verum in rebus summis, quid tenendum, et cur tenendum esset, qua via et ratione in religionis cognitione, adultis quidem hominibus digna, quibusque vitae institutis in virtutis christiana studio, usuque continuo, proficiendum esset: quam quidem institutionem disciplinamque optime ex suo ipsius usu promebat. Qui unam eius concionem audisset, quin animo vteretur noster vere christiano planeque theologico, dubitare non poterat; quod idem omnis eius vita clamaret. Moribundis amicis lubenter aderat, eiusque adloquium in ea causa a nonnullis expetitur est. Stigmatibus nominatim, quem et ipsum adiuvit moribundum, quum diu ante cum nostro de morte sermones aliquando seruisset, bonum factum! inquit: ergo tibi debeo, quae quum aliis, pro eo ac par erat, debere vellem, frustra anquisivi. Viduis et orbis promptus auxilium praebebat, ex occulto ille quidem, nec consilio tantum, sed re quoque et opera; etiam adversus alios liberalis, quibus vere consuli beneficentia posse videretur. Sed praecipue, quotiescumque usus publicus aliquid suae opis desideraret, liberalis erat, dando, commodando, laborando, defendendo. Amicis, qui calamitate aliqua oppressi non satis expeditas rationes haberent, ultro largam ferebat opem, in eoque sibi mirifice placebat. In se contra suosque minus liberalis, minus benignus et quasi adstrictior erat: sed enim sibi ipsi severus quum esset, erga suos videri non poterat malignior. Cognatos non de alieno, sed de suo sustentabat, non obtrudebat muneribus, aut ambitiosis precibus commoda iis expugnabat, sed non immerito excludi a muneribus nolebat. In disciplina domestica referebat ad honestatem, elegantiam, mediocritatem omnia, temperantiae et rite adhibendi temporis studio metiebatur omnium rerum ordinem. Ita factum est, ut in occupatissima vita tranquille tamen et hilariter ageret. Quae quidem res ei causa fuit et robur vitae longioris, quam in remissiori minusque frugali vivendi genere attingere datum non fuisset.


Defectus virium ante septuagesimum eius annum non magno pere comparuit. Etenim ad hoc usque tempus omnia ille munera strenue obire, alacriter etiam incedere adhuc poterat, ut qui senilis infirmitatis genere laboraret prorsus nullo. Enimvero sensim ab eo termino vitae humanae, hoc est vigoris senilis, gradus eius retardari, incurvus ipse deinceps trahere magis pedes, quam proferre. Ille vero, difficultates et impedimenta omnia omnis generis superare solitus, etiam huic malo resistebat, non ceden-

sedendo nec succumbendo, sed, quum ceteroqui non langueret, intendendo vires, et deambulationibus excitando, eaque pertinacia certe hoc effecit, vt serius aliquanto ad prodeundum plane deficeret. Sed moram ingravescenti malo iniecit etiam vsus aquarum Lauchstadiensium aliquoties repetitus; praesertim quum antea thermas quoque Carolinas semel iterumque adiisset. Enimvero vitam tantum illa remedia, non item viriam robur, aut conservare, aut excitare potuerunt. Ad scribendi etiam negotium tardior factus; manus enim, quas per omnem vitam tanto exercuerat magis, quanto pedes minus, idem diversa de causa negabant. Interea tamen scholas habere, colloquiis tentare ministerii sacri candidatos pergebat, et id genus alia pro more facere. Sed paene obmutuisse, recordantibus oris eius facilitatem flumenque orationis pristinum, videbatur, memoria item omni-que vi ingenii minus valere; idque magis magisque adparebat. Ipse autem quum non posset non sibi conscius esse, quantopere a semetipso descivisset; tamen, quidquid residuum erat virium, id omne, Ecclesiae bonisque litteris inserviendo, consumere cupiebat; quoad lectulo non adfigeretur, agere tantum, quantum posset, destinabat, professorem ratus docentem mori debere. Ita utrimque vires plane confici; vt ad extremum, praeter id, quod mortale habuerat vir immortalis, propemodum nil eius restare videretur.

Felicem vero illum, qui, quum finis vitae adpropinquaret, neutra parte sui maiorem adhuc vigorem retinuerit! Quid enim factum esset animo tam sollerti, salvo quidem eius vigore, cui non pareret corpus infirmum torpore suo atque hebetudine? Quam dignum Ernestio corpus idem, quantumvis sanum, fuisset, quod non regeretur ab animo integro sui-que prorsus compote? Sed nos quoque felices, quibus utcumque incolumis aliquamdiu mansit ille, licet utraque sui parte vehementer adfectus! Profuit nobis idem etiam ultimo lustro mirum quantum publice privatimque. Aderat nobis eius consilium, et vivi fama splendorem huic Academiae servabat; denique preces eius utramque hanc civitatem Deo commendavere. Succurrebatur ei a discipulis, disciplina Ernestiana dignissimis, qui ore suo Vos, *Carissimi Cives*, ab illo doceri vellent. Intellectum est, mortui disciplinam fore salvam, quae vivo tam officiose conservaretur. Sane aliquanto plus detrimenti passa esset Academia nostra, Ernestio iam ante hoc quinquennium, in prima oppressione morbi, erepto, quia se minus a repentino et damno et dolore recipere potuisset. Ipsi quoque tam lentus ac mollis exitus singulari beneficio divino contigit. Nam quum essent ei antea sensus acerrimi,

rimi, ne malis et incommodis suis ipsius, domesticis, alienis magnopere adiceretur, isto torpore optime provisum fuit. Ad extremum nihil omnino ei molestum erat, ne remedia quidem, corpus alias vel fatigantia vel torquentia. Et requiem talem a laboribus indefessae industriae Viro destinarat summa Dei benignitas, quae omnes dolores corporis ab eo prohibuisset, nec nisi senectutem ipsam ei morbum esse vellet: ipse autem ne olim, ad Dei solium transiens, vllis animi doloribus perturbaretur, diligentissime per omnem vitam curarat. Quum denique paucis ante mortem hebdomadibus resolutionem sinistri lateris expertus esset; plane suarum rerum negligens totus in se convertebatur. Illud quidem e sermonibus, subinde ab eo certe inchoatis, intelligebatur, de amicis mortuis eum, nominatim de coniuge, cogitare, quibuscum vna esse, in quorum habitationibus degere cuperet. Neque tamen, posteaquam ab illa resolutione sinistrum latus sollertissima cura revocarant medici, nulla spes restabat suis, fatum imminens ad tempus revocatum iri. Sed pectus pituita oppletum timere iubeat, ne suffocatione aliqua omnis vis vitalis opprimeretur, ipseque exstingeretur; id quod accidit. Quum enim die vndecimo mensis Septembris, ad sextam vsque horam matutinam, placide somnum carpsisset, repente per insolitos rhonchos spiritum difficilius ducere animadvertebatur. Tum vero periculum adesse videbatur ei, qui cubantis lectulo adsidebat. Acciti medici, quod diu timuissent, id plane evenisse, dicere, remediis nullum amplius locum esse, suffocatione et apoplexia paucis post horis animam exhalatum iri: isque vitae finis hora septima vespertina consequutus est, iis, qui aderant, have sancta anima! pie adclamantibus.

Huius tanti viri reliquias quum Vos, *Carissimi Cives*, in pompa funebri tanta frequentia talique officio prosequuti sitis, ne memoriam eius vmquam elabi ex animis vestris patiamini, hortatione apud Vos non magnopere opus esse intelligimus. Et sunt nobis adhuc alia huius in illum amoris vestri, atque etiam pietatis, pignora, quae nos plane iubent sperare, fore, vt, quemadmodum per ingenii sui monumenta perpetuo victurus sit Ernestius noster, ita, per Vos quoque, vestramque illius virtutum aemulationem, nobis quodammodo restitutus, nunc, olim, videri queat. P. P. Dom. **XXII.** p. Trinit. A. C. **clolcccLXXXI.**



MAG 2017207



